







**R. P. DANIELIS STADLER**

SOCIETATIS JESU,  
SERENISS. SAC. ROM. IMP. PRINCIPIS ELECTORIS,  
BAVARIÆ DUCIS &c. &c.

CONFESSARI

TRACTATUS

DE

**DUELLO**

**HONORIS VINDICE**

AD THEOLOGIÆ, ET JURIS PRINCIPIA  
EXAMINATO.



*CUM FACULTATE SUPERIORUM, & PRIVILEGIO CÆSAREO.*

INGOLSTADII, & AUGUSTÆ VINDELICORUM

Sumptibus Joannis Francisci Xaverii Crätz, Bibliopolæ Academici,  
Et Thomæ Summer, Bibliopolæ Augustani.

**ANNO M. DCC. LL**

CONFERENTIA  
FACTATIS

THEOLOGIE ET JURIS PRINCIPIA  
TRADITIO.



Amstelredamum, 1684.

SERENISSIMO,  
POTENT<sup>AC</sup>ISSIMO  
PRINCIPI,  
DOMINO, DOMINO  
MAXIMILIANO  
JOSEPHO,  
Utriusque Bavariae, & Superioris Palatinatus  
DUCI,  
COMITI PALATINO RHENI,  
SAC. ROM. IMP.  
ARCHIDAPIFERO,  
ELECTOR<sup>ET</sup>I,  
LANDGRAVIO  
LEUCHTENBERGENSI,  
&c. &c.

POTENTISSIMO  
PRINCIPI

OMINO, DOMINO

AMILIANO

IOSEPHO

omino Bavaria, & Superioris Palatinatus

DUCI

COMIT. SALVATINO RENT.

AVC. ROM. INS.

ARCHIDIAcono


ELECTORI

AVC. ROM. INS.

LEUCHT

82

SERENISSIME  
PRINCEPS,  
POTENTISSIME  
ELECTOR,  
DOMINE  
CLEMENTISSIME!

 Permitte, ut Serenissimo Tuo Nomini  
inscribam opus à me elaboratum horis,  
vacuis à curis aliis, quarum præcipua mihi  
semper fuit, intra sphaeram muneris, à Te  
mihi clementissime injuncti, sollicitè pro Tua salute co-  
gitare ad Numinis Gloriam & Felicitatem Patriæ. Ma-  
teriam

teriam liber eam tractat, ad quam Tu, exemplum secutus Sapientissimorum Principum, Tuam quoque contulisti symbolam, dum non ita pridem inter sexcentas curas alias duellorum licentiam accuratioribus mandatis interdixisti.

Scilicet scrutaris vasti Regiminis capita singula, verfas Te in omnem partem, ordinas, prospicis, nihilque omittis, quo Reipublicæ navem, ex superiorum temporum calamitatibus male quassatam, repares, frustra Te hinc avocante voluptatum choro: illinc incassum obnitante legione difficultatum; has enim non times: illas non audis.

Ad grande hoc opus, cui Te destinavit Cœli Providentia, paravit Te liberalis natura, dum iis Te dotibus instruxit, quæ non unius populi, sed generis humani felicitati sufficerent. Ingenii Tui vis atque facultas jam ab ineunte ætate se prodidit: tum verò Francofurti immortalem Tibi in conspectu totius Romani Imperii laudem peperit, ubi bis in arenam descendisti ex Philosophia, ac Matthesi pugil admirabilis, qui plus veluti per ludum didicisti, quàm felicia etiam ingenia pertinaci studio addicerent. Quibus initiis præparatus non minore felicitate excepisti juris naturæ, ac Romani Imperii placita.

Præterquam quòd intellectum ejusmodi scientiis ornares, præcipuum Tibi ac jucundissimum studium erat



erat voluntatem doctrina Ethica excolere, & hac duce quàm profundissimè in cognitionem humanorum cordium descendere. Theoreticæ doctrinæ Ethices addidisti libros Regum Judæ & Israël, quorum explicationi attendisti plurimā cum meditatione, præquam aliis quibuscunque disciplinis.

Memoriam Tuam quod attinet, est ea omnium historiarum compendium, & rerum sub Te actarum fidele tabularium. Judicium adeò limatum & solidum es nactus, ut non nisi probè meditata ad Te afferre audeant, qui sapiunt: adeò ab omni præcipitatione remotum, ut ad passus singulos cautè attendas, nec induci in errorem unquam posses, nisi nunquam induci conditionem humanam superaret. Accedit secreti cura tenacissima, qualem inter viros, etiam ætate provectos, raro invenire est: neque ulla re faciliùs offendi posses, nisi proditione secreti. De reliquo totus animus Tuus ab omni turbulento affectu vacuus est. Ira est tranquilla, amor castus, moderatum gaudium, mœror heroe dignus. Non es effusus in luxum, non prodigus in lufum, non pronus in vindictam, non credulus ad malum. Nil dare es solitus præconceptis opinionibus, nil delationibus invidorum, nil vanæ loquacitati, omnium minimè adulationi: mens tota sana est. Nec meus hic tantum, sed omnium, quotquot te nōrunt æqui virtutum

tum æstimatores, unanimis sensus est, gratulantium terris Boicis Principem, omni carentem vitio, & id solum desiderantium, ut diu Te serves Tibi, Tuisque.

Huic menti corpus natura aptavit vegetum, nullo unquam tentatum morbo, ad quasque exercitationes agillimum, factum ad artes omnes, & tam amœnam frontis, orisque majestatem spirans, ut, quoties finis promicare hoc jubar, toties intuentium, vel Tibi loquentium animi miro capiantur illicio. Dresda testis est, testis Praga, testes Legati, quotquot Te accedunt, testes Serenissimi atque Eminentissimi Patruī, testis ipse hodiernus Augustissimus cum sua Augustissima ab eo tempore, quo in Straubingano colloquio à Tua se comitate captos prædicant,

Ita à natura Te comparatum jussit inopinato manus gubernaculo admoveere mors heu! præmatura nimis Augustissimi Parentis. O quàm optâsses Tu hujus sub ductu per nonnullos adhuc annos usū excolere fecundum naturæ fundum. At vel invitus debebas in Te molem suscipere Imperii sane difficilimi, eo rerum articulo, quo bello arduo implicatus fœderatos videbas recedere, copias proprias succumbere, Patriam gemere, Tibique fatalem necessitatem imponi vice jam tertia deferendi Bavariam.

Itaque

Itaque, quod mox ab Augusti Genitoris obitu cœpisti moliri, Patriæ amore ductus, bello finem fecisti: perditas terras, & ad terras reditum mercatus es pace, qua opulentiorē post tot clades, & in ipso exilio, quin interclusâ post superatum ab hoste Lycum à tergo ulteriore fugâ, obtineri vix posse, vocatis etiam in consilium superiorum temporum historiis, judicabas.

Quod Serenitatis Tuæ judicium dum, ut par est, demisere veneror, certissimum esse assevero, à primo in Patriam reditu primum Tibi votum fuisse genti Tuæ exhaustæ quietem indulgere. Et indulgisses etiam, si multiplex necessitas, & innumeri supplices quietem indulgissent Tibi. Vota Tua differri dolebas immanibus belli malis, quæ profectò sola subscriptione pacis non poterant abstergi; neque enim cessantibus in diluvio nimbis mox prima dies siccitatem agris attulit: nec brumali frigore concretæ arbores primo post solutam nivem sole fructus pariunt: etiam ægroto corpori, è mortis faucibus recēter erepto, tempore opus est, donec vires recuperet. •Emortuæ Imperialis Dignitatis moles tota tibi simul incumbēbat: vix non opprimebat Te militum, Ducum, Legatorum, Advenarum, Creditorum, Clientum, famulantūm relictus cumulus, & onerosa appendix, quos nequē omnes retinere poteras, nec dimittere, nisi ingenti vi pecuniæ, quæ debebatur,

tur, numerata. *Ærarium* erat exhaustum, gaza *Tua* ut plurimum oppignorata, *æs alienum* velut tumentes super *Te* fluctus assurgebat. *Regionem* habebas magna ex parte depopulatam, unde quaque emunctam, onera domestica multiplicia, sumptuosa : ad hæc gregem integrum eorum, quos aliud quam honestatis meritum subfelliis admoberat. Ut nil dicam de calumniandi, ac carpendi licentia, de figmentis ac mendaciis quotidie sparsis in vulgus credulum, de pessimo exemplo, quod hac in re præbebant illi, à quibus omnium minimè expectari debebat.

Pudet ultra detegere, quæ tunc temporis *Patriam* depascebant, ulcera. Satis sit dicere, adeò difficilia fuisse regiminis hujus initia, quæis difficiliora non facile *Principum* quispiam expertus sit.

Quo tamen *Tu*, *Serenissime Princeps*, nequaquam territus, confusus brachio præpotentis *DEI*, gubernaculo strenuè admovisti manus : uti cœpisti grandibus illis donis, quibus provida *Te* natura instruxerat, consultationibus omnibus adesse præsens, evolvere varia, plurima, & quo plus evolvebas, eo plus detegebas rerum *Tuarum* morbos, videbasque difficultates nostri difficultatibus, obstacula obstaculis.

Viri

♂ Viri probi, qui Te intimius noverant, in animo equidem Tuo latere sciebant ingentem virtutum thesaurum: metuebant tamen, ne Tu territus difficultatum horrida mole, aut fatigatus contrariis studiis tandem animum desponderes, & in ea ætate, abjectis curis adeo seriis, molestisque, regimen aliis relinqueres, Tæque liberiori auræ. Neque deerant mali, quibus id placuisset. Certè Divinæ bonitatis, Te roborantis prodigium est, quod infractus non solum à labore non destiteris, sed majore indies ardore continues.

Sensim initio progressus es, ac pacatè; quia pro genio Tuo, ac prudentia malebas flectere, quàm frangere. A temetipso voluisti incipere, ut queri nemo posset, & mox tibi tollere ardere venationem pretiosam, unaque voluptatem, quam exinde poteras percipere. Spectaculi quidem genus unum, idque optimum servasti ad aulæ decorem: ita tamen, ut non ex ære publico, sed ex Tuo privato sustineas. Idem de Tuo vestitu ordinasti, in quo quidem omnem adeo luxum refugis, ut, exemplo Tuo in omnium oculos incurrente, ægrè jam non ferre debeat populus, quod ei auri, argentique in vestibus usum interdixeris.

Tum id maximè attendebas, ut debita ad te translata sensim solveres: neque Tu contraheres nova. Illis in annos singulos medium millionem Imperialium (non leyem hercle summam) assignasti, ex qua Tibi nihil remanet, quàm invidiosa molestia colligendi. Neque tamen per tantam summam, expendendam in debita, impeditum est, quo minùs staurarum, ut vocamus, onus

seu tributum saltem aliquantum quotannis attenuēs, & illud vino, atque Nicotianæ impositum vectigal non parum imminueris, plura in hoc genere promptissimè factururus, quamprimum per tempus licuerit.

Nē de novo æs alienum (quo Tibi nil magis exosum est) contrahere debeas, œconomiam aulae Tuae in meliorem ordinem redegeisti. Neminem equidem tuorum, quamvis non paucis carere posses, suo loco movisti, id quod alibi gentium sine scrupulo factitatum vidimus: sed pro innata Tua clementia alia usus es dexteritate, quarumvis minutiarum ipsemet repetito labore sedulus examinador, qua tantum rebus Tuis, restituto meliore ordine, attulisti commodum, ut locata opera abundè fuerit compensata.

His, similibusque studiis eò res Tuas provexisti, ut Tuorum cuilibet stato tempore jam à pluribus annis constitutum salarium numeretur ea accurazione, cui similem se vidisse unquam nemo meminit, quamque sistere, vel abrumpere nec palatii incendium potuit, nec nuptiarum magnificentia. Et quid pluris exigere queant quidam importuni gnathones, nunquam saturi, eorumque Patroni malè consulti? num eousque profusum velint Principem, ut plus expendat, quàm annui proventus ferant? sanè qui hoc desiderat, bonus ille per me homo sit: at malus est Civis: imo hostis est Patriæ, quam ulterioribus debitis mergi profundius dolet parum, modò ipse, & sui habeant multum.

Quid de administratione justitiæ dicam, quæ, si primas Principum curas meretur, Te totum sibi vendicasse

esse dicenda est? Toto animo gestiebas labantem erigere, & mox dotare uberius, ne egens ipsa Jus, fâsque venderet. Mirabantur nonnulli hoc Tuum consilium; eum antehac ærarium non suffecisset doti minori accurate persolvendæ. Sed nihil hoc Tu permotus, quod justitiæ ministris ex veteri stipendio adhuc erat debitum, numerâsti, novumque addidisti, dicens, Principes à populo constitui, & tributa capere, ut administrent justitiam incorruptam: huic ergo primas expensas esse faciendas, & sufficientes: tum primum videndum, quantum rebus aliis residuum maneat. Doti addidisti meliorem juris dicendi formam; ne texerentur in foro litium ambages immensæ, vias, per quas suum quisque quærat, breviores fecisti, aliâque adhibuisti studia, protectò saluberrima: quæ inter & illud est, quod quovis trimestri Catalogum accurate inspicias, in quo legas trimestres judicum singulorum labores, causas necdum decidas habeas in numero, &, quid emendandum, quive stimuli adhibendi sint, expeditè intelligas. Præterea in senatum non adlegis nisi viros, quorum Tibi scientia & probitas maximè est commendata: hæ solæ portæ sunt, per quas apud Te ingressus patet ad tribunalia. Unde spem concipimus, fore, ut Boica Themis cum tempore integerrimum suum splendorem recuperet. Illi quoque justitiæ, quæ criminibus pœnas decernit, curas Tuas adjecisti, itaque conscripto doctissimo codice mox innovabitur, ut rei minore carceris tædio, & minore Tuo sumptu celerius, quod meriti sunt, consequantur.

Neque ita soli justitiæ Te impendisti, ut scientias vel commercia negligeres. Ædificium Academiæ Ingolstadiensis, vetere squalore absterfo, restaurasti cum ornatu. Adjecisti Cathedram Juris naturæ, publici Imperialis, ac Patrii. Ut nil dicam hîc de æstimatione, amore, imò honore, quo literatos prosequeris, dum jam in Baronum adlegis numerum, jam, dum aliud non potes, magna eisdem voluptate colloqueris.

Commerciis ut facilitatem afferas, cœpisti instaurare vias publicas. Curas, ut domi fabricent nostrorum manus, quod ab exteris emunt cum ingenti pecuniarum detrimento. Ut genium nationis nostræ ad ejusmodi opera, & fabricandi industriam inflecteres, linum & lanam præbuisi, quæis telam texerent, tingerentque, ejus hodie usus est frequentissimus. Socium Te, non Dominum junxisti iis, qui eidem operi se, suasque opes addixere. Lentè res processit: cùm tamen Tu nequidquam defatigabaris, maturitati proximum est opus, quod Bavaros Tuos doceat, eos pro diversis artificiis eadem pollere dexteritate, quam carò hæctenus exteris persolverunt.

Atque inde ulteriora repagula paras mendicanti publicæ, feliciter à Te proscriptæ, & ne redeat unquam, laboribus occupandæ. Forum & compita antehac obsederant mendicabula, quorum magis importuna magis dignis eleemosynam præripiebant. Purgasti hac facie vias & foras: verè egentibus domi suæ succurritur satis liberaliter, & eò magis minuetur egentium numerus, quo magis per Te florebunt artificia manuum. Sic nihil



nil intentatum relinquis, quo boni Principis officia implere, ac prodesse Tuis valeas, evolvis omnia; excutis minima, vel legis ipse: vel Tibi prælegi, aut referri audis.

Ne verò quid temere videaris agere, consilio uteris, & omnia ferme per consultationes conficis. Nunquam tractasti gravia nisi cum gravibus, & cum seriis seriâ. His consultationibus dum assides, (assides autem omnibus) admirabili facilitate penetras universa, &, siquidem rite exposita sint, æquitate inviolata decidis. Si res ejusmodi sit, quæ liberio rem suffragantium vocem postulet, separatim ministros audis, & viros probatos: vel etiam scripto Tibi soli suam sententiam ut exponant, petis. Ex his nullus est, in quo Tu non noveris intimos animi recessus, etsi sæpe dissimules. Quin etiam illos singulos ferme distinctè nosti, qui per provinciam totam dispersi vel jus dicunt, vel alio eminentiore loco constituti res Tuas & Patriæ agunt. Fideles, probosque amas quàm tenerrimè, eorum gaudes aliquo, imò honoras. Unde jam fidelitas caput magis & magis erigit, & virorum proborum numerus indies major detegitur.

Atque hæc quidem exteriora sunt, Clementissimè Princeps, quæ videmus, scimus, admiramur; quotquot res Tuas oculo propinquo inspicimus, ac mente limpida. At si cui penetrare altius datum est, & ipsum rimari mentis Tuæ sacrarium, quos ille virtutum thesauros non detegit?

Primo statim loco occurrit Religio, non illa umbratilis, & vacuis pietatis exercitiis contenta: sed vera illa, solidaque, quæ Deo amorem, atque æstimationem suam testatum facit observando mandata. Qua in re adeo admirabilis es Princeps religiosissime, ut ab unguiculis exitium peccati horrorem, & purissimam mentis integritatem in hunc usque diem servaveris, in flore ætatis, vigore sanguinis, malorum insidiis, aulæ illecebris. Eadem Religio Sanctæ Matri Ecclesiæ tam arctè Te devinxit, ut non solum hujus præcepta, quamdiu licet, ad scrupulum usque impleas: sed & inter præcipua incitamenta, cur vires Tuas reparare, atque augere fatagas, illius defensionem habeas. Ordinem Ecclesiasticum universum sicut veneraris, ita eidem eam indulges clementiam, quam grati prædicabunt singuli, si oculos velint non nihil extra Bavariam per orbem reliquum circumferre. Religionem, adeo profundè in animo Tuo plantatam, roboras quotidie, dum diem quemlibet à pia meditatione incipis. Unde nata Tibi est arcana, & creberrima cum Deo communicatio, quæ quousque perducta fuerit, dicere me prohibes: providebo tamen, ut hæc, & his majora posteritas non ignoret.

Quid pro justitia, quæ in Principe individua esse debet Religionis Comes, feceris, supra memini. Fluxere egregia ea facta ab æquitate illa animi Tui, quæ à recto, sibi rite proposito, tam parum deflectit, quam parum sol à sua ecliptica. Sæpius jam, dum de jure tribuendo agebatur, nec sexui Tu, nec generi pepercisti. Multo minus Tu ipse cuiquam mortalium sua jura, vel  
Privi-

Privilegia aufers: sed utilis rite semper utantur, invigilas. Delatoribus faciles nequaquam aures præbes: &, siquidem audire juvat, fidem suspendis, donec intimè, quid subsit, perspexeris: unde difficillimum, imò impossibile est virum probum, ac innocentem Tuâ gratiâ evertere.

Quid de Fortitudine dicam, heroum virtute, & Tua? hæc Tibi inexperto adhuc Palinuro robur addidit, ne navem reipublicæ destitueres in mediis fluctibus, aut à malè quassata curam reparandæ retraheres. Nil vidi unquam Te timere, præterquam offensam Numinis. Hic Deus, qui suos adversis casibus solet exercere, neutiquam mollior Te hætenus habuit, tyrocinium difficile Tibi dedit, ut in magnum Te Principem effingat. Charus propterea DEO sis, necesse est, ut quidem exinde pro sua sapientia collegit ipsa Augustissima Tua Mater, pretiosa superis, atque à Te maximo amore non minùs, quàm honore exæquo culta. Igne etiam probari debebas, quia aurum eras. Certe in illo palatii Tui veteris incendio præ flammis Tua fortitudo illustrius emicuit. Nemo de cæto in te vultum vidit, nemo querulam vocem audivit. Tibi præsentissimus dispensabas imperia, & compluribus providentiâ Tuâ vitam servâsti. Id solum in illa consternatione timebas, id solum, ne, si flamma gravius damnum afferret, corripereque novum palatium, pendere Tuis non posses accuratè stipendia, vel exigere tributum cogereris restaurandis ruinis: hoc solum, velut malorum summum, optabas averti: votis itaque ad cælum conceptis flammam stitisti, ne ultra serperet.

In

In quo horribili rerum articulo quicunque Tuam fortitudinem spectabant, atque animum sibi præsentissimum, tacitis il votis optabant Tibi aliquando summum in præliis imperium. Occasioni certè non esses defuturus, si quando eam Tibi non deesse contingeret; namque belli non minùs (siquidem necessarium sit) quam pacis studia amas. Difficillimam luctam in animo Tuo arbitrati sumus, quando minuere copiarum numerum debuisti, sanum faciliùs dentem evelli Tibi fuisses passus, quàm uni legioni missionem dares: harum tamen tot servâsti, ad caput numerum in pace solitum redactas, quot in media pace neminem Majorum Tuorum aluisse Tibi fuit demonstratum. Alia quoque jam paras opportuna instaurandæ militiæ, adeò Tibi charæ, ut ipse nullam vestem lubentius ac frequentius induas, quàm militarem.

Nec fortitudini, nec alteri virtutum Tuarum, palmam cedit Clementia. Proh quantus in Te agon exoritur, dum alicui deberes ægrè facere! moras trahis, effugla quæris, obluctaris, donec ratio & conscientia id, quod justum est, à Te extorqueant. O quàm gaudes, si quis ex Consiliariis mitiorem sententiam proponit! non inclinas in eam tantum, sed, nisi prudentia validè retineat, ruis. Limites ne excedat ea Clementia, tecum ipso providè reputas, sæpe erga publicum crudelem esse, qui erga privatos nimium bonus est.

Huic Tuæ Clementiæ arcta cognatione jungitur amor ille in subditos, quem alis perfectissimum. Non mihi hûc sermo est de amore quodam spurio, qui extrema  
oris

oris gratia, & sermonis melle totus absolvitur, fucumque facit: sed de illo, qui vera subditorum commoda quaerit, seque subditis, non subditos sibi natos esse credit, ac opere demonstrat. Talis Tuus est amor. O utinam rimari cor Tuum possent omnes, & scripta in eo tenerrima sensa legere. O quam beatum tum deum te crederes, si semper dare posses, nunquam accipere: quod cum nequeas, id saltem curas, ut, quae accipere necessitas cogit, utiliter expendas. Id singulare, & rarum, quod inutiliter expensum crederes, quidquid Tibimet superflui impenderes. Unde apud omnes in confesso est, Principem nostrum sibimet ipsi esse parcissimum: totique Patriae solatio cedit, quod, quidquid vel ipsa contribuit, vel etiam ab exteris in subsidium venit, in suum iterum emolumentum convertatur.

Nil mirum ergo, quod Tua Frugalitas celebretur passim, quae nihil quidem magnificentiae, qualis aulam Boicam decet, deesse patitur: caeterum omnium iudicio tanta est, ut, si omnes aequè Tibi fideles & conomus haberes, ac Tu Tibimet ipsi es, in ditissimum evasurus esses Principem. Sed spera, propitius Polus dabit, ut, postquam facta est pax in virtute Tua, etiam fiat abundantia in turribus Tuis. Tunc licebit duris probe exercitato respirare, bonoque frui, tot curis parto.

Interea curas Tuas, id quod boni omnes rogamus, perge adhibere reipublicae Navi. Potissima difficultas superata est: quod residuum est, sponte sua fluet, modo ceptis egregie insistatur.

*Fac repares, dabitur reparanti plurima Proles:*

*Haëtenus una fuit; nam Pater es Patria.*

*Illius Patriæ, quam ceu prolem diligis.*

Vela jam contraho. Quæ hîc dixi, veritatis studio dixi, & ad posteritatis notitiam. Non apologiam ut darem, qua contra manipulum subditorum non egent magni Principes, prudentiorum æstimatione, & affectu contenti. Nil assentationi dedi, à qua me, æquissime Princeps, adèò scis esse remotum, quantum ego Te veritatis patientem novi. Atque ut inde finiatur mea Oratio, unde exordium duxit, patere, Clementissime Domine, ut hoc meum qualecunque opus, & unà me totum Tibi consecrem.

## SERENITATIS TUÆ

*Servorum infimus*

DANIEL STADLER,  
Soc. JESU.

## AD LECTOREM.

**P**Ræsente libro materiam tibi, benevole Lector, propino unicam; de variis quippe scribere quàm facile id est, tam parum est utile reipublicæ literariæ hac ætate, ubi sexcentos libros reperies, qui sexcentas materias tractent, quamvis ad unum forte titulum revocatas: pluribus autem intentus minor est ad singula sicut sensus, ita & intellectus. Eam de duello, se mihi forte offerentem, selegi; tum quia occasio mihi fuit usu quidquam ea in re experiendi: tum quia elucidanda plurima superesse adverti, quorum in libris, hæcenus editis, vix vestigium. Patebit hoc ex *cap. 9.* ubi Magistratibus scripsit præcipue ex *§ 10.* ubi tres Conditiones ventilavi, requisitas ad duellum aliquando licitum. Collegi etiam ex multis Principum edictis modos omnes, quibus prætenfa duellorum necessitas tolli queat, Canonum, ac Theologiæ Doctoribus non satis notos *c. 2.* Ipsa edicta, in compendium redacta, leges *c. 9.*

Methodo ea usus sum, ut præmissis, atque explicatis necessariis de duello Notionibus *c. 1.* demonstrarem, quantum contenta in eo pravitas à recta ratione deflectat *c. 2.* tum discuterem, an in statu naturali licitus aliquando sit duelli usus ad defendendum honorem *c. 3.* vel periclitantes cum honore fortunas *c. 4.* A statu naturali progressus sum ad statum civitatis male ordinatæ, in quo scilicet provocatus, aut in honore læsus nihil præsidii apud Magistratus invenit *c. 5.* addendo examen trium conditionum, requisitarum ad duellum aliquando licitum *c. 6.* Dein primùm ad statum civitatis bene ordinatæ conversus duellum consideravi ut prohibitum lege Divina *c. 7.* Ecclesiastica *c. 8.* & civili *c. 9.* Demum post duellum noxium etiam de eo, quod aliqua ratione innoxium dici potest declaravi, quæ scitu digna, aut necessaria credidit *c. 10.*

Hunc ordinem scribendi meo non tantùm genio, sed etiam materiæ quadrare judicabam, ideoque mihi eligendum.

Styli puritatem servare studui, quamdiu licuit, ac meis verbis sum locutus. Inmixtis passim factis seu casibus, tum vetistum fictis, lucem, & amœnitatem theoriæ quæsi conciliare: neutiquam autem theoriam per casus tradere. De cætero securè me pro conscientia scripsisse existimo; si enim aliquando benignior fui, & licentiam duelli asserui arcta necessitate pressis, aliunde huic malo veram medelam quæsi, neutiquam molliter inculcando Magistratibus, quid agere possint, & debeant.

Boni itaque hunc meum conatum consulas, rogo, amice Lector! cùmque nec ego materiam me exhaustisse imprudens credam, amplum saltem cogitandi campum me aperuisse existimo illis, qui post me de duello volent scribere. Vale.

FACULTAS  
R. P. PROVINCIALIS.  
CUM  
PRIVILEGIO CÆSAREO



Um D. Franciscus Grätz, Bibliopola Ingolstadiensis, typis vulgare desideret librum, cui Titulus: DUELLUM HONORIS VINDEX, &c. à P. Daniele Stadler, Societatis JESU Sacerdote, compositum, & à deputatis ejusdem Societatis Patribus lectum, approbatumque, ego Rudolphus Burckhart, Societatis ejusdem per Superiorem Germaniam Præpositus Provincialis, potestate ad id mihi facta ab A. R. P. Nostro Francisco Retz, universæ Societatis Præposito Generali, eidem ad hanc primam Editionem Facultatem impertio, simulque communico Privilegium Cæsareum, quo aliis Bibliopolis, atque Typographis interdictum est, ne dictum librum citra consensum superiorum recudere, aut intra fines S. R. I., & hæreditarias S. C. Majestatis Provincias inferre præsumant. In cujus rei fidem has ei manu propria subscriptas, & consueto officii mei sigillo munitas dedi. Monachii 24. Octobr. 1650.

(L.S.)

RUDOLPHUS PURCKHART.



# CONSPECTUS OPERIS

## CAPUT PRIMUM.

### De Natura, & Varietate Duellorum. Pag. 1

Articul. I. Quid, & quotuplex sit Duellum.	1
§. I. Etymologia, & Definitio Duelli.	2
§. II. Unde potissimum Duellum à rixa extemporanea discernatur in foro Ecclesiastico.	4
§. III. Unde in foro Civili.	7
§. IV. Quotuplex sit Duellum.	12
Articul. II. De personis ad Duellum concurrentibus.	14
§. I. De Provocante, & Provocato.	14
§. II. De Patrini.	21
§. III. De Internuncio, & adjutoribus ceteris.	26
§. IV. De Judice, & Procuratore in solemnibus Duello.	27
Articul. III. De causis, ob quas olim commissa Duella sunt.	28
§. I. De Duello extrajudiciali.	28
§. II. De Duello judiciali.	37
Articul. IV. Quid hodie circa Duellum usus ferat.	44
§. I. Quid sit honor, & quibus modis violetur.	45
§. II. Quid circa modum vindicandi honorem hodie moris sit.	48

## CAPUT II.

### De pravitate hodierni Duelli. 51

Articul. I. Duellum nullo modo est necessarium.	52
§. I. Audietur Monomachus sua se necessitate excusans.	53
§. II. Consilia Doctorum pro evitanda necessitate provocandi.	55
§. III.	

	<i>§. III. Confilia Doctorum pro evicanda necessitate comparandi.</i>	Pag. 59
	<i>§. IV. Studia Principum pro elidenda necessitate provocandi.</i>	65
	<i>§. V. Studia Principum pro elidenda necessitate comparandi.</i>	70
Articul. II.	Duellum est ineptum ad tuendum honorem.	74
	<i>§. I. Duello probum non tollitur.</i>	75
	<i>§. II. Duello probum augetur.</i>	78
Articul. III.	Duellum non est argumentum veræ fortitudinis.	80
	<i>§. I. Hoc testantur sapientes.</i>	80
	<i>§. II. Hoc fulcis experientia.</i>	84
	<i>§. III. Hoc demonstrat ratio.</i>	86
	<i>§. IV. Hoc confirmant oracula Principum.</i>	87
Articul. IV.	Duellum est crudele.	90
	<i>§. I. Imperantur difficillima.</i>	90
	<i>§. II. Imperantur iniquissima.</i>	92
	<i>§. III. Firvola saps de causa.</i>	93
Articul. V.	Duellum est injuriosum Magistratibus.	96
	<i>§. I. Magistratus conqueruntur de injuria.</i>	96
	<i>§. II. Et merito.</i>	97
Articul. VI.	Duellum est noxium reipublicæ.	100
	<i>§. I. Afferit reipublica grandia damna.</i>	100
	<i>§. II. Utilitatis nihil.</i>	103
Articul. VII.	Duellum olim erat ignotum moratis Gentibus.	106
	<i>§. I. Morata olim gentes vel nulla habuerunt duella:</i>	106
	<i>§. II. Vel qua habuerunt, hodiernis non pastocinantur.</i>	109
Artic. VIII.	Duellum Christianæ legi est summè contrarium.	111
	<i>§. I. Afferuntur argumenta.</i>	111
	<i>§. II. Refelluntur excusationes.</i>	114

## CAPUT III.

### An Duellum licitum esse possit in statu naturali ad vindicandum honorem.

117

Articul. I. Declaratur status naturalis. 118

§. I. Ratio, cur Duellum primò ad statum naturalem reducatur. 118

§. II. Idea status naturalis. 119

§. III. Quibus legibus regatur status naturalis. 121

§. IV. Que jura competant homini in statu naturali. 122

Articul. II. Explicatur jus belli privati pro statu naturali. 126

§. I. Quousque se extendat hoc jus. 126

§. II. Et ad quam bona. 128

Artic. III. An ex hoc jure belli privati duello tueri honorem liceat  
CONTRA VERBERA. 132

§. I. Status questionis accuratè explicatur. 133

§. II. Agitur de verberibus primò dandis. 135

§. III. De verberibus jam datis. 144

Artic. IV. An in statu naturali honorem tueri duello liceat contra  
CALUMNIAS. 161

§. I. Reprobatur cruenta defensio. 162

§. II. Suggestitur defensionis modus mitior. 165

§. III. Solvuntur argumenta contraria. 167

Articul. V. An in statu naturali honorem tueri liceat duello con-  
tra CONVICIA. 172

§. I. Sententia Authorum circa vindicationem convictorum. 172

§. II. Nostra sententia. 174

Articul. IV. An ad evitandum DEDECUS, quod ex recusato duello  
oritur, subire duellum liceat. 177

§. unicus. Statuitur sententia negans. 177

CAPUT

## CAPUT IV.

An Duellum in statu naturali licitum sit ad  
vindican<sup>das</sup> cum honore fortunas 181

Articul. I. An ad servandas cum honore fortunas liceat duellum  
acceptare. 181

§. I. Statuitur casus, & probatur licentia. 182

§. II. Respondetur ad argumenta contraria. 186

Articul. II. An ad servandas cum honore fortunas liceat etiam  
provocare. 195

§. unicuique. Affirmatur licentia. 195

## CAPUT V.

An asserta pro statu naturali licentia applicari  
etiam possit statui civitatis male ordinatæ 198

Articul. I. Statuitur sententia affirmans. 198

§. Explicatur status questionis. 199

§. II. Argumenta pro sententia affirmante licentiam. 204

§. III. Responsa ad argumenta contraria. 209

Articul. II. Sententia nostra asseritur tuta in praxi. 214

§. I. Quia est probabilior quàm adversa. 214

§. II. Et quidem non speculative solum, sed etiam practice. 216

§. III. Neque contraria debet eligi, eoquod magis sit tuta. 218

§. IV. Neque tamen aliquando datur obligatio sequendi nostram. 224

## CAPUT VI.

Enucleantur tres conditiones, sub quibus  
duellum licitum diximus. 227

Articul. I. Enucleatur prima conditio, id est, iniqua læsio. 228

§. I.

§. I. An ad licitam PROVOCATIONEM sufficiat injuria materialis, seu facta sine malevolò animo.	228
§. II. An sufficiat lesio non satis consideratè facta.	230
§. III. An facta per exprobrationem Criminis veri.	239
§. IV. An sufficiat lesio, quam mihi accrevi per illatam alteri lesionem.	244
§. V. An licitum sit COMPARERE ad Duellum, dum quis ab eo provocatur, quem consideratè lesit: vel quonam alio modo debeat ei satisfieri?	248
§. VI. Et quid si tantum lesit semi-deliberatè, vel exprobrando crimen verum.	254
§. VII. An aliquando provocatus comparere possit ex charitate erga provocantem.	255
§. VIII. An Duellum suscipi possit etiam ab eo, qui non est lesus: vel contra eum, qui non lesit: id est, à vicario, vel contra vicarium.	258

Articul. II. Enucleatur secunda conditio, id est, damnum grave. 260

§. I An damnum, non auferens sustentationem necessariam, sufficit.	261
§. II. An excludi casu nobilium non aequivaleat jactura sustentationis necessaria.	270

Articul. III. Enucleatur tertia conditio, id est, Justitia aperte negata. 274

§. I. An debeat adiri Jux, qui prasciatur denegaturus justitiam.	275
§. II. An non aliquando uti quis possit licentiâ presumpâ sui Prin ipis.	277

## CAPUT VII.

### Quomodo in statu civitatis bene ordinatæ Duella prohibeantur: & quidem lege Divina.

Articul. I. Declaratur Lex Divina Duellum prohibens.	281
--	-----

§. I. <i>Lex Divina Naturalis.</i>	182
§. II. <i>Lex Divina positiva.</i>	184
Articul. II. <i>Declaratur respondens transgressioni Legis Divinæ Pœna, &amp; Obligatio.</i>	288
§. I. <i>Declaratur Pœna.</i>	289
§. II. <i>Declaratur obligatio reparandi damna.</i>	291

## CAPUT VIII.

### Quomodo Duellum prohibeatur lege Ecclesiastica.

Articul. I. <i>Declarantur Leges Ecclesiasticæ.</i>	301
§. I. <i>Reconsentur Decreta, &amp; Constitutiones.</i>	301
§. <i>Explicatur, quæ actiones in his legibus prohibeantur.</i>	310
§. III. <i>Et quanam persona iisdem comprehendantur.</i>	312
Articul. II. <i>Declarantur Pœnæ Ecclesiasticæ.</i>	318
§. I. <i>De Pœna Excommunicationis, ejusque laudabili usu.</i>	319
§. II. <i>De Pœna aliter afficiente actiones primarias, aliter secundarias: Retractatas, &amp; non retractatas.</i>	322
§. III. <i>De privatione sepultura sacra.</i>	325
§. IV. <i>De Pœnis Clericorum.</i>	328
§. V. <i>De Pœnis in Germania non receptis.</i>	332
§. VI. <i>De ignorantia, excusante ab his Pœnis.</i>	334
§. VII. <i>De Absolutione à censuris, latis in Duellum.</i>	334
Articul. III. <i>De impedimento, quod usui Sacramentorum afferre Duellum possit.</i>	345
§. I. <i>Quomodo ex Duello oriri possit impedimentum Matrimonii: vel dissolvi sponsalia.</i>	346
§. II. <i>An in penitentiæ Sacramento Confessario constare semper debeat, quo animo sit penitens in Duellum.</i>	352

## CAPUT IX.

### Quomodo lege civili Duellum prohibeatur. 360

#### Articul. I. Quæ sit obligatio Magistratum ad coercenda duella. 360

- §. I. *Magistratus tenentur ex officio Duella vel impedire, vel punire.* 361  
 §. II. *Possunt abolere frequentiam duellorum, modò velint seriò.* 366  
 §. III. *Modò adhibeant convenientem industriam,* 368  
 §. IV. *Et imitentur Reges Gallia.* 372

#### Articul. II. Quas leges, & pœnas statuerint in duellum varii Magistratus. 376

- §. I. *Qua pœna duello competant de jure communi.* 376  
 §. II. *Quanam de jure particulari juxta Edicta Principum.* 383  
 §. III. *An pœna, his Edictis consentanea, non sint justò graviores: vel omnino inutiles: aut minùs necessaria,* 396  
 §. IV. *Num pœna illa etiam in Crimine male ordinata infligi possint.* 401

#### Articul. III. An unquam Magistratus duellum permittere possint, vel commissio veniam dare. 402

- §. I. *Permissio, si non sit approbatio, potest esse licita.* 403  
 §. II. *Non tamen est necessaria hoc aro: nec utilis, ut demonstrat Card. Richelius.* 408  
 §. III. *Jure aggravandi utendum est causè.* 410

#### Articul. IV. Quas pœnas incurrant negligentes Magistratus. 417

- §. IV. *Explicatio Penarum* 417  
 §. II. *Applicatur Casibus particularibus.* 423

#### Articul. V. An contra pœnas civiles asylo gaudeant rei de duello. 430

- §. I. *Prænotantur necessaria.* 430  
 §. II. *An duello asylum bene neget BARBOSA.* 432

§. III.

§. III. An etiam post Constitutionem BENEDICTI XIII.  
asylum patreat duello lethali.

434

§. IV. Quid singulariter novissime statuerit BENEDI-  
CTUS XIV.

437

§. V. An contra hoc asylum iusta querela locum habeat.

439

## CAPUT X.

### De Duello innoxio.

444

Articul. I. Explicatur Duellum triplici modo innoxium.

§. I. Innoxium ex restricto modo pugnandi.

444

§. II. Innoxium ex fictione.

447

§. III. Innoxium ex abruptione.

454

Articul. II. Explicatur aliud duellum, quod Scientia Equestris Ita-  
lica pro innoxio venditavit.

457

§. I. Principia, & ortus hujus scientia


457

§. II. Damnantur à Marchione MAFFEJO.

459

§. III. Frustra dealbantur à Comite BELLINCINI.

460



CAPUT





# CAPUT I.

## DE NATURA ET VARIETATE DUELLORUM.



Quamvis pro scopo illud tantum Duellum mihi præfixerim explanare, quod pro vindicando contra contumelias honore juxta Pseudo - legem ævi hodierni suscipi solet: præmittenda tamen sunt ea, quæ Duella universæ attinent; ab universalibus quippe, ut Scholæ volunt, ad particularia descendendum. Unde hujus Capituli *Articulo I.* examinabitur, quid & quotuplex sit Duellum. *Articulus II.* ager de Personis ad Duellum concurrentibus. *Articulus III.* de Causis, ob quas olim fuerunt suscepta Duella. *Articulus IV.* dicet, quid hodie circa Duellum usus ferat.

### ARTICULUS I.

*Quid & quotuplex sit Duellum.*

Non satis est hoc loco in genuinam de Duello ideam inquirere §. I. sed cum hoc crimen in Foro tam Ecclesiastico, quam Civili prohibetur, ac puniatur, pro Foro utroque accommodanda idea erit, atque

Duellum à Rixa extemporanea discernendum §. II. & §. III. Demum §. IV. quæretur, quoruplex Duellum sit.

## §. I.

## Etymologia &amp; Definitiones variaz Duelli.

- |   |   |
|---|---|
| 1. Etymologia vocis hujus Duellum.          | 3. Traditur, sed cum evitari non possint litigia, |
| 2. Meritò ejus Definitio accurata quaritur. | 4. Ipsius solidius fundamentum inquiritur.        |

1. **O**Mnis, quæ à ratione suscipitur de aliqua re institutio, debet à definitione proficisci, ut intelligatur, quid sit id, de quo disputatur, ait CICERO. (a) Vox itaque *Duellum* idem olim sonabat ac bellum, unde PLAUTUS inter Thebanos ac Teleboas duellum intercessisse dixit. Et HORATIUS cecinit:

*Græcia Barbaria lento collisa duello.*

Quin ut vult GROTIUS (b) ipsum bellum est ex voce veteri *Duellum*, ut *duonus* quod fuerat, factum est *bonus*, & *duis bis*. Hodie usus obtinuit, ut *bellum* significaret certamen non singulare, sed plurium, autoritate publica ob bonum publicum susceptum. Imò non tantum *actionem* aliquam certaminis, sed *statum*, ut docet GROTIUS. (c) *Dyelli* econtra nomine venire solet certamen singulare, ex causa privata susceptum, quod voce græca *Monomachiam* dicunt.

2. Hujus cum accuratam definitionem quærerent Docti, meritò delectum adhibuere cum industria; cum enim gravissimæ pœnæ tum Civiles, tum Ecclesiasticæ in Duella sint latæ, disquirendum non rarè acutè est, an hic vel ille conflictus veri Duelli rationem habuerit. Secernenda scilicet sunt ea, sine quibus Duellum esse non potest, ab aliis, quæ illud comitari plerumque tantum ex usu solent, scilicet *essentialia* ab *accidentalibus*.

3. Itaque Duello hanc definitionem statuamus: *Est pugna singularis ab utraque parte spontè & deliberatè suscepta, ex conditio; designato tempore & loco, ad occisionem, mutilationem aut gravia vulnera inferenda.* (d)

Simil-

(a) De Offic. L. 1. (b) De J. B. P. L. 1. c. 1. n. 2. (c) Ibidem. (d) Bonatina de Censur. Disput. 2. q. 6. p. 2.

Art. I. Quid, & quotuplex sit Duellum? §. I.

3

Simillimam definitionem habet GOBAT, (a) nili quòd omittat voces illas *deliberatè ac sponte*, fortè idèò; quia jam continentur in voce altera *ex condicto*. Sunt, qui longiorem faciunt addendo *ex causis privatis*. Omit- tendum hoc aliis videtur ob Duellum Davidis ex causa publica susceptum; sed negant illi, quòd Davidis pugna *duellum* fuerit; partem publici belli vocant hoc & similia certamina. Magis necessaria censentur illa verba *designato tempore & loco*. Hæc ad definitionis perfectionem pertinere cre- dit TAMBURINUS (b); ne scilicet rixa extemporanea quandoque pro Duello habeatur. Putat tamen SCHIARA (c) illud *ex condicto* jam involvere quan- dam designationem temporis & loci, tacitè saltem, si non expressè. Ne- que verba ultima prorsus superflua esse volent *ad occisionem aut mutilatio- nem, aut gravia vulnera*; ne videlicet malè inter Duella recenscantur pugnae, quales committunt scæminæ, in capillos mutuo involantes, aut viri pugnis ferientes aliisve instrumentis, non factis ad inferenda gravia vulnera.

Quòd si tamen dicas, illa verba comprehendì in voce *pugna*, quam utique non qualemcumque intelligas, sed *cruentam*, non erit, cur tecum ultra contendam de vocabulo.

4. Ut breves simus in hac logomachia, ad Duellum verè dictum requiri videtur, ut sit pugna singularis duorum vel etiam plurium, ex utraque parte stantium, suscepta sponte, deliberatè, ex condicto, designato loco & tempore, ad occisionem, mutilationem, aut gravia vulnera inferenda.

An verò hæc vocabula singula ad integritatem Definitionis necessaria sint: item an non jam unum contineatur in altero, pluribus disputare operæ pretium non est. Utilius erit exponere, ad quid præcipuè attendi soleat tum in foro Ecclesiastico, tum in Civili, ubi de conflictu quodam statuendum venit, an verè Duellum fuerit, vel extemporanea tantum rixa, cui per varia edicta Principum (d) mitior statuta est pœna quàm conflictui, post maturam satis deliberationem suscepto. Normam dare juvat, ad quam utriusque fori Iudices exigere iudicium suum consueverint; quamvis fatear, non ita propriam esse uni foro suam normam, ut hæc non etiam ab altero vocari in subsidium utiliter possit.

A 2

§. II.

(a) Experim. The. Tract. 7. n. 172. (b) Dec. L. 6. c. 1. §. 3. (c) Thl. Bell. L. 1. Diff. 21. n. 2. (d) Vid. Colonienfè novissimum.

## §. II.

Unde potissimum duellum à rixa extemporanea discernatur  
in foro Ecclesiastico.

5. *Fori hujus norma sunt duae constitutiones Pontificiae,* 7. 8. 9. 10. 11. *Decisionem suggerunt pro variis casibus.*  
6. *Quae facile inter se conciliantur, &*

5. **F**orum Ecclesiasticum normam, sive regulam suam depromit ex Constitutionibus Summorum Pontificum, qui dum sacra fulmina torserunt in Duella, simul declarare non omiserunt, quas pugnas *Duelli* nomine accipiant, praenique feriant.

GREGORIUS XIII. (a) eos pugiles Duelli reos statuit, qui *ex condicto, statuto tempore, & in loco convento* monomachiam commiserint. CLEMENS VIII., cujus Constitutio (b) jus in hac materia novissimum facit, nominat Duellum ineuntes *ex composito. Statutum autem tempus, & locum conventum* hic Pontifex non exprimit. Unde

6. Dubium quiri primum est, an geminum hoc caput, *locus scilicet & tempus statutum* ad Duelli rationem pertineat in foro Ecclesiastico? Audire juvat PEREGRINUM Capuanum, qui prioris saeculi anno duodecimo commentatus est in Bullam Clementis VIII. juxta hunc authorem (c) „*Duellum cruentum sponte & ex condicto factum, nullo statuto tempore & loco, est verum & proprium duellum; eo quod habeat essentialia duelli, nempe ut sit pugna privata, cruenta, sponte ex utraque parte suscepta, & facta data opera.*

Observat tamen alio loco (d), quod nunquam provocatio seu *Diffidatio*, ut vocant, sit absque statuto tempore & loco *expresso* vel *tacito*. Hoc èd quoque sufficere credit, ut quis incurrat poenas, in duella statutas, sive deinde Constitutio Gregoriana per Clementinam, vel Clementina per Gregorianam explicari debeat.

Quod PEREGRINUS docet de loco & tempore *tacite* definito, hoc BONACINA (e) tradit de loco & tempore non *prae* definito, seu *indetermina-*

(a) Constit. *ad tollendum*. an. 1582. (b) *Illius vices*. an. 1592. (c) De Duello. quæst. 15. n. 4. (d) Quæst. 20. n. 2. (e) De Censur. Disput. 2. q. 6. p. a. n. 6.

*minato.* Er bene; stare enim nos æquitas jubet illo effato: *Non tam ad vocum significationem attendendum est, quàm ne fraus legi fiat* (a). Fieret autem fraus legi, si per implicitas dictiones, idem tamen significantes, quod expressæ, subterfugere daretur ferientem Nemefin. Duo itaque requiruntur, tum ut pugna ineatur *ex condito* seu composito, id est, condicente parte utraque: tum ut ineatur *statuto tempore & loco*: & ita quidem, ut saltem tacitè & indeterminatè definiantur tam locus, quàm tempus, id quod ex particula copulante *ET* colligunt SANCHEZ (b), & FLORONUS. (c)

Hoc jacto fundamento deciduntur sequentia:

7. I. Siquis, ferro nudato minax, obvium forrè in platea inimicum pugnare jubeat, duellum non erit; quia inimicus ad sui defensionem adactus, non condixit, adeoque pugna celebrata non fuit *ex condito*. Quod hac propositione demonstrat L. B. de WOLF. (d) “ Si quis vi adoritur al-  
 „ terum, animo ad duellum eum cogendi, aggressor est, & contra eum  
 „ se defendere licet: quando verò quis se defendit, duellum non est, sed  
 „ bellum ex parte defendentis justum. Quod si tamen, subjungit ille; al-  
 „ ter paratus sit ad vim tibi inferendam (non præsentem scilicet, sed stan-  
 „ tem adhuc intra minas) nisi in Duellum consentire malis, & tu metu  
 „ inductus consentis, Duellum utique est.

8. II. Si Cajus adversarium offendens, in platea expectare eum jubeat, donec arma ex domo sua attulerit, Duellum erit, si adversarius præstolaturum se promittat; de loco enim & tempore paciscuntur. Secus si pergat vias suas, & post nihilominus ab insequente Cajo deprehenderetur. Duellum item erit, si quis, præcedentibus offensis irritatus, in inimicum incidens, interroget, an hic finire litem velit? & hic interroganti annuat. (e)

9. III. Si Hector Camillum, quem de se malè locutum comperit, adeat, & calumniam exprobet, admota capulo manû: quo indicet, se obsecrurum arma, si quidem Camillus, mendacii objecti impatiens, vim moliarur: quòd si etiam Camillus arma arripiat; Hector non dicetur Duelli reus, quamvis cum tuerente in arma Camillo pugnare debeat; non enim con-

A 3

di.

(a) *Alciatus* ad L. l. 40. ff. si cert. pet. (b) L. 2. Mor. c. 39. (c) *De Duell.* c. 2. (d) *Jur. Nat.* p. V. §. 1094. (e) *Farinas.* q. 119. n. 24.

dictum est in locum aut tempus (a): quin neque in pugnam; capulo enim manum admovit Hector non nisi promptæ Defensionis causa, si quidem hac opus foret sibi.

10. IV. Si quidem Hector Camillum domi suæ nil opinantem obruat, ad Duellum evocet, & donec annuat, ex ejus conclavi renuat pedem efferre: Camillus autem, molesto hospite se liberaturus, extra domus limen ad plateam descendat, ibique pugnet, dubitatur, num hic Duelli se reum faciat? videtur, quod non; nam quid agat aliud in eo articulo Camillus? ædibus expellere Hectorem nobilem per famulos non decet: timendum foret, ne hic primum quemque, vim afferentem, confoderet. In domo propria pugnare moris non est, neque consultum, quemcunque pugna exitum fortiat. Cum igitur ab importuno hospite aliter se liberare nequeat Camillus, comitari eum ad plateam debet, ita, ut ipse defendentis, Hector aggredientis partes agere sit censendus. At fors alius magis ad rigorem judicabit, Camillum post Hectorem, cui in egressu primas utique dederit, ostium debuisse claudere, & interim per viam aliam monere Principem: quod cum omiserit, jam in arenam ultrò egressum non continuisse se intra defensionis limites veluti contra aggredientem: sed Duellum verè admisisse; præcipuè cum ex condicto (promisit hoc enim in conclavi suo) pugnaverit, & quidem statuto tempore, scilicet dum plenè vestitus fuerit, ac loco, scilicet extra domum in platea. Duellum itaque fuit: an licitum Camillo? hoc colligendum ex alibi dicendis.

11. V. Si quis provocet alterum, ut pugnent, quamprimum extra urbem sibi occurrerint, Duellum erit hæc pugna, ait BONACINA; (b) quia constitutum est tempus, & locus, ille scilicet & illud, quo se obvios habuerint. Sentit contrarium PIGNATELLUS (c) cum FIANA (d); eoquod locus tam vastus, variæ scilicet extra urbem viæ, locus *statutus* & certus dici nequeant; item tempus, quo sibi primo occurrerint, incertum sit & vagum. Idem dicendum his authoribus videtur, si pugna statuatur in tempus, quo sibi occurrerint in urbe.

Certi

(a) *Pignat.* Tom. 9. consult. 88. n. 88. (b) *De Censur. Dispnt.* 2. q. 6. p. 2.  
(c) *Consult.* 88. n. 9. (d) *Part.* 3. tr. 13. *Miscel.* 1. resolut. 59.

Certi ego quidpiam hac in re statuere non ausim; utur enim certa sint principia: certi tamen non sumus de recto eorundem usu; hinc nunquam finis erit dubitandi.

§. III.

Unde potissimum Duellum à rixa extemporanea discernatur in foro civili.

- |   |  |
|---|--|
| 12. Rixa, qua meriti à Duello distinguitur;   | 17. Vocis in continenti non est significatio aequè semper stricta.   |
| 13. Confunditur autem à monomachis;   | 18. Qualis sit in Praesenti materia?   |
| 14. Notas characteristics has duas habet: repentinum æstus, & factum in continenti. | 19. Ex his casus dubii facile deciduntur.  |
| 15. Repentinus æstus consideratur politice,   | 20. Præcipue si insuper attendatur ad varia indicia, à summis principibus suggesta, pro discernenda rixa à duello. |
| 16. Etiam Theologicè.   |  |

12. **D**UM Monomachia alicubi fortè committitur, nil frequentius audire est, quàm eam pugnam Duellum non fuisse, sed rixam duntaxat, subito exortam. Ad hoc advertunt ipsi magistratus ac iudices, quorum officium est pugiles dare custodiæ, ac punire. Unde Jacob. THOMASIVS (a) rectè duellum dividit in *præmeditatum & extemporaneum*. Consiectum præmeditatum duellum dicimus: extemporaneum rixam seu fortuitum occursum (b). At,

13. Quod Docti bene distinguunt, Monomachi malè sæpe confundunt; unde præter alios Principes queritur EBERHARDUS LUDOVICUS, Dux Wirtenbergicus in edicto suo contra duellum edito (c), contingere non raro, ut vero duello nomen & species allinatur ortæ subito rixæ, & occursum fortuiti; haud dubiè, ut statuta pœna evitetur, vel inîmiciorem saltem transeat; *Leviora enim sunt ea, qua repentino aliquo motu accidunt, quàm ea, qua meditata ac preparata inferuntur.* (d) & *inconsultus calor calumnia vitio caret* (e). Itaque in jus vocati pugiles, ut fulmen declinent, repentinò turbine se collisos fuisse affirmant.

14. Ne

(a) Disp. de Duell. Moralit. (b) Rencontre. (c) An. 1714. Lunig. Corp. Jur. milit. (d) Cicero L. 1. Offic. (e) L. 1. §. Quarta. ff. ad SC. Turpil.

14. Ne verò fraudi locus sit, & ut rixa à duello discernatur, vulgò inter viros nobiles ac militares, atque in ipsis etiam Principum edictis nominatim in edicto LEOPOLDI Cæsaris edito an. 1682. rixa dicitur ea pugna, quæ committitur *in repentino animi aestu*, atque *in continenti*. Sæpe enim vix facta offensa est, mox animi commotio oritur, prodit se vultu, aut verbis, profilitur ad vindictam, & *processu* veluti *summario* is absolvitur. Juvat ergo declarare tantisper, quid sit ille *repentinus animi aestus*, aut pugna *in continenti* suscepta.

15. Dum GUSTAVUS SAMUEL LEOPOLDUS Comes Palatinus Rheni Dux Bipontinus (a) Duella, & præcipuè injurias, utpote Duellorum foemites, publico edicto vetaret, primo aestui unius quadrantis horarii, vel duorum ad summum quadrantum spatium attribuit, intra quod si injuriæ reddatur injuria, mitiori poena plecti reum jubet ob concitati animi aestum. Ita ille pro foro politico.

16. Quòd si autem Theologos consulamus, quid iis de primo aestu videatur, non concedunt illi quadrantem, minùs duos illi iræ, quæ excusari, & motus *primo primus* dici possit. Non equidem negant Theologi, eum mitius puniendum esse, qui *impetu doloris tractus*, ut ait Imperator (b), quæquam invadit, ut tamen in sacro hoc foro à gravi culpa absolvetur conscientia, ita vehemens sit oportet illa commotio mentis tunc, dum in actum erumpit, ut actus non ampliùs dici queat vel *liber*, vel *voluntarius*. Est autem *voluntarius*, ut post Aristotelem (c) communissima Theologorum docet, qui *procedit ab intrinseco*; dum nempe agens seipsum movet ad certam actionem, & cum *cognitione finis*, dirigendo scilicet actionem ad finem, à se cognitum, & quæsitum. *Liberè* autem agimus tunc, quando etiam possemus non agere, quod agimus; libertas enim *indifferentia* est potentia, qua *positis omnibus ad agendum requisitis, potest agere, & non agere*. Jam autem indignatio irati animi adedò vehemens & repentina quandoque est, ut actus, ea incitante positus, *liber* dici nequeat: imò quandoque neque *voluntarius*. Offendatur vir nobilis verbis, vel, quod majus est, verberibus, profiliet præcipiti vehementia abreptus  
ad

(a) In edict. contra Duell. an. 1721. vide *Lunig Corp. Jur. Milit.* (b) L. 38. ff. ad Leg. Jul. de adult. (c) 3. Ethic.



*Art. I. Quid & quotuplex sit Duellum? §. III.*

ad vindictam, quin ulla ei argumenta occurrant, à vindicta retrahentia. Sic ager sine libertate; quia libertas non datur, ubi nihil prorsus agnoscitur, quod in contrarium movere possit; neque enim voluntas ferri potest in incognitum. *Voluntaria* tamen hæc vindicta esse poterit, quia *concupiscentia*, qualis est ira, *voluntarium non tollit*; sed *auget intensivè*, seu est causa, ut voluntas intensius velit, ut docet D. THOMAS (a). Quod si tamen *concupiscentia* seu ira ita invalesceret, ut usum quoque rationis everteret, neque *voluntariam* amplius eam actionem liceret dicere.

Si jam petas, ut definiant Theologi spatium temporis, quo ejusmodi ira, libertatem evertens, durare possit, varii variè tibi respondebunt. Ego quidem existimo, metiendum id esse tum juxta gravitatem offensæ irritantis, tum juxta offensi indolem magis, vel minus aliàs placidam. Aegrè cuiquam aded fusca bilis dominabitur, ut intra quadrantem vel omnino semi-horam serenior sibi radius non affulgeat. Quod itaque in Bipontino edicto de hoc intervallo dicitur, ad forum Nemesis potius pertinere arbitror, quam ad forum conscientiae: potius ad poenam, quam culpam definiendam.

17. Declarandum jam venit, quid illud *in continenti* sibi velit. Multa de hac voce differit CARPZOVIVS (b). Id certum, quodd ejus vocabuli significatio non sit æquè semper stricta. Aliquando idem dicit, ac *mox, illico, confestim, statim*, quæ voces vi propriæ significationis videntur denotare temporis momentum præsens & proximum sine aliquo intervallo. Ita BARTOLUS (c). Quod videtur etiam probari ex legibus (d), ubi actus stipulandi & promittendi debet esse continuus non interpellatus, ita, ut partes interim discedant ad alia negotia.

Unde liquet, *in continenti* esse idem, quod *confestim* nullo interjecto tempore vel intervallo. Contra verò quodd dictio *in continenti* non præcisè de momento temporis sit intelligenda: sed cum aliquo spatio temporis accipienda; colligitur ex alia lege (e) dicente, verbum *in continenti* accipiendum esse cum aliquo spatio temporis. Unde, quamvis pa-

B

renti

---

(a) 1. 2. Q. 6. a. 7. (b) Præct. crim. p. 1. q. 31. (c) In L. 3. n. 2. ff. ut in poss. leg. se. v. &c. (d) In primum cit. & ex L. continuus. 137. junct. Gloss. de V. O. (e) L. 1. §. licet si na. ff. ad L. Falcid.

renti adulterum cum filia non nisi in continenti juxta Leges antiquas occidere liceat, ita, ut prope uno ictu & impetu utraque cades peragatur: tamen si prius adulterum occidit aufugiente filia, & aliquot horis interpositis à patre ipsa quoque interfecta sit, *in continenti* occidisse dicitur (a). Alibi etiam verbum *in continenti* accipitur de eo, quod fit intra triduum proximum (b) (c). Denique Auctores nonnulli, imò plerique hujus temporis, ait CARPZOVIVS, definitionem Judicis arbitrio ac moderationi committendam esse censent. Casum si legere placeat, in hanc rem accommodatum, vid. n. 229. præsentis tractatus nostri.

18. Crediderim ego, pro ratione materiæ ampliorem vel strictiorem huic voci addendam esse vim, ut ex ipsis adductis legibus satis appareret. In præsentī materia, ubi de vindicanda illata injuria agitur, ita accipiendam esse judico vocem *in continenti*, ut inter ortam collisionem seu altercationem, & inter pugnam vix aliquod notabile temporis intervallum intercedat, hoc est, ut ait CARPZOVIVS in simili materia, "ut dimicetur armis, *antequam ad extraneos actus divertatur*. Hoc si fiat, duellum propriè dictum non erit, nec locus erit pænæ *ordinaria*, seu à lege statuta. Contra rixam *tamen* habebit locum pœna *extraordinaria*, hoc est, definienda judicis arbitrio pro multiplici diversitate intervalli & actuum intercedentium. Non tamen arbitrium ita laxum Judex habeat, ut pro motu animi sui pœnam mitiorem imponat; sed exactè & diligenter expensis circumstantiis quibusvis, & imprimis examinato intervallo, post rixam elapso, advertere, & exactè considerare debet, an durante adhuc dolore & ira, *antequam divertatur ad extraneos actus*, ventum ad arma sit.

Nec frustra dixi, non debere intercedere notabile temporis intervallum inter *collisionem seu altercationem*, & *pugnam*; fit enim quandoque, ut injuria, seu qualiscunque offensa, aliquamdiu antè illata, & interim dissimulata, data subin occasione, recrudescat, & collisionem seu altercationem excitet. Quod si hanc altercationem *in continenti* excipiat pugna, rixa erit dicenda, quamvis offensa præcesserit intervallo complurium dierum. Unde decides faciliè sequentes casus dubios.

19. I.

(a) L. quod sit. 23. §. fin. ff. ad L. Jul. de adult. (b) C. de Judic. L. fin. (c) C. de error. Advocat. L. fin.

19. I. Si duo in jurgium inciderint ob factam quamcunque injuriam, & durante calore jurgii, ad locum, etiam aliquantum distantem, pugnandi causa accesserint strictis confestim armis, judicandi sunt rixam commisisse potius, quam verum duellum. Multò minùs duellum dicetur, si eodem loco, quo altercantur, etiam pugnam absolvant.

II. Si qui, collisi in templo aut palatio Principis, exeant, locum reveriti, & pugnent in eodem calore, quo concitante ad exeundum condixere, duellum non committunt; quia, cum non intercesserit spatium temporis: quo ad *actus extraneos se converterint*, censendi sunt in *contumeliis* pugnasse.

III. Si duo verbis vel pugnis primò certent, mox uterque domum abeant, allaturi arma; tum reduces manus conferant, duellum non est; quia non satis interrupta fuit altercatio, & prima ira. Quòd si unus duntaxat necesse haberet apta domi arma querere; adeoque alterum eo loco præstolari jubeat, donec redierit, dubitant Authores, an commissa subin pugna duellum fuerit. Affirmat SANCHEZ, negant DIANA & TAMBURINUS (a). Mihi, distinguendum videtur. In foro Ecclesiastico, ubi ad id attenditur, an pugna celebretur *ex condito, destinato loco & tempore* (vid. N. 5.) existimo pro duello esse habendam ejusmodi pugnam. At in foro Civili, ubi consideratur potissimum, an dimicatum fuerit in primo æstu, & in continentia, crediderim à duelli crimine esse absolvendam.

20. Tractationi huic lucem, & ornamentum accessurum spero, si subnectam ex variorum Principum edictis singularia quædam indicia & notas, quas Præfectis suis & Magistratibus locorum suggerunt ad discernendam rixam à duello, quantum quidem pro foro suo satis est.

Edictum Brandeburgicum (b) jubet, eos, qui commissæ à se pugnae, nomen fortuitæ rixæ prætexunt, rigido examini subjici, & jurisjurandi religione adstringi, ut fateantur, an antè voce aut calamo, vel per internuncios ac famulos de pugna convenerint. Trutinari simul mandat rei adjuncta omnia, ut ex illis appareat, an potius ex motu primo, cui resisti vix potest, collisi, quam meditato, & in fraudem legis congressi fuerint. In eundem forme sensum loquitur edictum Civitatis Hamburgensis, an. 1699. renovatum 1720.

(a) Apud la Croix L. 3. p. 1. n. 846. (b) An. 1688.

Rex Christianissimus, LUDOVICUS XIV., qui plantando, & evel-  
lendo regnum Galliae ad hodiernum florem perduxit, ita statuit (a): "cū  
" saepius acciderit, ut multi occasionem sibi occurrendi de industria quæ-  
" fierint, hac specie fortuiti occursus duellum palliaturi, mandamus, ut,  
" qui post acceptam injuriam ad Judices, pro eo causarum genere à nobis  
" constitutos, querelam deferre neglexerit, si postea solus cum solo, vel  
" æquali utrinque stante comitam numero, paribus armis congrediatur,  
" jam non de rixa, sed de duello reus habeatur. Idem de iis statuimus,  
" qui ex terris nostris abeunt, ut alibi injuriam, hæc acceptam, ulciscan-  
" tur, vel in regni finibus de industria congrediuntur; ejusmodi enim  
" frustra prætendunt præcipitem iram. Nec literas veniæ stat cuiquam  
" concedere post tumultuariam pugnam, nisi antè vel in Regia nostra, vel  
" in alia provincia custodiæ mancipatus, finem inquisitionis expectarit.

Hoc ultimum de subeunda interim custodia, statuit etiam magni  
proavi dignissimus Pronepos LUDOVICUS XV. (b) postquam id pridem LU-  
DOVICO XIII. suaserat Card. de RICHELIEU (c). Inhæret item firmus ei sen-  
tentiae, ut, si inter quosdam litem vel similitatem ante pugnam interces-  
sisse constet, de qua nihil illi ad Judices, *de puncto honoris* dictos, detu-  
lerint: post tamen mutuo sibi occurrentes conseruerint manus, poena ca-  
pitis plectantur, non aliter, ac si duellum verè commisissent.

Easdem omnino leges observandas præscripsit priori sæculo Prin-  
ceps Arausicanus HENRICUS WILHELMUS unitarum Provinciarum Gu-  
bernator. (d)

Dux Lotharingiae LEOPOLDUS prudentissimè statuit tria veri duelli  
indicia, & notas characteristicas. Imò si causa dissidii ad Judicem delata  
non fuerit. add si paribus armis. 3tò si in loco suspecto fuerint congressi. (e)

Adstipulatur edictum JOSEPHI CLEMENTIS Electoris Colonienfis (f).  
Item recentius CLEMENTIS AUGUSTI (g).

Recentiora hætenus indicia adeò clara sunt, ut Magistratus ac Judi-  
ces ex iis facilè duellum à rixa discernent, modò nollent quandoque  
ultro suis oculis glaucoma obducere ad excusationem quærendam crimini.

§. IV.

(a) Edicto an. 1669. (b) Edicto an. 1723. (c) Iatestament. polit. cap. 3. sect. 2.  
(d) In edicto an. 1684. (e) In edicto an. 1699. (f) An. 1704. (g) 1742.

## §. IV.

## Quotuplex sit Duellum?

21. *Solemne, & Privatum. Extrajudiciale, & Judiciale. Lethale, & non Lethale.* 22. *Vindex honoris, Vindex fortunarum. Equestre, & Pugare. Proprie, & minus proprie dictum, &c.*

**B**reviter indicare juvat Duellorum genera varia, quorum per hujus operis decursum amplior passim memoria occurret.

21. Dividitur Duellum imò in *Publicum*, quod etiam *solemne* dicitur, & in *Privatum*. Illud sub certa forma, seu solemnī ceremoniā peregitur missis chartis provocatoriis, adhibitis patrinis, invitatis spectatoribus, ferèquē in loco securitatem præstante, quem *Campum francum* nuncupant. \* Committuntur, ait GEBAT (a), in nostra Germania satis raro per DEI gratiam duella *solemnia*, id est, decertationes factæ vi provocationis ad certum diem, locum, cum chartellis, coram testibus & fidejussoribus: at verò *privata* satis superque frequenter. „ *Privatum* est, quod ex condicto quidem & destinato loco ac tempore committitur: sine aliis tamen ceremoniis, nisi quod etiam patrilinos (*Secundantes vocant*) admittat.

Dividitur addò in *monomachiam Extrajudicialem, & Judicialem*. Illa citra Judicis auctoritatem committitur, ut ferè hodie assolet. Hæc auctoritate Judicis præcii, vel etiam præsentis, & judicantis de eventu pugne, & causâ inde dependente. Olim admodum hæc viguit certandi ratio, de qua vid. Art. 3tium hujus Capituli.

22. Dividitur 3tîd in duellum *Lethale, & non Lethale*. In illo pugiles quærunt, vel saltem non abhorreat dare vulnera qualiacunque, mutilationem etiam, aut ipsam necem allatura. In *non Lethali* cavetur pæcto, aliâve industria, quantum fieri potest, à vulnere graviore. Vide varia hujus specimina Cap. X.

(a) Theol. Experim. Tract. 7. c. 18.

IV. Ratione finis duellum aliud potest esse vindex *Honoris*, aliud vindex *fortunarum*, prouti scilicet vel per contumelias honor, vel per injusta damna fortunæ ac opes in discrimen adducuntur. Ubi utraque læsio concurrit, idem sæpe duellum vindicabit honorem, ac connexas cum honore fortunas.

V. Aliud juxta KNIPSCHILD (a) est duellum *Nobile* sive *Equestre*, celebratum scilicet inter viros ordinis Equestris: aliud *Vulgare*, quod ad omnes pertinet, tam plebejos, quam nobiles.

VI. Denique aliud est duellum *proprie* dictum, aliud *minus proprie* acceptum. *Proprie* dictum à rixa extemporanea differt, juxta dicta §. præcedente. *Minus proprie* acceptum cum illa nonnunquam confunditur. Sic etiam, dum nobis de licentia vel malitia ejusmodi pugnarum multus in hoc opere erit sermo, non semper duellum strictè & *proprie* dictum asseremus, nisi ubi de pœnis agitur, latis in duellum strictè acceptum; quamvis & *minus strictè* dictum suas pœnas mereatur, à Magistratibus ex gravi obligatione infligendas.

## ARTICULUS II.

### De Personis ad Duellum concurrentibus.

**N**on requiruntur ad duellum necessariò plures, quam duo, *provocans* scilicet, & *provocatus*; cum enim neglectò tribunali jus sibi merere velint efferi homines, vel potius gladio dicendum committant, actoris veluti unus partes agit, & provocat: Rei alter, & provocatur, causam decidente gladio. Accedere tamen ex more solent etiam *patrini*, & subinde internuncii, aliquæ hujus furfuris homines: & siquidem de solempni duello loqui libeat, etiam *Judex*, ac *Procurator*. De his omnibus quatuor §§. agemus.

### §. I.

#### De Provocante, & Provocato.

23. *Pars provocans, & provocatus potest pluribus constare capitibus.*      24. *Provocatio fit expresse, vel tacite.*

25. *Quis*

(a) De Nobilit. L. 2. c. 3.

- |   |  |
|---|--|
| 25. <i>Quis autem provocaverit, colligimus ex doctrina Alciati,</i> | 29. <i>Item si non sit nobilis, &amp; vocet nobilem.</i>                           |
| 26. <i>Confirmata exemplis.</i>                                     | 30. <i>Provocatus non sit ejusmodi, quem provocans singulariter colere debeat.</i> |
| 27. <i>Contra provocantem datur exceptio, si sit infamis.</i>       | 31. <i>Neque omnino rudis in tractandis armis.</i>                                 |
| 28. <i>Quamvis non omnis infamia in considerationem veniat.</i>     |  |

23. **N**Otandum imprimis, quòd pars tam provocans, quàm provocata non duo tantùm, sed plura etiam capita numerare possit. Sterère ex una quandoque tres vel decem pugiles: totidem ex altera, quando scilicet vel causa communis tangebatur, & involvebat plures: vel solus amicitiae titulus utrique principali plures commilitonèss adjunxit, Theseos & Pirithoos amicos usque ad orcum. (a) Legi aliquando viginti simul grandi in flumine Insulam conscendisse, & subducto lembo tamdiu in mutuas saeviisse cædes, donec non nisi unus, & ipse malè mulctatus, stragi superfuisset. Hodie mitigato furore ferme non nisi duo configunt: cæteri patrinos agunt, non pugiles.

24. PROVOCANS est, qui ad pugnam evocat, idque vel per tabelam provocatoriam (b), vel per internuncium, vel ipse coram & præsens. Uti autem solent provocantes plerumque verbis ejusmodi, quorum sensus potissimum ex usu interprete colligi debeat. Exemplum cape. Hector in hunc modum scripsit Camillo: cum per astutiam tuam præripueris mihi altiore in exercitu nostro gradum, quem præstiti servitii diuturnitas mihi adjudicare debebat, facile conjicies, quid læsus viri equestris honor exigit, cui, spero, te satisfacturum.

Aliàs Titius Coriolano: Quædam verba tibi excidisse memineris, quæ in dubium vocata est stirpis meæ antiquitas; eorum cras, peto, ut explicationem des prope civitatis pomeria ad horum Claudii. Hæ similèssæ phrasæ, ex usu ritè intellectæ, provocationem ad duellum continent, quibus parere necesse habet provocatus, nisi ignavus ex hodierna pseudo-lege audire malit.

25. Illud

(a) *Amelot de la Houffaye Memoires tom. 2.* (b) Vulgò Cartel.

25. Illud adhuc magis declarandum est, quis universè pro *provocante*, & quisnam pro *provocato* sit habendus; aded enim perplexa quandoque contentio exoritur, ut, quis duello initium dederit, difficulter dignoscatur. Necesse tamen est dignoscere; cùm quidam Principes initium in provocatum pœnam statuerint: vel is certè veniâ judicandus sit dignior. Qua in quæstione ALCIATUS (a) ita disserit: "Non est dubium, ex vi sermonis eum provocatorem intelligi, qui primò cœperit, & unde prior exorta est injuria: sed sicut in Jure quandoque dubitatur, quis actoris, & quis rei partes sustineat, ita & in monomachia plerumque ambigitur. Nam & reus, in cujus bonorum possessionem ob contumaciam itum est, si revocari decretum prætoris postulet, actor dicitur.

„ Idem in eo, qui pignoris capionem, vel aliam executionem principaliter cancellari intendat. Is quoque, qui instrumentum rescindi petit, si non possideat, actor dicitur. Quibus exemplis ego arbitror, non eum, à quo prior injuria orta est, provocatorem esse, sed eum, qui prius certamen indixit. Ille ergo *injuria* provocator rectè dicitur, hic *duelli*. Quam sententiam, scio, plerosque lanistas non probaturos: sed ego, quæ à Jure-Consultis tradita sunt, quæque à præstantissimis hujusce artis accepi, ea magis insequenda arbitror, quàm horum iniurias nulla ratione opiniones.

Et hanc ALCIATI sententiam hodie dum tenendam esse existimo; injuria enim ad summum dici potest provocatio *remota*; *proxima* autem provocatio est ipsa duelli denunciatio. Nec obstant ea, quæ ARISTOTELES (b) scribit: *Qua per iram fiunt, talium non est author & causa is, qui iratus facit, sed is, qui laceravit, atque irritavit; ob injuria enim speciem animo objectam, ira commovetur.* Aliud ex hoc non concluditur, quàm quoddam ille; qui alterum injuria laceravit, atque irritavit, provocationi causam dederit: non autem quoddam provocaverit.

Quin neque causam dedisse, si præse loquamur, verum est; confugere quippe debebat læsus non ad duellum, & privatam ultionem, sed ad Judicis præsidium; neque enim singulis concedendum, quod per Magistratum fieri possit, ne occasio sit majoris tumultus faciendi. (c)

Quam-

(a) Cap. 5. de duello. (b) 5. Nicom. 8. §. 9. (c) L. 176. ff. de R. J.



Quamvis non diffitear, æquum esse, ut, qui provocationem facit, & remotam & proximam simul, majore plectatur pœna, atque ille, qui solam proximam, vel solam remotam; id quod bene observatum legimus in edicto Brunswicensi GEORGI Magnæ Britanniae Regis (a). Juxta hanc doctrinam etiam tenco casus, ab ALCIATO bene decisos, sequentes.

26. " I. Qui te proditorem dixerit, quamvis tu mentiri responderis, non tamen provocator idcirco dicitur, nisi recepta responsione ad pugnam te invitaverit. Quodsi tu respondendo mentiri eum, tēque singulari certamine id approbaturum professus fueris, tu ille ipse verus provocator es; potuit enim existimare, qui te proditoris infamulavit, alia te ratione honoris tui causam suscepturum, quam duello, cūmq; tu ad specialem duelli probationem suscipiendam eum appellaveris, meritò actoris partes sustinebis. "

" II. Sed & si te sic compellavero: *Quoniam id à te in dedecus meum dictum, factum est, ut honorem meum defendam, volo tecum armis concurrere, sicque me defendere*, arbitror me provocatorem esse; nec enim verborum integumentum formulam actionis variat. Et sicut in judiciariis libellis conclusio ipsa spectanda est, nec verborum sonus attenditur, sic & hoc casu id observandum est, quod ego in bellum provocem, tamen *defensionem* appellem, quæ respectu congressus, offensio est. "

" III. Idem respondendum censeo, si hæc formula verba concepta proponantur: *Quoniam in honorem injuste debacchatus es, si te affirmas rectè fecisse, paratus sum judice gladio ostendere, falsa te opinione niti, & mentiri*. Et hic enim, si sibi respondeatur, rectè atque verè factum, nihilominus actor est; ipse enim ad pugnam ultrò provocat. Alter igitur rectè provocator injuria dicitur, alter duelli. Sed parum refert, quis in injuria occuparit, solumque inquirimus, quis in duello actor sit. "

" IV. Ex facto illud quoque quæstionis fuit hæc in specie. Scripsit Venetus Gallo: *Accepi, te Duces exercitus Veneti imbelles dixisse, quod judicio meo improbe à te dictum est: cūmq; id mea non parum referat,* "

G

" velim

(a) An. 1718.

„*velim certior à te fieri, an verum id sit.* Responsio Galli: *Ducibus Venetis non maledixi, nec mei moris est: verum quod tu improbi me dixisse affirmas, mentiris, idque tibi in campo probaturus sum, si ejus designationem literis ad me tuis declaraveris.* Dubitatum est, uter duelli provocator esset. Et Gallum non esse, vero propius est; quoniam, qui sibi designari campum petit, is consuetudine Cisalpinæ Galliæ reus est, id est provocatus. „*Hactenus ALCIATUS.* Ego huic consuetudini suum pretium relinquo: si tamen decisionibus prioribus insistam, Gallum provocasse dicam,

27. Cæterum cum duellum judicii quodammodo formam imitetur, in quo provocans actorem, provocatus reum agat, nemo mirabitur, contra actorem quasdam *exceptiones* dari, quibus iniqua ejus provocatio elidatur,

Ac imò quidem provocans non sit homo *infamis* oportet; ferme sicut in judicio accusatorio non admittuntur ad accusandum infames, & criminum rei tam de Jure Canonico (a), quam & de Jure Civili (b). Est autem alia *infamia facti*, quæ nascitur ex ipsa, solâque inhonesti operis, vel defectus, apud probos & honestos viros notam afferentis, turpitudine manifestâ. Alia *juris*, quæ auctoritate Legis, vel Canonis ob turpe factum decernitur. Ejusmodi facta sunt v. g. bina sponsalia, binasve nuptias suo nomine, vel ejus, quem quàmve in potestate habet, eodem tempore constitutas habere (c): histriionem agere, & pro quæstu turpes ludos edere (d). Juramentum promissorium contractui, & transactioni appositum ex culpa non servare (e), hæresi inhærere (f), usuram manifestam exercere, & exigere injustè usuras usurarum. (g)

Infamis item est *sententia Judicis*, qui doli mali suo nomine admissi, vel calumniæ & prævaricationis in publico judicio commissæ est damnatus (h). Vel, qui ignominie causa exauthoratur militia, ordine move-

tur,

(a) Can. 18. causa 2. q. 7. (b) L. 4. ff. de accusat. (c) L. 1. & 13. ff. de his, qui not. infam. (d) L. quod ait. 2. §. fin. ibid. (e) L. Si quis major. 41. C. de transact. (f) C. Excommunicamus. 13. §. 6. de Hæret. (g) L. improbum. 20. C. Ex quibus causis infam. irroget. (h) L. Fustibus. 16. C. Ex quibus caus. infam.

tur, vel honoribus interdicitur (a). Plura vide apud Doctores passim. Nota ramen, juxta morem hodiernum exceptionem etiam dari contra eum, qui indignum aliquando actum admisisse passim dicitur, quamvis sententia Judicis non fuerit declaratus reus: sufficit, quod necdum fuerit purgatus.

28. Quacunque ejusmodi infamia si quis notatus sit, ad duellum etiam provocet, non auditur, nec quisquam tenetur provocanti morem gerere. Ita pro certo statuit pseudo-Lex de duello, hoc saltem ex capite non irrationabilis; nulli enim provocantes deberent audiri: ergo multò minùs infames. At illud incertum, an omnes illos pro infamibus habeat, quos Jura habent; certè cum eo, qui criminè raptus admiserat, non horruit olim nobilis quispiam in arenam descendere: & tamen infamiam hoc crimen affert (b). Nunquid juxta idem Tridentinum infames sunt una cum patrinis, suis monomachi? nihilominus pseudo-lex commisso semel duello eos etiam posthac ad duellum admittit. Vice versa eum excludit velut infamem, qui vel semel duellum recusaverit. Quin & eum, qui ex legibus Evangelii calumniam, vel ignominiam, aut verbera inultus tulcrit, adeò susque deque vertit omnia.

29. Exceptio etiam locum habere dicitur, dum ignobilis nobilem provocat. Equidem ALCIATUS, quem Sæculo XVI. Jurisprudentiæ barbariem absterfisse dicunt (c), de suo ævo dum loquitur, contendit, imparē in nobilitate, vel dignitate conditionem nihil ad monomachiam facere, ita ut gregario quoque militi fas sit Ducem provocare (d). At de duello *judiciali* ibi sermo est; patet ex ratione, qua suam sententiam tueretur; eo, quod scilicet monomachia genus probationis sit, cui Deus præsidere credatur, apud quē omnes pari jure agant. Contrarium tenent nonnulli cum BALDO (e): hodierni mores ferunt, ut nobilis provocatus ab ignobili comperere non teneatur. Quin orti de antiquo stemmate cum aliis, quos vel recentior Principis gratia nobiles scripsit, vel sola roga, aut calamus primis etiam subselliis admovit, manus conferere detestantur. Aliud observatur inter eos, qui castra sequuntur, ubi inter Du-

(a) L. 1. Prætoris. ff. de his, qui notantur infamia. (b) Trident. Sess. 24. de reformatione matrimonii. (c) V. d. M. de Thon. (d) De singul. cert. c. 30. (e) Apud Fignatelli. Tom. 9. Conf. §§. n. 3.

ces non habetur sanguinis ratio. Meum non est, ejusmodi regulas ad examen vocare. Excludant pace mea, quosunque placet, à cruento hoc pugnandi jure, quò severiores erunt, cò magis parceretur humano sanguini. Id adverto, sanguinem viri sapientis, qui togà illustis præclara obit munia in Reipublicæ commodum, æque pretiosum esse ac alterius cujusquam, cujus rota gloria est commemorare

*Et genus, & proavos, & quæ non fecimus ipsi.*

30. In provocato requiritur, ut non sit talis, quem provocare per bonos mores non licet, quémque cum provocante pugnare ob autoritatem dedecet. Sunt porissimum illi, quibus jure naturali, vel civili singularis honor debetur. Sic nefas est provocari parentes à liberis, Patronos à Vassallis, à Subditis Dominos, à Discipulis Magistros. Neque decens erat jam ALCIATI ævo, ut privignus vitricum, vel nepos avunculum, aut civis Consulē, ac Prætorem in arenam vocaret.

Militiæ quoque moris est, ut Dux exercitus, vel Præfectus legionis atque cohortis à quoquam sibi subdito adigi ad singulare certamen nequeat, tunc saltem, si offensa orta sit ex mandato quodam Ducis, quò disciplinam hic militarem ex officio curabat. Id tamen subdolè jam agunt aliqui, ut dum duritiam secum actum fuisse à Præfecto existimant, missionem petant, eaque obtenta, ad locum alterius ditionis invitent correctorem suum. Huic malo occurrere laborarunt Principes multiplici industria, ut recensëbimus alibi Cap. 2. & 9.

31. Id præterea, credideram ego, in provocato requiri, ut in tractandis armis non prorsus rudis esset; quæ enim laus provocanti accrescat, si ipse in arte digladiandi versatissimus, rudem adversarium, & in palæstra hæc vix novitium, veluti ovem lanio ad macellum pertrahat? contigit tamen, ut veteranus gladiator vexilliferum, qui recens ex laribus paternis venerat, nescio, qua de causa frivola, in arenam educeret reluctantem, & obtendentem suam in tractando gladio inscitiam.

Instabant patrini quoque, ineluctabilem necessitatem inculcantes, nec spatium mensium aliquot indulgentes, donec tyro athleta se exercendo profectum caperet ad sui defensionem. Itaque bonus vexillifer in arena jam constitutus, educto gladio, in genua procumbit, ultimas deprecationes adhibet: &, dum surdis canit, à desperatione mutuans consilium, durum ad-

ver-

versarium nihil minùs opinantem transfodit, gravi adèò vulnere, ut ab eo nunquam ex integro sanatus, & curvo corpore miserè tota vita reliqua incedens, ridiculum prope spectaculum multis præbuerit thrato.

Hæc de personis principalibus *provocante*, & *provocato*. Quibus cùm plerumque Patrini (sive Secundantes) accedant, de his jam differere ordo monet.

## §. II.

### De Patrinis.

- |  |                                       |
|--|---------------------------------------|
| 32. Unde Patrinorum nomen.                     | 36. Etiam ex fundamentis Theologicis. |
| 33. Horum officium est pugna assistere.        | 37. Sed refutatur excusatio,          |
| 34. Debebant olim etiam pugnare.               | 38. Addita gravi ratione,             |
| 35. Hodierni videntur excusari à culpa & pana, | 39. Absterfo suco Theologico,         |
|  | 40. Et accedente oraculo Ludovici M.  |

32. **P**atrinus, ignotum Latîo nomen, iis primò tributum est, qui infantem de sacro fonte suscipiunt, & rectiùs Patres lustrici, vel Patres baptismo adoptivi dicuntur (a). Pòst mutuare hoc nomen, & profanare ausi sunt monomachi, affingendo id patromachis suis, qui duellis solemnibus adfuere velut *baptismo sanguinis*, constituti pugilum patrini, atque advocati, utpote quorum jura tuerentur, & coram judicibus causam dicerent, ob quam illi descendissent in arenam. Ejusmodi Patrinorum memoria & species quædam servatur etiamnum ad pompam in catadromo, ubi ludicæ decursiones (b) celebrantur, atque Equitum, vel Amazonum turmis singulis (c) bini aut quaterni junguntur.

33. Ad hodierna duella adhibentur eo potissimùm fine, ut testes sint pugnae juxta leges peractæ; ne scilicet quis fortè in inermem adversarium irruat, antequam hic gladium strinxerit, aut sclopum manulem expediverit: aut ne pugiles, vulnerato alterutro, ira abrepti vehementiùs sæviant: nève alia fraude aut arte insolita utantur, & si qui sunt alii ejusmodi fines. Finito negotio, dilaudant patrini pugiles suos, strenuique viri partes dicunt implèsse. Mox eos reconciliare saragunt, & iis, quorum interest, testatum faciunt, litatum

C 3

fuisse

(a) Pomey V. Parrain. (b) Carrouseis. (c) Cadrille.

fuisse satis læso honori. Unde & ille, qui contumeliam acceperat, jam ab omni mala nota absolutus habetur. Itaque gladius, & duo patrini effectum dant, quod nec Magistratus, nec Princeps ullus juxta corruptum judicium ejusmodi hominum tota sua autoritate valuisse.

34. Durior antehac erat Patrinatorum conditio, vel, ut veriùs dicam, inhumanior cæcitas. Usque ad HENRICUM III. Gallia Regem, spectatores tantùm agebant: at in duello Queli, & Entraguetii etiam ipsi manus conservare. (a) Invaluit tunc perniciosus hic mos præcipuè in Gallia. Narrat Thuanus (b) plura ejusmodi exempla tragica. Inter alia de duello Levii, & Caroli Balfaci hæc habet: "Cum alter ab altero de injuriis sibi, usur, parat apud nos inter nobiles ratione, satisfieri peteret, horam & locum duello condicunt, quo & duos ex amicis, inaudito apud alios more, cæterum vana decoris ostentandi cupiditate nunc satis frequenti, secum, pugnaturos adducunt. Hi omnes summo silentio in equorum foro Lutetiae ad mutuam perniciem, orto vix sole, certant. Si causam quæras, ob quam sibi socios adlegerint, scito, Ludovico Magno teste (c), idèd principales quandoque involvere *secundos & tertios*, quod sibi diffidant, & præsidium quærant in aliorum dextera. Nec Germania penitus sapiebat, id quod colligere datur ex *Concluso* Imperii, contra duella edito (d), & ex *resolutione* LEOPOLDI Cæsaris, data ad hoc *Conclusum* (e), ubi longè acrior pœna statuitur in eos patrinos, qui ipsimet etiam pugnant, quàm in alios pugnae duntaxat assistentes; præterquam quod egregio ibidem encomio hi pugiles maectentur, dum *inhumanum, diabolicum & pessimum exempli inventum* sectari dicuntur. Sed tandem abolitus est hic mos in Gallia, qui extra Galliam non admodum se diffuderat. Et merito ad extremam barbariem ablegata hæc est rabies, quæ, dum plures trahebat in societatem, lites ex litibus ferebat, & pugnas ex pugnis. Jam etiam olim duella solemnia ac judicialia inficere parabat hoc moris monstrum: sed oraculis Jurisperitorum proscriptum est; eo quod neque ex Jure Civili contra advocatum, procuratorem, tutorem, quibus similem personam patrini credebantur sustinere, unquam actio judicati daretur (f).

De

---

(a) *Amelot de la Houffaye* Memoires tom. 2. (b) Lib. 66. ad an. 1578. (c) In edito contra duell. an. 1679. n. 15. (d) An. 1667. (e) An. 1668. & 1670. (f) L. 4. ff. de re judic.

35. De eo dubium moveri posset, an pœnæ tam à lege civili, quàm Ecclesiastica generaliter in Patrinos latæ, quas suis locis recensuimus, hodierni quoque moris patrinos feriant. Innocuum hi videntur munus agere; non ipsi suadent duellum, nec ad cruentam pugnam excitant: sed, quod ab aliis decretum est, ut sine fraude, aut furore absolvatur, id curant unicè. Quò non ageret quandoque ira efferos pugiles, vel quas malas artes non suggereret vitæ amor, si moderatores abessent, & testes? præstat hos duello adesse, quàm abesse, ut scilicet malum, quod impediri jam non potest, fiat cum minori periculo, ac damno. Nónne quis benè se jungit alteri comitem, quem scit in suo consortio peccatum saltem moderatius; huic enim tribuetur, quòd peccatum quidem fuerit: illi, quòd non fuerit peccatum magis. Itaque non abs re queri potest, quinam patrinatorum nomine veniant in Pontificum, Principumque edictis, quæ in ejusmodi multa cum severitate fulmen, & gladium vibrant. Illos haud dubiè solos spectabunt intentatæ pœnæ, qui vel duello solemniter operam commodant, vel in privato ipsimet arma arripiunt.

36. Opinio hæc est, quam multorum animis altius insidere deprehendi, quàm ut facile eximi valeat. Quid? quod etiam speciem quandam veritatis theologicæ præferat. Si enim tunc patrinatorum obsequium licitum non esset, tunc ea ex ratione, quòd peccato operam locant, seu *cooperantur*? at sine piaculo hoc agunt; quia *qualemcunque* operam ad peccatum conferre non semper vitium est. “Tunc licebit juxta Theologos (a), si “imò tuum opus, seu cooperatio sit secundum se bona, vel saltem indifferens. 2dò si bona intentione, vel saltem rationabili ex causa fiat: “non ut juves alterum peccare. 3tò si alterius peccatum impedire nequeas, aut saltem non tenearis propter causam rationabilem.”

Atqui totum, quod Patrini hodierni in duello præstant, indifferens est, vel etiam bonum: assistunt, furori ponunt modum, dolosas pugnantibus artes excludunt, & tandem de pugna hoc modo peracta, testimonium dant. 2. Ista agunt bona mente, justoque ex fine, ut patet. 3. Eò jam vident rem devenisse, ut impedire pugnam, vel eam clientibus suis dissuadere non sit integrum: à reatu ergo absolvi debet hæc innoxia opera, seu

matte-

*materialis cooperatio*, ferme sicut caupo ille absolvitur, qui in urbe Catholica Acatolicis carnes apponit die jejunii, si sciat, se tergiversante caupones alios hoc hospitiibus obsequium exhibituros multa cum lubentia. Quod idem nōrunt etiam Patrini, scilicet alios, si rogentur, haud difficulter hanc spartam fore suscepturos.

37. Contrā omnino tenendum, in Pontificum Bullis (a) ac Principum edictis (b) vapulare tam antiquioris, quā hodierni aevi patrinos. Dabo plerosque veteres Canones, & quasdam Pontificum Constitutiones in patrinos solemniter tantū duelli detonuisse: dabo quosdam Principes, praecipuē Reges Galliae ab HENRICO III. usque ad LUDOVICUM XIV. illis duelli privati patrinis minas intentasse, qui pro illius temporis more arma ipsi quoque solebant stringere. At Leges recentiores, Bullae, edictaque plurima loquuntur de hodiernis; est enim temporis habenda ratio, quo quavis ejusmodi Constitutio lucem aspexit. Quales tunc erant patrini, tales quoque damnati, & poenis subiecti fuerunt. Constat autem multas Constitutiones fuisse editas ultimis temporibus, quibus duellum solemne vigere jam desuit, & iis in Provinciis, in quibus patrini ferme semper a pugna abstinere consueverant. Accedit, quod ii, qui ipsimet pro more pugnant, *secundi & tertii* potius vocentur, quā patrini. (c)

38. Adde, quod ex sana etiam ratione condemnentur hodierni Patrini. Quodsi enim duellum inire culpa non vacat, ut suo loco abunde demonstrabitur: neque culpa vacabunt, nec poenis se subducent, qui patrinos agunt; nam sine patrinis duella vel nulla haberemus, vel rara, id quod ex eorum officio, cujus partes paulō antē enumeravimus, liquet. Quis enim volet se adversario suo, exacerbato saepe hosti committere sine arbitro? qui securus ero; ne fortē à tergo me ille invadat, ne me praeveneriat haerente adhuc in vagina meo gladio, vel antequam firmum in arena pedem fixerim? quodsi ego ei vulnus infligam, & is inhonestis me modis egisse postea calumnietur, quem testem opponam? si glandem ego ejus prior excipiam innoxie, & nolit ille meam expectare, expectasse tamen mendax jactiter, qui confutabo? si eum occidam, cui probabo, me juxta honesti leges

(a) Vide has Cap. §. (b) Vide eas Cap. 9. (c) Vid. Edictum Ludovici XIV. p. 495.



leges dimicasse? vulneremur uterque, quis opem advocabit laborantibus? illasi abeamus, vel non nisi leviter faucii, nonne judicabunt commilitones nostri, nos post offensam reconciliatos, non nisi umbratilem pugnam commisisse? qui ergo purgabimur, qui ad societatem & commercium æqualium admitteremur, qui tamen duelli finis est? quæ cum ita sint, apparet satis, sine patrinis nulla, vel rara oppidò duella fore. Quisquis ergo patrini officium in se suscipit, duella fovet, id est, malum fovet, omni jure condemnatum, peccatque graviter in DEUM & Rempublicam. Accedit, quodd patrinatorum præsentia pugiles animet ad pugnam seriam, fortè aliàs cessaturos ante datum vulnus. Ob similem causam in spectatores duelli lata est excommunicatio, id quod est extra dubium: ergo etiam, & multo magis lata est in patrinos: malè hi agerent, quamvis non nisi spectatoris noxam admitterent.

39. Unde etiam facilè abstergitur fucus Theologicus, & concidunt tria suprà allata Capita, ex quibus cohonestari ea *cooperatio* videbatur. Imò enim opera, quam navat patrinus, indifferens non est; unicè enim duello est sacrata & dedicata. Aliud est de opera artificis, qui gladium fabricavit, & vendidit, post duello adhibitum; gladius aliis etiam usibus factus, & aptus est.

2dò. *Neque ex bona intentione, aut rationabili causa* patrinus assistit. *Malum, ais, sic fiet minore cum periculo & damno.* At operam suam omnino neget, & malum omnino evitabitur, dum cessabit duellorum usus, vel saltem frequentia. Non nego, rixas nihilominus non cessaturas; at huc non pertinent rixæ, ubi de solo duello est sermo.

Neque 3tiò patrino favet, quodd duellum jam impedire non poterit. Dixi utique, impeditum iri duellorum usum, si patrinum agere pro sua quilibet conscientia récuset. Quid? quodd etiam tenearis impedire, ne scilicet tum monomachis, tum etiam Rcipublicæ mala gravissima ex ea corruptela eveniant. Neque credas, cauponem ex hoc solo argumento à peccato excusari, quodd sciat *alias carnem apposituros*: sed ideò juxta doctrinam eorum, qui eum excusatum volunt, quodd hoc modo ipse notabile damnum esset passurus, dum paulatim nemo ad eum veniret (a).

D

Edic

(a) Vid. Sanchez L. I. Mor. c. 7. n. 16.

Edic autem fodes, quodnam damnum imminet patrino, si id officii detrectet? denique ed tenderet apologia pro hodiernis patrinis, ut etiam patrini duelli judicialis, aut alterius solemnis à noxa deberent absolvi, ita, ut si hodie Principum quisquam refragante licet conscientia, ejusmodi duellum permitteret, huic patrilos se addicere possent, si qui vellent, quin in Leges Divinas, humanasque peccarent, quod profectò à recta ratione & Doctorum omnium judicio est quàm alienissimum.

Firmer hæc omnia prudentissimi Regis Galliae LUDOVICI XIV. sententia, pronuntiantis, patrilos ejusmodi malè implere viri honesti & Christiani partes, dum, quas tricas sopire debebant, viis his, à vera magnanimitate alienis, promovent, spurium amicis suis præstantes obsequium (a).

## §. III.

41. *Internuncius.*42. *Adjutores cateri.*

41. **P**OST principales personas, sine quibus duellum vel esse non potest, vel non esse facile solet, recensere oportet etiam alias minus necessarias. Offert se primo conspectu *Internuncius*, qui chartam seu libellum provocatorium ei affert, quem provocans ad pugnam deposcit. Vile hoc hominum genus est, & abhorrent ab hoc officio, quibus nobilior est animus.

Commerito hos internuncios encomio mastravit AUGUSTUS Dux Brunswico-Luneburgicus (b), dum eos appellare non dubitavit *homines malos ac diabolicos*. Pœnas, in eos statutas tam jure Civili, quàm Ecclesiastico, recensimus Cap. 8. & 9. Interim etiam illos pro internunciis reputandos esse censeo, qui sermone referunt, quod scribere provocans omisit. Quin & illos, qui jussi, vel rogati chartam ad alterum perferunt, scommatis adeò malè sonantem, ut inde duellum secuturum haud difficili conjectura præsentiant. Et hunc finem qui vehunt, eos omnium maximè contemptu dignos existimant prudentes.

42. Minoris notæ sunt personæ reliquæ, quæ quidem ipsæ operi manum non admovent: *indirecte* tamen, ut dicimus, promovent. Omnes hujus furfuris distinctè admodum enumerat Constitutio CLEMENTIS VIII. quam illu-

(a) Edit. an. 1679. n. 15. (b) Edit. an. 1646.

illustratam dabimus Cap. 8. Interim notos tibi habeto ex celebratis illis versiculis, quos legere est apud D. THOMAM (a)

*Iussio, consilium, consensus, palpo, recursus,  
Participans, mutus, non obstans, non manifestans.*

§. IV.

43. In duello solemnī Judex. 44. Procurator.

43. **I**N duello solemnī præter eas personas, quas privato jam dedimus, memorandi adhuc veniunt *Judex & Procurator*. Judicis erat primò quidem locum securum, quem *campum francum* vocant, intra ditionem suam pugnantibus designare, id quod non nisi supremæ potestati competere poterat (b). Dein assistere debebat is Judex pugnae, vel alii id officii demandare, atque ea finita pronunciare, penes quam partem stictisset victoria, ut hæc ratione legem atque ordinem acciperent negotia, & causæ, quas ex hac victoria dependere, ac duello definire pugiles volebant.

44. Accedit etiam *Procurator* (campionem dixere). Mirum! in *criminalibus causis*, ajunt antiquæ leges (c), *nec accusator, nisi per se, aliquem accusare potest: nec accusatus per aliam personam se defendere permittitur*; æquitati namque repugnat, ut innocens procurator, si causâ fortè eadat, ferat penam illi debitam, cujus ipse personam in judicio sustinuit.

Ideo etiam more hodierno actor per procuratorem agere non permittitur, nisi in iis tribunalibus, ubi pena talionis abrogata est: sed ecce absque in materia duelli dogmata; per hæc licebat olim in duello sibi substituere alium, præcipue dum de crimine probando agebatur, qui causam armis dirimeret. *Licebat*, inquam; nam adstringi ad id nemo poterat, qui ex æquo impedimentum afferebat, quo minus ipse compareret; quia, cui jure *exceptio dilatoria* competit, is non cogitur per Procuratorem litigare; cur enim provocatus honorem suum salutemque alienæ fidei & dexteritati committeret? neque tamen hæc æquitas ubique gentium sedem fixerat; teste namque ALCIATO (d) *Lege Langobarda, & Sicularum usu*

D 2

cau-

(a) 2. 2. q. 62. art. 7. (b) *Gonzal.* ad cap. 2. de Cler. pugnant. (c) *Can.* 27 *Caus.* §. 2. 3. (d) De singul. cert. cap. 35.

cautum erat, ut provocatus per vicarium pugnaret, si ipſus eſſet impeditus, vel provocantem ſibi imparem crederet, vel cauſam ſimilem obtenderet, ne ſcilicet (hem! ponderoſam rationem) dilata pugna, delicta viderentur impunè abire. Sed demus veniam ætati illi, quæ ſaltem in eo humanitati conſuluit, quòd Procuratorem non admitteret, qui in alia monomachia herbam porrexiffet.

Illud mirari liceat, quòd reperire fuerit mercenarios, qui ſanguinem vitæque venalem exponere non dubitabant, nullo adſtricti vinculo, ſola allecſi pecunia. Sed nempe

*Auri ſacra fames quid non mortalia cogis  
Peſſora?*

### ARTICULUS III.

*De cauſis, ob quas olim Duella commiſſa fuerunt.*

**C**um ex inſtituto de illo maximè duello agere mens ſit, quod pro vindicando honore ſolet ſuſcipi hodierno more, de aliis veterum duellorum cauſis, non eſt, cur fuſius agamus. Neque tamen penitus ſilentio prætereundæ ſunt, cùm nexus doctrinæ ſubin aliquam de iis notitiam deſideret. Dicendum igitur, quibus de cauſis, tum *intra*, tum *extra* iudicium duella inire uſitatum fuerit.

#### §. I.

De Duello extrajudiciali.

- |   |   |
|---|---|
| 45. <i>Duellum extrajudiciale oftentationis cauſa olim uſitatum</i> | 50. <i>Ad finiendum bellum reſtè initur,</i>              |
| 46. <i>Improbatur.</i>  | 51. <i>Siquidem utilitas inde ſperetur.</i>               |
| 47. <i>Non minus torneamentum periculofum.</i>                      | 52. <i>Hinc reſutatur Cajetanus,</i>                      |
| 48. <i>Neque probatur duellum inter milites duorum exercituum,</i>  | 53. <i>Diſcutitur Grotius,</i>                            |
| 49. <i>Niſi proſit ad victoriam.</i>                                | 54. <i>Ponderatur notatio Gobatiana.</i>                  |
|   | 55. <i>Quis demùm in his pugnis victor cenſendus ſit?</i> |

45. **A** Pud Græcos jam viguit duellorum uſus, ALCIATO teſte (a), inventumque à Mantineis in Græcia, eo ex argumento conſtare, ait, quòd

---

(a) De ſingul. cert. c. 2.

quodd bellicum sagum, veterésque armaturas *Mantineas* appellant. Accedit, quodd etiam HOMERUS non uno in loco duelli meminerit, núneque Menelaum cum Paride pro Helena singulári certamine coram utroque exercitu pugnantem inducat: nunc Hectorém cum Ajace: VIRGILIUSQUE *Æneida* suam concluderit nece Turni, congressi cum *Ænea* pro uxore Lavinia.

Græcos æmulati sunt Romani, dum gladiatores suos habuère, venali sanguine in arena decertantes, quos magistri & institutores, quibus *Lanistarum* nomen, ex servis & libertis legebant. Eorum genera quatuor, Retiarii, Secutores, Mirmillones, Hoplomachi. Ludis funebribus committi solebant, quodd sic Manes Deos placari persuasum haberent. Tum ea potissimum causa inducti sunt, ut hoc spectaculo firmati tyrones cruentum hostem mindis expavescerent.

Accidebat plerumque, ut in hoc munere etiam liberæ conditionis viri nomen darent, specimen virtutis edituri. Sed tandem Romanos cruenti hujus spectaculi satietas cepit (a), gladiatores Quiritum jure, & edicto Prætoris infamia notati sunt, donec THEODOSII Constitutione sint penitus Republica ejecti. De his speciatim agit Lex Constantiniana (b) his verbis: *Cruenta spectacula in otio civili, & domestica quiesce non placent: quapropter omnes gladiatores esse prohibemus.*

46. Ejusmodi pugnas, solius roboris ostentandi causa initas, ex æquo damnat Joannes de LIGNANO (c), inter antiquissimos, qui de duello scripsère, Authores. " Ait introductas quidem esse jure naturæ, ut " sumitur hoc jus pro instinctu naturæ, proveniente ex sensualitate, eo " quodd naturaliter quis moveatur ad duellandum in spectaculo ad finem " gloriæ consequendæ: esse tamen inhibitas jure naturali sumpto pro naturali intelligentia. „ Mox verò non abs re sibi met objicit, quodd si hoc duellum æquitate naturali veritum est, quid fieri potuit, ut lege Civili vetere permissum fuerit unquam? Extant enim in lege quadam (d) hæc verba: *Si quis in colluctatione, vel in pancratio, vel pugiles, dum inter se exercentur, alius alium occiderit, siquidem in publico certamine occiderit, cessat Aquilia; quia gloria causa & virtutis, non injuria gratia, videtur damnum*

D 3.

(a) *Alciat. ibid.* (b) L. un. C. de gladiat. (c) In Tract. de duell. (d) L. Quæ actione ff. ad Legem Aquil.

*damnum datum.* Respondet mentem Legislatoris eam fuisse, ut pœna remitteretur occidenti. Igitur pugnam illam olim fuisse permissam sola permissione *remissiva pœna*; eo quod non injuriæ gratia damnum videatur datum.

47. Solent, qui de duellis scripsere, huc etiam referre Hastiludia seu torneamenta, quæ duella ludicra appellantur. At cum omne duellum sit bellum; bellico autem seu hostili animo non congregiantur, qui in his ludis decertant, duellum propriè dictum non sunt censendi committere. Accidit equidem jam non semel, ut pugilum unus infelici eventu occubuerit, uti HENRICUS II. Galliarum Rex, quem Mongomerius, cohortis prætorianæ præfectus, transfixo dextero oculo vel invitatus prostravit, festivum Hymenæum funestante Libitina; utur autem periculosa sint ejusmodi pugnae, hostiles tamen non sunt, ideoque nec ad duella propriè referendæ. Id certum, quod temerarios hos ludos potestate Principum coercere, atque abolere oporteat, ut pridem monuit Panormitanus (a): *Omnes ludos, in quibus periclitatur hominis salus, aut animarum, omnino tollendos esse, quod pugnent cum verbo Dei.* Præcipuè cum exercitationis hujus jam nulla ferme ad bellum utilitas sit; utpote cujus gerendi ratio plurimum immutata est inde ab Henrico Aucupe, quem torneamentorum authorem extitisse tradunt. Jure sane Ecclesiastico hi ludi dicuntur *detestabiles nundina seu feria* (b), & occisus privatur Ecclesiastica sepultura. Unde Doctores colligunt, ejusmodi interfectorem ex L. Cornel. etiam ad subeundam homicidii pœnam esse condemnandum.

48. Aliud, quod *extra judicium* suscipitur, duellum militiæ locum habet, ubi ex utraque parte adversa duo, vel plures, & quidem autoritate Ducum, committuntur, qui singulare certamen ineant, in quo nobis non tam pugilum numerus, quam causa consideranda est; vel enim ostendendæ virtutis causa id agitur? vel ut bellum resolvatur in duellum, & sic parcatur humano sanguini? si primum, errant Principes, ut tenet CAJETANUS (c), "Concedentes quasi spectaculi causa, cum in bellis sunt, certamina quasi singularia, puta, decem hinc, & decem illinc ad ostentationem virarum fortium. Diabolica sunt hæc, & sicut duella judi-  
canda

(a) In C. felicis. de torneam. (b) C. 1. De torneament. (c) In 2. 2. Q. 95. Art. 5.

canda eadem ratione. Nec excusat eos tempus belli & conflictus partialis hostium cum hostibus; quoniam iusti causa belli in partiali hoc conflictu locum non habet; quia habens bellum iustum ut sic ad ostentationem non pugnat. „ Eandem sententiam tenet SCHIARA (a), alique. Et bene; ut ex eo maximè patet, quòd vita horum pugilum temerè exponatur discrimini; quid enim utilitatis ex inani gloria sperare liceat? Nec excusat accedens Ducum licentia aut exhortatio; neque enim ipsis licet invitare, aut facultatem dare ad inutilem necem virorum fortium. Ad Theodosij Imperatoris exemplum deberent animum advertere, qui populo, petenti gladiatores in theatro, respondit: pium Principem oportere non tantum regnare, sed etiam spectare clementer.

Si de pœnis, in hæc certamina statutis, quærat, BONACINA equidem etiam docet veritas esse has pugnas: pœnas tamen Ecclesiasticas, in duella generatim statutas, ad easdem extendere veretur (b). Ego autem non satis perspicio, cur ab iis pœnis immunes sint; duellum enim propriè appellare licet ejusmodi conflictum; cum sit singulare certamen ex condito, loco & tempore statuto initum; quamvis decem omnino, aut etiam plures hinc atque inde concurrant; non enim duellum quasi pugna duorum hominum: sed quasi *bellum partium* dicitur, teste GONZALEZ (c). Autoritas publica frustra impenditur actui lege divina prohibito. \* Nunquid etiam duella, judicialia quæ dicimus, simili olim autoritate tegebantur? nec tamen sub hac lauro à fulmine Pontificio secura credebantur.

*Oppones* fortè, CLEMENTEM VIII. in Bulla sua (d) eos solum pœnis Ecclesiasticis ferire, qui contra alios in adversariorum exercitu milites, permisso Ducum ad singulare certamen descendunt, *privatas simulates, & inimicitias publica causa intermiscendo*: ergo qui ab hoc sibi cavent, ne scilicet privatas simulates & inimicitias publicæ causæ intermiscant, non puniuntur à Pontifice, modò Ducum permissio accesserit; nam communis Doctorum apud PANORMITANUM (e) docet: *argumentum à contrario semper esse validum, quando verbum ponitur causative, nisi reperiat in jure expressum*

(a) Theol. bell. L. 2. diff. 12. (b) De excomm. part. extra Bull. Cœn. disp. 2. q. 3.

(c) Tit. de Cleric. pugnant. in duell. (d) *Illius vices*. §. Idem quoque.

(e) In Cap. publicato. n. 6. de Elect.

*sum contrarium.* Cùm ergo puniantur, quia immiscuerunt privatas similitudines: non puniuntur, si non immisceant. *Resp.* id neutiquam evinci: vel pro eo solum casu valiturum, quod causa publica simul est iusta. Jam verò *iusta* causa non est nulla ostentatio praelii. Imo hæc causa reprobata est à legibus, ut supra vidimus: ergo regula, ex Panormitano adducta, nil prodest ad præsentem casum.

Quodsi tamen fingatur, quoddam particularis hæc pugna ad praelii, aut belli successum momenti quidpiam conferre possit, ut olim contulit pugna Davidis cum Goliatho, ajo, si casus ita ferat, ut Monomachia praelii, aut belli fortunam post se tractura judicetur, licere eo jure monomachiam inire, quo praelium. Hunc in sensum docet P. SCHMALZGRUEBER: (a) *licitum esse militibus acceptare singulare certamen sibi oblatum ab hostibus, si periculum est, ne duello non acceptato, exercitus bonam existimationem amittat apud hostes, & isti animosiores reddantur...* idque etiam verum esse, *etsi hostis duellum obtulisset causa solius spectaculi, vel ostentationis.* Liberalior adhuc est P. WIESTNER (b), *in bello*, inquit, *licite acceptantur, & offeruntur singulares pugna unius, vel plurium militum cum totidem adversa partibus, quando id ad frangendos hostium animos, & milites ad cupiditatem, ac spem victoria erigendos necessarium, ac utile esse, judicatur.* Affert pro se SUARIUM (c) & BECANUM (d).

50. Altera duelli hujus causa, dum scilicet bellum in duellum resolvitur, magis probatur prudentibus quibusdam rerum arbitris, sive deinceps rei summa committatur quibusdam militum, sive ipsis Principibus placeat discrimen subire, & saluti subditorum proprium devovere caput, modò pacificentur de finiendo bello, quiscunque duelli sit futurus exitus. ALCIATUS totus est in commendando hoc consilio (e). "Principes ipsos", ait, "de regno ambigentes, contentiones suas hoc modo finire jus fasque est; cùm enim bellum non nisi maxima humani generis calamitate invehatur, quid justius excogitari potest, quàm ut, tanta noxa è medio sublata, hi potissimum soli armis decernant, ad quos ea res pertinet, victorém-

(a) Tit. de Cleric. pugnant. &c. n. 8. (b) Eod. Tit. n. 4. (c) Disput. 13. de bello. S. ult. n. 9. (d) De Fide, cap. 26. q. 1. n. 3. (e) De singul. cert. c. 3.



etorémque res sequatur? Extant hujus rei apud veteres exempla, quorum Caroli Andegavensis, & Petri Arragonensis illud potissimum est, qui cum de Insula Sicilia diu bellum gessissent, Martini Pontificis Romani, Collegisque Cardinalis autoritate Burdegalæ in Aquitania armis concurrere pacti sunt, juréque jurando sanxerunt, uter victus esset, insula decedere, nec ampliùs de ea re controversiam facere. Memorabile est duorum fratrum, Hungariæ, quæ inferior est Pannonia, Regum; cum enim instructo exercitu jam jam congressuri forent, periculúmque esset, ne in gentis internecionem certaretur, alter solus, intra fratris præsidia ingressus, ad eum se rectà deduci clara voce petiit, progressusque: *Quid, inquit, Frater, opus est tot fortissimorum hominum sanguine alterutri victoriam querere? quin nos potius committimus manus?* atque hæc identidem inclamans hostem trucidavit, omnibus ejus audacia perterritis, & quia Regis frater erat, tela inhibentibus, sicque universa gens in victoris jus, atque ditionem pervenit. Rarissima tamen sunt hujusmodi exempla, & quæ vix ætatibus singulis proveniant; nam qui in Principum consilio sunt, alii focordiam, timorémque Domini obtegentes, alii publicis malis locupletati, consulere solent, ne in apertum discrimen præceps eat, aut causam, quam optimam mentiuntur, fallaci armorum judicio subjiat; nec difficilis hac in re persuasio est. Sarmatæ tamen & Germani, apud quos plurimum plebs potest, plebique Principes suos ad id adigunt, ut mutuo decernant, ipsi horum malorum securi, & aliud agentes. Pontificis iraque factum laudo, atque cæteris imitandum censeo. Ita ALCIATUS Mediolanensis, qui postquam in Gallia & Italia docendo floruit, diem supremum obiit anno M. D. L.

Doctrina hæc Alciati placet etiam quibusdam recentioribus Theologis. SCHIARA (a) firmat eam effato quodam Concilii Toletani (b) dictis: *Duo mala, licet sint omnino cautissime præcavenda, tamen si periculi necessitas ex his unum perpetrare compulerit, id debemus resolvere, quod minori nexu noster obligare. Quid autem ex his levius, quid gravius, puta rationis acumine investigamus.* Idem arguit ex alia quadam lege (c).

E

Jam

(a) Theol. bell. L. 1. diff. 21. (b) Ex cap. duo mala. dist. 13. (c) Cap. quod David. XXII. quæst. 4.

Jam autem quis nescit, duellum minus malum esse bello publico? quando autem justa causa dat facultatem gerendi bellum, cur non etiam, imò cur non potius det facultatem ad duellum, quo bellum vel præpediatur, vel finiatur?

51. Id tamen antea tam parti provocanti, quam provocatæ fœdulo perpendendum, an scilicet mutando bellum in duellum rebus suis consulant. Et imò quidem, si qua pars, consideratis suis viribus, prævideat se in bello succubituram potentiori, gratuletur sibi, si duello dubio perniciem nimium probabilem amoliri concedatur. Licebit, imò oportebit hanc aleam tentare; uti dicat ratio, quam passim sequuntur Authores (a). Quòd si e contra Princeps, conferendo suas cum hostium viribus, polliceri sibi possit prosperum prælii, aut belli exitum, tunc incertæ unius duelli aleæ utique committere non decebit suam, & patriæ salutem. Sed fingamus jam 3tò, æqualem spem, merumve obversari de belli, aut prælii successu, an etiam tunc ad duellum æquè dubium descendere liceat, in controversiam deducitur.

52. CAJETANUS (b) videtur id negare tam in bello vindicativo, seu *offensivò*, quod dicimus, quam *defensivò*. Argumentum audiamus. „Tunc tantum duellum est licitum ad talem finem (scilicet ad terminandas lites & contentiones) quando habet rationem justì belli. Bellum „justum aut est vindicativum, aut defensivum. Si vindicativum, hoc „est, quando indicitur ad vindicandam injuriam, illatam patriæ, indicens bellum, gerit personam Judicis, utpote utens publico gladio contra extraneos impugnatores Reipublicæ. Hujusmodi autem Judex & „vindex fungitur persona & officio agentis: agens autem debet super- „excedere patiens, ut possit illud subicere sibi: & propterea non debet „ejusmodi bellum, nisi à potentiori indici, & sic potentiori, ut, licet „varius sit eventus belli, humana tamen ratione quasi certa sit victoria, „aut saltem non succumbere, quemadmodum Judex contra internos pacis „perturbatores non procedit, nisi habens tot satellites, ut sit quasi „certus, quòd capiat malefactores. Hoc autem in duello servari non po-

(a) *Peregrin. de duello* quæst. 16. *Valentia* tom. 3. disput. 3. q. 17. *Navarr. in Manual. c. 11.* (b) *In 2. 2. q. 95. art. 5.*

potest; quia in singulari certamine aut par est utriusque conditio, aut uni facile possunt accidere in illo actu aliqua, quæ fortiorem facient succumbere. Et propter hanc rationem, quamvis bellum aliquando indicere sit licitum; indicere tamen duellum nunquam est licitum. „

At ego parùm moror, quæ de *excessu agentis supra passum* allata sunt, veteris Philosophiæ axiomata. Id verissimum, quòd pars, læso jure suo, sanè temerè bellum vindex inchoaret, nisi solidam de prospero successu spem conciperet; patriam enim decumanis malis exponeret, ex infelici bello profecturis. Fingamus autem, parti læsæ tantas vires non esse, nec prævideri facile unquam adventuras, per quas prævalituram se credat in bello publico: an causam non liceat decidere indicto duello, sicque jus suum sibi vindicare, siquidem tamen pars adversa consentiat? certè ex hoc duello, utcumque succedat, ea mala non pullulabunt, quæ ex bello, minùs prosperè gerendo, oritura timentur. Dein fingamus, partem læsam incepisse quidem bellum cum opinione probabiliora de obtinenda victoria, eò tamen jam fuisse attritam, ut dubio omninò Marte certare debeat, quid, rogo, oberit, quo minùs ex angustiis se expediat duelli compendio? Nec validiora sunt ea, quæ CAJETANUS contra duellum, pro finiendo bello *defensivo*, suscipiendum affert. „ Si bellum justum est defensivum, inquit, prout patria aliqua indictum sibi bellum oportet sustinere, aut succumbere, tunc suscipiens bellum gerit personam ac officium resistentis, & propulsantis injuriam. Et ideo oportet tunc imitari res naturales, quæ, quantum possunt, resistunt contrariis suis, & debet in hujusmodi bello fortificari virtus resistiva, quantum potest: hoc autem non fieret in duello; quia dum unus solus ponitur ad resistendum uni, nimis debiliter consulitur huic defensioni. „ Hæc quoque tunc tantùm valebunt, ubi ad defensionem tantæ suppetant copiæ, & armorum vis, ut victoria certius ex justo prælio, aut bello continuando, quàm ex duello sperari possit. In tali rerum statu utique nemo prudens volet remedium arripere incertum præ certiore; adeoque cessat quæstio, ibi solum habens locum, ubi æqualis pro duelli & belli successu stat incertitudo. In ejusmodi rerum statu existimo, pondus habere ea, quæ antea ex *Acciario*, & aliis retulimus: ita tamen, ut, si non solius Principis, sed etiam populi salus in tali conflictu versetur, hujus quoque consensus exquiratur.

53. Quæstionem hanc eandem, quam HUGO GROTIUS valde agitatam dicit, ipſus quoque agitat (a); exiſtimat autem, ſolo Jure Gentium ea duella permitti: vetari in conſcientia. Tota ratio in eo eſt, quòd vita à DEO data prodigatur, ſalus innocentium periclitetur, & juſtitia cauſæ ex incerto duelli exitu quaratur. Argumenti hujus debilitatem, quæ ſua ſponte eluceſcit, oſtendit HERZIUS (b). Addit, ſententiam GROTII tum habere ſuum pretium, ubi bellum contra barbaros, Chriſtiani nominis hoſtes, geritur, & regio non tantum, verum etiam religio ancipiti aleæ per duellum committeretur. Hæc cum ſit cauſa DEI, cunctæ vires humanæ exercendæ ſunt, locata ſpe-firma in DEI auxilio. Sed & ipſe GROTIUS exceptionem ſuæ regulæ ſtatuit, pro eo tamen unico caſu, ſi alioquin exſpectandum ſit, ut, qui injuſtam cauſam fovet, victor ſit futurus. Notat inſuper (c): „ qui ſic in duelli exitum conjiciunt controverſiam, ſibi quidem „ juſ, quod habent, adimere poſſunt, non etiam alteri, qui non habet, „ dare, in illis quidem regnis, quæ in patrimonio ſunt. Itaque ut valeat „ pactio, etiam populi, &, ſi qui jam nati juſ habent ad ſucceſſionem „ conſenſum neceſſe eſt accedere, in feudis non liberis etiam Domini ſive „ ſenioris. „ Hæc GROTIUS circa quæſtionem hanc *valde agitatam*.

54. Quam ultra agitare ſupervacaneum duco, ſi de duello, ab ipſis Principibus quidem ineundo ſermo ſit, dum ad notationem Patris GOBAT (d) animum applico. Acutè hic Author dijudicat id, quod MASENIUS (e) narrat de FRANCISCO I. Galliarum Rege, hunc ſcilicet, ut creſcentibus in dies diſcordiis finis imponeretur, CAROLO V. Imperatori, ad ſingulare certamen provocanti, hæc inter alia reſcripiſſe: Quid verbis armisque inter tot hominum exitia contendimus? noſtro duorum, ad quem me provocabas, gladio hanc litem dirimamus, duellòque, quod poſtulas, experiamur, utri cauſa, & æquitas favcat, huic locum tempusque deſigna. “ Hæc MASENIUS, inquit GOBAT, ego autem ad quæſtionem perquam ancipitem reſpondeo, ignorari à me, utrùm illam provocationem & acceptionem duelli illorum duorum ſummorum, verè „ fortiffimorum Monarcharum veſtiverint omnes omnino circumſtantiæ, quæ

(a) J. B. P. L. 3. c. 20. §. 43. (b) De Fide pacta. cap. 2. §. 3. n. 38. (c) Loco cit. §. 44. (d) Theol. experim. Tract. 7. caſ. 18. (e) Anima Huſt. c. 4. n. 266.

quæ rem in abstracto, & per se licitam, efficerent etiam in concreto, " seu, ut loquimur, hic & nunc licitam: & ea etiam ex causa non defi- " nio; quodd expendens ingenia tam Gallorum, quam Hispanorum, exi- " stitem, haud quaquam futurum fuisse, ut alterutro occiso rediret, fir- " mareturque alma pax. Quodd si voluerint illi Reges, ut verba FRAN- " cisci videntur innuere, cognoscere ex alterutrius nece, uter eorum iusto " titulo bellum gereret, tunc sanè jam pridem NICOLAUS Papa tulit senten- " tiam (a); etenim tentassent DEUM. Malo tamen illam Regis sententiam " interpretari in religiosiorem partem. „ Utique non abs re timet GOBAT, ne, occiso alterutro Rege, bello finis non fuisset impositus. Fortè exar- " fissent acridus odia, stimulatorum ad vindicandum sanguinem regum exacer- " batos animos, nulla pactorum præviorum religione satis continendos. Id adhuc noto: siquidem periculum subesset, ne extincto per duellum Prin- " cipe, de jure succedendi lis, & inde turbæ intestinæ orirentur, consul- " tius ejusmodi duello abstineretur.

55. Quæri denique potest, quis in ejusmodi duellis pro victore sit habendus? Responder GROTIVS (b), & clariùs PUFFENDORFF (c): " Si " inter duos pugnetur, ille victor erit, qui adversarium occiderit, aut ita " debilitaverit & oppresserit, ut victum se ipse fateatur, sicut egit Tur- " nus graviter faucibus (d). Ubi plures pugnant, illa pars victrix erit, " quæ adversarios occiderit, aut fugatos ita debilitaverit, ut resistere am- " pliùs nequeant. Qui loco cessit post conflictum, in dubio magis est, ut fugisse credatur. Quodd si apud neutram partem sint certa victoriæ in- " dicia, res manet eo loco, quo fuit ante conflictum, & ad bellum, " aut novas pactiones erit redeundum. „

## §. II.

### De Duello Judiciali.

56. *Duellum Judiciale, quod apud va-  
rias gentes.*

57. *Etiam apud Germanos erat usita-  
tum.*

E 3

58. *Quin*

(a) Cap. Monomachiam. II. q. 1. (b) L. 3. c. 20. §. 45. (c) De J. N. L. §. c. 8. §. 5. (d) Æneid. 12.

58. *Quin Sanctionibus firmatum,* 60. *Est ratio inepta finiendi lites,*  
 59. *Ad ipsos Clericos & mulieres ex-* 61. *Vel superstitiosa:*  
*tensum,* 62. *Fors tamen in casu raro licita.*

56. **D**uellum *Judiciale*, quod suprà N. 21. definivimus, ita declarat **ALCIATUS** (a): “ Quamvis Jure Civili & Pontificio duellum prohibeatur, quibusdam tamen Gentium moribus receptum fuit, ex quibus vetustissimi Longobardi, quoties coram Judice integra probatione destitutus quisquam esset, & aliquid, ad plenam intentionis fidem Prætori faciendam, decesset, duellum multis casibus concedebant; dum tamen, qui rem pugna decidi optabat, jurejurando sanxisset, non dolo malo, nec calumniæ causa eò confugere: sed quia aliter quàm Divino judicio rei gestæ veritas erui non posset. ” Tum recitat novendecim omnino casus, in quibus, vi legis Longobardicæ, ad cruentum hoc deficientis justitiæ supplementum fas erat recurrere.

Longobardicus mos universam Italiam inundavit, tenuitque per plura sæcula. Poëtæ, Jurisperiti, quin & nonnulli hujus gentis Theologi statuere certas duello leges, per Academicas passim concertationes ventilatas. Multa cum laude & eruditionis abundantia veterem hanc caliginem peragravit **Marchio Scipio MAFFEI** (b). Alias quoque gentes idem error abduxerat, dum scilicet Jus etiamnum squallebat confusa caligine, & Leges vel nondum erant conditæ, vel ignoratæ; unde tritum illud invaluit:

*Si non sufficiunt Jura, veniamus ad arma.*

Meminit **ALCIATUS** de Gallica lege, condita à **PHILIPPO** Pulchro, & **ALCIATI** etiamnum ætate observata, qua sancitum erat, ut, si quis occultis criminis, capitalisque reus sit, atque ita de eo constet, ut quæstioni subijci possit, condemnari non possit, is arbitrato accusatoris duello experiatur.

Pugnas ejusmodi plurimas non sine elogio legere est præcipuè apud **Du CANGE**. (c) Id tamen laudi dandum genti Gallicæ, quod præ aliis tollendo

(a) De cert. sing. cap. 3. (b) Della Scienza chiamata cavallaresca. L. 3.  
 (c) Glossar. med. & inf. Latin. V. Duellum.

lendo cuicumque duello ultimis temporibus laborarit. Anglos suos SELDENUS (a) ab hoc delirio immunes extitisse ante Normannorum invasionem defendit, cui autem contradicit BASNAGIUS (b).

57. Quid de veteribus Germanis dicam? narrat AVENTINUS, senatum populūque Bojcum unā cum Sacerdotibus DEUM publica voce invocasse, ut certamini adesset iudex omnium æquissimus, & litem pro æquitate dirimeret. (c) Præterea testis locupletissimus sit nobis CHRISTOPHORUS LEHMANNUS, quo nemo rerum Germanicarum faciliè fuit peritior. Hic testatur, (d) quodd, si quis innocentiam suam contra accusatorem per testes satis demonstrare vel non potuerit, vel non voluerit, id reliquum habuerit, ut pugna publica ab accusatione se purgaret: usumque duelli apud veteres Francos etiam post suscepta Christiana Sacra ita invaluisse, ut ad lites levis cujusque momenti decidendas sanguinarium hoc consilium arripuerint, justitiam & innocentiam heteroclitica hac ratione in apicem protracturi, quasi verò viribus debiliior semper debiliorem quoque causam haberet.

Et quod mirè, non solum dubiæ quæstiones *facti*, sed & *juris* duellis illis decidas fuisse legimus. Ejus rei insigne exemplum idem author affert (e). Disceptabatur, imperante OTHONE, multa cum contentione, an demortuo patre superstites filii ac filiae solæ, vel unā cum his etiam unus fortè ante patrem defuncti filii aut filiae superstites liberi ad capiendā bona hæreditaria essent admittendi *in stirpes* saltem, ut loquimur, si non *in capita*. Visum erat compluribus, excludendos esse hos nepotes ab hæreditate avi. Contrā sentiebant alii. Hinc emergente casu multum quandoque sanguinis fufum est, donec OTUO in pagum, Sirela dictum, selectos arbitros convocavit, qui re seriò discussa, in eam tandem concessere sententiam; jus fasque postulare, ut illi quoque nepotes ad adeundam hæreditatem admitterentur. Non displicuit OTHONI, & Imperii Proceribus sententia: visum tamen est eis, æquitatem etiam duello examinare, veluti argumento, ut credebant, minimè fallaci. Quare delecti Equites invitantur, qui in arenam descenderent, in duas turmas divisi. Harum una tuebatur latam illam ab arbitris sententiam, oppugnante altera. Pugnatum est, & victoria re-  
lata

(a) De Duell. c. 6. (b) Reflexions sur les Ducs. c. 4. §. 14. (c) Annal. Boic. L. 4. c. 14. (d) L. 2. Chron. Spir. c. 39. (e) L. 5. Chron. Spir. c. 4.

lata à sententiæ propugnatoribus, in legem Imperii receptum, ut etiam nepotibus pars sua posthac obveniret.

58. Cùm duellum non aliter, atque Ariadnæ filum in pretio esset, cujus ope è labyrintho emergeret perplexa Justitia, non mirum, quòd pro ejus conservatione leges quoque summi imperantes condiderint. OTHO II, Imperator, teste GONZALEZ (a), in Romaniola de Principum Italorum sententia lege promulgata statuit, ne deinceps in Italia controversias *jurejurando* definiant propter perjuratorum multitudinem, sed duello potius; (b) & tamen, teste ALCIATO (vid. supra n. 56.) necessum esse ducebatur, qui rem pugna decidi petebat, *jurejurando* sanciret, non dolo malo se cò confugere. Addidit OTHO (c), ut idem observaretur non solum in laicorum, sed etiam Ecclesiarum litibus. FRIDERICUS Imperator (d) ita statuit: *Si quis hominem, intra pacem constitutum, occiderit, capitalem subeat sententiam: nisi per duellum hoc probare possit, quòd vitam suam defendendo, illum occiderit.* Sileo integros libros ab antiquis conscriptos, quibus solcmnitates, formæ, ac jura duellorum discutiuntur uberrimè, ita ut hæc pugnandi ratio teste BONAVENTURA GANERIO (e) ad formam *judicii contentiosi* redacta sit. Si quis vel solum ALCIATUM legat, mirabitur, rem injustissimam multa cura ad justitiæ apices fuisse examinatam. Plura BASNAGIUS (f) commemorat hanc in rem.

59. Crescet admiratio, dum legitur etiam ab iis, observatum fuisse inhumanum hunc morem, à quibus observari omnium minimè debebat. Refert GONZALEZ (g) controversias varias, quas Clerici olim duello diremerant, vel adhibita manu propria, vel per substitutos. Unde ad tollendum indecentem usum procusus est titulus iste in libris Decretalium *de Clericis pugnantis in duello*, carnificinam illam è Clero proscribens. Quin ipsæ imbelles fæminæ, ad colum natæ, per procuratorem pugnare jubebantur, præsertim lege Grimoaldi, Longobardorum Regis, ubi adulterii suspicionem incurrerant. (h)

60. Pau-

(a) Ad c. 2. de Cleric. pugn. (b) L. 2. Leg. Longob. Tit. 55. edit. Lindembrog. (c) Leg. ult. ibid. quæ est Lex 11. Ottonis II. in Corp. Jur. Germ. antiq. col. 1271. (d) Feud. 2. Tit. 27. (e) Disput. de Duell. th. 43. (f) Reflexions sur les Duels c. 10. (g) In Tit. de Cleric. pugn. (h) Lib. 2. Leg. Longob. Tit. 55. l. 12. quæ est lex 7. Grimoaldi, Basnage L. cit. c. 4. §. 11.



60. Pauca hæc lineamenta monstrosam judicialis duelli faciem addo luculenter exprimunt, ut nisi rudibus illis sæculis incredibilis dominata fuisset infecita squalentibus litteris, vel ipsa etiam ætas illa deformitatem palpare debuisset. Quid enim? ut stringam breviter: vel persuasum habebant Præfides duellorum, judices, singulari Numinis providentia ita temperandam fore pugnam, ut certò victura esset ea pars, quam sciret DEUS justam fovere causam? vel credebant, pugnam geri naturali prorsus robore ac dexterritate; sicque duellum adscisciebant, non tam ut justa causa triumpharet, quam ut liti finis imponeretur? si hoc, tunc pessimè functi sunt officio judicis; hujus enim est non tam curare, ut lis finiat, quam ut finiat secundum jus & æquum. Quænam autem hæc æquitas, innocentem æquali cum nocente discrimini obijcere? quænam æquitas, ex armorum successu de causæ justitia ferre sententiam, & cum, qui succubuit, quasi verè reum, gravi supplicio, imò vita mulctare? si in causa criminis liti finis quaeritur, absolvatur reus, dum accusator in probando deficit. (a) Vel si quid valent accusatoris argumenta, quæstioni subjiçiat reus adhibitis tormentis, vel jusjurandum adhibeatur in subsidium. Fortè cum Othone II. perjuriarum multitudinem quis timet? perjurium timeamus, & non horreamus effusionem humani sanguinis? perjurium jurantis malitiæ imputabitur: econtra innocens effusus sanguis judici, cæcis armis committenti causam. Unde non immeritò ALCIATUS contra legem FRIDERICI, paulò antè recitatam, sic arguit (b): " Quis putaret hanc legem observandam, quæ à ratione naturali, publicæque utilitate penitus aliena est? cùm enim de delicto non ambigatur, constetque occisum hominem, debet reus ipse exceptionem suam probare, quòd defensionis causa fecerit; cùm adversus eum sit legis præsumptio. Finge, neminem velle cum eo congredi, an jus vindictæ, quod ad Rempublicam pertinet, extinguitur? quàm absurdum, ut, qui injuriam sibi, vel alicui suorum factam, Judici indicavit, proscutus est, probavit, rei arbitratu armis decernere compellatur, & malum malo addere. "

F

Ar

(a) C. L. 4. de edend. (b) De singul. cert. c. 3.

At id ego miror, quòd *ALCIATUS* legem *Fridericianam* improbet: illam tamen *PHILIPPI Pulchri* (vid. n. 56.) Constitutionem summa dicat æquitate niti. Quæ enim peregrina illa æquitas, quæ ad exculpendam veritatem modum aptum, scilicet equulei cruciatus reicit, electo alio prorsus inepto, Duello scilicet, in quo plerumque succumbit, non qui causa, sed qui arte & viribus inferior est? in causis civilibus, ubi quæstio juris oritur, consulatur recta ratio, hujus est dictare leges condendas, & conditas interpretari. Cur adhuc in duello quæsit *Otho II.* quod in prudentium judicio jam invenerat? vel præponderat causa unius, majusque pro se momentum habet? ergo adjudicetur ei victoria. Si utrinque lanx fluctet in æquilibrio, urgeantur partes, ut amicè componant litem. Feræ ita lites dirimunt, ut idem sit causa & pugna vincere: hominibus id indignum judico.

61. Nisi fortè credant, Numen intervenire, & singulari providentia moderari certamen, ne unquam vincatur, nisi is, qui causam iniquam sustinet. At hoc ubi scriptum, ubi revelatum exstat? quando, & cui promisit id *DEUS*? speramus, inquit, ita à *Deo* temperandum fore certamen, ferme sicut olim speraverant illi, qui fortibus satis frequenter sunt usi, testibus sacris paginis. At, quod ibi refertur, vel disponente Numine factum, ut fas est credere de sorte, quæ *JONAM* prodidit: vel ex expressa *DEI* lege, quali originem debet poculum Zelotypiæ (a). Ubi autem *DEUS* vel expressè mandavit, vel cui tacitè suggestit, ut intricata causa gladio decidatur in judicio? cùmque ad ejusmodi sortem recurratur absque ulla necessitate, crimen id est, quod ad *DEI* tentationem pertinere asserit *D. THOMAS* (b); unde etiam duellum fortibus vetitis annumerat.

Ex eadem causa sacri Canones cum reliquis *purgationibus vulgaribus* duellum proscripsere. Et utinam non eventus jam sæpius docuisset, quam inani spe se læsent, qui præter rerum ordinem justæ causæ adfuturos Superos autumant. Ejusmodi casum legimus in libro V. *Decretalium* (c), ubi quidam furti crimine accusati, cum accusatore coacti sunt inire duellum, in quo succubuerunt, eapropter per Consules Spoletanos bonis propriis spoliati: postea tamen furtum apud alios inventum, ipsique innocentes re-

perti

---

(a) Numer. 25. v. 15. (b) 2. 2. q. 95. art. 8. (c) Cap. Significantibus. de purgat. vulgari.

perti sunt. Unde INNOCENTIUS III. Pontifex Consulibus dedit in mandatis, ut ablata restituant universa. Etiam LUITPRANDUS Rex Longobardorum iniquitatem hujus Monomachiae bene agnoscens: *incerti sumus*, inquit (a), *de judicio DEI, & multos audivimus per pugnam sine justitia causam suam perdere: sed propter consuetudinem gentis nostrae, Longobardorum legem impiam vetare non possumus.* (b)

62. Ultima verba ansam praebent quaerendi, an unquam Princeps, vel quisunque supremam potestatem teneat, permittere sine piaculo vel potuerit, vel possit, ut ejusmodi duellis causae dubiae decendantur. Teste NICOLAO DE LYRA (c) docent quidam, Principes in omni casu peccare graviter concedendo duella: sibi tamen hoc videri durum; eoquod S. LUDOVICUS Rex Franciae, & CAROLUS M. & multi Praelati hoc sustinuerunt: & quia licitum est tolerare minus mala, ut evitentur majora, quae nisi duella fierent, evenirent, ut vastationes, incendia, homicidia &c. Ponderatis his rationibus, suam subjungit mentem CAJETANUS (d) asserens, peccare Principes concedendo; non autem *permittendo* ex urgenti causa, sicut nec peccant *permittendo* usuras, & meretrices. Non discutiam ego, utrum elapsa retro saecula tot & tanta mala timere sibi debuissent, & quidem nulla alia ratione avertenda, ut duella, tanquam mala minora, potuerint absque piaculo *permittere*, vel etiam *concedere*. Pro hodierna aetate fusiùs hoc dubium ventilatum invenies Cap. IX. art. 3.

Illud absque difficultate concesserim, si quis rudi illo aëvo id, quod certè suum erat, alia via consequi non potuisset, aut vitam contra accusatoris calumniam non defendere, nisi acceptando coram judice, vel etiam offerendo duellum, sine labe conscientiae id facturum fuisse; quia licitum pro defensione sui, & rerum suarum pugnare, ait CAJETANUS ex NICOLAO DE LYRA. Idem admittit MOLINA (e), aliisque. Nec movet, quod in contrarium obijciunt Observationes selectae Hallenses (f): "tutius scilicet esse mortem etiam injustam pati, quam cooperando participem se reddere culpae alienae; cum illa dimicatio imperetur non tanquam tutela incul-

F 2

„pata,

(a) Inter Leges Luitprandi lib. 6. leg. 65. (b) Lib. 1. Leg. Longob. Tit. 9. de homicid. lib. hom. l. 23. (c) In Lib. 1. Reg. c. 17. (d) In 2. 2. q. 95. art. 8. (e) De J. J. tom. 4. tr. 3. disp. 17. n. 7. (f) Tom. 9. observ. 5.

„pata, sed tanquam probandi medium. „ Contra est, quòd Judex non tanquam *medium probandi*, sed tanquam *medium litem finiendi* dimicationem proponere possit. Dein, cur nequeat conscientiae labem à se amoliri dimicans publicè profitendo, se non *divinationis*, sed *defensionis* causa pugnam suscipere? Sed mittamus ista: gratulemur potiùs hodiernae ætati, quæ, exorta plena Jurisprudentiæ luce, ad tenebras damnavit sanguinarium illud desperantis cerebri inventum.

## ARTICULUS IV.

### *Quid hodie circa Duellum usus ferat?*

**N**on ampliùs certatur hodie ex vana ostentatione virium, nec gladiatores atroces in Circo ludos dant. Non est necesse per hæc spectacula militiæ parare pubem; neque enim in hodiernis præliis, tantum valet lacertosum corporis robur, quàm expedita pulveris nitrati tractatio. Neque singularia in bello certamina incuntur, præcipuè à summis Princeipibus; pretiosior quippe horum vita habetur, quàm ut pro vita gregariorum militum discrimini committatur, sperato effectu nihilominus fortè non secuturo, ob fluxam in servandis pactis fidem. *Fid. n. 54.* Lites, ubi de fortunæ bonis agitur, æquior hodie Astræa decedit, cujus Deæ Sacerdotes èd perpolierunt leges ac jura, ut magis optem, modum illis poni, quàm ultrà acui. Neque si quis, primæ etiam Nobilitatis vir, per tritam juris viam, quod suum est, querit, propterea ab adversario provocari ad duellum potest; nisi huic fortè mendacium, aut calumniâ obiciat. Si quid autem famæ, aut honori noxium illatum fuerit, id non nisi armis depelli, aut vindicari posse existimant, vel existimare debent reluctante intellectu, tum Nobiles, tum militiæ Duces prope omnes; non enim frustra se gladios gestare existimant, & soli ferro inesse autumant vim sanandi tabern, quàm afflâsse audacior homo creditur. Itaque dispiciendum imò, quid sit honor, quibûsque modis violetur. add. Quid circa modum vindicandi hodie moris sit.

## §. I.

Quid sit Honor, quibúsque modis violetur?

63. Definitur bona existimatio, fama, *genera varia, tum gravia, tum honor, levia.*  
 64. Infamia, contumelia, & hujus 65. Refellitur idea falsa honoris.

63. **D**icendum inprimis, quid sit *bona existimatio*. Est ea aliorum de nostra perfectione iudicium (a). Quales perfectiones censentur virtutes, vires, scientiæ, pulchritudo, nobilitas, opes, favor Principum &c. talia enim commendant hominem, & bonam de ipso existimationem causant (b). Quod si hæc existimatio plurium animis insideat, *fama* dicitur; existimationem enim unius ad summum *famam partialem* licebit dicere cum Card. de Lugo. (c) Cum tamen *fama à fando* derivetur; tum primum fama completa erit, si existimatio concepta à pluribus non jam solo animo conclusa maneat, sed & sermocinatione diffundatur. (d) Et ita explicandum venit illud juris: *existimatio*, seu fama, *est, dignitatis illa status, legibus ac moribus comprobatus*. (e) Si jam bonam existimationem ei, de quo concepimus, actione externa significamus, ac testamur, honorem ei exhibemus: unde *honor dicitur testificatio excellentia alterius* (f), vel, ut habet MOLINA (g): *est exhibitio alicujus rei velut in testimonium & recognitionem quamdam excellentia, quam habet ille, qui honoratur*. Si detur hoc testimonium verbo: *laus* erit; si laus claritudinem acquirat, in gloriam abibit; nam *gloria* est clara cum laude notitia. De actibus externis, quibus existimationem monstramus, rectè ait Illustris WOLFIVS, (h) eos variare moribus gentium.

64. Facile jam colliges, quid sit *infamia*. Est scilicet concepta à pluribus de vitiis alicujus opinio, sive, ut MOLINA definit (i), est læsio status, dignitatis seu conditionis, personæ alicujus. Qui opinionem hanc suam, seu judi-

F 3

cium

(a) Wolf. J. N. p. 1. §. 538. (b) Lugo. de Just. D. 14. n. 2. (c) Ibid. n. 1. (d) Illung. T. 4. D. 3. n. 101. (e) L. 5. §. 1. ff. de extraord. cognit. (f) S. Thom. 2. 2. Q. 123. a. 1. ad 2. (g) De Just. Tom. 5. D. 1. n. 1. (h) J. N. p. 1. §. 538. (i) Tom. V. D. 7. n. 4.

cium de alterius imperfectione actibus externis declarat, alterum *ignominia* afficere dicitur, seu *contumeliam* inferre. Dubitari posset, an etiam tunc contumeliam inferat, cum verum de altero dicit. Edictum Marschallorum Galliae, editum contra duellum (a) videtur id negare: at crediderim, intelligendum esse, si quis verum dixerit loco, & modo decen- te; secus etiam veritas in contumeliam accipietur. Dividitur autem contumelia (b) in *Convitium*, quo vitium, vel defectus etiam naturalis obiicitur alteri cum ejus dedecore. *Exprobrationem*, qua idem obiicitur praesenti in faciem. *Irrisumem*, qua quis praesens, vel absens obiicitur risui. *Illu- sionem*, qua quis obiicitur ludibrio quasi tacite. *Subsannationem*, qua quis obiicitur risui per gestus, aliosve motus corporis (c). Denique *calumnia* erit sermo, quo alteri imputatur imperfectio, qua non laborat. Haec omnia communi nomine *injuria* veniunt; quamvis enim *injuria generaliter* dicatur omne id, quod non jure fit: *specialiter contumelia à contemnendo dicta est*. (d)

Porro si per dictum vel factum honor, vel fama leviter violatur, *injuria*, vel *contumelia levis*: si graviter, *gravis* aut omnino *atrox* vocatur. Levitas, aut gravitas ponderatur ex condicione personae injuriam inferentis, aut patientis: ex ipsis verbis, aut factis: ex loco, modo, tem- pore &c. Caterum potest quis etiam injuria affici in personis sibi arcte conjunctis, vel in sua potestate constitutis. Sic qui injuriose tractat alte- rius uxorem, sponfam, filiumfamilias, famulum &c. injuriam dicitur fe- cisse hero, patri, sponso, marito. Universè attendi debet ad id, quod usus fert, & mores diversarum nationum; nam ex his potissimum defu- mendum est, quanta sit injuria, an duello elui debeat ex Monomachorum pseudo-legibus. Illud adhuc notandum venit, quod proprie *injuria*, aut *contumelia* non detur, ubi honor & existimatio non laeditur dolose, hoc est, non ex intentione & animo laedendi. Hinc qui per jocum profert verbum, alteri injuriosum, vel inconsideratè, injuriam non facit. Sed circa jocos, ut bene notat P. PICHLER (e), notandum, valde circumsp- ctos esse debere, qui iis vexant alios; saepe enim contingit, ut jocis ni-  
mis

(a) An. 1643. n. 1. apud Lunig. (b) Lugo D. 14. Sect. 11. (c) Vid. la Croix L. 3. p. 2. n. 1223. (d) Fr. Instit. de Injur. (e) Ad Tit. de injur.

mis falsis, & facietis non satis liberalibus, præsertim si in aliorum corona aut frequenter jacentur, alter non immerito offendatur.

Nec semper juvat dicere, joco id factum; sæpe promicat latens nequitia, & animus alterum confundendi. Hinc, ut duella evites, cautè jocare, nec nisi cum iis, quos familiarissimè nôsti: secus scabrosi fortè ingenii homo in serium nimis, & partem malignam trahet jocum tuum. Ex æquo autem tunc judicatur, seu præsumitur adfuisse *dolus*, seu animus inferendi contumeliam, seu injuriam, si verba vel facta (nam & factis infertur injuria, quæ dicitur *realis*) de se jam sint contumeliosa, vel probrosa: licet quis protestetur, se non dicere, vel facere malo animo; cum sit protestatio contraria facto, nisi videlicet sufficienter probet, abfuisse iniquum animum (a). Sicut vice versa, si verba, & facta de se non sint contumeliosa, vel probrosa, judicatur abfuisse animus lædendi. Et hæc est, quam hodie docti de honore definitionem statuunt.

65. Notat autem Marchio MASSEIUS (b), quod Authores illi, qui de *Scientia Nobilium*, seu methodo vindicandi honorem bello privato, minus solidè scripserunt, in definienda honoris idea non satis aptè quandoque loquantur. Vocant honorem bonorum omnium supremum, cui opes, amicitia, & ipsa vita sit postponenda; & ut tanto facilius fidem inveniant, *honorem* non rarè confundunt cum *honesto*, de quo utique verissimum est, quod ejus cura homini debeat esse prima. Adverti ego, quod in hoc sensu hodierni quoque viri Nobiles, ac militares quandoque honorem accipiant, dum, quanti honorem suum faciant, multo cum ardore prædicant. At probè notandum venit, quod *honestum* plurimùm differat ab eo honore, quem ex legibus Monomachiae privato bello defendere fas esse autumant. *Honestum* in animo viri probi residet, servaturque, licet ei negetur ille *honor*, qui dicitur *testificatio excellentia alterius*. Insurgant contra mille convicia: suo tamen hoc bono gaudet mens conscia recti. Pro hoc *honesto* vitam rectè exponit in prælio miles, dum pugnat, non ut laudetur; hoc enim vanum quid est: sed quia modò pugnare honestum est, ac virtutis. Monomachi autem non pro hoc *honesto*, sed pro illa

*testi-*

(a) L. 5. Cod. de injur. (b) Scienza Cavalleresca lib. 1. c. 2.

restitutione rixantur, quæ cum non raro bene meritis negetur, exhibeatur autem indignis, jure tanti esse non debet, ut inter bona hominis supremus ei locus detur, id quod alibi demonstrabimus; interim monuisse contenti de vocis abusu, ne quis decipi se facile sinat.

## §. II.

Quid circa modum vindicandi hodie moris sit?

- |  |  |
|--|--|
| 66. Pro jacta injuria, communi iudicio, præstanda est satisfactio, | 71. Dicentem calumnias, sufficit mendacem vocare, vel actionem instituere ex L. diffamari. |
| 67. Nonnunquam etiam pro exigua, & facile excusabili.              | 72. Alapa, aliæque verbera quale remedium postulent.                                       |
| 68. Conditur in modum satisfaciendi.                               | 73. Damna recusantis duellum,  |
| 69. Eligitur quandoque modus compensarij;                          | 74. Etiam non lethale, vel fictum.   |
| 70. Præcipue ubi obstructa est Furis via.                          |  |

66. **Q**Uæ mala persuasio, & quis exortus inde malus mos hodie apud plerasque gentes Europæas vigeat, stat enarrare. Nec tamen is est omnium consensus, ut non diversi diversa quandoque sentiant in re, quæ arbitrariæ potius tyrannidis, quam rectæ rationis regulis nititur. Is ergo ut plurimum inter nobiles ac militares viros mos obtinuit, ut quacunque ex causa cuiquam verbum indecentius, aut injuriosum vel ore, vel calamo exciderit, sive in præsentem, sive in absentem prolatum, is satisfacere læso teneatur, nisi vindicem læsi munus experiri velit. Idem de actione ignominiosa statutum habetur, e. g. dum in faciem quis subsannat; aut alterius pectori manus iniicit. Quo facto neque læso liberum est satisfactionem exigere, neque lædenti eandem præstare. Utrumque jubet pseudo-lex tyrannica. Plerumque id quoque sancitum est, ut maritus ad duellum provocet, si uxori suæ à quoquam aspersa fuerit nota adulteræ: hac enim, ait BIRAGO, utrique conjugij aufertur honor. Multis hanc amentiam exagitat MARCHIO MÆFELIUS. (a)

Dixi



Dixi, hunc morem obtinuisse *inter nobiles ac militares viros*; ex hoc enim ordine sit oportet tam lædens quàm læsus, provocans ac provocatus. Vid. n. 29. Vixdum ergo ejusmodi læsio, veluti scintilla, temere promicuit, illico, ac si in pulverem pyrium incidisset, suscitavit flammam, quam nisi in tempore amici probi, & fideles sopiant, crepitus pervadit militares turmas, & nobilium aedes. Mussitatur primò: tum altiore voce duelli necessitates ingeritur: læsus provocare debet, & provocatus comparere. Si quis horum longiores moras trahat, lividis passim notatur oculis: caribus abstinere æqualium cogitur veluti leprosus, donec per vulnus aut mortem ab hac lue se purget.

67. Initia horum tumultuum sunt quandoque exigua, futilia. Contigit, ut Herus jactum ab alio in eanem suum probrum duello debuerit vindicare (*Vid. N. 314.*). Sunt quandoque facile excusabilia, dum mitiore explicatione diluitur dictum, quod temere excedit: modò hæc detur in tempore adhuc, & hominem inveniat pacificæ indolis (*Vid. N. 82.*). Hæc ubi nihil proficiat,

68. Satisfieri sibi pars læsa postulat, vel per libellum provocatorium (a), vel per internuncium. Deliguntur utrinque patrini, de quibus dictum N. 32. seq. Constituitur dies, locusque modò explicato N. 7. seq. Etiam genus armorum designatur, an scilicet nitrato pulvere, vel chalybe agere placeat.

69. Quandoque, præcipuè dum moras non patitur æstus, missis ambagibus, provocans & provocatus contendunt ad locum aptum, compendioso rem absoluturi. Unde duellum extemporale oritur, quod rixæ nomine persæpe palliatur, vid. Art. I. §. 3.

70. Ex re sua facturos se credunt multi, si forè cum alio collisi, missa ulteriore mora, quamprimùm possunt, confligant; nõrunt siquidem, quàm multis difficultatibus obnoxium sit, quærere satisfactionem via Juris. De his difficultatibus vide amplam tractationem *Capite sequente Art. 1.* Minus difficile est honorem absque duello reparare in statu Civitatis bene ordinate, sive ubi Principes, & Magistratus succurrunt læso in honore, vel provocato efficacissimis modis, quos sapientissimè excogitatos leges

G

ges

ges *Cap. seq. Art. 1.* Ubi etiam prospectum est pro casu, dum quis ab extero provocatur ad locum neutrarum partium.

Ubi autem vel leges ejusmodi salutare non vigent, aut non observantur, prima lex Monomachorum est: "*ne inultum quid feras, quo honor tuus, & existimatio est laesa.*"

71. Si facinus probrosum, vel crimen falsò tibi quis exprobravit, proderit eum arguere mendacii, & infamem declarare, donec dictum argumentis probaverit. In probando si deficiat, tu honorem salvasti tuum, & alter inter infames abjicitur. Quòd si autem infestis tibi Judices nanciscaris, vel incentores socii adsint, præcipuè si contra te probatio saltem ad speciem aliqua afferatur, tum enimvero ad duellum condemnaberis.

Si coram aliis, te absente, malum contra te sparsum rescias, suaserim, ut hominem vel accedas tu, vel à te vocato dicas, nolle te faciliè fidem adhibere rumori, qui ad aures tuas pervenerit: ne tamen gravetur coram præsentibus edicere, qui res se habeat. Sic dicendo dabis locum alteri, ut vel neget, ea à se dicta: vel narratione sua mitiget; unde pacificis vobis esse licebit, nisi incentores obstant. Licebit nihilominus semper, imò quandoque expediet, querelam ad Magistratum, quin ipsum Principem deferre. Licebit; quia agere ex *L.* diffamari prohibitum est nemini: nec ulla consuetudo huic Juri ad agendum, vel Juri Principis ad causam cognoscendam obesse potest. Atque ex hac lege qui agit, necesse non habet probare in judicio, unde ipso hoc verè dictum fuerit, vel an malè; prævenire solummodo quærit accusationem, & Judici indicia præbere, quibus vel in crimen suum, vel innocentiam inquireat. Expediet etiam quandoque ita agere: præcipuè si alicubi gentium calumniandi libido invalescit contra ipsos etiam Judices, & tribunalium Præsides, atque ipsæ partes litigantes dicantur similia spargere. Hanc causam deferre ad superiorem Senatam oportet, vel ipsum Principem, ne quis temere ausit posthac effutire quælibet, & ut Judices in administranda justitiâ, ac servanda morum disciplina sine molestia valeant pergere.

72. Quòd si alapa quis, vel baculo te percusserit, tunc ajunt, desperatum esse malum, aliudque in roto, qua latè patet, terrarum orbe non dari pharmacum, quàm sanguinem in pugna fundendum, & quidem

non

non parçè. Plura alia; quæ de verberibus vindicandis statuit Monomachorum Alcoranus; leges fusè à N. 194. usque ad N. 235.

73. Ad duellum subeundum condemnatus si quis abhorreat, & tergiverferur; triplex habet; quod timeat, damnum. imò ignavi hominis notam fert cum contemptu. addò societate æqualium, & nobiliorum circulis excluditur. 3tiò non rarè etiam dignitate, munere; ac fortunis excidit. *Vid. Cap. IV. V.*

74. Si quis per duellum non lethale, vel fictum molestiis se exercitare possit; minùs saltem infelix erit. De quo duelli genere vide amplè dicenda *Cap. X.*

Plura; quæ de hodierni duelli more dicenda superessent, hoc loco prætereo, utpote enucleanda per tractationem materiarum sequentium. Primo itaque Capituli finem imponimus, visuri jam; *quale sit duellum, postquam examinavimus, quid sit.*

## CAPUT II.

### DE PRAVITATE HODIERNI DUELLI.

**N**È quid inultum feras, quo honor tuus, & existimatio est laesa: Legem habemus, & secundum legem expedienda sunt arma, ut honor in salvo sit. Ita conclamant hodierni Monomachiae Sectatores. At legem hanc pseudo-legem esse, nulla auctoritate contra rectam rationem, distante cæco furore, introductam, probi, doctique omnes existimant. Nec dubito, complures esse militiae, domusque Nobiles, qui iniquitatem ejus, ac tyrannidem satis perspectam habeant, ac de-rententur: nihilominus torrente abrepti, & ipsi paratum circumferre debent sanguinem, quò maculam lavent, si qua fortè honori aspergitur. Pseudo-legem ergo hanc excutere juvat, &, qualis sit, ante oculos ponere, singula ejus probra enumerando; ut hodierni duelli pravitas ad oculum pateat. Ajo itaque: Hodiernum duellum I. nullo modo esse necessarium. Quin II. etiam ineptum ad reparandum honorem. III. Non

esse argumentum veræ fortitudinis. IV. Esse crudele. V. Injuriosum Magistratibus. VI. Noxium Reipublicæ. VII. Ignoratum olim moratis gentibus. VIII. Christianæ legi summè contrarium. Singula per singulos Articulos discutietur.

## ARTICULUS I.

*Duellum nullo modo est necessarium ad tuendum honorem.*

**N**ecessitas, ajunt Monomachi, quæ facit licitum, quod non est licitum in lege (a), hæc animum egregium ad duellum cogit, dum vel labem est passus honor: vel, ne patiatur, discrimen imminet. Præterea hæc ferrea necessitas clypeus est, quo se contra sacra æquæ ac profana fulmina tuentur. Dehortari quisquam velit militarem virum à concepto pugnandi proposito, audiet illico argumentum hoc opponi, huc Achillem in prima acie locari. Et profectò, antequam ego sapientissimas Principum diversorum Constitutiones pervolvendo, efficacissima remedia conspexi, quibus huic malo occurrere satagunt, curasque solertissimas, quibus in omnem se versant partem, ne difficultatem ullam non complanatam relinquunt, antea, inquam, ipse ego opinabar, præteritam hæc necessitatem non esse omnino inanem: in solis certè Theologorum libris ægrè poteram acquiescere; quamvis enim horum consilia, suggesta tum læso, qui provocare deberet, tum provocato, cujus esset comparere, utique suum pretium habeant: necdum tamen penitus videntur confringere jugum, quod vel inviti ferunt militares, ac nobiles viri: nec malo efficax medela erit, quamdiu Principum, penes quos suprema potestas est, studium non accedat, ut rectè cum aliis sentit MENDO (b).

Experientia hætenus docuit, quantum in præcavendis, atque abolendis duellis Principes possint, si tamen seridè velint: & vicissim, quàm parum quæcunque remedia valeant, si supremam hanc auctoritatem sociam non habeant.

Fuit etiam, quæ DEI gratia est, ea multorum Regum, ac Rerumpublicarum cura non postrema, ut, quæcunque possent, ratione, huic malo

(a) R. J. 5. Decretal. (b) L. 3. Jur. Acad. q. 29. Append. de Duell.

malò irent obviam: adèd præclaram & multiplicem adhibuerunt industriam partim impediendis, partim puniendis duellis, ut, siquidem inhaereant his, quæ saluberrimè constituerunt, à suis saltem Finibus quilibet exclusurus sit hoc malum, suo, & subditorum ingenti bono. Edièta omnino quinquaginta sex solus LUNIGIUS (a) collecta exhibet, à variis, tam intra, quàm extra Germaniam Principibus, Regibus, Imperatoribus, atque Civitatibus Imperii liberis edita, quibus non solùm prohibentur duella, & cura adhibetur sopiendis dissidiis: sed id inprimis curatur, ut injuriam fortè passo præstetur satisfactio, ne opus habeat, armata eam manu quærere; probè enim notavit FRIDERICUS WILHELMUS Rex Prussiae (b), & cum ipso EBERHARDUS LUDOVICUS (c) Dux Württembergiae, frustra fore saluberrima mandata, prohibentia duellum, nisi læsis alia ratione violatus honor reparetur. Insuper in his ediètis provocatus instruitur, qui gerere se, & expedire debeat, quin necesse habeat in pugnam condicere. Audiamus itaque §. I. Monomachum sua se necessitate facundè excusantem. §. II. Ponderemus consilia Doctorum, hæc suggesta ad evitandam necessitatem provocandi. §. III. Eorundem consilia suggesta provocato ad evitandam necessitatem comparendi. §. IV. Exponamus studia summorum Principum ad elidendam necessitatem provocandi. §. V. Eorundem studia ad elidendam necessitatem comparendi.

### §. I.

Auditur Monomachus necessitate se excusans.

75. *Perditur fama, & sape officium,* 77. *Nec expedit petere veniam, aus recusato duello.*  
76. *Nis juvat implorare Magistratum.* 77. *Nec expedit petere veniam, aus petitam dare.*

75. **P**assim audire est has, similèsvæ voces querulas: Quis vitio vertat nobili animo, si vel provocatus compareat; vel dum injuriam passus est, ipse provocet? *Honor, & vita pari passu ambulant; &, si perdamus omnia, famam servare monemur.* Quis autem famam, & honorem

(a) Corp. Juris Milit. (b) Ediè. 1713. (c) Ediè. an. 1714.

tuebitur nisi vindex gladius? Recusat hunc quis stringere? illico audiet, vecors, ignobilis fungus, caudex honoris incurius, homo nauci, & si quæ sunt alia ejusmodi convicia. Recusabunt commilitones cum socium admittere in servitio: gregarii ejus detrectabunt imperium, desertum *absque synagoga faciens*. Undique contemptus abstinere debebit societate æqualium, &, nisi passim velit probra excipere, ad desertas Insulas emigrare. Missionem petat à legione sua vir militaris? dabitur: at nullibi terrarum recipietur illotus: vel latente nota receptus, indices timere debebit, ne fama vindicati necdum probri eò quoque delata, nova eum statione deturbet. Fuit, qui à Rheno, ubi piaculo sibi duxerat acceptum convicium duello eluere, ad extremam Moscoviam profugus, illis sub vexillis ignotum, tutumque se latitare credebat; sed adversarius, epistola eum insectatus, dedecoris inulti notam etiam inter Moscovitas propalavit. Unde ille coactus redire ad Rhenum, & invitus pseudo-legi obsequi, insectatorem suum aggressus est, quem, dum favente fortuna prostrasset, in suæ fortunæ rota tandem clavum fixit.

76. Et quid aliud consilii poterat capere miser? num tribunalia imploraret, & justitiam Principis? at surdas non raro aures habent ad querelas ejusmodi; ignorare se affectant, quid rerum agatur: vel *tu videris*, reponunt, tu ipse esto fortunæ tuæ faber, non est in nostra potestate cogere commilitones tuos, ut communia tecum servitia obeant. Et demus, scrib velle Principem opitulari subterfugienti duellum conscientiae causa, qua vi legiones is integras, coget, ut cum infami militent? Missionem dabit refractariis? at quanto damno suo id faciet? manumissis si subroget alios, in hos diffundetur infamia, & invidia manumissorum, ac pro uno duello complura succedent, Cadmeæ segetis instar pullulatura. Qui statione sua emoti fuerint, turbis omnia implebunt, vel etiam coacti exire ex provincia infamiam per oras externas dispergent, obfuturam copiis universis ejusmodi Principis. Quid si dein copias has suas alterius nationis exercitui jungere casus postulet, nonne quotidiana erit vecordiae exprobratio? & quis, nisi ignavissimus sit, tum se contineat ad objecta probra? quæ inde cædes sequentur? nonne præstaret dissimulando malum unum centena evitare?

77. Laudabile quidem & illud est consilium, quo nonnulli existimant duella in herba posse suffocari, si scilicet is, qui temere læsit alterum, culpæ veniam precari publicè jubeatur. At num nobilis, aut militaris animus eò usque se demittere valeat? poteritne supervivere probro, & tam cardè luere, quam ex præcipiti ira offensam intulit? Et valeant hæc utcumque intra provinciam sui Principis: si infelix pedem efferat post petram humiliter veniam, continuè exprobrationem sentiet. Quin etiam læsus, qui hac ratione domi se purgatum credit, nihilominus alibi terrarum cum turpi nota apparebit, utpote quam non armis eluere, sed tegere voluerit, timide implorato Principe. Ita ferme pro se Monomachi hodierni perorant, subeundi duelli necessitatem obtinentes, quæ profectò aded levia non sunt, ut ea Doctor Theologus mox uno halitu difflet. Remedia hi varia suggerunt, quibus se expedire queat provocatus: vel qui in honore afflictus, provocandi necessitatem sibi incumbere existimat. Juvat eadem exponere, & quàm facilis, atque efficax eorum usus esse valeat, prudenti judicio relinquere, ac primùm quidem audiamus, quid suadeant, ne quis provocare debeat, quamvis in honore læsus: rum ne debeat quis comparere, quamvis provocatus fuerit.

## §. II.

### Consilia Doctorum pro evitanda necessitate provocandi.

- |   |   |
|---|---|
| 78. <i>Suadent retorsionem convicii.</i>                      | 80. <i>Ut patientiam exerceas,</i>            |
| 79. <i>Velut petas mihiorem dicti, factive explicationem.</i> | 81. <i>Aut actionem injuriarum instituas.</i> |

78. **E**Xistimat non nemo, contumeliam posse propelli retorquendo, dum convicium convicio reponitur. "Rectè & optimè fit," ait ille (a), si injuriatus injuriato dicat: tamdiu ego te pro fure, aut adultero habebò, donec probaveris, quod de me malum dixisti. Quodd talis retorsio sit licita, probatur inde, quodd injuriam repellere, aut suum defendere honorem omnia Jura permittant. Nec obest, quodd ac-

„ cepto

„ cepto ictu vicissim adversarium percutere non liceat; talis enim percussio non foret defensio contra injuriam inferendam; sed esset ultio injuriæ jam completè illatæ. In posteriori autem retorsio, debitè facta, est defensio contra injuriam, nondum completè illatam, utpote quæ post verba, physicè præterita, moraliter perseverat, & in æstimatione hominum aliquis habetur pro tali, qualis ab altero fuit proclamatus, nisi in contingenti per retorsionem eximat audientibus suspicionem objecti criminis. „ Legi præterea meretur HEN. RENNEMANUS (a).

Quamvis huic ego doctrinæ neutiquam refrager, viri tamen militares, ac nobiles malè sibi consulereut convicia conviciis reponendo; non enim per hoc se purgare Titius censetur, quòd Cajo in faciem idem, vel aliud stercus rejiciat: uterque potius habebitur conspurcatus sordibus, non nisi armata dextera abstergendis. Ita judicat hodierna duelli Schola.

Valebit quidem aliqua retorsionis species, ubi tu per *calumniam* læsus, alterum dixeris *mentiri*, & pro infami *calumniatore* habendum esse declares, donec dicti sui probationes attulerit. Valebit hæc, inquam; non enim hodie, ut olim inter Italos (b), fas est ei, quem mendacem calumniatorem dixerò, me illicò ad suam armatam probationem evocare. Neque *mendacem* dicere prohibet Constitutio CLEMENTIS VIII. contra duellum lata; quamvis enim ea hoc dictum execretur, addit tamen (c): *si ejusmodi dicta sint preparatoria quadam ad duellum, & illorum veluti radices*, quod in casu nostro appellatio *mendacis* non est, spectando intentionem appellantis. Valeat itaque hæc retorsionis species contra calumniam: at non valet contra alias contumelias, quarum genera complura, supra recensita N. 64. honorem mutilant, ut bene observavit MAFFEIUS Marchio (d). Accedit, quòd non rarè probatio, quam ille offert, qui mendax dictus est, ita confusa, & perplexa sit, ut quamvis non certitudinem, tamen speciem veritatis habeat: tum enimvero aliud supererit nihil juxta sententiam Monomachorum, quàm intricatum nodum gladio dissolvere: Universale itaque non est hoc, quod à Doctoribus præscribitur, pharmacum.

79. Solet

(a) De Jure Retors. (b) Teste *Alciat.* Consult. de Duell. (c) §. 14. vid. *Bal-*  
lam infra n. 405. (d) *Scienza Cavalleresca* l. 1. c. 7.



79. Solent alii mitioris ingenii viri, altero die ab accepta injuria, dum conviciatorem non nihil deferuisse credunt, cum cum amico uno, alteróve accedere, & refricare memoriam hesterni acerbioris dicti, addendo, de ejus humanitate se confidere, ea verba neutiquam esse prolata animo iniquo, aut studio offendendi. Quòd si conviciator, & ipse moderati consilii vir, profiteatur, se invito fieri, si in rigido, & minùs æquo sensu acceptarentur, quæ sibi subitò excidissent, honorificè se semper sensitse, & sentire adhuc de commilitone suo, tum res pro composita haberi solet. At si convicia sint ejusmodi, quæ mitiorem interpretationem non admittant: vel si turbulenti quidam homines excitari malint flammam, quàm sopiri, tunc aegrè dissidium amicè componetur. Item si læsus explicationem dicti, vel facti imperiosa voce postulet magis, quàm petat, tunc alter probro sibi duet jam vela demittere, negabitque à dictis suis vel latum unguem se recessurum. Et quid sequi tum aliud poterit, quàm provocatio ad conflictum? Unde PEREGRINUS (a) docet, quòd si similis declaratio petatur extra judicium, & dedita opera, ita, ut proximè occasionem possit præbere duello, peccari graviter, & incurri pœnas à Pontifice latas.

80. Alium clypeum suppeditat alius quispiam (b). "Primò, ait, "homines contentiosos, quantum potes, evita: si vitare non satis potes, negligè, aut risu excipe, vel joco explode eorum injurias, ac si tangi te non satis sentires, etsi revera sentias aculeos tibi animum penetrare. "Quod si facias amore Christi te ipsum vincendo, maximi meriti virtutem exerces. " Tum Socratem proponit in exemplum, Comædorum crudos sales, & Xantippes pluviam fortiter eludentis. Saluberrima, fateor, sunt hæc consilia, principiis Ethicis, ac Christianis dogmatis maxime conformia. Arque utinam ea hodie tempora viveremus, quibus his dogmatis, atque illis principiis justum pretium poneretur. At neglecta jacet passim Ethica, scientia rationali homini præ aliis necessaria. Evangelio verò vim nullam inesse aurumant in pseudo-legem, receptam pridem nobiles inter ac milites: aut aegrè non laturum existimant Divinum Ju-

H

dicem

(a) De Duell. q. 4. n. 6. in §. aut ad hunc effectum. Const. Clem.

(b) P. Sybilæ, Erotem. Jur. P. 2. Sect. 4. §. 2.

dicem, si in causâ tam ardua, ubi de amittendo honore, & fortunâ agitur, minùs obsequentes se præbeant; semper autem cavere, ne quis in turbulentum hominem incidat, eique collidatur, hoc certè humanam industriam excedere.

81. Sunt, qui *actionem criminalem* suadent. Et hi propiùs scopum feriunt; námque *sciendum est, de omni injuria eum, qui passus est, posse agere*, seu actionem instituere, idque vel *criminaliter*, vel *civiliter*. (a) Actio civilis est vel *penalis*, vel rei *persecutoria*. *Penalis* iterum est gemina, una descendit ex jure Prætorio, & vocatur *æstimatoria*, qua læsus petit æstimationem injuriæ, quanti nimirum æstimat læsus ablatum honorem, v. g. dicendo, quòd maluisset amittere centum aureos, quàm hoc probum sustinuisse, quam summam, prævia tamen moderatione secundum merita circumstantiarum, Judex tenetur adjudicare læso. (b) Actio altera descendit ex jure Civili, nimirum ex lege Cornelia, quæ tamen solum competit ex injuria reali, & quidem ea tantùm, *qua quis pulsatus se, verberatumve, vel domum suam vi introitam esse dicat* (c), tendit pariter ad æstimationem injuriæ: sed à Judice faciendam, & læso adjudicandam (d). *Rei persecutoria*, scilicet bonæ famæ, tendit ad revocationem injuriæ, & restitutionem famæ, per verba contumeliosa ablata, èstque introducta per consuetudinem, & vocatur *actio recantatoria*, seu *ad palinodiam*, qua potissimum in Bavaria uti solet passus *injuriam verba-lem*. Hæc actio non invehit infamiam juris de jure communi: bene tamen infamiam facti, nisi Judex, ut fert usus, ex officio tollat, & honorem reserver: ad quod obligatur in Bavaria casu, quò causa injuriarum non est adeò liquida: vel dubium, an læsus lædenti non dederit causam (e). Denique *criminalis* actio injuriarum est, qua læsus petit, ut reus debitè plectatur; pœna nimirum *extraordinaria*, seu arbitraria, nempe vel *corporis afflictiva*, vel *multa pecuniaria* Fisco, aut Ecclesiæ applicanda. Plura de actionibus injuriarum passim apud Jurisperitos legere est.

Remedium hoc extra statum *naturalem*, quem vocant, in Civitate utique convenientissimum est. Sed qua ratione instituetur actio, si Judex non

(a) §. 10. Instit. de injur. (b) §. 7. 10. ibid. (c) §. 8. ibid. (d) L. 37. §. 1. ff. de injur. (e) Statut. Provinc. Tit. 46. Art. 10.

non audiat, & ea sit corruptio pravorum hominum, ut imperatam etiam à Judice palinodiam rejiciant, velut inutile sanando malo pharmacum? atque utinam ea esset in multis Magistratibus promptitudo succurrendi passis contumeliam, qualem divinat Clarissimus Salisburgensis Doctor (a), ita loquens: " Si Nobiles, aut Officiales reliqui te in consortium non admittant, neque subjecti ulterius servire velint, adeas superiorem proximum, cujus est temerarios compescere, ac ad legum observantiam adigere. Si neque hic administraverit Jus, ad altiora Tribunalia appella, ad ipsam Majestatem Imperatoriam provoca; fiet, ut salvo tuo honore, atque officio adversarius cum ignominia cedere debeat. „ Utinam, inquam, ea esset in multis Magistratibus promptitudo succurrendi. At Centurionem novimus, qui baculo ignominiosè percussus, recusato duello, adedò opem nullam etiam in primis tribunalibus invenit, ut cum conjuge nobili, & liberis ad incitas, & rus redactus fuerit. *Vide casus similes N 281.* Vident, in quas angustias conjiciatur contumeliam passus; vix non diram necessitatem impositam sibi videt, reluctante etiam conscientia, in arenam descendendi.

### §. III.

Consilia Doctorum pro evitanda necessitate comparendi.

82. *Provocatus à se forè offensum studeant placare.*

83. *Vel legem DEI obtendat, & fortitudinem antehac à se exhibitam.*

84. *Dicat se expectaturum vim aggressuri.*

85. *Fors etiam licebit exire in campum destinatum.*

86. *Vel convicio provocantem prolicere, ut prius vim inferat.*

82. **N**on multò melior est conditio PROVOCATI, qui honorem fortè alterius mutilavit, vel mutilasse censetur. Consilium suggerit Theologus. imò Dum dicta sua in deteriorem partem accipi, & rem seridò agi advertit, mitiorem sensum suis verbis, factisve affingere studeat, fors expediet se molestiâ. At si insistat adversarius: vel incentores obstrepant socii: vel ipsa verba, & facta molliorem sensum refugiant, ægrè se

H 2

extri-

(a) P. Böcklin ad Tit. de Cleric. pugnans. n. 5.

extricabit. 2dò. Canat palinodiam. At canere palinodiam tunc solum poterit, ubi calumniando offendit, non ubi alio contumeliæ genere. Dein cum certa sua perniciæ recantabit. 3tò Satisfaciat humiliter precando veniam. At ira veniam precari in innocentem non cadit, qui credidit dictis suis factisve nihil veræ contumeliæ inesse. Quid ergò consilii?

83. Suadet P. SEYBOLD (a), ex mente multorum Theologorum : „ Quòd si provocatus es, & eludere nulla arte valeas, dic adversario, te, „ licèt duellum ob legis Divinæ, & Ecclesiasticæ reverentiam non accē- „ ptes ; eò quòd charior tibi sit DEUS, & animæ tuæ salus, quàm cor- „ poris, nihilominus, ut fortem virum decet, te neminem, ubicunque „ te aggressurus sit, metuere : sed cuicumque aggressori, inter quos etiam „ provocator non sit exceptus, ita obviaturum resistendo, ut fortem „ virum in te experiatúr. Si ignavi id esse animi asserat, responde, ex- „ perimentum ignaviæ ex defensione licita capiendum: desperati homi- „ nis, & profligatæ temeritatis esse animam diabolo offerre: tuam tibi non „ esse adeò vilem. Si pergat esse molestus, abrumpe, & discedens adde : „ Eas tu licèt, ad diabolum, mihi nõndum libet esse comitem: nec tam „ vilis animi, & abjectæ salutis homo sum: meo indignus consortio es. „ Suppetunt, pergit Author, innumera alia responsa, quibus ingeniosè „ eludi provocaciones possunt. Recenset gemina ex P. HURTADO DE MEN- „ DOZA, quorum primum ita habet. Vir quidam in urbe Lucrovia natus, „ Gubernator Habanæ, provocatus ad duellum respondit: à se multis in „ præliis ostensum fuisse animum imperterritum: duellum verbò à se recu- „ sari propter legem DEI; quo responso ingentem sibi gloriam compa- „ ravit. Alius vir nobilis, & fortis in urbe Salmantica, cùm è vita laxiore ad „ meliorem frugem se recepisset, provocatus ad duellum, respondit: Ego „ tempore superiore non recusassem duellum: nunc autem bene nõsti, „ mihi curæ esse legem DEI; quod laudârunt & mirati sunt quotquot re- „ sciverunt, „ Alia adhuc exempla commemorat, aliásque rationes, qui- „ bus indemnis salvetur honor absque duello, hic dissimulandas, quia pa- „ rum diversas.

Absit

(a) Erotem. Jur. P. 2. Sect. 4. §. 3.

Abstine à me, ut hæc & similia suggesta consilia fugilem : dolere tamen liceat, quod tantum in iis repositum non sit, ut facile evadere provocatus queat; Idque propter perversitatem hujus ætatis, ridentis ad legem Ecclesiæ, & excommunicationis fulmen : neque volentis agnoscere ullam DEI legem, duellum prohibentis. Subest etiam alia ratio, cur tam difficulter fides habeatur excusantibus se lege DEI; eoquod nempe tales sæpe sint, qui alia DEI præcepta sine scrupulo transgrediuntur : quæ ergo singularis reverentia ab hoc præcepto violando eos abstertere credatur? vide hanc notationem amplius explicatam n. 168. Hinc credere fas est, Salmanticensem illum nobilem fortè cum turba vanorum jam tunc temporis abruptissime commercium, electa sibi vita privata. Et ô utinam tam æquos rerum aestimatores etiam hodie numeraremus, qui recusantem unanimi ore laudarent. Lucroviensis illius responsum tale est, quod meritò toti Orbi debeat satisfacere. Haud dubiè per prælia virtus probatur in luce publica, ubi postquam quis sæpius imperterritus stetit animo, quid est, quod de ejus fortitudine clancularium adhuc experimentum desideretur? at videmus prohi dolor! præfictissimos Heroes post superata crebra pericula, relata decora vulnera, & complures expeditiones bellicas ed adigi, ut provocati, vel laceffiti etiam ab imberbi mento & inculto stolone, pretiosam vitam debeant exponere ei gladio, qui hostem antea non viderat. Casum unicum scio, à veterano mihi Duce narratum, in quo egregium facinus militare absolvere provocatum valuit à necessitate ineundi duelli. Acri obsidione diu urbs quædam pressa præstructam vallo parmulam ostentabat, quam assultu expugnare obsidentes parabant. Centurionum unus eo die supremum castrorum Præfectum adit, hanc sibi provinciam, quamvis præter ordinem, deposcens. Præfectus primò miratus est, quod quis, ordine non vocatus, tanto se periculo sponte offerret: cùmque plurimi semper fecisset, amassèretque centurionem, admonet de discriminis gravitate; primo assultu ægre fore subigendam parmulam, & non nisi paucos cum vita redituros. Nihil territus alter instat, urget, donec, nemine invidente, spartam obtinuerit. Et revera facta impressio cruenta admodum fuit: nihilo fecius centurio cum paucis suorum pedem firmum in parmula fixit, depulso hoste. Dilaudatus pro merito à supremo Præfecto, quæsitusque, cur periculosam hanc aleam prensasset, respondit, se provocatum ad duellum à commilitone, legem DEI reveritum, pugna justiore probare voluisse imperterritum animum.

Non poterat non Præfectus à lege comparendi virum strenuum absolvere, plaudentibus universis castris. Ejusmodi opportunitas cum raro se offerat, raro etiam quemquam sortitudo, alibi exhibita, à duello liberat.

84. Itaque eam esse viam evadendi tutissimam credunt Doctores nonnulli, si quis provocanti reponat: duellum recuso; paratus tamen sum, ubicunque me aggressus fueris, & si etiam nunc velis, vim vi repellere, meque defendere. (a) In hunc etiam sensum loquuntur sic dicti Marechal-li Galliae in edicto quodam suo (b). Nobilis quisque, ajunt, provocanti respondere poterit, prohiberi se, quo minus locum pugnae designet, aut in designatum condicat: nihilominus nihil omitturum, quo se contra ag-gredientem, sicubi se inferat, strenuè defendat: plus neque concedi per leges regias, neque ad tuendum honorem esse necessarium. Hòc similive dato responsò interea, ut docet PIGNATELLIUS (c), „ potest provocatus „ ad peragenda sua negotia armatus incedere, acsi esset cum inimico pu- „ gnaturus; quia non tenetur relinquere suas actiones, quas sine notabili „ suo damno præterire non valet, quamvis ex illis alter occasionem suæ „ ruinae sit accepturus. IQuare provocatus potest, ac debet non leviter „ armatus incedere, dum non sine periculo pugnandi incedit; in ea enim „ occasione prudentis est contra pericula se præparare. Potest è domo „ sua exire cum voluntate non absoluta pugnandi, sed conditionata, si „ aliter se tueri honestè non possit, & provocans adigat ad pugnam. „ Affert pro se BANNES, SANCHEZ, HURTAD, DIAN. Refugit suffragari huic doctrinæ Tournely (d) rigidior aliquantum, putans fore hoc idem sub verborum involucrio, ac revera acceptare duellum: jam verò non il-lum tantum contra leges impingere, qui agit contra legis verba: sed eum quoque, qui adversus sententiam & sensum (e).

Per me liceant hæc omnia provocato. Quin liceat etiam nomina-re plateas & aedes, quas perambulaturus sit vel hodie vel cras: non tamen video, qui hoc effugium universè usui esse possit; quid si enim provocans reponat, sibi commodum non esse vias explorare adversarii: minus in publi-

(a) Vide Mendo. L. 3. Jur. Acad. q. 29. Append. de Duell. (b) An. 1653.

(c) Tom. 9. Consult. 88. n. 61. (d) In Præcept. V. Decal. cap. 2.

(e) L. 29. 30. ff. de leg.

publica platea aut foro congregari; procul à turba monomachias exerceri: esse prope pomeria arenam, his pugnis destinatam ex more. Hæc si reponat, sequi necesse habebit provocatus, si satisfacere velit grandi delirantium turbæ, & contemptum evitare, conjunctum fortè cum damno fortunarum. Dein sit provocans homo exterius, alteri subiectus Principi: horreat ille provocati patriam ingredi, ideoque ad urbem neutrarum partium, utpote locum magis sibi securum, eundem evocet, quid tunc consilii? spectavi ego ejusmodi casum, ubi provocatus antè molestiis se non expedit, quàm profectus fuerit eo, quo vocabatur. Quid ergò consilii super?

85. Juxta quorundam opinionem, ait P. SCHMALZGRUEBER (a), potest provocatus exire in campum, in quo destinatum est duellum; quia talis egressio est actio indifferens, & qui sic egreditur, solum contendit, ut agnoscatur, non esse ignavus, haberéque animum pugnandi tunc tantum, si invadatur. Unde sicut femina non peccat, si in publicum absque intentione prava exeat concinnè ornata, quamvis credat, aliquem eam aspiciendo peccaturum: ita neque peccabit provocatus egrediendo ad locum duelli. „ At ipse hic Author unà cum MENDO, & PRIGNATELLIO negant hoc licere; „ nam, ait, licet egressio ista secundum se sit actio indifferens: in his tamen circumstantiis, ubi conjuncta est cum periculo mutuarum cædium, indifferens esse cessat: & hujus periculi ipse egrediens est causa, non per accidens tantum, sed per se; quia semel designato campo, & indicto duello hic effectus habet connexionem cum eo exitu. Hinc paritas non est cum egressu, & ornatu feminae, si hic, ut fieri debet, ponatur esse indifferens. „ Hactenus P. SCHMALZGRUEBER.

„ Atque, ait MENDO, ut paritas aliquid evinceret, sic debebat efformari: si homo, deperiens feminam impudicè, ab ea posceret, ut in quodam destinato loco conveniret ad colloquendum cum ipso: & ipsa exiret, ut ostenderet, se posse colloqui cum illo, quin in peccatum laberetur, firmiter proponens non peccare, nisi sollicitaretur ad peccandum. Hæc femina non peccaret exeundo ad illum locum: ergo idem evenit in casu proposito. Hæc paritas rectè efformatur. Verum „ assum-

(a) Tit. de Cleric. pugn. in Duell. n. 27.

„ assumptum est negandum; cum utique famia peccaret in ea voluntate  
 „ non delinquendi, si sollicitata non foret. „ Ita MENDO (a)

86. Audiri denique meretur PIGNATELLIUS (b). „ Magis, in-  
 „ quit, idoneum erit, si provocatus provocationis injuriam proportio-  
 „ nato convicio expellat; planè enim id potest: non ad injuriæ jam irro-  
 „ gatae vindictam, quæ privato non conceditur, sed ad injuriæ, tunc  
 „ primùm illatæ, ac veluti cadentis, repulsam, ac exclusionem. Quòd si  
 „ provocans repensum convicium inhonoratione ulteriore, aut ferro ul-  
 „ cisci aggrediatur, fas præterea erit provocato exertis confestim ar-  
 „ mis malè excipere provocantem, quo factò honori suo consulat, quan-  
 „ tum satis est, absque noxa duelli. Nulla igitur ratione duelli accepta-  
 „ tio est medium necessarium ad honorem provocati indemnem servan-  
 „ dum ab injuria provocantis. „ Ita ille.

At necdum omnia in expedito esse autumo. Imò Si tu prævia of-  
 fensa fortè læsisti provocantis honorem, vel reparare debebis juxta leges  
 justis & æqui, vel juxta pseudo legem pugnare. Addere convicia conviciis  
 neque per conscientiam licet, saltem tunc, quando provocanti, iniquè à te  
 læso, palinodia vel simili reparatione satisfacere vales.

Quòd si eum offenderis, errorem vel piaculum exprobrando vi mune-  
 ris, quod geris, vel ex zelo pro justitia & honestate, aliæve ex causâ non iniqua,  
 tunc non dubito, quin fas tibi sit, dum provocaris, confirmare dicta, &  
 à pœnitudine te procul remorum ostendere; etsi prævideas, aded irritandum  
 fore impotentem adversarii animum, ut è vestigio stricturus sit contra te  
 gladium; quod enim semel rectè dixeras, etiam altera vice licebit dicere,  
 & in oritura fortè pugna te defendere. At verò si provocans sibimet sa-  
 tis præsens, retenta in præsentī ira, reponat, hæc & similia convicia,  
 muliebriter jacta, gladio se purgaturum loco decente, in quem commeari  
 solent Monomachi, tum quid ages? adeoque necdum plenè excussumus  
 ferream necessitatem, quam dura illa pseudo-lex imponere nititur.

## §. IV.

(a) L. 3. Jur. Acad. q. 29. Append. de Duell. (b) Tom. 9. Consult. 89. n. 31.



§. IV.

Studia summorum Principum ad elidendam necessitatem provocandi.

- |  |  |
|--|--|
| 87. Caveantur jurgia.                          | 96. Pro deridiculis,                                     |
| 88. Sopiantur in tempore.                      | 97. Pro verberibus, etiam datis per subornatos.          |
| 89. Coerceantur.                               | 98. Praestanda simul cautio de non vindicando.           |
| 90. A consiliis denunciatur Judici:            | 99. Reservato tamen honore Rei.                          |
| 91. Ad hunc recurrat lapsus,                   | 100. Reus fugitivus, aut alieni juris, non evadet penam. |
| 92. Propterea à nemine deridendus.             | 101. Ha cura Principum omnino sufficiunt.                |
| 93. Procedatur summarè.                        |  |
| 94. Post propriam vindictam nulla satisfactio. |  |
| 95. Satisfactio danda erit pro calumniis,      |  |

87. **I**nprimis id inculcant summi Principes, ut studeant omnes pacem colere, honore se mutuo prosequi, & cavere solenter, ne verbo, aut facto quemquam offendant. (a) Si pariter, qui sanguine, vel autoritate præminent, omni humanitate inferiores complectantur, ne eos duriore agendi modo exasperent (b). Nec minus indecorum existiment, si susurrones agant, dissidia seminantes (c).

88. Ut autem, si quæ nihilominus nata fuerint, periculosa dissidia veluti in herba suffocentur, & scintillæ extinguantur, antequam erumpant in flammam, monet JOSEPHUS CLEMENS Elect. Colon. (d) supremos militiae Duces, ut gliscentes controversias maturè sopiant apud commissas sibi copias. Idemque in aula & alibi præstare studeant, penes quos potestas civilis residet, ne animi collidantur, vel ut, si fortè collisi fuerint, concilientur.

89. Quod si non ex vano illi vereantur, ne vehementior sit exacerbatio, quam ut facilem medelam admittat, jubeant collisos domi se continere, apposita etiam, si necesse videatur, custodia. Discutiant interea causam jurgii, cui finiendo si impares se videant, absque mora Mareschallum

(a) Edit. Ludov. XIV. an. 1679. (b) Edit. Lotharing. an. 1699. (c) Edit. Maximil. Eman. Elect. Bavar. an. 1679. (d) Edit. 1794.

lum Lotharingæ aut Baari, vel memet ipsum reddant certiozem, ait LEOPOLDUS Dux Lotharingæ. (a)

90. Utque constituti Judices tanto facilius in gliscentis mali notitiam veniant, Edictum Colonienſe, & cum eo Concluſum Imperii (b) jubent, ut patresfamilias & caupones, in quorum ædibus jurgium periculum exoritur, vel alii quicunque præſentes & conſcii, abſque mora id denuncient Judici, ad quem cauſa ejusmodi pertinet, ni velint cadem cum offendente pœna plecti. Pœnam arbitrariam reticentibus ſtatuit EBERHARDUS LUDOVICUS Dux Wûrtembergſis (c). Saxonicum Edictum, ſicut denunciante *duellum* centum imperiales promittit, ſic pro denunciata *rixa* promittit quinquaginta; pro *realibus injuriis* triginta, *verbalibus* injuriis quindecim, addito promiſſo reticendi denunciantis nomen, quæ ſumma ſolvenda crit, vel ex Rei bonis, vel ex ærario ſiſci.

91. Quoddâ jactum convicium, ſimilisve injuria in aprium ita jam eruperit, ut læſo moleſtum accadat concoquere crudiozem bolum, moneatur is, ut, ſuſpenſa tantisper ira, Judices compellet, quorum eſt, vel ex more provinciæ de honore judicare, vel ex decreto Principis. Et hoc eſt, quod edicta omnia clamant, uberrima ſatiſfactione promiſſa læſis. Sereniſſimus noſter Elector-MAXIMILIANUS JOSEPHUS, Baviariæ ſuæ verè Pater, ſicut ad res cæteras cura ſua dignas, providentiam ſuam extendit, ſic etiam duellum Reſcripto dato ad omnes ſuas copias anno M. DCC. XLIX. reſpreſſit, dum illum fomitem, injurias ſcilicet tum *verbales*, tum *reales* ſeveriſſimè prohibuit, ita ut quicunque eas intuliſſet, ad Præfectum carceris abſque mora abſtrahi jubeatur, ubi dein ſequi debent reliqua, providentiſſimè ſtatuta.

92. Ne quiquam auſit ridere, aut contemptui habere eum, qui Juris remedium ſanandæ inuſtæ ſibi labi adhibet; ſeveram tali exprobrationi pœnam ſtatuit Concluſum Imperii citatum. Megalopolitanum ejusmodi protervum hominem condemnat ad petendam veniam, & biennalem carcerem (d).

93. Cauſa itaque, ut decet, ad tribunal competens delata, in ea diſcutienda proœdatur *ſummarie*, ut vult Concluſum Imperii, & Reſcriptum Sereniſſimi noſtri Electoris. Vel etiam pro re nata procedatur  
via

(a) Edict. an. 1699. (b) An. 1668. (c) Edict. an. 1714. (d) An. 1715.

via Juris ordinaria causam deducendo ad sententiam, ut mandat CAROLUS Landgravius Hassio-Cassellanus (a). Ubi imprimis indagandum erit, uter prior leserit alterum; sive quis author rixæ fuerit. Ita habet Edictum Brunswicense Georgii Regis Magnæ Britanniae (b). Tum magnitudo injuriæ ponderanda veniet. Quo comperto de satisfactione deliberandum erit Judicibus.

94. Nullam autem satisfactionem speret læsus, si injuriam injuriæ è vestigio rependit. Ita statutum est Edicto Lotharingico, Saxo-Gothaico (c), ac Colonienſi. Quæres, quid ergo opis huic superſit, quæ maculam sibi aspersam laver? Responsum habet ex Edicto Bispontino CRISTAVI SAMUELIS LEOPOLDI (d): portabit maculam, & damnum, quod patitur, præcipiti iræ suæ tribuet, quæ in vindicanda injuria Judices malè præverſit. Si cuiquam Principi, durior hæc lex videatur, mutare, vel mitigare haud dubiè fas erit. Sic mitior hoc ex capite fuit LEOPOLDUS Cæſar, qui permittit *retorsionem legiſt. nam, si in continenti fiat* (e). Novissimum Edictum Colonienſis Electoris cum, qui alapam reddit alapæ, ad quatuordecim dierum custodiam damnat: imò ad trimestrem, si alapam scutica, vel baculo vindicet (f).

95. Ubi iniquè inflixisse injuriam deprehensus fuerit, tum enim vero justitia tota in eo est, ut utrique suum tribuat, tam lædenti, quam læso. Varias itaque rationes, quibus honor refarciatur, apud varias gentes initas legimus. Enucleatè, si quod aliud, loquitur Edictum Saxonicum Electorale (g), & novissimum Colonienſe. Qui clanculariè proſcedit absentem sermonibus maledicis, famamque denigravit, siquidem primò hoc piaculum admiserit, cogatur ab offenso veniam petere, & malè prolata retractare. Si repetita eiusmodi diſſidia effutierit, carceris pœnam ferat anno dimidio, & ad petendam veniam adigatur mullta pecuniaria: vel, si in ære non habeat, porrecto solo pane, & aqua oppugnetur per vicacia, donec veniam precetur, & palinodiam canat.

96. Si quis nobilitate conspicuus Nobilem, vel nobilitatis prærogativis gaudentem, aliùmve honestiorem natum, aut constitutum loco indecen-

(a) Edict. an. 1684. (b) An. 1718. (c) An. 1709. (d) An. 1721. (e) In Edict. 1682. Ex Tabular. Austriac. (f) In Edict. An. 1742. (g) An. 1706.

decentibus deridiculis, sive voce, sive gestu, confundat, publicè prece-  
tur veniam insolentiae conceptis his verbis: *Ego N. N. profiteor, me incon-*  
*sideratis, & pœna dignis verbis hunc N. N. graviter offendisse: & sicut ad*  
*excipiendâ similia lege Talionis meritò me offero, sic datâ injuria simul ve-*  
*niam exoro; cùmque generosior sit pars à me offensa, quàm ut par pari velit*  
*rependere, ego debitis actis gratiis, declaro, me, si offensus fuisset, parî*  
*satisfactioni fuisse acquieturum.* Quodd si jacta in faciem convicia solito  
atrociore essent, habita personarum ratione, veniam petens insuper os  
suum percutiat, squallore carceris, si tergiversetur, ad id compellendus.  
Quin Edictum Saxo-Gothaicum Ducis FRIDERICI, & Baruthanum CHRISTIANI  
ERNESTI Marchionis (a) statuunt, ut licetor revocet, calumniatori data fo-  
nante alapa, & indicto exilio.

97. Injurias *reales* qui infert, verbera minitans baculo, scutica,  
manu, petita venia unius, vel, si domi suæ id cuiquàm fecerit, trium annorum  
carcere mulstabitur. Si intra minas non steterit, sed verbera etiam infli-  
xerit, data ad hoc causâ, pœna durabit per biennium: nulla data causâ  
per quadriennium, postquam antea dignitatibus, & officiis exutus veniam  
petierit supplex. *Augēbitur pœna, si quis* alterum à tergo aggredi non  
erubuerit. Si subornasset alios, ab omni in Republica gerendo munere  
sit exclusus; sex-annorum custodiam patiatur, primo anno non nisi pane,  
& aqua reficiendus. Si famuli, subornati ab hero, id præstiterint, qua-  
driennali carcere macerati naribus, & auriculis mutilentur. Similia le-  
gere est in Edicto Brandeburgico, Suecico, & compluribus aliis. Ho-  
diernus Serenissimus Elector Bavarix in Rescripto suo, cujus paulo antè  
meminimus, cum, qui injuria *verbali* læsit quemquam, condemnat ad pe-  
tendam veniam, nulla admissa cautela Jûris ad reservandum honorem, &  
tum exauthorari mandat. *Injuriam realem* qui intulit, exauthorari debet  
cum nota infamiae.

98. Ne is, qui satisfactionem compulsus est præstare, post adhuc  
ultionem fortè meditetur, mox à petita venia cautionem juratam, vel etiam  
realem, ut vocant, de non ampliùs offendendo, nec se vindicando re-  
neatur præstare, oppignorando bona sua, vel adducendo vadem ido-  
neum. Ita cavet Edictum Wûrtembergense (b).

In

(a) An. 1699. (b) In Edict. an. 1714. n. 14.

99. In eo vicissim ipsi consulitur, quòd præstitam ab eo satisfactionem nemini liceat in pejus interpretari, aut pro ignavia nota accipere. Qui exprobrare auderet, similem pœnam deberet subire. Ita CAROLUS XI. Sueciæ Rex (a). Conclufum autem Imperiale, & *Resolutio* LEOPOLDI Cæsaris (b) severius cum ejusmodi agit, qui veniam proterviæ petere debuit. Vetant, ne sine gravi causa reservetur honor revocantis; neque locus datur notis *cautelis Juris*, quibus *per indirectum* infamia evitari solet, pœnis ipsi Judici intentatis, si, cura malè impensa, indigni hominis honori consultum iret. Meo judicio severa hæc lex eum petit, qui petulanter, graviter, & manifestè alterius honorem læsit. Ubi autem dictum ambiguum cuiquam excidit, quod mitiorem facilè explicationem admittat, rectè reservatur honor explicanti. Novissimum Ed. etum Colonienfis Electoratûs famam servat revocanti, nisi delictum sparsisset, quod de Jure post se trahit pœnam corporis afflictivam.

100. Ne quis verò post illatam injuriam, subdolè se subducendo, justitiæ manus cludat, cavet EBERHARDUS LUDOVICUS Württembergensis Dux, ut absentis nomine veniam precetur apparitor. Ipsum lictorem substituit CAROLUS Marchio Haffo-Casselanus. Citari tamen antè debet, &, si extero Principi sit subditus, hujus implorari justitia. Vide etiam Ordinationem Saxonicam N. 107.

101. Ex his satis liquet, læso ad tuendum honorem neutiquam necessarium esse provocare ad duellum. Vel enim submissè ab eo lædens petiit veniam? & utique triumphabit: vel injuria, quam sibi illatam credidit, modica erat, imò non nisi ex sinistra interpretatione in malam partem acceptum est dictum, aut factum? tunc utique data coram judice declaratio plenè eum purgat. Non video, quid ipse vel alii, si vel mica honestatis ac prudentiæ superfit, ultrà exigant. Certè qui offensio post totam hanc satisfactionem datam exprobrare adhuc ausi fuerint hærentem aliquam notam, ex mandato Serenissimi nostri Electoris Bavari compellentur ad petendam veniam, & tum exauthorabuntur. Et quæso, quomodo injuriam passus jam duellum inibit cum illo, qui cum nota *infamia* exauthoratur?

vel qui *non reservato honore* veniam compulsus est petere, & missionem accipit? & hunc ipsum in finem, credo, tum in Concluso Imperiali, tum in Bavarico Rescripto honor non reservatur. Nec est, cur læsus timeat, ne domi purgatus, alibi terrarum cum turpi nota appareat, modò enim de petita venia, aut recantatione satis constet, ubique habebitur purgatus. Si nihilominus data hac satisfactione quis placari se non sineret turbidi ingenii homo, ad carcerem detrudendus erit, donec ei mens sanior veniat. Ita Edictum Colonienſe. In eo solo rei cardo vertitur, ut Principes, & Magistratus saluberrimis his constitutionibus firmi inhæcant, id quod alibi multo argumentorum pondere eis commendabimus. At dolendum, quòd non rarò offerri homines, sui ex accepta injuria impotentes, rejecto omni moderato consilio, nihilominus, sprete sacra Themide, provocent ad pugnam, litaturi exulcerato animo. Tunc enimvero quæstio de provocato oritur, qua ratione hic salvo honore enatare valeat. Videndum, quid prudentissimi Legislatores in suis Edictis præscripserint.

## §. V.

## Studia Principum ad elidendam necessitatem comparendi.

- |  |  |
|--|--|
| 102. <i>Provocatus non condicat.</i>             | 109. <i>Incaſſum opponitur imò provocatum inutiliter compellere Judicem:</i>                     |
| 103. <i>Deferat provocantem Judici.</i>          |  |
| 104. <i>Nec quiquā hoc ei vertat probro.</i>     | 110. <i>Præſertim militiæ, ubi integra legio turbas ciet.</i>                                    |
| 105. <i>Judex provocanti, punire quem debet,</i> | 111. <i>Fruſtra opponitur adò, hac ſtudia ſolum valitura pro provincia Principis judicantis,</i> |
| 106. <i>Præcludat fugam.</i>                     | 112. <i>Nec profutura ei, qui provocatur apud exteros.</i>                                       |
| 107. <i>Si elabatur, procedat nihilominus.</i>   |  |
| 108. <i>Sic neceſſitas comparendi tollitur.</i>  |  |

102. **P**ROVOCATUS, five vera injuria alterum exacerbaverit, five non; prohibetur parere provocanti: spondeat ei potius, se in judicio dicta probaturum, vel etiam satisfactionem præstaturum, si ita iudicibus visum fuerit. Ita inter alia Edictum Württembergense.

103. Quia FRIDERICUS AUGUSTUS, Rex Poloniæ, & Saxoniae Elector jubet cum aliis, ut provocatus absque mora denunciaret delatam sibi pugnam,

pugnam: secus subiturus dimidio anno carcerem, quamvis non condixisset. Neglecta autem non tantum denunciatione, sed etiam acceptata charta provocatoria, puniendum statuunt, acsi pugnam ipsam commisisset; vel æquali saltem pœna cum provocante, ut decernit MAXIMILIANUS EMANUEL Elector Bavariae. (a)

104. Nec quisquam audeat provocato exprobrare, quod denunciando morem gerat legibus: Ita importunè cavillantem iisdem pœnis subiiciunt, quas statuunt in provocantem Conclusum Imperii, ac Edictum Würtembergense. Megalopolitanum decernit petitionem veniæ, & carcerem biennem. Multo minus provocans provocato vim ausit inferre, baculo, gladiove percutere, secus incursum pœnam capitis, juxta Edictum Lotharingicum.

105. Provocatione denunciata Judici, id imprimis agitur, ut congrua pœna provocans afficiatur. Primo enim loco crimen provocationis castigandum est, quæcunque dein offensa ei causam dederit. Pœnas varias à variis legislatoribus decretas recensebimus *Cap. IX.* quas longè graviiores esse patebit, ac hodie à multis Magistratibus, plus æquo indulgentibus, infligantur. Tum primum examinabit Judex, num, & qualem injuriam provocatus provocanti intulerit: an etiam pro hac debeatur pœna, vel satisfactio. Actionem autem ipsi provocanti instituere non licet juxta edicta complura, & ex rationibus æquissimis, de quo *Vid. n. 525. cas. 9.*

106. Ne verò provocans facillè fuga se pœnis subducatur, Conclusum Imperii prohibet, ne tali homini equi cursores in stationibus *Postarum* dentur. Ex fuga retrahere laborat Edictum Saxonicum.

107. Si nihilominus evaserit ex territorio Principis, citabitur *ediliter*, vel more militari. Si se non sistat, patria ad decennium interdicatur, affixo suo nomine in furca publica. Si exteræ potestati sit subditus, requiretur, modo, quem legere est in Edicto Saxonico & Megalopolitano.

108. Hæc ferme sunt, quæ sapientissimi Principes ac Reges statuere in bonum provocati. Quibus observatis nemo provocatus necesse habebit in duellum condicere; quodsi enim veræ injuriæ, alteri illatæ, non sibi conscius sit, cur horreat Magistratum, clam saltem & per alios monere de vi, quam provocans parat ob crabrones, suo excoctos in cerebro?

certè

(a) Edict. an. 1720.

cerrè id per leges facere obligatur. Quòd si autem alterum à se esse læsum deprehendat, difficilem, fateor, spartam habebit. Nam pugnare non licet: causa autem ad tribunal delata, vapulabit ob datam injuriam, quamvis non admodum graviter; eoquòd provocans jure ad satisfactionem jam exciderit, *vide n. 105.* nisi fortè *calumniam*, aliudve *mendacium* dixisset; hoc solum in judicio manifestatum, non levibus malis dicentem involveret. At ex æquo tunc offam debebit comedere, quam sibimet intrivit. Interim patet, duellum non esse necessarium; neque enim necesse est provocare; nam si non es læsus, cur provocas? si verè te læsum existimas, judicem adi. Nec necesse est provocationi parere; nam si provocatus bene sibi sit conscius, declinata pugna causam committat judici: si malè conscius, ad læsum pertinet querelam deferre in judicium.

109. Oppones imò, quacunque ratione Magistratus edoceatur, vel imploretur: quacunque industria controversiæ intercedere laborer, nunquam provocato timiditatis notam absterget, utpote quam hic sibi inussit confugiendo potius ad judicem, quam ad gladium. Et etiam si judex, non monitus à provocato, *ex officio nobili* intercessisset, vel intercessisse crederetur; non tamen acquiescerent nobiles, ac militares viri, sed ex suis circumstantiis excludere pergerent non acceptantem duellum: id quod multò magis tunc fieret, si quid scirent, vel suspicarentur de asylo, clàm quæsito apud Magistratum. Hæc. Mirum, si usque adèd progrediatur morum corruptela, ut infamis habeatur, qui molestè provocanti sponder, se in judicio vel demonstraturum suam innocentiam, vel fidem facturum eorum, quæ de ipso edixerat? Ubinam gentium inter probra reputatum fuit, si quis demonstrat, neminem à se fuisse offensum: vel veritate niti, quod pro calumniâ accipitur? si insuper Magistratus talem omnis malæ notæ expertem pronunciet, & ab omnibus expertem haberi jubeat, num vir prudens refragari ultra valeat? num quem supremus Princeps ad aulam, ad alloquium suum admittit, dedignentur protervi quidam subditi?

110. Facile mihi dabis, opinor, sanæ rationi conforme esse ut quam maximè, provocato ita purgato nihil ultra tricarum movere. At obtinuisse jam malefani gregis judicium causaberis, vecordiae damnantis eum, qui ferreum sibi jus veretur dicere gladio. Principem, & Magistratum parum contra multitudinem valituros, militiæ præ-



præcipuè, ubi quandoque integra legio arma ponit, donec amoveatur, qui offendiculo est, vecors homo. Integra, ut video, legio te terret, arma positura. antè, quàm militatura cum socio obediente legibus? ponat: ergo manumittatur, quid tum? crede, intra paucas hebdomadas redibunt ferme Duces omnes, gratiæ loco habituri, si in antiquum gradum reponantur, miles autem gregarius vel huic causæ se parum miscet, vel soluta legione aliis inferi legionibus poterit, vel dimittes magis refractarios. Dein neque hoc time, ne discedant Duces omnes. Dic, fodes, ubi ea animorum in integra legione consensus? ubi eæ singulorum fortunæ, ut universi loco suo decedere, dignitate & sustentatione se exere, & alibi terrarum incertas spes sectari malint, quàm Principi, seridè imperanti, parere? murmur concitari poterit & tumultus; at dum singuli in jus vocati interrogantur, quo animo sint, vix unus & alter hiscere audebit. Obstreptentibus detur missio, substitutis aliis, & si qui turbas cieant contra substitutos, dentur custodiæ, quam in sexennium decernit Edictum Colonienſe: vel ejiciantur provincia, & brevi erunt pacata omnia. Ita experientia non semel docuit.

Fuit Princeps, qui ex tumultuante ejusmodi legione non nisi duos, separatim ad Senatum bellicum vocatos, interrogari jussit, an adjudicata jam causa acquiescere velint, nec quidquàm posthac commilitoni exprobare? respondebant hi, se quidem imperata facturos, si reliqui quoque Duces essent consensuri. At instabant judices, imperabantque, ut absque effugio, & ambagibus vel annuerent, vel abnuerent. Id cùm suo honori adversari dicerent, dimissi sunt illico, & intra triduum jussi purgare provinciam, incassum quiritantes, etiam alios navigare in eadem navì, cur ipsi soli plecterentur. Post hebdomadam circiter, vocati alii duo ad eandem quæstionem dum eadem reponunt, eodem modo dimissi tantum terrorem in alios diffudè, ut nemo auderet vel hiscere posthac. Prudenti sanè consilio separatim vocati sunt in Jus, & mulctati per intervallum temporis; faciliùs enim flectimus arundines singulas, quàm collectas in fascem: & feliciùs avertimus undas venientes per intervallum, quàm irruentes conferto agmine.

III. Oppones secundò: hæc studia quidem valitura intra Provinciam, cui Princeps Jus dicit: vim nullam habitura extra ditionem suam apud exteros. Ajo, si illi exteri suis quoque legibus inhæcant (vix enim ulla

gens Europæ est, quæ contra duellum mandata non condiderit) ubique erit securitas. Satis interea sit Principi, quod suam provinciam infans hoc pugnandi genere purgârit. An rarus quidam casus possit emergere, ubi nec Principi impedire, neque provocato duellum evitare integrum sit, alibi examinabimus.

112. Quæres denique, si quis non domi suæ, sed in regione externa provocetur, quid ei opis ferre poterit Princeps suus? Percipe, mi bone, quid FRIDERICUS WILHELMUS Rex Prussiæ statuerit. (a). Ne cura honoris, ait, omnino à nostris negligatur, nostrivæ Duces militares excludantur societate, & commercio æqualium, monemus quidem iterum, iterumque nostros quoscunque, ut, dum extra regni nostri fines cum aliorum Principum subditis eis agendum, vel in castris, vel in hybernis, vel ubicunque locorum, diligenter sibi ab omni altercatione, conviciis, ac duellis caveant. Si nihilominus ab ejusmodi, qui nobis non subsunt, extra fines nostros protervè, & nulla data causa, in honore suo læsi fortè ad duellum inducantur, pœnas duelli, à nobis statutas, non ferent, nisi cædes patretur, quæ juxta Jus commune punienda erit, ne sanguis humanus inultus maneat.

Crediderim ego, æquissimum Regem pro eo casu neutiquam duellum probare; sed solam pœnam suspendere, id quod Jura sæpius faciunt in criminibus variis; neque tamen prohibere, quo minùs à Magistratu loci plectantur, ubi ratione delicti forum nanciscuntur, saltem si privati ibi degant.

Finio totius Operis mei Articulum utilissimum, quo sicuti solidè demonstravi, duellum non esse necessarium ad tuendum honorem, ita præcor, ut vel consilia Doctorum, vel curæ summorum Principum optatum fortiantur effectum.

## ARTICULUS II.

### *Duellum est ineptum ad tuendum Honorem.*

**H**onorem, quem læsum existimant contumelia, aut rejecta provocatione periclitari, ut servant Monomachi, duellum subeunt. Hic finis est, quem sibi præfigunt: hic scopus ad quem collimant. Duellum ad

(a) Edicti sui §. 3.

ad hunc finem consequendum non esse necessarium, jam demonstravimus. Nec satis hoc est, ajo, etiam ineptum esse, nec ulla re minùs, quàm duellò honori consuli. Ratio gemina est. Primò, quia duello probum non tollitur; sed secundò potius augetur.

§. I.

Duello probum non tollitur.

- |  |   |
|--|---|
| 113. <i>Possset negari, quòd alterius convicium probro tibi sit:</i> | 115. <i>Nisi desipere, ut veteres Monomachi, velimus,</i> |
| 114. <i>Et si sit, duello probum non tolli, ratio dicat.</i>         | 116. <i>Casus unicus excipitur, qui tamen non obest.</i>  |

113. **I**n primis meritò possset negari, alterius convicio, aut maledicentia quidquam tuæ existimationi fuisse detractum. Dogma est, pridem à prudentibus adoptatum: *Vera laus ab eo dependet, quod ego ago: non ab eo, quod alii erga me agunt.* Falsò ergo Monomachi censent, tum maximè honorem naufragari, dum malum viro probò imputatur. Miserum me, si cuilibet pro libidine sua integrum sit auferre mihi bonum, quod sicut est præ omnibus pretiosum, ita clavibus, & feris custodire ego non valeo. Si ita est, tunc verus honor nunquam dependebit à vita proba, ac morum honestate: sed à calumniatoris corrupto cerebro, ac maligno dente. At quæ isthæc æquitas! fors ad tetricam Philosophiam hæc sensa ablegas? at hoc ipsum magnorum Principum judicium pridem fuit. CHRISTIANUS ERNESTUS Marchio Baruthanus (a): Errant, ait, qui existimant, viro probò, ac egregio quidquam alièna maledicentia de honore detrahi. ERNESTUS Dux Saxo-Gothæicus (b) his verbis suam mentem declarat: licèt adversario tuo verba quædam exciderint cruda, aut ignominiosa, nihil inde tibi damni vel in membris, vel in honore inferitur; siquidem neutiquam existimandum, in cuiusque hominis privati potestate situm esse, voce petulantiore existimationem lædere, quæ sicut laudabilibus tuis factis parita est, sic non nisi turpibus factis tuis potest

K 2

pestum.

(a) In Editò, contra Duell. an. 1699. (b) In Editò, contra Duell. an. 1646.

possundari; sedens penes unius luronis illotum os staret, integras Communitates unica horula honore, ac laude sua spoliare. Sanè rationi quàm maximè consentanea sunt hæc prudentissimorum Principum effata. Ut quid ergo armis quæritur, quod non fuit deperditum? ineptus utique conatus exseritur.

114. At demus, verè à conviciatore labem fuisse honori impactam; num abstergendam hanc credis temeraria pugna? nequaquam. Audiamus Illustrem WOLFIIUM: Duellum, ait (a), non est modus aptus ad controversiam decidendam, aut famam tuendam. Alibi (b): qui alterum interficit, vel corpus ejus quomodocunque lædit, hoc ipso famam, & existimationem suam minimè defendit, quod sic demonstrat: " Qui famam alterius lædit, infamiam alteri aspergere conatur: consequenter id agit, ut communis sit de eo hominum opinio, quod is quibusdam vitiis sit deditus, quibusdam imperfectionibus laboret, & virtutibus careat: consequenter ut minoris, & nihili fiat tanquam indignus honore. Quod si ergo famam, & existimationem defendit, id agere debet, ne alii fidem habeant famam suam laceranti. Enimvero, quod alterum interfacias, nemini persuadebis, falsa esse, quæ de te spargit. Patet itaque que famam, & existimationem minimè defendi, quod alterum interficias, vel ejus corpus quomodocunque lædas. "

Si juxta hæc principia rem attentius considero, Monomachos apprehendo in Dialectica maximè esse rudes, eo quod ex duello commisso ineptissimam consequentiam deducant. Exprobravit Titius Cajo admissam in lusu turpem fraudem. Purgavit se Cajo duello, ergo jam Cajo, à fraudis suspitione absolutus, pro viro honesto habendus erit? quis obsecro hic rerum nexus: *Cajus pugnavit, ergo non decepit Titium?* si diceretur: *Cajus pugnavit, ergo injuria impatiens fuit: ergo timuit, ne vapularet ut deceptor: ergo novit tractare gladium: ergo non horruit committere discrimini corpus, & animam: ergo leges Ecclesiasticas, & Civiles violare est ausus.* Hæc enimvero legitima esset consecutio: at pugnet ille per me centies, necdum soluta erit illa quæstio: *an in lusu deceptus.*

Fer-

(a) De Jur. Nat. P. 5. §. 1092. (b) P. 1. §. 1035.

Fernandus laudi sibi tribuebat, quòd legionem equestrem sibi commissam, ad omnem militaris disciplinae apicem perfecisset. Hoc ut inane jactantiam explodebat Leander. Provocatum itaque est ad manuales scypos; pugnatum est. Et quid postea? num idèd legio illa bene composita, atque exercita fuit? qui coram inspexerint, judicent: alii judicium suspendunt. Quid ergo Fernando duellum hoc tribuit? feralem, ais, glandem non extimuit. Sed neque extimuit Leander. Uterque dicti sui veritatem duello firmare laboravit, penes quem ergo stat veritas? num Fernandus vanus jactator: vel num Leander iniquus obtestator audiet? si indecisum hoc manet, qui, obsecro, honor Fernando redit? Fernandus imputatum sibi probrum inultus non tulit: ergo falsò ei imputatum esse ais? at etiam quibus verè imputatur probrum, patienter id non ferunt, imò impatentiùs ferme ac alii, hinc *usu propemodum eventit*, teste WOLFIO (a), *ut hoc ipsum judicium mala conscientia habeatur, si quis valde exacerbetur: dum ex adversò conscientia mens recti fama mendacia ridet.*

115. Timeo, ne cultissimo hoc seculo recidamus in barbariem illius retro ætatis, quæ duellum in judicium adscivit ad decidendas lites dubias. Vitio damus majoribus nostris, quòd à duelli exitu causam judicaverint. Hodie de causa judicare non veremur, & absolvere accusatum, *quicumque* pugnae exitus fuerit: pugnavit, dicimus, ergò est vir egregius, civis honestus. Majores nostri Numen præsidere duellis arbitrabantur, cæque temperare in favorem justæ causæ. Nos Numen à duellis abesse, iisque offendi credimus: nihilominus plus in iisdem momenti reponimus, quàm in quibuscunque sententiis, ac declarationibus summorum Principum. Quanta hæc in judicando barbaries!

116. In unico ego casu argumentationem monomachorum coherere cum legibus dialecticis video, tunc nempe, si exprobratum nimium vitæ amorem, aut timiditatem suscepto duello quis confutet. Hæc saltem non aded ineptè concluditur: *duellum iniit: ergo vita, lethique contemptor ultimum discrimen non horret.* At cum hæc nuda timoris exprobratio rara sit, nisi ex alia offensa, aut altercatione nascatur, cui dijudicandæ, sicuti & cæteris, duellum non quadrat, suæ asserto meo stat veritas, quo duellum ineptum tuendo honori modum dixi.

## §. II.

## Duello probum augetur.

117. *Quia duello divulgatur obiectum crimen.*

119. *Vel victum teter exitus.*

118. *Infames poena sequuntur Victorem.*

120. *Unde concluditur contra errorem male receptum.*

117. **Q**uid? quodd duellum acceptum probum, cui abstergendo non quadrat, nimium quantum sepe adaugeat, vel etiam nova probra adiciat. Quod tibi convicium dixit alter, paucorum ad notitiam adhuc pervenit. Si dein progredieris in arenam, rumor diffunditur per omnia urbis compira, per provinciam integram. In causam dissidii dum curiosus quilibet indagar, suspectus habebis, v. g. fraudis in lusu admittæ. Et pugnes licet ad ultimum usque halitum, non tamen hanc suspicionem evelles. Sine, ut enarrem, quod historiæ exhibent ad annum, qui Ludovico XIV. primus erat regiminis (a). In frequenti circulo nobilium personarum, celebrato apud Ducem Montbazoniæ, commercium Principis Longevillanæ, quod ei cum Colignio familiarius intercesserat, sermonibus carpebatur. Id quamprimum ad aures dictæ Principis pervenerat, exacerbata Guisum Ducem reum arguit ingesti sermonis. Neque contenta Longevillanæ, quodd Montbazonia, jussu matris regiæ, exhibito singulari honore eam placare, ac demulcere studeret, Colignio vindicandam committit, quam sibi factam credebat, injuriam. Hic itaque, ita imperante amore despotico, invitat Guisum ad duellum in foro publico ineundum. Sed aded male ab eo excipitur, ut ex acceptis vulneribus, paucis post diebus extinctus miser amandi, & vivendi finem fecerit. Illico fama per totum regnum non pugnam solum, sed & pugnae causam sparfit. Canebantur passim in triviis amores Montbazoniæ, quos antea leviter unus in paucorum confessu perstrinxerat. Ain jam, num sic duello reparata est fama? nonne potius acceptum probum nimium quantum adauctum est?

118. So-

(a) Histoire de Louis XIV. L. 1. p. 16. edit. à la Haye 1740.

118. Solet præterea duellum nova probra adjicere, in quamcunque partem victoria inclinet, ut dicere Monomacho fas sit :

*Vinco, seu vincor, semper ego maculor.*

Nam si vincit per eandem antagonistæ, restim, vel gladium vindicem sentiet, infami carnificis manu perimendus. Nulla quoque secuta cæde, uterque Monomachus morti adjudicatur vi Ediæti Bavarici, Coloniensis, Brandeburgici, Bipontini, Baruthani &c. *Vid. Cap. IX.* Præter capitale supplicium bona addicuntur fisco Regio per Ediætum LUDOVICI XIV. in Galliis. Item ALBERTI, & ISABELLÆ in Belgio (a) : nec non Regis Sardinie (b). Diuturnum saltem carcerem cum privatione omnium dignitatum statuit Ediætum Saxonicum, Palatinum, Brunswicense, Megalopolitanum, & cætera propè omnia. Quid ad honorem victoris Monomachi posset esse gloriosius ? fuga se his pœnis subducatur ? vagetur itaque, errereturque miser per terras exteras : dicat pro more, creatum sibi fuisse negocium (c) in patria. Si suus Princeps satis langueat in investigando, ac persequendo, modicam tamen ipse sibi fabricabit fortunam in exilio.

119. Quodsi in pugna victus herbam porrigat, gravi relato vulnere, tota fortè vita sentiet plagam non satis sanatam, prælagam præ omni barometro mutandæ tempestatis. Frendebit ipse, quod succubuerit, ridebit in sinum antagonista : alii judicabunt eum fuisse imparem ferendæ injuriæ, & fors reapse reum imputati probri ; Princeps si justus sit, afflicto pœnas addet. Quodsi etiam animam in duello efflet, horrore percellentur omnium animi non dubitantium, miserum jam cum Plutone cœnare. Carebit exequiis, parentabit ei solus carnifex, cadavere procul à Christianorum cœmeteriis abjecto ad sepulturam asinorum. En honorum apicem, ad quem tandem ascendit ambitiosus Monomachus.

120. Nemo, credo, est adeo bardi ingenii, corruptique judicii, ut non duellum de se, & *ex natura sua* ineptum judicet tuendo honori. Sic est, dicet Monomachus, *ex natura sua ineptum* est ; at ex persuasione vulgari, & prævalente hodie usu maculam abstergit cruenta hæc sponsia, vel ne aspergatur, cavet. Ita institutum est *ex placito hominum*, cui si ratio non

(a) An. 1624. apud Mauris. de Duell. (b) An. 1723. Lunig. Corp. Jur. Milit.  
(c) Une affaire.

non subest, saltem experientia suffragatur. Bene habet, teneo, quod volo. Aptum de se duellum non est optato fini: est tamen ex culpa, & vitio hominum eorum, qui usum pessimum rectæ rationi præhabent. Diminutio itaque est signum servati honoris *ex puro placito*.

Eccur autem aliud mitius signum statuere non placet? cur non amico amplexu jubetis dissidentes redire in gratiam? signum hoc esset humanitati conformius. Cur non sententia judicis statis? signum hoc esset multo æquius. Sed nempe insanire lubet: nec pudet insanire cum multis. Ego sapientibus scribo, vel sapere desiderantibus: si pereant in suo morotrophio, qui helleborum non admittunt, absque mea id culpa fiet.

### ARTICULUS III.

#### *Duellum non est argumentum veræ Fortitudinis.*

**I**Nveteratam hic opinionem ex multorum animis evellere contendo, dum duello abrogo fortitudinis laudem. Quamvis pseudo-legem malè introductam ut plurimum fateantur: cum tamen fortibus viris accensere non dubitant, qui, neglecta Magistratuum autoritate publica, jus sibi vi armata dixerit. Evomat licet in conflictu animam, & infami tumuletur manu: fortiter saltem occubuisse ajunt infelicem honoris sui vindicem. At demonstrandum jam, quodd hanc qualemcumque laudem immeritò sibi arrogent.

Duellum non esse argumentum veræ fortitudinis testatur I. Idea, quam sapientes fovent de fortitudine. II. Experientia. III. Ratio. IV. Oracula Principum.

17

#### §. I.

Duellum non esse argumentum Fortitudinis, testantur Sapientes.

121. *Genuina fortitudinis idea.*  
122. *Non convenit duello,*

123. *Juxta chorum sapientum,*

121. **Q**Uænam ergo est illa idea, quam sapientes fovent de illa heroum virtute, de Fortitudine? teste WOLFIO (a) vocabulum *fortitudo* non sumitur ab omnibus in eodem prorsus significatu; sunt enim nonnulli,



nulli, qui hanc virtutem ad solam fortitudinem bellicam restringunt, quasi militibus propriam. Sunt alii, qui eandem ad fortunam utramque æquo animo ferendam referunt, adeoque à patientia non satis distinguunt. Sunt denique, qui eandem circa terribilia, & ardua versari opinantur. Præcisam itaque daturus ideam ait: *Fortitudo est virtus, quæ moderatur metum, quo minus eodem adducamur ad faciendum, quod non facere: & non faciendum, quod facere tenemur.* Unde *fortis* dicitur, qui metu periculi imminentis sese adduci minimè patitur, ut faciat, quod non facere debebat: vel non faciat, quod debebat facere. Econtra *timidus* dicendus est, qui levis etiam periculi metu se adduci patitur, ut faciat, quæ facere non debebat: aut non faciat, quæ facere debebat. *Audax* erit, qui nulla obligatione urgente pericula subit. Conformia sunt hæc doctrinæ ARISTOTELIS, qui fortitudinem ait esse mediocritatem circa metum, & audaciam (a). Qui fortis verè est, nec temere audet, nec inconsultè timer (b).

122. Exinde fuit, Monomachum *audacem* esse; quia pericula corporis, & animæ subit, nulla obligatione urgente. Ad injuriam repellendam si obligatum se credit, vias licitas incat, Articulo I. hujus Capituli recensitas. Obligatio ad duellum nulla, nisi ad evitandum; quia pseudo-lex hæc omni Jure proscripta, turpissimis confixa notis, ligare neminem valet.

Sub alia quacunque ratione *timidus* dicendus est Monomachus; quia metu levis periculi, ne scilicet apud iniquos rerum aestimatores contemptum sibi consciscat, adduci se patitur; ut faciat, quæ facere non deberet, scilicet ut confligat; & non faciat, quæ facere debebat, scilicet vel contemnere injuriam, vel vindictam committere Judici. *Fortis* ergo jam dici nequit, dum *timiditate*, & *audacia* vitio se obstringit.

123. Fuit hætenus is unanimis Sapientum sensus, hominumque bene moratorum, tanto magis valiturus; quod virtus, & vitium plerumque ex prudentum judicio dignoscantur! quidquid contra blaterent alii. ARISTOTELES ait: Vir magnanimus in honoribus, & ignominiiis maximè spectatur: ignominiam, atque infamiam contemnet; quia in eum cadere non potest (c). Alibi (d) docet, eum fortitudinis laudem mereri, qui

L

adit

(a) 3. Ethic. c. 6. (b) S. August. in Epist. ad Hieron. 167. aliàs 29.

(c) 4. Nicom. 3. §. 33. & 37. (d) Ethic. 3. c. 7. & 8.

adit pericula: sed ea, quæ sunt honesta, in quibus potest aliquid laude dignum præstare pro patria, bono publico, proximæ utilitate. Qui adit pericula cum consilio, & ratione, hoc est, modo, loco, quo & quando oportet, omnia agens honestatis, non explendæ stolidæ passionis causa. Idem SENECÆ est iudicium. dicentis: Pusilli hominis est, & miseri, repetere mordentem ut mures, & formicæ (a). Idem LACTANTI: Fortitudo, si nulla necessitate cogente, aut non pro causa honesta periculum subierit, in temeritatem convertitur (b). JUSTINIANUS Imperator, (c), nec fortitudinem, inquit, laudabimus, quæ non est cum iustitia, & si quis ab ea iustitiam subtrahat, delictorum solummodo, non bonorum fiet occasio. Juvat etiam GROTIUM adducere (d), qui talem fert injuriam (de accepta alapa ei sermo est, quæ inflicta, qui dedit, fugit) is patientem se excellenter ostendit, atque idem honorem magis auger, quam minuit. Contra quidem ait VITRIARIUS, quoddam hanc GROTII Philosophiam mos vitæ civilis non ferat: neque propterea excellenter patiens censendus sit; quia quævis ferre à quovis virtus non est. At nunquam dixit GROTIUS, *quævis à quovis* esse ferenda, utique Eurapelia cuique virtuti est necessaria, Liceat etiam PUFFENDORFIUM addere, inter alia dicentem, majorem enasci honorem ex cello animo injuriam aspernante, quam ex illo Neoptolemi apud CURTIUM: *Emoriar potius, quam ut nomen ignavi feram.* Unde apud PLUTARCHUM Antigonus Pyrrho provocanti reposuit: *Pyrrho, si vita paniteres, multas patere ad interitum vias.*

MASENIUS (e) refert, Lacones, qui inter Græcos fortitudine ferme eminere, Deos inter solemnes preces compellasse, ut ad ferendas injurias vires largirentur; quod sine hoc beneficio se minime viros, ad magna idoneos, futuros crederent. Hinc proverbio *SPARTANA VIRTUS* celebratur. De Hercule testatur PLUTARCHUS, quod, convicia ut muscas contemnere sit visus. Quod si tres celeberrimas sectas Philosophiæ Moralæ, Epicuream scilicet, Stoicam, & Peripateticam iustrimus, nullibi vindicationem injuriæ fortitudinis titulo honoratam conspiciemus, utpote adeo reprobam ab omnibus, ut, si parvulus ex schola morali redux eam laudat.

(a) L. 3. de Ira. c. 34. (b) L. 6. Divin. Instit. c. 14. (c) Novel. 69. pr.  
(d) De J. B. & P. c. 1. §. 10. (e) Utilis curiosit. c. 10.

laudasset, haud dubiè ferulam fuisset sensurus Argivi Patris: (a). Ad Romanos si progredimur, Marcum Catonem habemus (b), cui dum in foro causas agentì Lentulus adversarius attractam pinguem salivam in faciem exspuisset, absterxit ille, velut à sudore faciem, dicens: *affirmabo omnibus, falli eos, Lentule, qui te negant os habere; habebatur siquidem vulgò pro indiffero.*

Et ut apertius de duello loquentes audiamus, Cajus Marius, Imperator exercitus, cum ipsum Cneius Pompejus idem Imperator, ad singulare certamen provocaret his verbis: *si magnus es Imperator, ô Mari, descende in certamen*, ætudiè factum his aliis verbis: *inib tu Pompei, si magnus Imperator es, coge me vel invitum decertare.* Ita etiam Augustus Antonio provocanti reposuit, alias sat multas patere ad interitum vias. Alios nobis geminos admirandos exhibet CÆSAR (c), qui militiæ gravissima emulatione collisi, quomodo fortitudinem alter alteri comprobaverint, acciperent. Erant in legione fortissimi viri centuriones, qui jam primis ordinibus appropinquarent, T. Pulsio, & L. Varenus. Ille perpetuas controversias inter se habebant, inter alteri anteferebantur, omnisque anno de loco summis simultatibus contendebant. Ex his Pulsio, cum acerrimè ad munitiones pugnaretur, *quid dubitas*, inquit, *Varene? aut quem locum probande tue virtutis expectas? hic dies, hic dies de nostris controversiis judicabit.* Hæc cum dixisset, procedit extra munitiones, & quæ pars hostium confertissima visa est, in eam irrumpit. Ne Varenus quidem tum se vallo continet, sed omnium veritus existimationem, subsequitur, mediocri spatio relicto. Pulsio pilum in hostes mittit, & unum ex multitudine procurrentem trajicit: quo percusso, & exanimato, hunc scutis protegunt, hostes, & in illum universi tela conjiciunt, neque dant regrediendi facultatem. Transfigitur scutum Pulsioni, & verutum in balteo defigitur. Avertit hic casus vaginam, & gladium educere conantis dextram moratur manum, impedirumque hostes circumstant. Succurrit inimicus illi Varenus, & laboranti subvenit. Ad hunc se confestim à Pulsione omnis multitudo convertit: illum veruto transfixum arbitrantur. Illic

(a) Scienza Cavalleresca c. 2. c. 5. (b) Apud Masen. loc. cit. (c) Lib. 5. de bello Gall.

verò occurrat ocyùs gladio, cominisque rem gerit Varenuſ: atque uno interfecto, reliquos paulum propellit. Dum cupidius iſtat, in locum inferiorem deiectus concidit. Huic rursus circumvento fert ſubſidium Pulſio: atque ambo incolumes, multis interfectis, ſumma cum laude intra munimenta ſe recipiunt. Sic fortuna in contentione, & certamine utrumque verſavit, ut alter alteri inimicus auxilio eſſet, ac ſaluti.

## §. II.

Duellum non eſſe argumentum Fortitudinis, fulcit experientia.

124. *Dantur occaſiones alia demon- 125. In quibus deſicere ſape viſi ſunt*  
*ſtranda fortitudinis: Monomachi.*

124. **N**Otate Monomachi verba illa primùm allata, heroë digna Pulſione: *Quid dubitas, Varene, aut quem locum virtutis probanda exſpectas? hic dies, hic dies de noſtris controverſis judicabis.* Tunc ergo & vos armis veſtram fortitudinem probate, dum dimicandum erit pro patria. Interim, premendo impetù exulcerati animi, nomen fortium aucupamini. Majores veſtri, ô Nobiles palæſtræ, generis ſui dignitatem non hujusmodi duellis naſti ſunt, quibus Mandata Principum refractarii everterint. Nec ergo vos ad fortitudinis laudem per hanc viam graſſari decet. Certè quantumvis nobilitate generis excellatis, indigni eſtis, qui aliis regendis præſciamini, quamdiu in vobiſmet ipſis efferatæ iræ impetum regere ignoratis, aut debitam legibus Principum reverentiam præſtare. Ogge-  
retis fortè, occaſionem vobis in promptu non eſſe oſtendendæ cum Vareno fortitudinis; neque enim ſingulos dies aſſultum, & prælia offerre.

125. At verèor, ne multi veſtrùm, quibus tota magnanimitas in ore reſidet, occaſioni deeſſent, ſi hæc adeſſet. Ne de calumniandi libidine me arguatis, Rôquesius vobis canar mei loco (a): "Erramus, ait, ſi credamus plus animi ineſſe duelli ſeſtatoribus, quàm iis, qui veneratione in DEUM, & Regem ducti, duella recuſant. Quoties notati ſunt thra-  
ſones illi toti expalleſcere, dum vel aſſultum tentare, vel hoſtium cu-  
neos

(a) Reflexions morales ſur le Duel, ſ. 85.

*Art. III. Duellum non est argumentum vere Fortitudinis. §. II. 85*

neos perrumpere juebantur. Quoties inter fugitivorum imbellem turbam sunt deprehenſi? Nec mirum; duellum ſubire audent, ed quodd prævalere ſe Antagoniſtæ armorum tractatione confident. At dum incendendum ſupra ſolvendos jamjam cuniculos, contra irruentem globorum nimbum, tunc ſanè apparet, quiſnam vitam pro cauſa publica generoſè contemnat. Nec quis exiſtimet, hæc, in Muſæo excogitata, experientia deſtitui; teſtes habemus rei peritiſſimos. Narrat FOLARDUS vir Equeſtris ordinis, Guiſium Ducem, dum Metas contra Carolum V. defenderet, ſevero Ediſto duella vetuiſſe, inrentata pœna abſcindendi de manu pollicis. Et hoc ad illos præcipuè pertinebat turbulentos Monomachos, quos verè probra dixeris exercitiſ, & urgente periculo, primos videbis fugam capeſſere. „ Ne itaque obviſ quiviſ Monomachus fortium Heroum albo inferi poſtulet, eo ſolo titulo, quodd duellum non horreat; fors plus jaſtantiæ, quàm animi ſubeſt.

Memini, quod de Thraſone Vaſcone non illepidè narratur. In campum is condixerat, quotidianis duellis frequentem, &, ne quid generoſitati deeſſet, anteverterat ſtatam horam. Interea dum ſpirans minarum obambulat, alia duo paria pugilum adventant, eo ardore congreſſa, ut utrinque unus herbam momorderit. Clàm geminam cædem arbitratus Vaſcò, horrido concuſſus ſpectaculo, modum, quo ſe ſimili periculo expediret, excogitat, à ſuo genio non alienum. „ Et en! poſtquam uterque interfeſtor diſceſſit, is perſtans in arena utrumque cadaver decenter componit. Tum truci fronte deambulans, adverſarium operitur. Adventantem excipit ruſoſo vultu, & interroganti de hiſ cadaveribus, reponit verbis Vaſcone dignis, ſe binas haſ inferias pro jentaculo abſolviſſe. Territus alter, pedem referre cœpit: habe, inquiens, tuum tibi jentaculum, nolim ego tibi in prandium cedere. Ita nempe inanis quandoque rumor magnam præſeſert ſpeciem, & dolium vacuum præ pleno tinnit.

## §. III.

Duellum non esse argumentum Fortitudinis, demonstrat Ratio.

126. *Suscipiens duellum non movetur* 127. *Recusans non retinetur ignavia*  
*virtute fortitudinis.* *vitio.*

126. **M**ultum scire refert, quo stimulo ad duellum adigatur monomachus; sicut enim alia quævis virtus, si: & fortitudo inclita suam causam impellentem habet, qua absente virtus non est. Sic mercatorem, qui, sola spe lucri plectus, sulcat maria, & timentes frangit fluctus, fortem non dicimus, sed habendi cupidum, avarum. Econtra fortem illum Heroem prædicamus, qui per tela, per enses ruit, ubi salus patriæ vocat. Quis ergo ille stimulus, qui monomachum ad duellum adigit? ardua res est ejusmodi certamen: horret natura, quis neget? sed quid animum firmat? præceps ira, ambitio, sui æstimatio nimia, livor, aliisque indomitus affectus animi: ita tamen, ut sociam semper operam conferat timor. Ain, timor? ita est, nisi timore ageretur monomachus, pugnam non subiret. Timet insulsa judicia hominum, timet damnum in fortunis, jacturam dignitatis, contemptum, diſteria, iniquos oculos, & quæ sunt alia ejusmodi. Eja si vir fortis est, ster infractus ad hæc omnia; nec propterea vel latum unguem à legis divinæ & humanæ reverentia discedat. Audeat, quod Martyres, etiam feminae, ausæ sunt. Ajo iterum: si timidus non est, cur patrata cæde, vel commisso sine cæde duello, ubi instare severam Nemesis novit, trepidus de fuga sibi consulit, vel ad loci sacri asyllum properat? hém leporem! qui, postquam toties sacra loca, personas, resque fastidioso supercilio contempsit, jam intra sacra latibula trepidus se recondit. Fortis ergo non est; quia non movetur virtute fortitudinis.

127. Quam parum autem suscipiens duellum fortis viri meretur nomen: tam parum recusans duellum ignavis accensendus est. Equidem si solus timor vulneris, necesse quemquam abstergeret, minus audax, aut etiam timidus is per me diceretur, quamvis ab humana natura alienum nil faceret. At si reverentia legum, & salutis æternæ cura recusantem movet, quis, rogo, infamem ei ignaviæ notam jure tribuere ausit! obſtrepat vefanorum turba, quid tum? ain, si licentia militaris aliquando pro ignaviæ

nota

nota statueret pudorem, quo quis vereretur peccare cum prostibulis? si alibi Nobiles cum inter vecordes reputare inciperent, qui renneret haullis plenis cyathis tumulare rationem: vel cum inter avaros, qui dubitaret opes suas in mare projicere, aut extremo discrimini committere? ain, num propterea ebrietas laudanda, & damnanda sobrietas foret? num abhorrere à Venere, aut servare fortunas ignominiosum & infame facinus rectè à quocumque reputaretur? Et quæ dèum, obsecro, sit illa infamia, quam ex recusato duello oriri dicunt? num *facti* illa est, vel *juris*, quærit Carpzovius? (a) non illa *juris* esse poterit; quia hanc lex irrogat obturpe factum. Tantum verò abest, ut lex eam provocato, si pugnam detrectet, imponat, ut etiam cū adversus provocantem præsto sit. Non etiam *facti* poterit esse; quia homines graves & honesti detrectantem non infamia, sed laude dignum censebunt. Vel num fortè ea vivimus tempora, in quibus probro vertatur revereri Deum, & Principem? ubi terrarum, an in media Barbaria versamur?

#### §. IV.

Duellum non esse argumentum Fortitudinis, confirmant  
Oracula Principum.

128. *Abnegant duello fortitudinis laudem;* 129. *Secum non possent prohibere.*

128. **A**gedum, Monómache, summos Principes in suis Edictis loquentes audiamus. Cave, contra mentem loqui ne dixeris; terrestres hos Deos arguere mendacii, monstrum proterviæ foret.

MAXIMILIANUS Elector Bavarus duellum vocat consilium temerarium, dignumque pœnis. Atqui nec temeritas, nec pœna cum virtute convenit.

LEOPOLDUS Dux Lotharingiæ declarat, hoc æstro percitos homines, relicta vera, & à Christianæ fidei placitis separari nescia, fortitudine, umbram sectari, quam pro idolo colant.

FRIDERICUS AUGUSTUS Rex Poloniæ, Saxoniae Elector, censet eos, qui carpere solent lata in duellum Edicta, animi plerumque robore destitui.

FRIDERICUS III. Elector Brandenburgicus monomachos dicit homines temerarii & inquieti animi.

WILHEL-

(a) Pract. nov. L. 1. §. 29. n. 72.

WILHELMUS itidem Elector Brandenburgicus, morem, qui geritur his Mandatis Principum, non timidi, sed obedientis animi indicium haberi vult.

GEORGIUS LUDOVICUS Elector Brunswicensis duello omnem virtutis laudem adimit, ob turpes ejus natales, compositionem scilicet & lusum, ex quibus nulla unquam virtus pullulavit.

ERNESTI Ducis Saxo-Gothaici verba sunt maximè notatu digna: falsa persuasio est, ait, provocato quidquam de honore detrahi, si comparere detrectat. Masculina virtus est magnanimitas, non irruit caeco impetu in pericula, neglecta cura corporis & animæ.

Nec minùs ponderosum effatum est Comitis Hanoviæ: ne quis provocatus existimet, recusatum duellum, etiam post impletâ hucusque omnia egregii viri officia, turpem notam sibi posse aspergere. Abolitam volumus ejusmodi opinionem, tota infamia in solum provocantem detorta. Heroica mens non in calcandis justis legibus, sed in defendenda patria demonstratur.

CAROLUS XI. Rex Sueciæ duellum nuncupat audax, & arrogans factum.

CAROLUS EMMANUEL Sabaudia Dux detestatur astutiam demonis, sub falsa specie servandi honoris pertrahentis homines ad divinas, humanasque leges violandas.

LUDOVICUS XIV. Rex Galliarum, dum monet, ut amicè componantur dissidia, ait: hoc magis esse conforme vero honori, quàm dimicationem utrunque cruentam.

Postquam hæc ex Edictis excerptimus, juvat addere ex THUANO (a) Judicium Condæi Principis, belli, pacisque arte excellentissimæ. "Mon-  
 20 pelli mentione injecta de nimia jam tum (b) detestabiliu duellorum  
 25 frequentia, cùm Isaacus Waldraus Mojus, qui cum aliis è nobilitate  
 30 aderat, ea decoris tuendi, cui vitam nobilis animus posthabere teneat.  
 35 rur, necessitate excusaret, Condæus summa, & tanto fastigio digna  
 40 gravitate interfatur, & magno errore homines in eo decus, & veram  
 45 gloriam reponere dixit, quòd gloriæ Dei, ad quam omnia nostra con-  
 50 filia, & actiones dirigere debemus, & mandatis ejus, in quorum ob-  
 serva-

(a) De vita Condæi L. 2. (b) An. 1582.



*Art. III. Duellum non est argumentum veræ Fortitudinis. §. IV. 89*

servatione vita æterna consistit, adversetur. Nec nisi pro patria iussu Principis, aut inculpata corporis tutela, cuiquam gladium stringere fas esse, pronuntiavit, conversaque ad pastorem, qui post sedile stabat, facie, quo maiorem sententiæ suæ fidem adstrueret, ab eo coram quaesivit, an salva conscientia privatis injuriis ulciscendis liceret ad certamen venire? Et cum ille non licere, nec nisi cum certo damnationis æternæ discrimine id fieri respondisset: hoc jam constantor, inquit, tene, & auctor me, qui pro decore vestro, & gloria ultro me sponso, & prædem offero, illas de decore, & gloria eripere opinor, ex animis vestris in posterum deleto.

Denique testimonia superessent Episcoporum Galliae plusquam viginti, Doctorum Parisiensium quinquaginta trium, & Nobilium complurium, ac Polemarchorum Galliae, spuriam fortitudinem agnoscentium in duello, quæ volenti legere peculiari codice exhibentur (a).

129. Jam duo verba Monomache. Si pro fortitudine habenda est provocatio, & acceptatio vestra, ecquid est, quoddam supremi Legislatores, & prudentissimi Principes tam atris coloribus illam depingant, omnemque magnanimitatis laudem abrogent? ecquid est, quoddam prohibeant, puniantque severè? num prohibere, & punire virtutem volent? si duellum detrectare infame factum est, cur, ut detrectetur, mandant, iterum iterumque urgent? Cur HENRICUS IV. Rex Galliae (quantum nomen) infames esse voluit Monomachos (b)? ludere eos fors credis, & simulare iras, aut ex ratione politica prohibere, quod in animo approbant? Næ tu ex summis Principibus turpissimos facis populorum deceptores; quin tyrannos iniquissimos, ut qui plectant facinus, quod tacite probant. Obstipare naris, oportet, si vim hujus argumenti non persentiscas. Fatere ergo tandem, spuriam fortitudinem affingi duello; ita nos docent testimonia Sapientum, experientia, ratio, & oracula Principum.

M

ARTI.

---

(a) Recueil des Edits & autres pièces concernant les duels, & rencontres, à Paris l'an. 1669. (b) Apud Schiaram Theol. bell.

## ARTICULUS IV.

*Duellum est crudele.*

**E**O licentiæ devenit detestandus duellorum usus, ut, ex arrogato velut imperio, Jura dare attentet, hominibûsque ingenuis servitutem imponere, & legem præscribere, qua nescio, an unquam crudelior ab ullo tyrannorum excogitata fuerit; imponit quippe I. Difficillima: II. Iniquissima, III. Futili sæpe de causa.

## §. I.

## Imperat difficillima.

130. *Vita exponenda est, & cum vita bona omnia:* 132. *Servata etiam vita ferenda miseria:*  
 131. *Ipsa aterna salus;* 133. *Ita, ut nulla lex Dei tam dura sit.*

130. **Q**uid, edic, difficilius, quàm vitam, fortunæ bona, familiam, &c. periculo exponere, quamprimum vel frivola provocatio urget ad comparandum: vel jactum protervi hominis convicium ad provocandum? Egredi ergo debebo domo mea, fors nunquam rediturus. Tristibus oculis valedicere parentibus, uxori, liberis, & quidquid in terris charum est. Tergum obverto fortunæ bonis, fors post horam omnium possessione deturbandus. Progredior ad macellum ut lanio, non sanguinem pecorum, sed humanum, & fortè meum effusus. Dubiæ aleæ expono non aurum, non opes: sed quæ his omnibus potior est, vitam, cujus conservandæ contumax studium omnibus animantibus natura indidit: qua perdita, vitæ hujus bonâ perdita sunt omnia.

131. Et utinam expirantium in duello vita ita exstingueretur penitus, ut nulla sui parte superessent; non aded acutus est gladius, ut etiam animam perforet. Hæc soluto corpore, quo gentium, quo terrarum abibit? nōne huic quoque triste illud propempticon occini potest, quod olim Turno, ense Æneæ conciso, MARO cecinit:

*Vitæque cum gemitu fugit in signata sub umbras.*

In æstu furoris, ac rixæ calore descendet ad tartara, luitura, præposteram obediẽtiam, præstitam maledictæ legi. Et ne quis de ruina immortalis animæ dubitet, eam inter commenta rigidæ nimis Theologiæ abjiciendo, alibi exhibebimus N. 388. quid magni Principes, acatholicis etiam principiis imbuti, hac de re consueverint.

132. Fingam tamen, me salva vita rediturum: fors vulnus feram sanatu difficile, unde nunquam integrè cõvalituro perpetuæ erunt ferendæ molestiæ. Sed liberalior sim: victor revertar strato hoste. Igitur erit capeßenda fuga, descenda patria, vel diuturna toleranda captivitas, quin ipsum fortè ferale supplicium, si Princeps legum suarum sit observantior. Quo dolore familiæ, charorúmque? & quo mco solatio? Mens mihi effera adcò non est, ut de humano sanguine, si mea fortè manu effundatur, non angar: horrebo measmet manus cruore tinctas: nocturnæ umbræ, rædæ furiarum, conscientiæ morsus, adempra quicre, terroribus vexabunt animum, nullum mihi posthac diem serenum daturi.

133. Hanc ingentem malorum molem intueor: nihilominus duellum subeam; quia subire crudelis lex imperat? Superi, quàm dura servirus! si DEUS, cujus tamen dominatus in creaturas limites nescit, tam difficilia præciperet, quis non de jugi gravitate conquereretur? Nunc is nil desiderat, quàm ut injuriam generoso animo feramus, vel ad Magistratum saltem querelam deponamus: & hæc æquissima, moderatissima suppremi Domini voluntas rejicitur, & ceu jugum non tolerandum excutitur. Econtra gregi imbecillum hominum, præscribenti duellum, curvatur genu, & in momenta expectatur nutus, quo comparendum in arena sit; quamprimum scilicet maleferiato homuncioni placuerit convicium facere. Nempe etiam Dæmon, Numinis semper simius, suos martyres habet, qui lætæ à se legi, & acceptatæ à suis, fortunas omnes unà cum vita immolent, in hoc martyribus audaciores, quodd etiam in æterna non horreant incidere supplicia, dum illi non nisi *leve, & momentaneum tribulationis* paterentur, cum æternis gaudiis illico commutandum.

## §. II.

## Imperantur iniquissima.

134. *Quia dimicare debet innocens,* 136. *Et quandoque contra amicos.*  
 135. *Cum damno charorum,*

134. **Q**Uærent Theologi, num Judex committere duello possit duos mortem commeritos, ita, ut victori supplicium remittatur. Dicunt plerique, posse id licitè: dissuadent tamen. Sed quæ nova apud nos scena? Non rei: sed innocens nil mali meritus, extremo discrimini obicitur, scilicet duello. Illi dicere poterunt: *Nos quidem digna factis recipimus: ille autem, innocens, quid meruit?* Casum unum dabo, & utinam, qui contigisset, esset unicus. Cajus, stimulante veteri rancore, insimulavit coram amicis Titium de peculatu, seu ærario militari olim fraudato, dum alterius Principis castra erat secutus. Jacti convicii dum percrebrescit rumor, Titius, quibusdam in speciem argumentis in suspicionem inductus, adigebatur gladio diluere objectum probum, nisi vel depeculator, vel ignavus haberi velit, certè excludendus legione, in qua centuriæ præerat. Recti sibi erat conscius, & ab iis quoque, qui penitus virum noverant, innocens habitus: nihilominus satis non erat accepisse injuriam, etiam vitam suam exponere adversarii gladio fuit coactus. Quo quid iniquius excogitari possit, non dispicio.

135. Iniquè cum Monomachò agit tyrannica lex: sed meminerit is, se quoque iniquè agere cum sua chara familia, siquidem legi illi colla submittat. Constituerant olim Reges Galliæ in duellum supplicia varia, ut nec victus, nec victor impunis abiret. Sed nil carcer, nil restis, nil gladius potuit. Inde permotus Ludovicus Magnus trientem bonorum, quem Monomachi uxori antea in Ediçto suo reliquerat pro alenda superstite familia, nova declaratione (a) totum abjudicavit, nosocomiis applicandum unà cum bonis cæteris, eo fine, ut, si effratos proprium exitium à duello non satis absterret, misera saltem charorum sors, & extrema pau-

(a) Declaratio Ediçti an. 1711. §. 13.

paupertas retraheret potentius. Et si hæc sapientissimi Regis severitas extra Galliam non vigeat: nunquam tamen occiditur Pater, quin relicta familia, præter dolorum ingens detrimentum bonorum patiat. Et quis ille animus (Marpesiam caute melius dixero) quem nec sui, nec suorum miseret!

136. Post propinquum sanguinem locum primum habent amici. Sanctum quid erat amicitia jam ethnicos inter. LUCIANUS (a) admiranda in hanc rem exempla recenset. Habet amicitia sua quoque jura, ad quæ appellare, per quæ obtestari passim amici consuevère. Hæc sacra jura evernit pseudo-lex de duello; hac enim stante omnis amicitia, vitro fragilior, tenui pendet filo. In corona phurium fortè joco, eoque liberali, ut credis, perstringis amicum, quocum tibi hæcenus bene convenerat. Adsit cinis quidam, qui ei crabrones excitet, quæratve, an inultus hoc pati velit? etiam alibi spargat temere prolapsum verbum, reticens, qua id mente prolatum sit. Sint invidi, qui alterutrum vestrum è medio sublatum cuperent, invalescet fremitus, statuetur, duellum labi lavandæ unicè esse necessarium: progrediemini vel inviti in arenam, & post teneros amplexus ructis in mutuas cædes ac vulnera, feritate adeò barbara, quam etiam eductus heri è sylvis homo detestetur. Amantes hæc fors iniqua premere non semel est visa. Amasius, ne idolo suo displiceat, in amici viscera grassari debet, si delicata mulier ab hoc se læsam conqueratur, & imperiosa satisfieri sibi postulet. Nil necessitudo, nil cognatus sanguis valebit: multum erit, si saltem sibi patrem excipiat, ut Rodericus in tragedia (b). Adeò jura omnia convellit iniquissima lex.

## §. III.

Frivola sæpe de causa.

137. *Demonstratur exemplis.*

139. *Concluditur.*

138. *Et horum uno satis pathetico.*

137. **D**UM ita de iniquitate conqueror, qua & amicitia, & humanitas leges violantur, jam ad ipsas duelli causas prolapsus sum, quas per sæpe frivolas, & futes esse dico, & ex recensitis apparet. Unum & alterum, ne in deliriis fusior sum, addo casum.

M 3

HEN-

(a) In Toxaride, seu de amicitia. (b) Tragedies du Pierre Corneille. le Cid.

HENRICUS IV. Galliae Rex, Entraguam amabat, formae illiciō captus, &, ut solus amaret, Bassompierum (a) cupiebat amoveri. Votum suum vix exposuerat Duci Guisio, cū hic absque mora promittebat se pugnaturum pro Rege, & tres contra Bassompierum fracturum lanceas. Accepto promisso, pugnae destinatur in ipsa regia spatiosa area. Sublatis antē, quibus strata erat, lapidibus, à prandio comparent armati heroes, in exigua causa magni Palæstritæ, confluyente ad fenestrarum cancellos omni aula cum ipso Rege, & Regina. Datur pugnae initium. Guisius lancea sua primū ad-versarii cassidem feriit: mox & ventrem perfodit aded graviter, ut extracta lancea etiam viscera effunderentur: ex quo quidem lethali vulnere post moram Bassompierus præter spem omnium convaluit, tanto nihilominus horrore in spectatorum animis relicto, ut Rex statuerit posthac ejusmodi pugnas proscribere. Non multū absimile est, quod nuper admodum Germania indignabunda vidit. Puella procax saltandi arte multorum oculos aded fascinavit, ut etiam Principum de sanguine miles donum idolo afferret horologium, quod aureum esse credebat. Hoc ubi alius quispiam procus de viliori metallo confectum esse notasset, joculari de generosa Principis liberalitate non veritus, probrosum aded verbum ab eo tulit, ut, cum neque imperatoria, neque regia autoritas componendæ rei sufficeret, duellum inire debuerit, in quo Princeps tria tulit vulnera, unūque eorum grave admodum.

Aliam duelli causam frivolum lege n. 314. ubi in canem venaticum subita indignatione jactum conviciū, eoquod malè judicabatur redundasse in herum, gladios è vagina evocavit. Nec illepidè MAURITIUS narrat causas futes, unde in Academiis Studiosi concitantur ad educendos castos suos gladiolos, qui eousque nunquam apparuerant nudi. "Sunt cæ, in-  
 „quit, aded plerumque frivola, ut satius foret, de tribus contendere  
 „capelli; vel enim helluoni non æqua potus mensura aut numero, aut  
 „non æquè diu respondetur: vel caput non aperuit commilito, nec salu-  
 „tavit alterum, quem sæpe nec vidit: vel non satis demissè erga vetera-  
 „nos, cristatosve hoc officio functus est: vel Spartacus aliquis, arte, aut  
 „viribus præfusus, aliis insultat: vel Pamphilus æstuat, quod Niccratus  
 heri ."

(a) Bassompierre, Journal de sa vie l' an. 1605.

heri Chrysidem habuerit: vel quòd rivalis cum Glycerio choream du-  
 xerit in nuptiis, vel quòd crapula jam gravis, aut artis imperitus præ-  
 propèrè alterum saltu præverterit: vel quòd intempestivè alterum mo-  
 nuerit, eisque oblocutus sit, quòd acerbiùs disputantem oppugnaverit;   
 quòd de suo cive, aut combibone parum honorificè locutus sit: quòd   
 in via provocaverit museum præteriens: quòd clamanti alius occlama-  
 verit: quòd se quis æmulum in vestigiu, aliàve re ostenderit: quòd co-  
 ram Lesbæ foribus fidibus cantaverit: quòd illam è fenestra prospicien-  
 tem vultu veneratus sit: & sexcentæ aliæ sicutæ gerræ, de quibus cali-  
 dissimè inter se contenditur. „ Hæc insana levitas, academicam gyrans  
 juventutem, urinam non etiam militibus, ac nobilibus viris quandoque  
 vertiginem afferret.

138. En miseram monomachorum conditionem, quibus necesse  
 est, vel necesse esse videtur parere legi difficillimæ, ob causam frivolum.  
 Quod ut provocatus quidam provocanti manifestius ante oculos poneret,  
 si vis, inquit, ut paream tibi, eja pergamus ad cæmeterium; malo enim  
 in sacro, quàm profano loco occumbere. Ubi ventum est ad cæmeterium,  
 ostendit commilitoni suo calvarias mortuorum, sandapilam, ligonem Vespil-  
 lonis, hæc addens verba: en frater locum, quo alteruter nostrum, nisi  
 desistas, tumulabitur corpore, anima ad infernum descensura. Tum ad  
 effodiendum communi opera tumulum invitat, sperans, mitigatum iri hac  
 oratione pathetica. Sed furdo cecinit, & pinxit cæco. Absoluto tumulto  
 confectæ sunt manus, & secundo congressu, qui provocavit, peremptus  
 est, devotum stygi caput, ex eo commodè mortuus, quòd in propinquo  
 tumulum invenit. (a)

139. Crudelem itaque, & tyrannicam duelli legem esse demon-  
 stravi; eo quòd imperet difficillima, iniquissima, & frivola sæpe de causa. Id  
 verò capere nunquam satis potero, qui fieri potuerit, ut homines, libertatis,  
 suisque aliàs ita amantes, nobilèsque servire nescii, ferro huic mancipati  
 se subjecerint. Nullus dubito, quin legem hanc abolitam ferme omnes cu-  
 piant; at nemo separata opera abolere vel volet, vel poterit. Et quando  
 tandem

(a) Gobat. Theol. Experim. p. 1. Edit. 2. Tract. 7. cap. 15.

randem conspirabunt omnes conatu unanimi? Principes hic potissimum appello, quibus sicut non licet subditos tyrannica lege vincire: sic iisdem incumbit victos ex tyrannide in libertatem asserere.

## ARTICULUS V.

*Duelli injuriosum est Magistratibus.*

**M**irum! concoquere qualemque injuriam nesciunt monomachi, quam sibi factam existimant: nec meminere tamen, graviozem se Magistratibus, atque Principibus inferre, dum neglecta horum potestate publica, ipsimet tumultuarium tribunal erigunt, adversarium condemnant, & gladio utuntur ad vindictam, judices neutiquam competentes. Idco contra protervos conqueruntur Magistratus: & quidem merito.

## §. 1.

## Magistratus conqueruntur de injuria.

140. *Tam in Germania.*141. *Quam extra Germaniam.*

140. **I**nter plurima, quæ contra duellum prodivere edicta, nullum prope modum invenire est, quod quercias non contineat Magistratum, ac Principum contra monomachos, in suum sibi jus involantes. Juvat brevitatibus studio, non nisi aliquas referre.

Ajunt præcipi sibi jus dijudicandi causas. Ita Imperii Proceres in Concluso suo, de quo alibi (a), item FRIDERICUS VI. Elector Brandenburgicus in suo Edicto (b). Conqueruntur, protervos palæstras gladium justitiæ temerariis manibus contrectare. Ita MAXIMILIANUS EMMANUEL Elector Baviaræ (c): item FRIDERICUS AUGUSTUS Elector Saxoniarum (d).

Sacram illam, quæ Principibus debeat, reverentiam violari indignatur GUSTAVUS SAMUEL Dux Bipontinus (e). Et novissimè Serenissimus ac Potentissimus Elector Colonienfis CLEMENS AUGUSTUS. (f).

Justi-

(a) An. 1667. (b) An. 1688. (c) An. 1720. (d) An. 1706. (e) An. 1721.  
(f) In Edict. an. 1742.



Justitiam vilipendunt; & Constitutiones æquissimas dum non respiciunt, proculcant sacrosanctum Principis munus. Vox hæc est CAROLI LEOPOLDI Ducis Megalopolitani. (a)

Radicem proterviæ hujus assignat superbiæ AUGUSTUS Dux Luneburgico-Guelpherbytanus (b). Hac suadente parcere nescii arrogant sibi, inquit, munus Judicis; popularem auram ut capent, haud dubiè instigante diabolo, autore superbiæ:

Notanda etiã veniunt aurea verba LEOPOLDI Ducis Lotharingiæ: DEUS, ait, quam sibi servavit vindictam, Principibus, vicariis suis; exercendam commisit. Igitur quicumque privatum sibi jus audent dicere, ordinem à divina providentia sapientissimè constitutum evertunt, & prærogativam usurpant, quæ inter primarias summæ potestatis numerata hætenus fuit.

In eundem denique sensum (ut plures alios silentio præteream) loquitur WILHELMUS HENRICUS Princeps Arausicanus, Gubernator Hollandiæ in Edicto edito contra duella. Ita conqueruntur summi Principes.

§. II.

Et meritò.

142. *Gravem habent causam conquerendi.*

143. *Qua confirmatur testimonio;*  
144. *Et duellu veterum.*

141. INDIGNATIO; quam Magistratus; & Principes omnes contra Monachos ostendunt, justissima est; siquidem ipsimet malo mederi velint, id est, satisfacere læso, reddendo honorem. Volunt autem plerique eorum, ut ex eorum Edictis manifestè apparer: justissima itaque, ajo, est eorum indignatio; nam quis unquam, vel de plebe si sit, præoccupari sibi passus est suum officium, & importunum quemquam intercedere? curat quisque solum; & quantum alius sibi adjicit, tantum quisque sibi detractum existimat. Nonnisi infirmis ita succurritur, vel non valentibus, vel non volentibus agere; quod suum est. Quod gubernator est in navì, quod Paterfamilias domi suæ, quod in exercitu dux, hoc est in Republica

N

Judex.

(a) An. 1715. (b) An. 1684.

Judex. Et quis Dux imperium, quis Paterfamilias auctoritatem, quis Navarchus gubernaculum sibi præripi ægrè non ferat? quis non inique secum ita agi existimet? num fortè solus Judex dissimulet? num hic ergo primum in Republica locum non aliter occupet, quàm sculptus Jupiter forum, cujus trifurca arma ostentationi potius serviant, quàm usui? an non in iras justas exsurgat, dum Edicta sua saluberrima proculcari, & sperni intentatas pœnas videt? Regalia jura si quis subditorum sibi usurpare audent, in jus vocatus, sine hæsitacione condemnatur; neque enim contræctare reservata ejusmodi jura cuiquam fas est, & justitiæ gladium è manibus sibi extorqueri patiantur Principes?

An ergo non sufficiat tota potentia, & auctoritas Principis eluendo uni convicio? *Legitimos* natales dare, vel ad equestrem ordinem, imò ad ordinem Principum evehere valeant, & quæ sunt alia potestatis Regiæ, aut Cæsareæ Jura: & nequeant effectum dare, ut læso, recusanti duellum, honor sine conflictu redeat? Qui ita sentiunt, nã illi nimium quantum Majestatem deprimunt. Si Princeps non dedigneretur ejusmodi purgato loqui, & ab eo servitia recipere; herclè! plus æquo delicatus est ille, qui eidem humanitatis officia denegare pergit. Non jam miror, quòd BRUNEMANNUS (a) dicere non dubitaverit, qui duellum ineunt, læsæ Majestatis esse reos: & hoc verum esse, etsi ob læsam famam inearur certamen. Idem probat MAURITIUS ex eo, quòd Majestati Jus belli competat: duellum autem cum sit aliquod bellum, à Monomachis Jura Majestatis temerari certum esse ait (b). Et hoc inulti patiantur summi Imperatores? Fuit Princeps, qui ortas inter quos Nobiles turbas sopivit in tempore, & lite ex æquo composita utrumque obstrinxit, ut fide nobili sponderent, ab ulteriore offensa sibi cauturos. Parum tamen hæc valere; paucos enim post dies unus alterum ex inopinato prope ipsas Regiæ fores est aggressus. An non hoc est illudere supremæ potestati?

143. Certè remotissima etiam antiquitas, & quidquid de meliore gleba Minerva finxit, in ea constanter sententia fuere, causas quasunque ad tribunal publicum esse deferendas, neutiquam terminandas Marte proprio. [ARISTOTELIS effatum est (c): *Cum aliqua de re dissident homines,*

(a) In L. un. C. de Gladiat. (b) De Duell. §. 68. (c) §. Nicom. 4. §. 19. seqq.

ad Judicem confugiunt (bestias ab hoc more eximit) adire Judicem, adire Jus est; nihil aliud videtur Judex, quam jus animatum. DEMOSTHENES inquit: (a) Placuit de omnibus his injuriis ex legibus judicium exerceri, non autem ex ejusquam impetu, atque arbitrio. D. MARCUS decrevit (b); optimum est, ut, si quis putas te habere petitiones, actionibus experiaris. Et cum Marcianus diceret, vim nullam feci, Caesar dixit: tu vim putas esse solum, si homines vulnerentur? vis est & iure, quoties quis id, quod debet sibi putat, non per Judicem petit. THEODORICUS Rex enunciabat (c): Hinc est, quod legum reperia est sacra reverentia, ut nihil manu, nihil proprio ageretur impulsu; quia enim à bellica confusione pax distat, si per vim litigia terminantur? Unde rectè GROTIUS (d): Tam laudabili instituto, ut scilicet Judex, cujus nihil interest, cognoscant rem potius, quam ut homines singuli, nimium sui amantes, quod jus putant, manu exequantur, obsequendum ipsa dictas aequitas, & ratio naturalis. Nolim testimonia agglomerare in re clara.

144. Id fortè nostris Monomachis inexpectatum veniet, si eos per ipsa duella veterum hoc loco, condemnabo. Ne, quæso, putent abolitam illam licentiam sibi patrocinari. Nōrint, neque illa duella sine autoritate Judicis olim permissa fuisse. Erat enim duellorum concessio apex supremæ potestatis, teste GONZALEZ (e). Et iusta erat excusatio; verba sunt ALEATI (f): "Cum provocatus se ideo nolle certare asserit, quoniam Imperator hanc veniam concedere nolit; Juris enim naturalis est, ut Patriæ, & Parentibus, Magistratibusque parcamus, quod Jus, nulla armorum consuetudine aboleri potest. Alibi (g) inquit: videtur adversus militarem disciplinam eum agere, qui injussu Imperatoris sui comilitonem ad singulare certamen provocat. Et ideo tanquam pacis perturbator vel capite puniendus, vel saltem lege novissima FRIDERICI, qui Capitaneus sit, ducentis auri libris puniendus.

Tenuit hæc erga Magistratus observantia, donec duellorum, in judiciis usitatorum, superstitio eam in Germania barbariem peperit, qua quisque sibi armis, jus diceret, & præstaret vindicias: postquam scilicet

N 2

Regia

(a) In Conon. (b) L. pen. ff. ad L. Jul. de vi privata. (c) Apud *Castellorum* Var. Lib. 4. Epist. 10. (d) L. 1. de J. B. P. c. 3. n. 1. (e) Ad cap. 2. de Cler. pugn. n. 8. (f) De singul. Cert. c. 25. (g) In consilio de Duell.

Regia autoritas variis artibus esset p̄sumdata, Duces, & Comites p̄vincias hæreditario jam jure administrarent, &, faventibus præcipuè interregnis, suis quisque viribus, ac milite nixus pro libidine agebat, donec tandem Regimenti, & Cameræ Spirenſis Constitutione repressâ est illa morum atrocitas.

Huic non multum absimilem judiciorum perturbationem cum inducant hodierni Monomachi, &, privato dum sibi Marte Jus dicunt, subjectionem excutiant, iis *indignari*, & quidem *ex æquo* dixi summos Principes, & Magistratus, utpotè de injuria supremam suam potestatem violante,

## ARTICULUS VI.

### *Duellum est noxium Reipublicæ.*

**B**oni civis officia negligit, qui abusus Reipublicæ noxios inducit, vel fovet. Id monomachi faciunt; dum civitate donant duellum, Reipublicæ summè noxium. Unde non immeritò sibi gratulatur ille boni publici vindex acerrimus LUDOVICUS Magnus, quod propitio cælo acceperit singulare donum, obfirmatum scilicet contra duella animum, certè nunquam immutandum, donec eliminâſſet è regno peſſem, frustratam toties pios Majorum suorum conatus (a). Ajo itaque, duellum asferre Reipublicæ *damna grandia, utilitatem nullam*.

### §. I.

Duellum Reipublicæ asfert damna grandia.

145. *Ordine judiciorum everso,*

148. *Us experta est Gallia.*

146. *Innumeris cadibus*

149. *Provocatur etiam ira DEI.*

147. *Tolluntur membra reipublicæ utilia,*

145. **D**amnum leve non est, quodd conculcata, ut præcedente articulo vidimus, Magistratuum autoritate, privatorum pravæ cupiditati tot lites, & offensæ dirimendæ relinquantur. Hæret incolumitas reipublicæ ex ordinata-

(a) In Editto. an. 1679,

dinato partium consensu, dependentium à capite. Hic concentus turbatur, reipublicæ compages solvitur, ubi sublata subiectione summa iniquis confunduntur.

146. Fingè, impune hæc tolerari, quantus in rem communem malorum cumulus? susdèque vertetur pax civium, flebunt jura publica, fas totum in armis stabit, & quisquís viribus præpollet, innocentem absumet. Conficiant se cives per mutuas conflictationes, & cædes; neque enim unquam decrunt causæ, quâs turbulenta ingenia excoquant innumeras, si ad arbitrium vocabunt æstimationem sui immodicam. Offensa accepta camelus videbitur, dum vix culicem adæquat, & penitus evertisset honoris colossum, quem vix perstrinxerat. Hinc non pro causis tantum gravibus, sed sæpe nugis, pro putidis suspicionibus, sæpe quoque ex morâ libidine impotentis animi, in arma & exitium ruentes lugebimus.

147. Atque utinam non luxissent hunc luctum complura regna, atque provincie. LUDOVICUS XIV. populi sui amor, luget (a); Nobilitatem, firmissimam regni sui columnam, duello everti. LEOPOLDUS Dux Lotharingiæ, dolet, nobilissimas familias, occiso filio aut patre, ruinam traxisse, idque olim satis frequenter, damno non nisi severissimis mandatis avertendo. FRIDERICUS III. Brandenburgicus Elector queritur, duellis grande reipublicæ afferri detrimentum, dum tolluntur è medio viri, egregiis aliâs dotibus instructissimi, qui tam patriæ, quàm Romano Imperio universo, militiæ æquè ac domi utilissima præstitere obsequia, præstituri & plura posthac, nisi petulantis hominis dextera raperentur. Similes querelas legere est in Edicto Megalopolitano, Brunsvicensi, Luneburgensi, Guelferbytano &c. Academicam juventutem singulariter luget Edictum Megalopolitanum, utpotè ex qua non rarè præceps ardor juvenes aufert optimæ spei, cum maximo dolore & damno parentum, atque agnatorum. In eandem sententiam loquuntur Edictum Brandenburgicum, Saxonicum, unâ cum Concluso Imperii citato alibi. Württembergense meminit etiam epheborum in aula, & alumnorum discentium in Gymnasio. Denique cum energia loquitur Marchio MAFSEJUS, dum in Italia plus sanguinis per tot annos haustum fuisse asserit duello, quam per irruptiones Vandalorum, & Gothorum (b).

(a) In Edicto an. 1723. (b) Scienza Cavalleresca l. 3. c. 1.

148. Quòd si uspiam locorum hæc hyæna suam ingluviem exeruit, id profectò in Galliæ regno egit. Legimus (a) duella adeò fuisse frequentia sub initium regni LUDOVICI XIII. ut primo loco de iis interrogarent, qui sibi in plateis fiebant obvii. Quis hert pugnavit? quærebatur manè: & quis hodie manè? interrogabatur à prandio. Eò excrevit furor, ut duo se incluserint dolio, ibique, intercepto omni effugio, pugionibus se confoderint. Famofus præcipuè Bouteville, percitus hoc æstro, cruenta sine numero dedit spectacula. Domi suæ convenire solebant monomachiae candidati, quibus ludus erat quotidianus, ubiubi victimas quærere, vel semet mutuo conficere. Satis erat Boutevillio audire, Parisios appulisse virum quemdam strenuum, absque mora quæsitum omni humanitate ad duelum invitabat, adductis de societate sua patrinis, qui pro more eorum temporum & ipsi quoque configerent. Tanta erat horum vesania, ut Valencenius acerbè aliquando exprobraverit Boutevillio, quòd in arenam descendisset sine se: cui placando Boutevillius absque mora alium quemquam provocavit, quo Valencenio occasionem præberet agendi patrinum. Grassante hac inhumanitate in regno humanissimo, incredibile dictu est, quantus numerus occubuerit virorum, de quibus patria sperare plurimum poterat. Durante pupillari ætate LUDOVICI XIV. trecenti de flore Nobilitatis absumpti sunt, qui numerus vel solus nutantem in bello victoriam valuisset figere. Quin si Theophili RAYNAUDI calculus non fallit (b): intra triginta annos tot hoc ferali pugnandi modo in uno hoc regno cecidere, ut ex iis numerosus exercitus potuisset constari, quo & incolumitas regni conservari, & Turca Christianorum damnis auctior, non modicè vexari potuisset. En! ex solis rationibus humanis detectam malorum Iliadem.

149. Quòd si etiam divinas attendamus, vindicem DEUM experietur Respublica, vel Principes, qui pessimo huic mori se non totis viribus opponunt. Timeant sibi, suisque provinciis, si humanum sanguinem, velut sanguinem belluarum, impune effundi sinant: clamat is vindictam, ut sacræ paginæ crebrò monent. Sumat ergo illam Princeps de reo: vel Deus fumat de Principe, flagello incubituro toti provincie. Nec inanis hic me-

tus

(a) Causes celebres avec les jugemens par Mons. Gavot Tom. 14. hist. de Mons. Montmorancy. (b) Tom. 4. de Virt. & Vit. L. 1. Sect. 3. c. 3.

tus est; quem sparsū per omnia Edicta legimus contra duellum edita. Consulatur illud LEOPOLDI Cæsaris, Brandenburgicum, Suecicum; Bipontinum; Saxo-Gothaicum, Arausicanum; Hasso-Casselatum; Hamiburgense; Lubecense; aliæque; timetur passim, ne apud Divinam Nemescin culpa contrahatur inulti sanguinis; provocaturā mille inala in Magistratus, & subditos.

§. II.

Duellum Reipublicæ affert utilitatem nullam.

150. Male dicitur necessarium acneda virtuti militari.

151. Quia sic nemo Christianus posset militare.

152. Neque à sola militari virtute successus pendet.

153. Et si penderet, monomachis saepe minus uest militari virtutis, ac aliis.

154. Roboratur nostra sententia auctoritate summorum Principum duella prohibentium.

155. Ut pote noxia disciplina militari.

150. **E**T quæ utilitas tantis damnis æquiparari possit? Fuit aliquando vir bello clarus, qui asserere mihi non dubitavit, utile; quā & necessarium esse inter milites, si non approbare, saltem dissimulare duellum. Miranti mihi pronuntiati, noxiam, honor, ajebar, acerrimus militaris animi stimulus est, hebes, sanè in eo, qui inultum destituit. Et quis, pergebat, supremorum Ducum confidere in cuiusquam suorum imperperito animo possit, nisi documentum ex duello nunquam recusato, vel recusando sumat? hic lapis Lydius est virtutis militaris; neque enim securè quemquam hosti obicimus, qui vitam tantū amat, ut semet duello obicere in momenta paratus non stet. Hujus mentis erat vir de cætero præclarus, & fortè non erat solus.

151. At si falsæ huic persuasioni deferatur dominatus, à militia arcebuntur melioris notæ Christiani, qui piaculo sibi ducunt, calcatis Evangelii legibus; exercere vindictam privātam, & oppressa mansuetudine iræ fræna laxare. Nolent posihæ sagum induere, quod induere non possunt, non exuto Christiano. Num autem consultum erit Reipublicæ, vel Principi, nonnisi profligatæ conscientiæ homines sub signis numerare, qui, dum quotidie expediti duellum operiuntur, pravo hoc assensu tacitè beatæ æternitati renunciant? Si nomen dare militiæ idem est, ac renunciare do-

ctrinæ

strinæ Evangelii, quis Principum subditos ad sectandam militiam adstringere ex æquo poterit? Neutiquam inficias eo; non fortitudinem minùs apud milites requiri, quàm arma: his sine enim non pugnarent, & sine illa pugnarent infelicitè, quod pejus est. At fortitudinem acuerè duelli licentia, id iniquissimum judico; scopum bonum malis artibus quærere non licet.!

152. Sic animare exercitum dum parat Archistrategus, cælum sibi propitium ne speret, neque sine cælo propitio sortem prosperam. *Non saluatur Rex per multam virtutem*, oraculum est coronati Psaltis: & *gigas non saluatur in multitudine virtutis suæ: fallax equus ad salutem. Ecce oculi Domini super metuentes eum, & in eis, qui sperant super misericordiam ejus* (a). Ah! si sanctam fidem non omnino decoxisti, cur publicis precibus secundum armorum successum à Deo flagitare moris est? Num ludum hunc esse existimas, aut Deum, sibi intentum, res humanas non curare: vel si curet, pro robore exercitûs necessariò largiturum victoriàm? Erras quàm gravissimè; modico opus est, ut Deus hanc spem evertat. Modò supremi Ducis cerebrum nonnulla caligine obducatur, ut vel in tempore non meminerit, quorum meminisse deberet, vel consilium ineptum capiat, mox hic, tota spe dejectus, victoriàm multo cùm sanguine evomet, quam confusus Monomachorum suorum audaciæ præproperè deglutiverat.

153. Quod si etiam à sola intrepiditate militum eventus staret, num eos, qui insuperhabitis Dei legibus, tam ad duella, quàm ad scelera alia, paratum circumferunt animum, intrepidus crèdes præ illis, quibus sceleris pœna, & conscia mens recti est? iterum erras. Plurimum interèst, ut quis subeat discrimen securas, & spe bona fretus de sorte vitæ alterius, qui ejusmodi est, parum timebit. Econtrà horribilis cogitatio est, quæ à fronte præsentissimum moris discrimen, & infra orci voraginem objicit, subeundam, quamprimum vel globus, vel ensis fatalis jusserit. Bellua, non homo sit, oportet; quem hæc non moveant. Movent enimvero, quamvis commotus animus, coacto in ferociam vultu se regat.

154. Disputationi pondus & finem addat auctoritas Principum, militari gloria prorsus insignium: neutiquam tamen duelli licentiam nume-

ran-

(a) Psal. 32. v. 16.



rantium inter fortitudinis præsidia. Quis, ain, severiùs in Mônomachos animadvertit, quàm Ludovicus XIV. sæpius jam laudatus, erectis tropheis, & subiectis provinciis verè Magnus? Ludovicus Badensis, grande bello nomen, ad Rhenum copiarum Romani Imperii summa cum potestate per complures annos ductor, sub pœna capitis in exercitu suo duellum, quamvis sine cæde abiret, prohibuit, nullo discrimine inter provocatum, & provocantem admissio (a). Sileo alios claros bello Principes complures, quorum catalogum suo loco dabimus. (Cap. IX.) Ain, num hi virtutem bellicam elidere fors voluère, ac necessariam ei cotem subtrahere? Neutiquam. Quàm aliena fuerit Græcia, & Roma à singulari ejusmodi certamine, ob honorem suscepto, *Articulus sequens* docebit: & tamen nemo virtutis laudem Græco, aut Romano militi dubiam volet facere.

155. Noverant nempe hi omnes pro sua prudentia, quòd eo certandi genere non solum egregii bello viri immolentur sine fructu: sed etiam disciplinæ militari ingens accedat detrimentum, id, quod pridem ALCIATUS notavit, dum dixit (b): “ Audivi ego quandoque, hoc Italis militibus imputari, quòd seditiosi inter se, ad jurgia proni, suis monomachiae provocatoriis chartulis militarem disciplinam pervertant. ” Quæ ergo utilitas? Id addo, si eò insolentiae militibus progredi liceat, ut, dum à superiore Præfecto pro ratione officii admonentur, vel castigantur, fieri sibi injuriam opinentur, quam provocatione vindicare sit integrum, tunc enimvero omnis disciplina militaris corruet. Viguit olim apud quosdam noxius hic mos: quin & patronum invenit, qui velut æquum tueretur (c). Excisus hodie est, id tamen mali germinis reliquit post se, quòd petita, obtentaque missione, ejusmodi trosculi Ducem suum extra provinciam evocare soleant. At quis, oro, posthac disciplinam militarem curare volet contra petulantes, si facti rationem cogatur reddere stylo ferreo, & ei, quem ex officio correxit, jam mactandum se offerre.

Apparet satis duellum Reipublicæ esse summè noxium; quia *damnum plurimum, utilitatem affert nullam.*

(a) Edict. an. 1694. (b) Consil. de Duell. (c) *Berandiere* apud *Boisjage* de Duell. §. 51.

## ARTICULUS VII.

*Duellum olim ignotum moratis Gentibus.*

**N**ON ineptè me facturum existimo, dum duelli sectatores ad moratarum Gentium puteal ciro; harum enim judicium eò usque hodiedum valet, ut ei Jus Naturæ, & illud præcipuè Gentium, magna sui parte superstrui soleat à Doctõribus celeberrimis. Asserere autem non dubito, moratas olim Gentes hodierna duella non habuisse: & quæ habuere, hodiernis non patrocinari.

## §. I.

## Moratæ olim Gentes duella non habuere.

156. *Nec Romani, nec Græci,*157. *Nec Sinenses, nec Tunchinenses,*158. *Nec Gothi, postquam resipuerunt,*159. *Quin nec Turca, quamvis parum morati.*

156. **E**O ipso, quodd cæco impetu pro læso honore decertare *injuriousum sit Magistratibus, noxium Reipublica, non fortitudinis, sed vesana temeritatis argumentum, ad finem suum prorsus inutile*, eo ipso moratæ Gentes, quas meliore de gleba Prometheus finxit, per sani judicii lumen discretos à belluis, belluisque non absimilibus barbaris, de abominando ejusmodi more admittendo nec cogitârunt; & si cogitâssent, eum in sylvas ad urfos, & tygrides amandâssent. Inter Romanos, & Græcos, ait eruditorum quidam (a), hodierna de tuendo honore syntagmata nunquam viguere, illis ipsis temporibus, quæ potissimùm in armis vivere tot populorum victores: illis temporibus, quæ haud dubiè plura quotidie diffidia privata nascebantur inter copiarum Duces, viros utique strenuos, nec mortem magis, quàm ignavi nomen averfantes. Exempla hujus rei attuli suprâ ex factis Catonis, ac Varenii (b) nobilium Romanorum. Item ex Laconum votis ad Deos, quibus fortitudinem sibi expetebant ad ferendas injurias, quo sine beneficio se minimè viros, ad magna idoneos crede-

(a) *L'Abbé de S. Pierre* Bibliothèque raisonnée tom. 17. (b) *Vid. n. 123.*

crederent (a). Quare; eùm Romani in Germaniam primò venirent, teste VELLEJO PATERCULO (b); mirati sunt Germani, Romanos justitia lites finire, non pugna; agentes gratias, quòd injurias Romana justitia finiret, feritâsque sua incognitæ disciplinæ novitate imitesceret, & solita armis discerni, jure terminarentur.

157. Moratis Gentibus accenseri merentur nonnulli Orientales populi, Sinenses præcipuè, qui non magis quidem; at certè citius sapuere ac Europæi. De his ait JOANNES NEUHOEF (c): Nemo Sinensium tam atræ indolis est, ut paret morte ulcisci illatam injuriam. Qui cedit lædere volenti, providi, strenuique nominè compellatur. Inauditum inter Sinas, testatur paulò antè adductus ABBAS de S. PETRO; Ducem quemdam militarem loco moveri; si factam sibi injuriam ad Judicem deferat; recusato duello. Certè tota CONFUCII Philosophia plena est principiis; hodiernæ Monomachiae contrariis. Similia de Persis legimus; heroico contemptu convicia concoquentibus (d). De Tunchinensibus ALEXANDER de RHODIS (e) scriptum reliquit, intrepidus cæteroquin regni hujus incolas duellum diris devovere.

158. Gothis quoque id laudi dandum; quòd feritatem in Italia desuefacti, assumptoque humanitatis sensu; duellorum inter se usum sustulerint; inde à THEODORICO Rege suo cæteris barbaris populis in exemplum sunt propositi epistola, digna, quæ hinc subjiçatur, exarata à CASSIODORO (f); qui Regi erat ab epistolis, & data *ad universos Barbaros. & Romanos per Pannoniam constitutos*. " Illud vos credimus admonendos, ut " non in vos, sed in hostem sævire cupiatis. Res parvâ non vos ducat " in extrema discrimina. Acquiescite justitiæ, qua mundus lætatur. Cur " ad Monomachiam recurritis; qui venalem judicem non habetis? Depo- " nite ferrum, qui non habetis inimicum. Pessimè contra parentes erigi- " tis brachium, pro quibus constat gloriose moriendum. Quid opus est ho- " mini lingua, si causam manus agat armata? Aut unde pax esse credi- " tur, si sub civilitate pugnetur? Imitamini certè Gothos nostros, qui fo-

O 2

ris

(a) Vid. n. 122. (b) L. 2. c. 118. (c) Legatio Societatis Indicæ Orientalis c. 7.

(d) Scienza Cavalleresca l. 2. c. 8. (e) Itiner. L. 2. c. 6. (f) L. 3. Epist. 24.

„ris prælia, intus nõrunt exercere modestiam. Sic vos volumus vivere,  
 „quemadmodum parentes nostros, præstante Domino, cernitis floruisse. „

159. Nolim Turcas moratis Gentibus accensere, quamvis de eorum Scientiis, Academiis, ac Litterarum cultura multa eruditè recenseat Marchio MAFFEIUS (a): non abs re tamen erit testimonium ex Edicto Saxo-Gothalco hoc loco recolere, ubi indubitanter asseritur, tantum abesse, ut Turcæ duellum probent, ut etiam fortè commissum severè puniant. Id quod ex BUSBEQUIO singulari factò confirmatum imus (b). „ Fuit in regione Hungariæ magna virium famâ Singianus Arslambegus; nemo eo „validiùs intendebar arcum, nullius ferrum altiùs penetrabat, neque hostibus erat formidolosius. Huic se æmulum comparaverat Velibegus, ejusdem laudis affectator, finitimorum locorum & ipse Singianus. Æmulatio, fortè aliis rebus aucta, ad summum odium, insidias, & vulnera „processit. Hac, an alia de causa accersitus Constantinopolim Velibegus „mihi incertum, venit certè. Ex quo cùm alia multa quæfivissent in Divano Bassæ, postremò de dissidio ipsius cum Arslambego audire voluerunt. Tum prolixè recitavit totam illarum simultatum scenam, causas, „progressum, & quo denique evasisent, &, ut causam suam faceret meliorem, subjunxit, se ex insidiis ab Arslambego vulneratum, quibus nihil fuisset opus, si se dignum suo nomine Arslambegus præstare voluisset, quandoquidem ipse pugnam cum eo nunquam subterfugisset, ut „quem ad singularem pugnam multoties provocasset. Hoc Bassæ avertentes: Tunc, inquebant, commilitoni tuo singulare certamen denunciare es ausus? Decrant quippe Christiani, in quos pugnare. Vivit „uterque vestrùm pane nostri Imperatoris: nihilominus inter vos de vita „decernere parabatis? Quo jure, quonam exemplo? An ignorabatis, uterque „cunque vestrùm cecidisset, Imperatoris damno casurum? Quo dicto „duci eum in carcerem jusserunt, in quo multis mensibus maceratus, vix „tandem liberatus est, existimatione valde diminuta. „

Utinam ex ejusmodi allatis exemplis hodierna ætas saperet, aliàs sibi de sano præ aliis judicio plurimum blandiri solita. Ut in ruborem darem palæstritas nostros, ipsos Turcas adduxi. Adducant ipsi mihi ullam mora-

(a) Scienza Cavall. l. 2. c. 8. (b) Epist. 3.

moratam gentem, quæ unquam hanc pugnandi rationem coluerit, Jam dixi: moratæ olim Gentes duella hodierna non habuere: &

## §. II.

Quæ habuere, hodiernis non patrocinantur.

160. *Quia & illa fuere mala, utut ce-* 161. *Et fuere mala in gradu minore.*  
*lebrata Doctorum libris.*

160. Quid de veterum duellis sentiendum, quàm & illa ut plurimum damnanda sint, ex capitis præcedentis Articulo III. colligere datur, ubi quæsitum est, quibus de causis oim suscepta fuerint duella. Illud tamen cuiquam mirum videri posset, qui factum, quodd Sæculo XIII. & XIV. præcipui Juris-consulti certas regulas constituerint, quibus non jam frænium injiciebatur, sed laxabatur pugnandi licentiæ? DARIUS quidam, Doctor Bononiensis jam anno M. CC. LX. methodum posuerat creandi Equites, ubi inter alia, qui creabat, Equitem pro more perecutiendo, hæc verba adderet: *postremus hic ictus esto, quem inultus feras*; unde patientiæ virtus in animis hominum non evilescere non poruit. Ita tamen sibi de doctrina sua placebat, ut Purpuram Romanam non solum sibi debere existimaret, sed & animi tædio mortuus sit, ubi se spe sua delusum vidit (a). Si quidem similia verba hodie in creatione aliquorum Equitum adhibeantur, longè alium volunt, & debent sensum ingenerare, fortè hunc, quem MAFFEJUS formulæ Melitensi tribuit: *ictus hic, quem inultus fers, ultimus esto tibi infictus; nostros enim equites ita ferire nefas foret.* (b) BALDUS & BARTOLUS plurimis quæstionibus examinaverunt, qua ratione geri justè, ac decenter duellum debeat. ALCIATUS quoque cum pluribus aliis impigrè in eodem stadio decurrit. Qui factum ergo, ut viri cæteroquin perspicaces, ac tenaces recti, ventilare hanc barbariem in pulvere scholastico maluerint operosè, quàm inurendo gravem censuram ad Garamantas, & Indos ablegare? respondet MAFFEJUS (c) eos Doctores temporum iniquitate, & consuetudinis

O 3

do-

(a) *Basnage* Réflexions sur les Duels §. 2. (b) *Scienza Cavalleresca* l. 2. c. 3.

(c) *Ibid.*

dominatu, veluti torrente abreptos fuisse. Nescio ego, an hæc excusatio satis tantorum virorum auctoritati consulat. Crediderim, verbis ipsius ALCIATI rem melius declarari. *Non potuit duellum*, inquit is, (a) *tam efficaciter à legum laboribus prohiberi; quin inoleverit consuetudo, ut quibusdam casibus saltem de facto exerceatur: etenim de jure dubitandum non est, consuetudinem non valere.* Cum ergo de facto id exerceri soleat, perinde de hujusmodi corruptela disputamus, atque si valeret; quia ea, qua facto fiunt, quandoque ad causas juris trahuntur, quod plurimis exemplis ostendere possem, si expedire arbitrarer. Cum ergo superioris ætatis Doctores monomachias impedire non possent, modum saltem, quo gererentur, ad justas leges revocabant. Fuere ergo & illa duella mala, utut celebrata Doctorum libris: & fuere mala in gradu minore.

161. Ad exercendam in armis pubem gladiatores habuere Romani. Singulari certamine dimicârunt apud varias gentes clari bello pugiles. Judiciales pugnas admiserunt Galli, Itali, Germanique: at nunquam sine auctoritate Ducum ac Magistratum; nec futili, ac privata de causa: & non nisi tamdiu, donec melior Phœbus caliginem temporum candida legum luce discusserit. Apud complures Gentes is duellorum usus ortum suum debebat falsæ persuasioni, qua credebant, moderante DEO, non nisi justam causam vincere: (b) vel quia somniabant, redire in corpora animas duello expulsas, ut DIODORUS Siculus de Gallis (c); APIANUS (d) de Germanis affirmant. Ad hæc apud Gentes quasdam, id quod de Longobardis ALCIATUS refert (e): „Minore periculo, & non nisi gravissima de causa pugnabatur, dum ita necesse erat ad faciendam plenam fidem, præmissis etiam jurejurando, quod non calumniæ, sed necessitatis causa id remedium arriperetur. In ipsa verò pugna scutis solum, & fustibus res gerebatur, ita, ut non multum à pancratio, vel colluctatione abesset apud illos duellum, raroque contingeret, quemquam occumbere.”

At nunc concurritur ad duellum, neglecta auctoritate Ducum, & Magistratum, in plena Jurisprudentiæ luce, post credulitatem superstitiosam pridem explosam, levibus sæpè de causis, gravi cum periculo, ita,  
ut

(a) Consil. de Duell. (b) Wolfius P. 5. J. N. §. 1092. (c) L. 5. c. 28. de Gallis. (d) in Celúco. (e) C. 4. de singulari Cert.

ut hic locum habeat, quod de laniena gladiatorum scriptum reliquit SENECA (a). *Quidquid ante pugnatum est, misericordia fuit; nunc enim nihil habent, quo tegantur, ad ictum totis corporibus expositi. Non galea, non fuso repellitur ferrum. Quò artes, quò munimenta? omnia ista mora moris sunt: mutuos ictus nudis, & obvis pectoribus excipiunt.*

Satis dictum de placitis moratarum Gentium; ad perfectissimam legem Christianorum gradum promoveamus.

## ARTICULUS VIII.

### *Duellum Christianæ legi est summè contrarium,*

**S**I moratæ Gentes vel ex solo rationis ductu ostracismo multant duelli vesaniam, num Christiani civitate donent, quibus præter religionem naturalem religio etiam revelata, eaque à Christo explicata, duplicato lumine fulget? quot parasangis lex Evangelica alia quacunque sit perfectior, passim docent Ecclesiæ Patres, & ipse finis à Deo homine sibi præfixus, ostendit. Apage itaque cum tua duelli licentia, quicumque Christiana sacra profiteris; his enim è diametro adversatur. Quod ut demonstrem uberius, primò afferam argumenta: tum refellam excusationes.

### §. I.

#### Afferuntur argumenta.

- |   |  |
|---|--|
| 162. <i>Duellum auctore diabolo ortum.</i>            | 164. <i>De tolerantia injuriarum.</i>    |
| 163. <i>Eversis præceptum de diligendis inimicis.</i> | 165. <i>De vindicta privata vitanda.</i> |
|   | 166. <i>De habenda cura animæ.</i>       |

162. **C**hristiano nomini repugnare duellum, communi effato pronuntiant S. R. I. Legati in Concluso sæpius adducto. Idem in peculiari Edicto Saxonico legere est. Et quippe nō repugnet? diabolum inventorem habet. Tinniant ambæ aures monomachis ad verba Tridentini Concilii: *Detestabilis duellorum usus, fabricante diabolo introductus, ut cruenta*

COR-

corporum morte, animarum etiam perniciem lucretur (a). In eandem sententiam locutus est Clerus Gallicanus per FOULIETUM Episcopum Montis Pessulani ad LUDOVICUM XIII. *Nemini dubium est, quin principum hinc (duello decertantium) laniena ab infero sit, cui Christianos veluti victimas immolari ab ipsis Christianis, quam est impium, quam horrendum!* (b). Si cui testes profani præ sacris placent, audiat AUGUSTUM Ducem Guelpherbytanium (c): *Negari non potest, ait, lanienam duellorum authore damone, qui homicida erat ab initio, fuisse introductam, à barbaris initio diffusam, denique inter ipsos Christianos receptam: ita tamen obnitente contra semper Magistratu, ut vesani pugiles à cætu Christianorum exclusi, ipsi etiam tumuli honore indigni haberentur.* Si quisquam existimet, his effatis sola duella veterum feriri, meminerit, hodierna duella nequidquam veteribus malitia cedere, quin multum præstare. *Vid. n. 160. seq.*

163. Ut clariùs pateat duelli cum Evangelio pugna, sacrum codicem inspiciamus. Ait Divinus Servator (d): *audistis, quia dictum est (scilicet Lev. 19. 18.) diliges proximum tuum, & odio habebis inimicum tuum; ego autem dico vobis: diligite inimicos vestros, benefacite his, qui oderunt vos, & orate pro persequentibus & calumniantibus vos, ut sitis filii Patris vestri, qui in cælis est, qui solem suum oriri facit super bonos & malos, & pluit super iustos & iniustos; si enim diligitis eos, qui vos diligunt, quam mercedem habebitis, nonne & publicani hoc faciunt? & si salutaveritis fratres vestros tantum, quid amplius facitis, nonne & ethnici hoc faciunt? estote ergo vos perfecti, sicuti & Pater vester cælestis perfectus est.* En legem Evangelicam clarè explicatam! en doctrinam, non dantis consilium, sed injungentis præceptum, observatu necessarium, nisi cum publicanis & ethnicis perire quis malit. Quàm autem à diametro regula duellorum opponitur! iners fungus habetur, qui, retento in vagina gladio, benefacere calumnianti, orare pro persequente, & diligere inimicum vellet.

164. Jam à primis sanctæ fidei incunabulis inter præcipuas notas Christiani reponebatur mansuetudo, quæ contumelias, serena fronte exceptas, forti animo concoqueret. *Maledicimur, & benedicimus, ajebar*

Apo-

(a) Sess. 25. c. 19. de Reform. (b) Gabriel Gramond ad an. 1615. (c) in Editio an. 1646. (d) Matth. 5. v. 43.



Apostolus (a) *persecutionem patimur, & sustinemus*. Idque juxta mentem Christi hortantis, ut *percutienti te in una maxilla, alteram quoque porrigas*. (b) Hanc doctrinam sequi jam non licebit, si quidem Alcorano monachorum stare oporteat. Ad Monachorum claustra relegata, è reliquo Christiano orbe exulabit, & idem erit vivere inter nobiles, militesque, ac renunciare Evangelio. *Qua perversa sentiendi, agendique ratio*, aurea vox est ERNESTI Ducis Saxo-Gothaici (c), *in pleno Evangelii meridie, & verisantibus ante oculos tot exemplis mansuetissimi Salvatoris, neutiquam toleranda est*.

165. Vindicta privata passim in Evangelio, & Apostolorum epistolis interdicitur. *Si fieri potest, quod ex vobis est, cum omnibus hominibus pacem habentes, non vosmet ipsos defendentes charissimi: sed date locum iræ; scriptum est enim: mihi vindicta, & ego retribuam, dicit Dominus*, (d) *Omnes, qui acceperint gladium, gladio peribunt*, ait Servator. (e) In quæ verba eleganter AMBROSIVS: (f) *O Domine, cur emere me jubes gladium (scilicet Luc. 22.) qui ferire me prohibes? cur haberi precipis, quem vetas promi? nisi forte ut parata sit defensio, non ultio necessaria*. Quibus regulis speritis, si privatam vindictam exercere velint Christiani, indigni sunt, pro quibus Christus sanguinem effuderit, dum illi tam iniquè sanguinem alienum hauriunt.

166. Alia gnome Evangelica curam animæ omnibus præhabendam inculcat: *Quid prodest homini, si totum mundum lucretur, anima verò sua detrimentum patiatur?* Vicissim, quid obest homini, si mundi universi detrimentum patiatur, modò animam suam lucretur? Quod autem pretium animæ ponit Monomachus? Pro fumo honoris, & phantasie simulacro animam orco transcribit (h); aded ei levis est gemma illa, quam Divinus Trapezita infinito pretio emerat.

Adducere plura dogmata Evangelica nolim, quibuscum, ceu lux cum tenebris, pugnant præcepta scholæ hujus Anti-Christianæ; neque enim venientur fateri Monomachi, se ab Evangelio aberrare: aliud est, quod sapere vetat.

P

§. II.

(a) 1. Corinth. 4. (b) Matth. 5. (c) In Edict. an. 1646. (d) Rom. 12.  
(e) Luc. 22. (f) L. 10. in Luc. (g) Matth. 16. (h) Vid. n. 387.

## §. II.

## Refelluntur excusationes.

167. *Ridebimur.**tu abstinere.*168. *Non credent, nos ex peccati me-**169. Concluditur.*

167. **N**orus ille virtutis scopulus, merus scilicet displicendū discolis, mancipatos tenet: malunt corpus, & animam ruinæ exponere, quàm æqualium dicacitatem pati. Non nego ego, pungunt cavillationes, urūntque nobilem animum; sustinendis tamen futurum parem, si Christiana virtus generoso sanguini suppetias ferat. Quid enim? si fortē in Ethnicorum terras, & societatem delapsi ad idolorum cultum provocarentur, ridendi aliās cum multo contemptu, & sannis, nisi pro regionis more sacrilega litarent thura: quid tum acturi essent nobiles nostri pugiles? Nolim adē degeneres eos credere, ut muliebriter victi, impium facinus essent admissuri. Contemnerent haud dubiē insanientium diēteria, modō rectē agentes absolveret conscientia, & dilaudaret præsens ubique Numen. Et bene id quidem. Id ergo precor, ut æquali magnanimitate despiciant corrupta iudicia tunc, ubi contra legem DEI arma jubentur stringere. Equidem non sine probro humanæ naturæ ridentur illi, quibus Lex Divina cordi est: sed non minū in probrum cedit, quōd ob insulsum risum à recto vecordes desistant. Heu! quā longē hi absunt, à primæ Ecclesiæ, & Apostolorum fortitudine! Hi *ibant gaudentes à conspectu concilii; eo quōd digni habiti sint pro nomine JESU contumeliam pati* (a). *Mihi pro minimo est, ajebar ille* (b), *judicari à vobis, aut ab humano die.* Ita sentire, & loqui docuit, docerētque adhuc Monomachos nostros sancta, quam corde sovent, fides, nisi ea pene marcida, corticem haberet sine nucleo. Eorum itaque de numero sunt, *quorum pars ponetur cum hypocritis.* (c).

Non ultrā eis de sacra Cathedra Oratores dabo, à quibus officiū commoneantur: AUGUSTUM Ducem Guelpherbytanum denud audiant, jus

(a) Act. 5. (b) 1. Corinth. 4. (c) Matth. 24. §1.

ius inter alia, hæc sunt verba ponderosissima (a): *Mature quivis secum expendat, an præstes, vel pro servata sancta lege sinistra imprudentum ferre judicia, fidelitatem probante DEO: vel reclamante conscientia, & inuitis Superis omnibus, spuria lethum pro laude pacisci. Id certum, & nullus inficius ibit, si cui eorum, qui post infelix duellum abiverunt ad tartara, emergere ex suppliciis daretur, na is quàm lubentissimè probis mactari, convitiis proscindi, & omnium pedibus proteri se sineret ad ultimum usque mundi expirantis diem, modo hac lege ab infami damnatorum face liberaretur.* En considerationem Christiano dignam. Nec est, cur hæc lex Evangelica ardua nimis, & severa dicatur. Ethnici Philosophi Christianum in ruborem dabunt. Epicurei, & Stoici, quantumcunque aliàs dissidentes, in eo conspiravère, quodd prudentis sit, mentem supra contumelias, & injurias erigere. Divini quoque, quem dicebant, PLATONI sententia fuit, nihil vindictæ privatæ ob acceptam offensam esse tribuendum. Nolim integrum chorum Sapientum adducere. Alibi quoque demonstravimus, graviolem legem nullam dari in lege Christiana, quàm sit hæc pseudo-lex de duello. *vid. n. 133.* Id solùm ajo, si ejusmodi ultio cum Philosophia pugnat, quantum non pugnabit cum Schola Christi!

168. Quis ad hæc sensus Monomacho? Revereri se ait legem Christi, eumque profiteri se esse paratum cum qualicunque etiam sua molestia: modò credant commilitones, legis Christianæ, & conscientie causa duellum à se recusari. At illi hoc judicant proficisci ex metu, & cura cuticulæ, nec nisi pro furo religionem obtendi. Affirmet quis centies, metu peccati, non gladii se cohiberi: risu centies exploderetur. Quamvis ergo quis lubens vellet *pro nomine JESU contumeliam pati*, id, quod gloriosum: nihilominus crederetur pati ob timiditatem, id, quod probrosissimum. En ultimum effugium. Itane ergo, non credent homines, te Christi causa abstinere? Fac ergo, ut credant. Et hoc, quid valebo? ais: suggeram. Cætera Dei, & Ecclesiæ præcepta servato diligenter, nec patere, ut in iis transgrediendis te facilem esse quis deprehendat. Si sciverint, te conscientie teneræ virum, cæteris Christiani hominis officiis rite defungi, haud difficulter credent, etiam impræsentiarum te conscientie rationem habere,

bere, & ab hac sola retineri à duello. Econtra si te sciant laxæ cæteroquin conscientia hominem esse, & absque angore alia Dei, aut Ecclesiæ præcepta violare; si te sciant ululare cum lupis, & lascivire cum hircis, volurari in fimo Veneris, mille diris Divina quæque profanare; utique non facile credent, te in sola causa duelli tam religiosum evasisse, ut in reverentiam legis Divinæ id detrectes. Qualecunque sit præceptum Divinum, eadem ei observantia debetur; quia idem semper Deus est, qui præcipit, idem, qui offenditur. Unum ergo qui servare vult, & cætera transgredi, ne is dicat, quoddam Dei causa servet; vel saltem ægrè non ferat, si quis ei fidem non habeat.

Idem de præceptis Ecclesiæ judicium esto. Carnes diebus veritis manducat Leander Catholicus: diebus festis Sacrificio non assistit: de rebus, & personis Ecclesiasticis malignè, & nare non satis emuncta loquitur: & hodie credamus, eum Ecclesiæ præcepto, & metu sacri Fulminis à duello retineri? credat Judæus Apella. Igitur, qui hac in re fidem sibi adhiberi desiderat, vita proba hominum antea animos ad credendum disponat; secus nil mirum, si eum agi judicent ex mentis ignavia, sub pallio religionis se occultante. Quoddam, aëta licet hætenus vita Christiano digna, tamen iniqui censores metui adscribant, quod revera ex conscientia stimulis agis, tum memento, duplicem tibi lauream à virtute parari; tum quoddam pro virtute patiaris, tum quoddam nemo credat, te pro virtute pati, id, quod in palæstra virtutis non nisi primi Heroes nōrunt.

169. Detestemur ergo duellum, cujus Pravitatem octo Articulis explicavimus: Christianæ Legi est summè contrarium: Ignorantiam olim moratis Gentibus: Noxium Reipublicæ: Injuriosum Magistratibus: Crudele: Neque est argumentum veræ Fortitudinis: Est ineptum ad reparandum honorem: &, quod primum, ac præcipuum est, quoddamque omni labore excolimus: Non est necessarium ad honorem reparandum.

## CAPUT III.

AN DUELLUM LICITUM ESSE POSSIT  
IN STATU NATURALI AD VINDICANDUM  
HONOREM.

**P**ostquam suis jam lineamentis depinximus duellum, ob oculos posita omni, quam continet, pravitate, examinandum jam venit, quomodo, & quibus legibus interdicator. Ea enim est cujusque mali conditio, ut legum repagulis à republica arceri, vel si jam irrepperit, intentatis etiam atrocibus pœnis, ejici debeat. Nemo ferme authorum, qui de duello unquam suis lucubrationibus quidquam inscruit, dubitare est visus, quin *duellum honoris vindex* repugnet tam legi divinæ, quàm humanæ. Quo non obstante, orta postmodum fuit ultimis his temporibus acris quæstio, an non *aliquando* licitè acceptari, imò offerri possit. Mihi consideranti varias tum Theologorum Moralium, tum Juris Canonici Interpretum lucubrationes, necesse visum est altius fodere, eamque inire disputandi rationem, qua primò quidem inspicerem *statum* hominis *Naturalem*. Et tum primùm ad *statum Civitatis* conversus, quid utrobique liceat, vel non liceat, examinarem. Cùmque omnis in hoc genere injuria vel lædere possit *solum honorem*, seu existimationem bonam: vel aliud adhuc damnum secum trahere, dispiciendum primò erit, an duellum licitum esse in statu naturali possit, ubi solius honoris damnum esset subeundum: tum considerandum, an licitum esse possit, ubi alia adhuc damna essent oritura. Hoc sequenti Capiti reservamus: illud modò tractaturi. Itaque Articulus I. dabit declarationem statûs naturalis. II. Examinabit jus belli privati, competens statui naturali. III. Magis ad particularia descendens quæret, an vi hujus juris, cedere vel duello tueri liceat honorem contra injurias *reales* e. g. verbera. IV. An contra calumnias. V. An contra convicia. VI. An contra dedecus, quod ex recusato duello resuleret.

## ARTICULUS I.

*Declaratio Statûs naturalis.*

**C**irca hunc statum, hodiè celebrem Authorum scriptis, exponenda sunt varia ad finem nobis propositum. Ante omnia danda ratio, cur primò duellum ad statum naturalem deducamus. 2dò. Danda hujus statûs idea est. 3iò. Dicendum, quibus legibus regatur. 4tò Quibus gaudeat iuribus.

## §. I.

Ratio, cur duellum primò ad statum naturalem deducamus.

170. *Quia plurimi estimatur hac methodus.* 171. *Quia non raro monomachus in statum naturalem repositus esse videtur.*

170. **J**us naturale purum, quod solum in statu naturali dominatur, hoc præcipuè ævo, in pretio habetur, vigetque; quia ultima humani juris ratio, ait P. IGNATIUS SCHWARZ (a), fere in jure naturæ quaerenda est; quia suppeditat media genuinæ interpretationis, & applicationis: quia principiis universalibus constat: reliquum jus non nisi particularibus, & quibus omnes quaestiones decidi non possunt. In eundem sensum loquitur PUFENDORFIUS (b). Unde etiam viri sagacissimi post HUGONEM GROTIUM (c) jus naturæ, ab aliis disciplinis secretum, magno cum emolumento explicandum sibi sumpsere. Non abrogare GROTIUM antesignano encomia illa velim, quæ passim liberalissimè in eum congesta legimus; at illud immoderatiùs fuisse dictum existimo, dum omnes superiorum temporum Doctores, Patres æquè ac Theologos jus naturale vel ignorasse, vel pulvere scholastico conspurcasse nonnulli (d) asserere non verentur. Huic jactantiæ cristas evellit SCHWARZIUS pollice neutiquam molli (e). Legi quoque meretur limatum judicium Clarissimi P. SCHMIER (f).

171. Altera ratio, quæ hanc viam inire suavit, materiæ, quam tractamus, propria est. Ea nempe deprehenditur apud Principes & Magistrat-

(a) Prolegom. ad Instit. J. N. G. (b) L. 2. c. 5. §. 3. J. N. G. (c) L. de Jure B. & P. (d) Pufendorf, Thomafus, Fleisiberus &c. (e) Prolegom. instruct. 7. (f) Jurisprudentia publ. univers. Præfat. ad Lect.

status in tollendo duellorum usu non raro socordia, ut, qui existimationis, aut honoris detrimentum est passus, jam vel non audiat: vel auditus sine ope deferatur, tamdiu injustam infamiae notam circumlaturus, donec vel iuvitus, privatam ultionein sumat (*vide n. 81.*). Ejusmodi equestris, vel militaris ordinis vir, nihil opis inveniens in statu civitatis, ad Statum naturalem veluti redactus esse videtur, in quo, deficiente Judice, jus belli cuique à natura concessum dicunt. (*Vid. n. 180.*) Et hic, meo iudicio, est clypeus præcipuus, quo monomachus hodiernæ ætatis se tegit. Itaque non immerito elegi totam de duelli licentia, vel interdictione doctrinam statui naturali accommodare, antequam ad statum civitatis transcamus.

## §. II.

## Idæa status naturalis.

172. *Explicatur definitio.*173. *Probatur ejusmodi statum ext-**stere posse, si non merè talem, cer-*  
*tè mixtum.*

172. **S**TATUS impræsentiarum accipitur pro certa conditione seu ratione vivendi, prouti aliàs in jure & usu loquendi accipi solet (a). *STATUS* igitur *naturalis*, prouti ab *adventitio* discernitur, scilicet à statu conjugali, herili, à statu civitatis, Reipublicæ &c. est conditio hominum inter se æqualium, neque alterius, quàm DEi arbitrio subjeetorum. Ita præter *HERTIUM* (b), *SCHMIE* & *SCHWARZ*. Homines *inter se æquales* sunt non illi tantum, qui societatis omnis expertes, vitam solitariam agunt: sed & ii, qui licet societatem colant, quadam tamen ratione libertatem, à natura congenitam, retinent; eo quod nemini subjeeti vivant. Et hæc est præcipua status naturalis prerogativa, sine subjectione vivere; spectata namque natura, omnes æquales & liberi nascimur, nec unus alteri subjeetus est. (c) Hæc simul est differentia, qua status naturalis à statu civili discernitur, in quo necessarium est aliquod imperium, ut societas in debito ordine conferretur. Nihilominus civitas relata ad civitatem, sive Respublica ad Rem-  
publi-

(a) In Tit. ff. de Statu hominum. (b) In Element. Prud. Civ. p. 1. sect. 1.  
(c) L. 32. ff. de R. J.

publicam & ipsæ concipiuntur in statu naturali vivere, si sui quilibet juris neutra ab altera dependeat.

173. Dubitârunt aliqui; num ejusmodi status naturalis hominum detur. Ratio dubitandi potissimum hæc erat; quòd homo sit animal sociale, non appetens tantum societatem, sed etiam summè eadem indigens: societas autem excludat libertatem omnimodam, statui naturali propriam. Unde primi hominis status erat civilis; vix enim à Divino Protoplaste formatus, societati conjugali addictus fuit, *quia non erat bonum, hominem esse solum*, (a) Ad hæc & similia respondet SCHMIEK (b) juxta mentem PUFENDORFII: " Fatendum, nunquam universum hominum genus simul, & semel in statu *merè* naturali extitisse, aut existere potuisse juxta moder-  
 " nam DEI optimi maximi providentiam; cùm autoritate Divinarum  
 " Paginarum suffulti indubitanter credamus, ex uno pari conjugum, quid-  
 " quid est mortaliū, sua ducere incunabula: indèque colligamus tum  
 " imperium maritale, quo Eva subiciebatur Adamo: tum paternum, cui  
 " descendentes ex Adamo suberant. Quin autem nonnulli ex posteris  
 " Adami, soluta per mortem, aut mutuum consensum potestate patria,  
 " aliis in civitatem confluentibus, remanserint in statu libertatis, neque  
 " vera, neque nova exempla dubitare sinunt. Similiter extra du-  
 " bium est, quin priscis temporibus, qui familia paterna excedebant, fra-  
 " tres singuli sibi peculiarem familiam, ab alia non dependentem, con-  
 " stituentes, in libertate, & statu naturali, ex ductu & dictamine sanæ  
 " rationis mutuo vivere inceperint, eadèque de causa hodièdum una  
 " Civitas respectu alterius existat in libertate naturali, quatenus neutra  
 " paret alteri, nullàve Dominum, aut dominium supra se reveretur. Pa-  
 " riter extra controversiam videtur positum, statum naturalem oculis  
 " præsentari tunc, quando Civitas in Anarchiam delapsa, dissolvitur:  
 " vel quando diversarum Civitatum homines in terras vacuas, aut deser-  
 " tas Insulas se conferunt. " In statu Naturali vixisse GRONOVIVS (c) exi-  
 " stimat Aborigines, genus hominum agreste, sine legibus, sine imperio,  
 " ita describit SALLUSTIVS (d). Id, quod etiam MOLINA de hodiernis quibus-  
 " dam

(a) Genes. 2. (b) Jurisprud. Publ. Univers. L. 3. c. 1. à n. 7. (c) In not. ad Grot. l. 1. c. 1. §. 1. (d) Bell. Catil. c. 6.



dam Africae, & Americae populis testatur. Unde etiam patet, Statum Naturalem aptè dividi in merè talem, & mixtum. Mixti æconomiam quamdam descriptam leges n. 192.

§. III.

Quibus legibus regatur Status Naturalis.

174. *Regitur jure naturali.*

175. *Quid sit jus naturale?*

176. *Unde colligatur, rem quamdam præcipi jure naturali.*

174. **Q**Uæritur scilicet, an sit omnino exlex, vel quibus demum legibus ac principiis dirigatur. Negatur haud dubiè, quòd exlex sit, vagòque quodam impetu ducatur. Absit hoc. In tanta humanorum affectuum varietate ac ferocia qualis futura erat hominum vita, si nullum jus eosdem componeret? luporum, leonum, canum, inter se decertantium, turbam videres. Imò quilibet alteri leo, lupus, canis futurus erat, & his omnibus infestius quid; quippe cùm nullum sit animans, quod homini plus, quàm homo nocere possit, & velit: & cùm tot mala homines nunc invicem inferant, quando lex & pœna imminet; quid futurum foret, si omnia impunè fierent, si hominis desideria nullum intus frænum compefceret? plures rationes, quibus necessitas legis cujusdam, hominem etiam in statu naturali dirigentis probatur, affert PUFENDORF (a). Cùm verò inter æquales lex humana locum non habeat: neque de alia quæstio sit, quàm de ea, quæ ad felicitatem hujus statûs est necessaria, conficitur, legem naturalem in hoc statu vigere. Lege itaque naturali obligatur, quisquis in statu naturali vivit.

175. Est autem lex naturalis, juxta D. THOMAM (b) participatio legis æternæ in rationali creatura. Vel si Justinianum, & Ulpianum audiamus, jus illud, quod natura omnia animalia docuit. Vel denique juxta definitionem SCHWARZII, satis accuratam, ordinatio divinæ sapientiæ, per dictamen synterefeos naturæ rationali manifestata, præcipiens rectæ rationi simpliciter consentanea, & prohibens dissentanea.

176. Si quæras ulterius, ex qua regula discere liceat, quænam rectæ rationi consentanea vel dissentanea sint, SCHWARZIUM, suadeo, con-

Q

sulas

(a) J. N. G. l. 2. c. 2. (b) 1. 2. quæst. 91. a. 2.

fulas (a), qui operose ad omnem acribiam effingere ejusmodi principium fatagit: oculumque intendens in triplex hominis officium, quo DEO, sibi & proximo obstringitur, ita statuit: Fac, vel omitte ea, quæ ex amore, DEO, tibi & proximo naturaliter debito, hoc est, ad felicitatem, naturæ rationali propriam, necessariò facienda, vel omittenda sunt. Tum demonstrare contendit, celebre illud hodie *socialitatis* principium, quod GROTIUS concepit, PUFENDORFIUS enixus est, & de fonte levârunt sequaces plurimi, non esse *adaquatum*, sive complectens omnia triplicis generis officia; ex hoc enim, quodd cuilibet homini colenda, & servanda sit societas, quantum in se est, adcoque omnia, quæ ad hanc societatem necessariò, & universè faciunt, Jurè naturali præcepta: quæ verò eandem turbant, atque abrumpunt, vetita intelligantur, ex hoc, inquit, solùm intelligitur, quò homo erga hominem: non quò erga se, & præcipuè erga DEUM se gerere debeat. Quod videtur fateri ipse PUFENDORFIUS, dum hæc bina officia ad Theologiam, & Ethicam rejecit. Mihi interea placet illud vetus, Theologorum præcipuè autoritate roboratum principium, quod in obveneritibus casibus nunquam fallax deprehensum à se fuisse testatur SCHMIE (b): Illud præceptum, vel prohibitum, Jure naturæ teneas, quod ad feliciem statum humanæ naturæ simpliciter expedit esse præceptum, vel prohibitum. Illud autem expedire, vel non expedire censendum est, in cujus licentiam, vel interdictionem homines consensissent, si ante omnem casum particularem ab Authore naturæ requisiti, suffragium tulissent. Quæ in hoc principio carpit lima SCHWARZIANA (c), non est hujus loci examinare.

## §. IV.

## Quæ Jura competant homini in Statu Naturali.

- |   |                                |
|---|--------------------------------|
| 177. <i>Jus proprii arbitrii circa se, &amp; sua.</i> | 180. <i>Jus belli privati,</i> |
| 178. <i>Jus ultionis.</i>                             | 181. <i>Defensivi,</i>         |
| 179. <i>Jus pænæ.</i>                                 | 182. <i>Et offensivi.</i>      |

177. PRIMò est ejusmodi homo dominus suarum actionum, nec eas ad alterius cujusquam leges, aut utilitatem tenetur accommodare. Secundò est rerum suarum moderator & arbiter, potens de iis disponere ad

(a) P. 1. tit. 2. Instr. 3. (b) Jus Publ. Univ. Præamb. Sect. 2. n. 45. (c) Loc. cit. §. 2.

ad libitum; inodò sine cujusquam injuria, quæ lege naturali vetatur. Tertio, si in bonis suis læsum se videt, aut everti à quoquam jura sua, Judex est in propria causa, penes quem sit pronunciare, & exequi. Quarto, si ipsemet peccaverit, Judicem non habebit in terris, qui delinquentem, condemnet, aut puniat, saltem cum autoritate. Deducuntur hæc planissimè ex ipsa notione, quam de Statu naturali dedimus.

178. Illud non ita planum, an homini ejusmodi ita læso in bonis corporis, fortune, aut famæ competat Jus ultionis, *pana*, ac belli. Ultionem *meram*, seu quæ nihil aliud præter patientis dolorem, & perniciem habet propositum, sub crudelitatis vitio natura inter homines proscripsit (a); non enim debet in malo cujusquam quiescere ulciscens animus, ut docent Theologi (b). Et hoc est, quod SENECA voluit, dum dixit (c): ad vindictam veniendum, *non quasi dulce sit vindicare, sed quasi utile*.

179. *Panam* quod spectat, hujus infligendæ jus homini, in statu naturali constituto, attribuit GROTIUS (d), dum bellum *panale* admittit. At contradixit ei PUFENDORFIUS, qui ad pœnam infligendam imperium, seu jurisdictionem requirit (e), qualis in eo statu, ubi nemo superior, utique non datur. Huic adstipulatur clarissimus P. SCHMIEP (f) cum VITRIARIO, atque GUNDELINGIO, qui putat, in verbis ludi, dum æqualis æquali pœnam infligere dicitur. Contrà BARBEYRAC GROTIUM defendit in notis suis ad PUFENDORFIUM, existimans, inde nos notioni *pana* potestatem superioris connectere, eo quoddè ideam à statu civili desumere sueverimus. In subsidium vocat LOCKIUM, CARMICHAELEM, & NOODTIUM. Partes suas augere potuisset autoritate MOLINÆ (g), & L. B. de WOLF (h). Mihi hæc quæstio multum videtur habere de nomine. Unde de jure belli præstat dicere; præsertim cum hoc jus pœnæ benè vel malè dictæ, fere non abludat à bello privato punitionis causa suscepto, de quo n. 182.

180. Est *bellum* in genere status hominum, in quo unus jus suum vi persequitur adversus alterum (i). Jus itaque belli est jus vi persequendi

Q 2

jus

(a) *Pufend.* J. N. G. L. 2. c. 5. §. 3. (b) *D. Thom.* 2. 2. q. 108. *Sylvest.* verb. vindicta &c. (c) *De Ira* 11. 32. (d) J. P. B. L. 2. c. 1. §. 2. & c. 20. §. 38. (e) J. N. G. L. 8. c. 3. §. 4. (f) J. Publ. Univers. L. 4. c. 1. sect. 3. §. 1. (g) *Tom.* 1. Tra&t. 2. disp. 98. (h) J. N. p. 1. §. 1061. (i) *Wolf.* J. N. p. 1. §. 1102.

jus suum adversus eum, qui idem nobis tribuere non vult. Jus ad hoc bellum cuique homini naturâ competit. Quoniam vel civitas contra civitatem, vel etiam privatus contra privatum, jura sua persequi potest: *publicum*, & *privatum* inde bellum nascetur. Et hanc partitionem, ait GROTIUS (a), esse primam & maximè necessariam. Partitionem hanc in bellum publicum & privatum operosè tueretur MUELEN (b): utitur eadem WOLFIUS (c): quin ait, omne duellum esse bellum. Scio, sunt, qui cum P. SCHMIEER bellum privatum à ratione belli propriè dicti, excludunt: at de statu civitatis eis sermo est, in qua utique habere locum, saltem spectando jus, non male negant. Fateatur tamen P. SCHMIEER (d): " Si primo mundi ævo existere  
 „ homines, nulli familiæ adscripti, nulliusve potestati, etiam domesticæ,  
 „ subiecti, illi profectò ad mentem Groti bellum non publicum, sed  
 „ privatum suscipere dicebantur, quando ab aliis in corpore, vel bonis  
 „ impediti, se, suâque defendere conabantur; cùm persona publica cum  
 „ veritate nequeat compellari, quæ non aliud, quàm suum individuum  
 „ curat, & defendit. Quod si hodieum reperiantur ejus generis homi-  
 „ nes, sibi solis viventes, & ab omni superiore independentes, non ab-  
 „ nuo, quin, si quam concertationem per vim instituunt, *bellum priva-*  
 „ *tum* nominari queat. " Hoc jus belli privati homini privato, in statu naturali constituto, competere nemo dubitat.

181. Quoniam autem bellum publicum dividitur in bellum *offensivum*, & *defensivum*: idem de bello privato fieri debebit. *Defensivum* est, quo defendimus, & retinere laboramus, quæ nostra sunt, contra eos, qui nos lædere, nostra intercipere, aut ea perdere conantur. *Offensivum* (quod etiam *aggressivum*, vel *vindicativum* dicitur) est, quo extorquimus debita, quæ nobis abnegantur: aut justè nobis erepta recuperatum imus, cautionemque imposterum quærimus contra illum, qui prior nos læsit. Utriusque belli hujus justiciam, inter gentes si geratur, passim apud Authores defensam legimus. De æquitate belli privati eleganter loquitur PUFENDORF (e): " Ad conservationem sui, quam cuique & amor longè tenerri-  
 mus,

(a) L. 1. c. 3. §. 1. (b) In Comment. ad cit. loc. (c) J. N. p. §. 563.

(d) Jur. Univers. L. 4. c. 1. n. 17. (e) J. N. G. L. 2. c. 5. §. 1.

mus, & ipsa ratio commendat, pertinet sui defensio, seu propulsatio malorum. Isthæc defensio duplici modo instituitur; vel sine læsione ejus, qui malum nobis machinatur: vel cum ejusdem læsione, ac perniciæ. Prior quin sit licita, nemo sanus unquam in dubium revocavit. Circa posteriorem autem nonnullus ideo scrupulus fuit obortus, quòd per ipsam lædatur, aut perdatur nostri similis homo, quocum ad colendam vitam socialem adstringimur. - - At natura ad vim confugere quandoque indulget, ubi aliter per alterius injuriam salvi esse non possumus. Scilicet obligatio ad exercendas invicem leges naturæ, & officia pacis est mutua, & omnes homines æqualiter stringit. - - Adeoque ubi alter contra leges pacis talia adversus me suscipere aggreditur, quæ ad meam perniciem spectant, impudentissimè à me postulaverit, ut ego ipsum deinceps sacrosanctum habeam, id est, ut meam salutem perdam, quo ipsius malitia impunè grassari possit. „ Addit paulò pòst (a): „ In statu naturali degentes non solum in præsens intentatum periculum repellere, sed etiam eo depulso contra lædentem eousque progredi possunt, quoad ab illo in futurum satis sibi cautum videatur. De qua cautione ita habendum: si quis, injuria facta statim pœnitentia ductus veniam petat, & damni restitutionem offerat, in gratiam cum ipso redire debeo, nec ampliorem cautionem rectè ab eo videor exigere posse, præter fidem denuo dandam; sufficienti enim argumento est, firmum ipsi esse propositum in posterum me non amplius lædendi, quem sponte facti pœnituit, & qui ad petendam veniam ultro descendit. Ast cui per vim pœnitentia est extorquenda, & qui tunc solum veniam petere instituit, quando resistendi vires deficiunt, ejus sola fides parum sufficiens cautio videtur. Igitur tali vel vires nocendi subtrahendæ, vel aliud vinculum injiciendum, ut ne deinceps nobis existat formidabilis, postquam exprompta semel malitia, nec rite emendata, perpetuò ipsum suspectum reddidit. „

182. Nec minus liquet, bello *offensivo* privato, in statu naturali locum esse; si enim licet contra vim vi tueri sua, cur non etiam recuperare vi ablata, debita exigere, & pro futuro cautionem quærere liceat? imò

Q 3

etfi

(a) J. N. G. L. 2. c. 5. §. 3. ad finem.

erli non agatur de extorquendo aut recuperando debito, malum tamen inferre lædenti æquum est, *vindicta* aut *punitio* causa. Id quod WOLFIIUS sequentibus demonstrat: " Si quis lædi se patitur ab alio, ei non modò  
 „ verendum est, ne denuo ab eodem lædatur, verùm etiam ne ab aliis  
 „ ejus similibus lædatur, & ne idem quoque lædere posthac alios audeat.  
 „ Si quis te læsit, competit tibi jus eum adigendi, ne impostero denuo  
 „ lædat, & præcavendi, ne exemplum ejus secuti te, vel ipse etiam alios  
 „ lædere audeat. Ut eum huc adigas, malum quodpiam cum ejus læ-  
 „ sione connectas oportet, quod ei, aliisque motivum sit, nolendi posthac  
 „ læsionem. Cùm ergo jus habeas eum huc adigendi, jus quoque habes,  
 „ malum (*pœnam* vocat WOLFIIUS) connectendi cum læsione, id est, bello  
 „ offensivo aggrediendi. „ Ex hoc fonte se puriùs, quàm GROTIUM, ex  
 Jure Rhadamantheo deduxisse existimat WOLFIIUS jus puniendi in statu na-  
 turali (a). Illud cautè addit (b): " Qui alterum punit, non intendit ma-  
 „ lum, quod alteri inferendum est: sed aversionem periculi læsionis fu-  
 „ turæ sibi, & aliis ex præterita metuendæ. „ Subjungit: quemadmodum  
 D. THOMAS ait, " in vera defensione hominem non occidi ex intentione :  
 „ ita prorsus ad mentem ejus dicendum, puniendo non inferri malum ex  
 „ intentione. Absit, ut quis sibi persuadeat, inanes fingi subtilitates, si-  
 „ bique caveat, ne eas ad quisquillas Scholasticorum referat animo con-  
 „ viciandi, quo contemnuntur, quæ non intelliguntur (c). „ Sunt tamen  
 alii; quibus videtur non esse iniquum, ipsam occisionem si *intendat* pu-  
 niens; cui enim, ajunt, licet finem quærere, licet etiam *intendere me-*  
*diū*, quale hic est occisio. His omiſſis alia tractanda se offerunt.

## ARTICULUS II.

*Explicatur jus belli privati, Statui Naturali competens.*

**D**E hoc jure belli privati duo potissimùm explicanda veniunt, I. Quo-  
 usque se extendat; an etiam in infinitum. II. Ad quæ defendenda  
 bona se extendat.

§. I.

---

(a) J. N. p. 1. à §. 1057. (b) §. 1074. (c) Ibid. §. 992.

§. I.

Quousque se extendat jus belli privati.

183. *Jus in infinitum extensum à* 185. *Moderationem accipit à R. P.*  
 Grotio :  
 184. *Et Pufendorffio :* 186. *Et L. B. de Wolf.*

183. **C**elebre est effatum GROTII (a) : qui me injuria parat afficere , is mihi eo ipso dat jus, hoc est, facultatem aliquam moralem adversus se *in infinitum*, quatenus aliter malum illud à me arcere nequeo. GRUNOVIIUS in annotationibus ad hanc sententiam GROTII ait, “ hoc assertum duræ, ac difficilis esse concoctionis, etiam ubi injuria jam quis est affectus. “ Fortasse hanc fuisse mentem Authoris, quod det facultatem liberam in- circumscriptam in instanti, cum consilium in arena capiendum, nec copia est circumspectiendi, quid optimum sit, arripiendi auxilium, & ob- jiciendi, quodcumque sub manu est, etiamsi inde, non quidem destinatione mea (quæ est tantum, à me arcere injuriam) sed casu fortuito mors lædere volentis sequatur: ut si manum, dum intentatur mihi ala- pa, præcidam, aut sic fauciem, ut vulnus ei sit mortale. „

184. Duræ non minus concoctionis est doctrina PUFENDORFFII doctentis (b): Eo ipso, dum quis me injuriis lacessit, nec poenitentiae si- gna ostendit, dat mihi, quantum in se est, adversus se licentiam *in in- finitum*: neque habet amplius in se jus, quo minus extrema quæque ab altero ipsi vicissim inferantur: etsi sæpe, ne isto jure quis integro utatur, aliæ considerationes prohibeant. „

185. Hanc doctrinam PUFENDORFFII nimium liberalem appellat R. P. SCHWARZ (c): “ Hæc enim, ait, infinita potestas jure defensionis legitimo fundari nequit; hoc enim nititur moderamine inculpatæ tutelæ. “ Et licet æqualitate inferendi mali physica non restringatur, ut rectè PUFENDORFFIUS tenet: respicit tamen *per se* loquendo, moralem proportionem, jure penes lædentem manente, ut ne ob quamvis levem injuriam „  
 extre-

(a) De J. P. B. L. 2. c. 1. §. 10. (b) De J. N. G. L. 2. c. 5. §. 3. (c) J. N. G. P. 1. Tit. 4. Instruct. 2. q. 15.

„ extrema quæque in ipsum statui queant: imò charitatis etiam lege ob-  
 „ stringente, ut ne seviatur ultra modum, illatæ injuriæ proportionatum.  
 „ Hinc Grotianum axioma veriore longè paraphrasi exponit BANNES, id  
 „ extendendo ad ea omnia, quæ necessaria sunt, ut quis ab injuria se ser-  
 „ vet immunem.

186. Non multùm abludit expositio WOLFII, quam adhibet huic  
 juri infinito (a): “ Jus infinitum, ait, illud dicitur, cui in genere non  
 „ possunt præscribi limites: sed cui demum limites præscribuntur ex cir-  
 „ cumstantiis præsentibus; cùm nunc plus, nunc minus liceat pro varie-  
 „ tate circumstantiarum, eodem fere sensu, quo Euclides lineam rectam  
 „ infinitam vocat. „

Huic ego expositioni Wolfianæ, pariter illi Bannesianæ lubens af-  
 sentior: in alio sensu non agnosco jus belli privati *extensum in infinitum*.

## §. II.

Ad quæ bona defendenda se extendat jus belli privati.

- |   |   |
|---|---|
| 187. <i>Præmissa regula generali</i> Patris | 189. - - <i>ad bona fortuna.</i>              |
| Schmier,                                    | 190. - - <i>ad bona fama.</i>                 |
| 188. <i>Extenditur hoc jus ad bona cor-</i> | 191. <i>Si tamen sit spes boni successus.</i> |
| <i>poris.</i>                               |   |

187. **C**larissimus ille juris naturalis Doctor P. SCHMIER, dum de juribus  
 hominum, in statu naturali existentium, differit, inter alia hæc  
 habet (b). “ Si bellum publicum cum plurium occisione ex causa defen-  
 „ sionis ab omnibus licitum reputetur, etiam bellum privatum,  
 „ quo in statu naturali æqualis in æqualem arma movet, concurrente de-  
 „ fensionis causa, illicitum esse nequit. „ Verbo: *quotiescunque bellum pu-*  
*blicum jure naturali inter duas civitates censetur indultum, toties bellum pri-*  
*vatum inter æquales erit concessum; cùm dua civitates inter se considerata,*  
*pro æqualibus reputentur.* Regula hæc solido quidem nittitur fundamento:  
 cum grano tamen salis accipienda est, ut in exemplo patebit paulò pòst,  
 ubi

(a) J. N. p. 1. §. 977. §. 1063. (b) L. 1. c. 1, n. 37. 38.



ubi de calumniis vindicandis agemus n. 242. Id præterea notandum, ex hoc jure belli privati non semper licere extremum malum seu necem inferre adversario: sicut etiam in bello publico ea moderatio adhibenda est, ut quis alteri plus non noceat, quàm ad defensionem necessarium sit.

188. Ad particularia jam ut descendamus, & imprimis ad bona corporis, satis certum est, sicut pro vita subditorum Princeps, aut Respublica in hostes, si iniquas cædes exerceant, bellum suscipere, aut etiam patratas jam, præcipuè crebriores, armis vindicare potest, nì satisfactio pro culpa præstetur, & securitas pro futuro: ita etiam privato cuique licitum est adversarium, imminens vitæ aut membris, illata nece, si mitiore modo fieri nequeat, repellere; nam vim vi repellere omnes leges, omniâque jura permittunt (a). Ita Doctores communiter. Quòd si ergo occisio invadentis, præsertim dum sine meo novo periculo fieri potest, est licita, etiam duellum erit licitum, quamvis aleam dubiam subire oporteat, modò alia via non suppetat evadendi. Hoc contingere posse in duplici casu existimat GROTIUS (b). I. Si invadens alteri concedat licentiam dimicandi, alioquin cum occisurus sine dimicatione. II. Si Magistratus duos, mortem meritos, inter se committat. De quo casu gemino judicium ZIEGLERI legi potest apud SCHWARZIUM (c). Quid de reliquo observandum sit, dum occidi opus est invadentem; quando nempe fugere teneatur is, qui vim patitur: quando vitam propriam vitæ invadentis posthabere, quomodo moderamen inculpatæ tutelæ observandum, aliâque similia passim apud Doctores invenies.

189. Non minus bona fortunæ bello privato, quàm publico tueri, aut recuperare fas est; nam, ut ait PUFENDORF (d), quid judicium, & mos omnium gentium ferat, in aprico est; nam pleraque bella geri constar, non ut aliis vita, sed res eripiantur: ac ridiculus esset hostis, qui, ne telis peteretur, protestari veller, quòd ad res duntaxat rapiendas veniat. Illud igitur certum est, non fieri injuriam ei, qui, dum alterius res raptum, aut perditum ir, occiditur, etsi alias res istæ vitæ hominis acqui-

R

parari

(a) C. Si verò alicujus. 3. de Sent. excomm. (b) J. P. B. L. 2. c. 1. §. 15.  
(c) De J. N. p. 1. tit. 4. Instr. 3. quæst. 4. (d) J. N. G. l. 2. c. 5. §. 16.

parari nequeant. GROTIUS (a) hac in materia rigidus nimium videtur SCHWARZIO (b). Quem rigorem ego non moror; cum de lege Evangelica sit sermo GROTIUS. De statu naturali sentit cum communione, dum ita statuit (c): *Licita est defensio iusta bonorum fortuna, si in notabili quantitate, vel pretio sive eripienda, sive erepta non nisi morte furis aut servari, aut recuperari possunt.* Quanti autem pretii res ablata esse debeat: quæ certitudo juris ad eam rem, vel in ea re: quæ diversitas in statu naturali ac civili, aliæque huc pertinentia, vide apud SCHWARZIUM (d). Quoddam ergo cædes raptoris licita est, etiam duellum erit licitum, uti asserit BONACINA (e) nixus assensu NAVARRI, BECANI, SANCHEZ: *Ad defensionem rerum propriarum videtur esse licitum acceptare duellum, quando aliquis eas invadit, nec aliud adeest remedium ad eas defendendas præter acceptationem; tunc enim non dicitur propriè duellum (de hoc nolim jam litigare) sed iusta defensio rerum propriarum.* In quo casu, si invasus non habeat arma, potest ab invasore petere, ut sibi arma concedat. Nota tamen, cum in duello propriam vitam exponas, de majore jactura bonorum debere agi: quàm ubi sine tuo periculo raptorem occidis. *Vide n. 362,*

190. Demum propius ad rem meam accedere juvat, & num bello vindicare liceat illud quoque delicatissimum bonorum genus, honorem scilicet & famam, examinare. Bellum publicum gens genti non immeritò infert, grandis ubi contumelia illata fuerit, vel Principi, vel universæ Reipublicæ. Hac de causa bellum movit David contra Hanon regem Ammonitarum; eoquod nunciis, à Davide amica cum salutatione ad eum missis, in opprobrium barbæ dimidium abraferit, etiam vestibus sædum in modum præcisus (f). Justum quoque bellum fuit undecim tribuum Israël adversus tribum Benjamin, defendentem habitatores Gabaa, ne punirentur ob scelus illud immane, quo uxorem viri Levitæ eousque incredibili libidine vexarunt, ut animam efflaverit (g). Huc serviet etiam Dinæ injuria vindicata à fratribus, dignis, si modum demas, laudari à Judith (h). Injuriam hæc

*reales*

(a) J. P. B. l. 2. c. 1. §. 13. 14. (b) J. N. G. p. 1. tit. 4. Instruct. 2. quæsit. 6.  
 (c) Ibidem §. 11. (d) Loc. cit. (e) De Censur. disput. 2. q. 6. punct. 2. n. 11.  
 (f) 2. Reg. 10. (g) Vide Molinam tract. 2. disp. 104. n. 3. §. (h) Judith. c. 9.

*reales* quidem fuere: nec tamen dubito, etiam solis *verbis* acerbam inferri posse contumeliam genti à genti; dum e. g. una Respublica, vel Reipublicæ pagus unus (a) per præconem, ad fines alterius Reipublicæ vel pagi missum, in eandem scōmmata, & atras calumnias declamaret; easdem mox per complures provincias dispersurā, ut pessimam notam apud nationes cæteras inimicæ inureret. In similibus causis locum esse vi & armis, non facillè quis dubitabit: tunc saltem si congruā satisfactione vindictam prævenire non malit pars lædens; quā oblata utique à bello erit abstinendum: *cum in eum, qui jure agere & satisfacere est paratus, nefas sit bellum sumere tanquam in injuriam* (b):

Quod Gentibus licet; cur privatis in statu naturali constitutis non liceat? præcipuè si illud subsistat, quod supra n. 187. ex P. SCHMIEBRIE attuli: *Quotiescunque bellum publicum jure naturali inter duas civitates censetur indultum, toties bellum privatum inter aequales erit concessum; cum dua civitates inter se comparata, pro aequalibus reputentur.* Id interea extra dubium est, homini licitam esse justam defensionem, & vindicationem famæ & honoris. Quodd si enim tueri licet bona fortunæ, cur non & bona famæ; quæ meritò pluris habentur, quàm opes; nam *melius est bonum nomen; quàm multa divitia* (c). Consecutio hæc placet, teste SCHWARTZIO (d), Theologis, & Juris-Consultis tam veteribus, quàm recentioribus, MOLINÆ, SOTO, NAVARRO; ANT. GOMEZ, COVARUVIÆ, LESSIO, LUGONI, SILVERIÆ &c. Quin sic infert consequentiam: "Ergo si licita est occisio aggressoris injusti pro servandis bonis fortunæ, à fortiori licita erit pro servandis bonis honoris, & famæ." Sed de hoc indagare necesse erit paulò pòst pluribus, & enucleatè magis agendum.

Quodd si interea quæras, an defensio hæc à natura non tantùm permittatur; sed etiam imperetur, respondet WOLFIIUS (e), hominem ad famam defendendam obligari contra calumnias; hinc ipsum CHRISTUM DOMINUM, qui, quamvis convicia conviciis non redderet, seu *maledicta maledictu* (f): adversus calumnias tamen Judæorum, dum famam suam la-

R 2

cesse-

(a) Canton. (b) *Lips. Civ. Doctr.* l. 5. c. 4. n. 15. (c) *Prov.* 22. (d) P. 1. tit. 4. Instruct. 2. §. 4. (e) J. N. p. 1. §. 1033. (f) 1. Petr. 2.

cellebant, famam defendisse (a). Econtra alii cum SCHMIE, SCHWARZ, MEZGER, REDING, arctam ejusmodi obligationem non agnoscunt, nisi forè non mea tantùm, sed & aliorum interfit, famam meam illàsam stare; nam, ajunt, in opinione verè Sapientùm, qui patienter fert injuriam, æstimationem de se magis auget, quàm minuit; virtus enim heroica est, motus naturæ rationi subjicere, & se ipso esse superiorem.

191. Notare hic oportet, quod de bello publico communis Doctorum tenet (b), opportunè ad bellum privatum applicandum. Ajunt, non licere Principi bellum adversus hostem movere, non habenti vires necessarias, quamvis justam habeat causam, si ex bello tali maxima possunt oriri detrimenta in perniciem Statûs ex defectu virium. Ratio ex lumine naturæ petitur; quis enim prudens subeat grande periculum cum nulla, vel futili tantùm spe evadendi? quis se oceano insitor committeret, si spem prudentem concipere non posset evitandi syrtis, & scopules? Id, quod tunc præcipuè verum est, dum non tam patriæ, quàm familiæ suæ causa Princeps bellum cogitaret. Infero ergo etiam ego de bello privato: si quis aggressurus furem, ac raptorem, sive in duello, sive extra illud, ita se viribus, & dexteritate pollere non advertat, ut de victoria referenda spem possit concipere, malè is eam aggressionem tentaret; malè enim pro bonis fortunæ vitam exponeret ejusmodi periculo, in quo probabilis succubiturus vitam unà cum bonis amittere necesse haberet. Nisi forè de tali, tantòque damno evitando ageretur, ut, qui illud incurreret, vitam non nisi molestissimè esset toleraturus: ubi forè spes utnuncque probabilis vincendi posset sufficere. *Vid. Cas. Cap. 6. n. 357.*

### ARTICULUS III.

*An propter Jus belli privati Duello tueri honorem liceat  
contra injurias reales, e. g. verbera.*

**A** Generalibus ad particularia jam descendendum est. Quòd in Statu Naturali detur Jus belli privati, & quòd, vi hujus juris vindicare liceat præter bona alia illud etiam bonum delicatissimum, honorem scilicet,

(a) Ioan. 8. v. 48. (b) *Molina* Tom. 1. de Just. tr. 2. disp. 102. *Suarez* de Charitat. disp. 13. sect. 4. n. 8. aliique apud *Schiarum* Theol. Bell. L. 1. diff. 4. n. 6.

cer, & exiftimationem, fatis liquet ex præcedentibus. Cùm autem contumeliæ, quæ honor violari poteft, fint diverfæ, diverfi item modi vindicandi, examinabimus hoc Articulo, an duello, aliâve ratione violenta tueri liceat honorem contra craffiffimum contumeliæ genus, fcilicet, contra *verbera*, eâque fufte, fcutica, manûve vel infligenda, veletiam jam inflicta. Ante omnia accuratiùs explicare oportet *Status quæftionis*. Dein confiderabimus *verbera primum danda*, feu intentata: tum quoque *verbera jam data*.

§. I.

Status quæftionis accuratè explicatur.

192. *Depingitur Status naturalis mixtus.* 193. *Fingitur Cafus.*

192. **E**X iis, quæ fuprà, præcipuè n. 173. dicta uberius funt, pater, Statum Naturalem aptè dividi in *merè naturalem*, & *mixtum*. Nobis de mixto fermo eft, habente tamen præcipuum charactèrem Status Naturalis, libertatem fcilicet non dependentem ab altiore judice. Fingamus ergo, quemdam terrarum tractum incolæ ab hominibus, qui ex variis civitatibus eò confluerint, & nunc degant congregati in varias familias: ita tamen, ut etiam multi, foluta per mortem, aliâmvæ caufam poteltate paterna, conjugati, aut non conjugati, fuas fibi, ubi placet, fedes figant, nullius fubjecti poteltati, nifi Authoris naturæ, vel ad fummum parentum, aut mariti: vel fi vis, etiam herili; námque etiam fervos, & famulos in hoc Statu naturali mixto admittimus. Judice carent, qui vel inter familias, vel alios, extra familiam degentes, jus dicat, aut lites dirimat. De cætero offendi funt faciles: in famæ, ac honoris integritate fervanda admodum delicati: nil minùs, quàm contemptum, ludibrium, aut ignominiam ferre docti: mitiùs laturi opum, nescio quam jacturam, quàm vel fungi, aut deceptoris, aut adulteri nomen. Quod fi tamen ejusmodi fortè paffus quis fit, omnium judicio armata manu abftergenda fuligo eft: provocandus in arenam, qui offendit, ut pugnando fatifiat, redeâtque honor.

Omniùm maximè alapam, vel iſtum fuſte datum, indignè ferunt. Hunc, illâmvæ fi quis temerarius dedit, fas tibi eſſe dicunt, exerto eum

confestim gladio confodere, etsi suum is ferrum nondum nudasset. Moras si trahis, occasionem venari oportet; qua fortè obrutum tu quoque cedere fuste possis. Si patiens excipiat ictus tuos; quin suum ipse ferrum stringere audeat, tuus tibi honor rediit. Si occasio non detur, ita eum obruendi, (solent enim, qui alapam dedere; cauti incedere) vel si generosius velis agere, ad pugnam venire necesse erit, cui signum opportunè dabis projecto ad pedes antagonistæ baculo tuo. Pugna autem cruenta sit, nec leviter strinxisse cutem sufficiet. Hæc de verberibus, fuste, vel manu, vel scutica datis. Non tamen necesse est, ut verberem: modò pileum ei circumagam, vel manum impingam pectori: quin vel levassè manum ad ictum sufficit. De his ferme eadem statuuntur, atque de verberibus. Quodsi quis, neglectis his regulis, non utatur præscriptis remediis; extremo se contemptui exponit: velut imbellis fungus exploditur: commercio & societate æqualium excluditur: quin & bona vel rapiuntur, vel negantur cœque, ut, unde vitam sustentet, quandoque non supersit. Commissa econtra pugna, sive duello, quemcunque exitum habuerit, sanatum reputatur vulnus; honori antè illatum. Ut paucis dicam, de honore & duello idem est horum hominum in statu naturali corruptum iudicium, quale hodie in civitatibus plerisque vigere cernimus.

193. Fingamus etiam casum. Leander, nescio quibus crabronibus concitatus; Hectorem, virum inter suos æstimatum; subito invadit, eumque provocat, ut duello satisfaciatur pro injuria, quam sibi factam credit. Tergiversanti ex metu peccati fustem, aut alapam intentat. Dubitatur, an Hector vel aufugere debeat, si fugæ sit locus: vel an firmo pede consistere, & pugnam acceptare sine piaculo possit, atque etiam interimere. Fingitur simul, Hectori fugienti, vel alapam ferenti aliud damnum non fore timendum, præter ignominiam; contentam in ipso ignominioso ictu aut fuga, adeoque ignominiam hanc non esse de cætero damnificam. Explicato ita statu quæstionis, sequitur

§. II.

De verberibus primùm dandis, seu intentatis.

- |   |  |
|---|--|
| 194. Ponitur conclusio sex membrorum.                         | quadam animadversione Pufendorfii.                       |
| 195. De membro I. doctrina T. T. Catholicorum,                | 202. Membrum II. conclusionis.                           |
| 196. Qua admissa, nostra assertio erit à fortiori admittenda. | 203. Membrum III.  |
| 197. Doctrina rigidior Grotii & Pufendorfii,                  | 204. Membrum IV.   |
| 198. Nostra non est contraria.                                | 205. Membrum V.  |
| 199. Doctrina rigidissima Wolfii,                             | 206. Solvitur prima difficultas contra riam huic membro. |
| 200. Cum nostra forte conciliari potest.                      | 207. Solvitur altera difficultas.                        |
| 201. Conclusio denique stabilitur ex                          | 208. Membrum VI.   |

194. **A** Jo ; I. Hector in posito casu non obligatur fugere. II. Neque obligatur patienter excipere verbera ; sed fas est ei gladium obicere vim intentanti. III. Quòd si hic desistat, vel cedat, occidere non licebit. IV. Minore tamen poena protervum docere modestiam fas erit. V. Quòd si autem Leander armis contra Hectorem agere incipiat, defendere se huic vetitum non erit duello, vel rixa, quomodocunque vocare placeat. VI. Cavendum tamen Hectori, ne lethale vulnus det Leandro, si minùs periculoso expedire se possit. Membra singula juvat explicare.

195. I. Hector in posito casu non tenetur fugere. Nam difficile est, ad capeffendam fugam virum honoratum, non levis inter suos autoritatis, obstringere, siquidem fugiendo non leve honori suo dispendium, atque ignominiam esset allaturus. Quid agendum in hoc casu, ex judicio prudentum liceat colligere. Catholicos authores si consulo, docet MOLINA (a) : si sit homo ingenuus, cui dedecori sit fugere, quando alius " cum aggreditur, tunc, esto, fugiendo & vitam propriam, & aggressor is posset conservare, non tenetur fugere : sed defendendo personam " propriam, & proprium honorem interficere potest injustum aggressorem, quando aliter non potest utrumque conservare. „ Citat SOTUM, NAVAR-

(a) De Justit. tr. 3. disp. 17.

NAVARRUM, ANT. GOMEZ. Assentitur LESSIUS, testatus, hanc esse communem DD. sententiam. Certè vindex GEBATI recenset omnino nonaginta sex ei faventes (a). Et quamvis multi, vel plerique eorum loquantur de eo, qui armis, non qui colapho, aut fuste te impetit, sine periculo gravioris vulneris: nihilominus ratio movens est eadem utrobique, scilicet *ignominia fuga*, quæ si sufficit, ut quis stet, ubi vita invaditur, cur stare non liceat, ubi nihil vitæ, & membris timendum est? argumento utitur MOLINA, ut potior authorum pars, adducto jam supra n. 190; quia scilicet honor pretiosior est bonis externis: quoddam ergo rapere volenti opes arma licet opponere: idem licebit contra volentem rapere honorem adigendo me ad fugam, vel ad recipiendum colaphum. Item: ego jus habeo standi: alter jus non habet me obligandi ad fugam: ergo fugere non teneor.

Monent tamen Patroni hujus sententiæ, habendam esse rationem personarum; non enim Ecclesiastico aut Religioso Viro, vel cuidam ex plebe fuga in probrum imputabitur. Imò lepidum est discrimen, quod facit BARTOLUS (b) cujus sententiam his verbis recitat DAMHOUDERIUS (c): " Si tu es Perusinus, famam ac dedecus metuens, ad actum usque occisionis procedere potes; quoddam summum sit dedecus Perusino magnanimo ac generoso, turpiter adversario invadenti cedere. Sed ille, cui nulla est gloriæ, nominis, ac honoris ratio, qualis est Florentinus, & commodè fugere potest, neglecta nominis gloria, certè modis omnibus fugere tenetur, & si non fugit, punitionis crimen incurrit. " Hoc scilicet BARTOLUS studio partium dedisse videtur. Deinceps autem mutavit sententiam, & statuit, nullum teneri fugere (d). Monent insuper Doctores, illum, qui invaditur propè januam suæ, vel alienæ, præsertim amici cujusdam domus, ita ut eò se facile recipere, & excludere instantem inimicum possit, non tam facile habiturum, cur ignominiam timeat. Item monet LUGO (e) eum, qui adversarium iniquè læsit, & lædendo irritavit, teneri ad fugam, utut ignominiosam.

196. Si sana est illa MOLINÆ, & aliorum doctrina, multò facilius admitteretur mea; primò quia illi Theologi loquuntur non de statu naturali solùm,

(a) Vid. *L' Croix* l. 3. p. 1. n. 803. (b) Ad l. 3. ff. de Inst. (c) *Prax. Crim.* c. 76. n. 9. (d) Vid. Mauriti. de Duell. §. 51. (e) *Resp. Mor. disp. 10. sect. 8*



solum, sed etiam de civili, de quo mentem meam exponam Cap. VII. Tum ideo; quia qui fugit irruentem contra se armis, sperare potest, idem periculum, fuga semel superatum, non tam facile fore rediturum; vel quia mitigabitur furor invadentis, vel quia opem interea ferent alii; e contra Hectori, provocato ad duellum, etsi semel fuga se subducat duello ac alapae, nullibi tunc licebit consistere, redibit provocatio forte priore crudior; cum causa talis sit, quae juxta receptam in tali statu opinionem, non nisi monomachia finire possit. Quia ipsa intentata alapa habetur pro data, ut dixi n. 192. qualem non nisi sanguine elui arbitrantur. Non ergo tam facile obligari poterit ad fugam ignominiosam, & inutilem simul:

197. Acatholici Doctores rigidiores sunt. Juxta GROTIUM (a) "neutiquam probandum est, quod à plerisque (Casuistis scilicet) est traditum, defensionem cum interfectione esse licitam, jure scilicet Divino; (nam de solo jure naturae, quo minus ita sit, non disputo) etiamsi quis fugere sine periculo possit; quia fuga scilicet ignominiosa sit, in nobili praesertim homine. Atqui nulla est hic ignominia, sed falsa quaedam ignominiae opinio, spernenda ab omnibus iis, qui virtutem, & sapientiam sectantur."

PUFENDORFII sententia haec sunt: "qui ab altero invaditur, utique tenetur fugere, si commodè possit, sic, ut caedes invasoris non prius fiat licita, quam fugae via sit interclusa. Ubi patet, in naturali quidem statu invasori nullum competere jus, ex quo alter teneatur ipsius vim per fugam declinare: & si quando fuga potius, quam pugna eligitur, id non sit in gratiam invasoris, sed quia hoc ei, qui invaditur, magis expedire videtur. Inde cum civitates invicem in statu naturali vivant, nemo asseruerit, quod, dum v. g. Rex alterum Regem per injuriam invadit, hic teneatur, quantum potest, fugae se mandare, ne, dum resistit, aliquos ex invasoris copiis occidat. Verum in civitatibus omnino fugiendum potius, si commodè fieri possit, quam invasor occidendus. Neque verò in ejusmodi fuga turpe quid, & militari etiam viro indignum est; quippe, quae non suscipitur ex ignavia, aut neglectu officii, sed quia ratio nullam hic exerceendae fortitudinis materiam invenit, si citra ne-

S

„ cessi-

(a) J. B. P. l. 2. c. 1. §. 10. n. 3.

„ cessitatem civis sit occidendus , à quo me tutum Magistratus præstare  
 „ commodè potest. „ (a)

198. Qualiscunque hic rigor ad me hoc loco non pertinet. In statu naturali jam versatur Hector meus, pro quo statu mitior est PUFENDORFIUS, ut ex verbis primùm recitatis patet. Etiam GROTIUS consultò dixit, *se non disputare de solo natura jure.* Neque etiam aliter iis sentire licebit, si suis principiis velint inhaerere, positis partim *num. præcedente*, partim *n. 183.* Casuistarum jam est de Statu Civili disputare, & à se notam laxatæ disciplinæ amoliri. A damnatione saltem Pontificia hi non habent, quod timeant; nam teste CARDENA (b): *doctrina de honore invaso per facta ignominiosa nec formaliter, nec virtualiter subjacet damnationi.* Meum quoque erit, pro statu Civitatis tam malè, quàm bene ordinatæ suo loco edicere sententiam.

199. Igitur cum Illustri WOLFIO mihi adhuc res est, qui, præ cæteris rigidus, in ipso etiam statu naturali obligationem fugiendi imponit, ita statuens (c): *Si quis lationem, sibi intentatam ab altero, fuga evitare potest, fugere debet. Etenim in defensione sui durioribus remediis uti non licet, quamdiu leniora prostant.* At negabunt nostri Theologi, quòd fugam cum gravi ignominia arripere lenius remedium sit, quàm frontem, & arma invadenti opponere, & tentanti dare colaphum, quod gravissimum contumeliæ genus est. Pergit WOLFIUS: *Fuga sibi consulere ignominiosum non rectè reputatur; quoniam ipsa lex natura eam urget, nec in hoc casu aliud defendendi genus concedit.* Verissimum est, fuga sibi consulere ignominiosum non rectè reputatur: sed unde probatur, quòd ipsa lex naturæ fugam urgeat pro nostro casu, & aliud defensionis genus non concedat? Ait: *Imaginem hujus juris videmus in brutis animantibus, qua non nisi fuga sibi consulere possunt.* Crediderim; quia non ducuntur honore, nec eis fuga molestum dedecus affert. Subjungit: *hominum de ignominia præconcepta opinio jus nullum facit: Novi quidè, opinionem esse tyrannum, adversus quem nihil valet ratio. Sed hic non docemus, quæ malefactorum opinioni, sed qua rationi consentanea sunt: valeant, quantum possunt.* Ad hæc

(a) I. N. G. l. 2. c. §. 5. 13. (b) Crif. Theolog. dissert. 21. c. 2. art. 4.  
 (c) J. N. p. 1. §. 1010. 1011.

hæc, quæ doctissimè illata sunt, respondere liceat primò; equidem hominum præconceptam de ignominia opinionem jus nullum facere, quo arma obvertere liceat volenti cedere. Opinio ea malefana id solum facit, ut fuga habeatur pro ignominiosa, & consequenter molestissimum contemptum fugienti asserat. Jus autem amoliendi à se molestissimum contemptum, aliunde habet homo.

Objicies fortè, sic Hæctori etiam fore licitum adorare idola, si molestum deberet contemptum ferre, dum abstineret ab hoc crimine. Sed respondeo, neutiquam id confici; contemptus ex malefano judicio redundans in non adorantem idola non facit Hæctori jus ad idololatram; quamvis enim aliunde habeat jus amoliendi à se contemptum: non tamen habet jus id faciendi per idololatram; hæc enim statuitur esse *intrinsecè* mala de se, & semper prohibita. Econtra sistere gradum, & arma opponere volenti cedere: quin, nisi desistat, etiam occidere ad avertendam gravem contumeliam, licitum esse reputatur, licentia concessa ab illo ipso Deo, qui permisit ejusmodi defensionem armatam contra raptorem opum. *Vide hæc exposita uberius n. 159.* Rectè denique ait WOLFIIUS, *se non docere, quæ malefanorum opinioni, sed quæ rectæ rationi consentaneæ sunt.* Nempe malefanorum opinioni consentaneum est, fugientem velut ignavum contemnere: & hoc ego quoque improbo quàm maximè. Rectæ autem rationi consentaneum, vel saltem non dissentaneum est, postquam is contemptus separari jam à fuga non potest, ab hoc contemptu armis se contra iniquum hominem tueri: & huic soli subscribo. Illud adhuc notare liceat, vulgarem illam opinionem, quæ fugientem ad solius baculi minas de vecordia suspectum habet, dubitatque, an immoto pede perstiturus esset coram Reipublicæ hoste inter Martis tonitrua, non adedè temerariam, & frivolam esse; quis enim facilè credat, hominem, cæteroquin non admodum Christianum, aut Philosophum, non nisi conscientiae stimulo, aut Stoicis machinis ad fugam concitari?

200. Cæterùm concordia inter nos stabit, si casui, prout à me est positus, inhæreamus; etsi enim aliàs cum, qui vicie tus in me irrueret, fugere teneret: non tamen id de ejusmodi homine intelligendum, qui à me è vestigio duellum postulat; quia, ut suprà insinuaui, provocato ad duellum, nullibi tuto licebit consistere: redibit provocatio, &

fortè priore crudior. Judex autem, qui contra violentiam ulteriorem tueatur, abesse statuitur.

201. Denique conclusio, qua obligatio fugiendi negatur, confirmari potest ex quadam animadversione PUFENDORFII, ita differentis (a): "Non cre-  
 ,, dendum est, tergum semper in vasori obvertendum aut cessim eundum; cum  
 ,, illud vulneribus pateat, & hic à lapsu periculum immineat. Et quia peri-  
 ,, culis magis patemur averfi: & qui semel in fugam se conjecit, ubi fortè  
 ,, eidem spatium non ampliùs supersit, aut velocitate pedum invasor præ-  
 ,, cellat, non faciliè iterum gradum componere potest ad excipiendum ad-  
 ,, versarii impetum. Ergo ubi in proximo non patet suffugium, quo quis  
 ,, tutò se possit recipere, moderamen inculpatæ tutelæ non transgreditur,  
 ,, qui pectus potiùs invasori opponit, quàm per fugam opportunum se icti-  
 ,, bus præbet. ,, Hæc cum plerumque comitentur invasionem, ab obli-  
 gatione fugiendi plerumque absolvunt in statu Naturali, quin & Civili.  
 Robur accipiet hoc primum membrum conclusionis etiam ex sequentibus.

202. II. Dicitur in conclusione, Hectorem ab obligatione fu-  
 gicndi jam absolutum, neque teneri excipere verbera; sed fas esse objicere  
 gladium. Ita CARDENAS (b) verbis expressis, post damnationem nonnul-  
 larum circa hanc materiam propositionum, ait: Si Titius fuste intenter  
 ignominiosam percussionem Cajo, quam sine gravi nota aliter declinare  
 non valet, potest Cajus opponere gladium. Ratio desumitur ex gravitate  
 ignominia, quæ per fustem, aut colaphum inferri censetur, de qua  
 PUFENDORFIUS (c): "Gravissima habetur contumelia alapis cædi, cujus  
 ,, causa apud multos Europæos populos hæc videtur esse, quòd servo-  
 ,, rum, aut vili adhuc disciplinae subsectorum, ista sint bellaria, unde in  
 ,, alapa maximus est contemptus. ,, Pro ipso statu Civili hanc facultatem  
 tribuunt omnes ferme Authores citati pro membro præcedente n. 195.  
 Ut addeò in statu naturali minor sit hæsitandi ratio; quia in hoc statu si  
 admittas alapam, nemo Judex ignominiam per pœnas, reo infligendas,  
 absterget, id quod tamen in Civili sperare sæpissime licet.

203. III. Quòd si, qui verbera intentabat, desistit, vel gladium  
 objicienti Hectori cedit (utl quandoque solent post inane terriculum vani  
 thra-

(a) Loc. cit. (b) Dissert. 21. c. 2. art. 4. Crif. Theol. (c) J. N. G. l. 2. c. 5. §. 12.

thraſones) occidere non licebit, aut vulnerare graviter. Recepta quippe apud juris naturalis Interpretes lex eſt: In aggreſſientem tantundem tibi licet, quantum læſioni arcendæ ſufficit. Si quidem leniora media defenſioni ſufficiant, non utendum durioribus. Demonſtrationem hujus veritatis exhibet WOLFIVS (a), cui ſubdit: “ Hinc intelligitur, quomodo accipienda ſint, quæ dicit FLORENTINUS (b): *Jure hoc evenit, ut, quod quisque ob tutelam corporis ſui fecerit, jure feciſſe exiſtinetur.* Nimirum ſupponendum eſt in caſu dato, ea ob tutelam corporis fieri debuiſſe, neque hanc alio medio leniore obtineri potuiſſe. Hæc quæ de limitibus juris ſe defendendi dicuntur, probè tenenda ſunt. Etſi enim hic jus defenſionis ſpectetur non niſi in ſtatu naturali, qui libertatis eſt, & ubi nemini ratio ejus, quod fecit defenſor, reddenda: ex hiſce tamen principiis ſuo loco definiendum, quid juſtum ſit in ſtatu Civili, ut ad hanc normam exigantur leges, quæ de eadem proſtant, poſitivæ. Nemmo eſt, qui hoc non facile capiat, & ſecum hac ratione agi velit. Praxis tamen admodum difficilis eſt, præſertim ubi affectibus perturbatur animus, ut impediatur attentio, ſine qua de mediocum uſu probabile non fit judicium. „

204. IV. Licebit tamen minore pœna protervum docere modetiã. Ratio eſt; quia aliàs modetiſſimus quiſque ſæpiſſime præ aliis violentas contumelias pateretur, ſi aliud nil ultra liceret, quàm eas ſolùm depellere, & depulſis dare veniam. Recolenda hic ſunt, quæ ſuperiùs attulimus de bello offenſivo privato n. 182. ex WOLFIO. Quibus ſtabilitis competit jam læſo pœnam de reo ſumere, vel *emendatricem*, quæ ab eo, qui læſit, repetitur, ut animum lædendi mutet: vel *exemplarem*, qua, qui te læſit afficitur, ut aliis metus incutiat, quo à lædendis te vel aliis deterreantur. Hoc autem jus, quod jus *puniendi* vocat WOLFIVS, æquè eſt in finitum in eo ſenſu, in quo jus defenſionis infinitum dixerat, (*Vid. n. 186.*) hoc eſt, tale, cui in genere non poſſint præſcribi limites: ſed demum ex circumſtantiis præſentibus præfigendi ſint. Similia docet PUFENDORFIUS (c), dicens: “ in ſtatu naturali degentes non ſolùm in præſens intentatum peri-

(a) J. N. p. 1. §. 982. 983. (b) L. 3. ff. de J. & J. (c) J. N. G. l. 2. c. 5. §. 3. 4.

„culum repellere, sed etiam, eo depulso, contra lædentem cōsusque pro-  
 „gredi possunt, quoad ab illo satis sibi cautum videant. „ Quam ergo pœ-  
 nam sumere poterit Hector noster de Leandro? ajo, prohibitum ei non  
 esse gladii lamina dorsum recedentis, caputve aliquoties metiri, sine vul-  
 nere tamen: vel si occasio detur, etiam parte aliqua bonorum spoliare.  
 Ajo, hæc non fore prohibita pro statu naturali, si nil ex odio fiat: & ad-  
 hibeatur debita moderatio: & Hector innocens antè non læserit Leandrum.

205. V. Quòd si autem Leander armis agere incipiat contra He-  
 ctorem, obiecto gladio se defendentem, ne alapam recipiat, Hectori pro-  
 hibitum non erit, duello (rixam voca, si mavis) ulterius tueri sese; nam  
 nec fugere tenebatur, nec alapam pati: ergo rectè opposuit gladium, &  
 licita hæc erat defensio. Quòd si ergo, ut bene argumentatur WOLFIVS (a),  
 „aggressor tuam licitam defensionem oppugnare præsumat, facit, quod  
 „injustum est; quamdiu enim intra defensionis licitæ limites te continet,  
 „jure tuo uteris: dum ergo jus tuum evolvere ille satagit, contra jus tuum  
 „facit: ergo de novo fit aggressor injustus, „ non solum honoris, sed  
 & vitæ. Fas autem est injusto aggressori se se opponere: quamvis tam  
 tua, quam illius vita exponatur periculo; rectè enim vitam tuam dubiæ  
 pugnæ potius committis, quam ferro aggressoris extinguendam offeras.  
 Hæc autem malitiæ suæ tribuat, si gravius quid patiat. Neque dicat Lean-  
 der, excepta seinel pugna, sibi quoque necessitatem defensionis incumbere,  
 imò jus nasci; nam si desistere petat, etiam cœpta jam pugna, in Hectore  
 non dabitur jus ultra pugnandi, quod erat merum jus defensionis, cessans  
 utique, dum Leander aggrediens cessare seriò desiderat, nec renovaturus  
 pugnam tutò credi potest.

206. Oppones I. Repugnat amoris sui & alterius, pro evitanda  
 alapa vitam suam periculo exponere: & alienæ moliri perniciem; quæ  
 enim proportio inter vitam & alapam? R. I. Dum initio gladium obje-  
 cerat Hector invadenti Leandro, nil moliri volebat in ejus vitam, sed abster-  
 rere. Postquam autem audax homo, salutari terrore insuperhabito, ulte-  
 riorem vim intentat, utique nemo ab Hectore exigit, ut positis armis vel  
 mactan-

mañdandum se offerat, vel genas & tergum ultro præbeat cadendum insulenti dextræ? II. Naturalis amor, quem sibi quisque debet, utique exigit, ne vita *temere* exponatur: at non exigit, ut tanto me probro inermem exponam pro evitando periculo, quod defensio affert. Secus protervorum invalesceret audacia, & modestum quemque circumvolitarent sonantes colaphi. Neque etiam vitæ, vel etiam salutis æternæ, de qua periclitatur iniquus Leander, in pugna fortè occubiturus, magno suo incommodo Hector obligatur consulere, siquidem ille in ejus perdendæ periculum ex propria malitia se conjecerit; secus enim probus quisque prædoni improbo pecunias, vel ipsum jugulum deberet latroni præbere, ne resistendo ruinam perduto homini accersat. III. Quamvis alapam inter ac vitam proportio mathematica non intercedit: datur tamen proportio moralis, qualis etiam datur inter vitam & fortunæ bona, quæ utique cum vitæ periculo in bellis publicis æquæ, ac privatis defendi videmus.

207. Oppones II. Non licet occidere hominem propter opinionem solum probabilem (a): atqui solum est probabile, quod quis possit se defendere defensione *occisiva* contra alapam; nam oppositum tenent MAJOR, SYLVIVS, TANNERUS, MALDERUS (b) R. ex CARDENA (c): Nullum auctorem negare, quod nos asserimus: unde sententia hæc non solum est probabilis, sed omnino certa. Quod si autem Doctoribus acatholicis nominatis n. 197. 199. displiceant catholici Theologi, hanc licentiam pro ipso etiam statu civili admittentes, argumenta hi petent, quibus erroris convincantur. Monebunt inter alia, ne GROTIUS illa Christi verba: *percutienti dexteram, sinistram quoque maxillam porrige. Auferenti pallium, da quoque tunicam*, pro præcepto obtrudat; cum consilii tantum rationem habeant. Dein in quo sensu verum sit illud: *Non licet hominem occidere ob opinionem solum probabilem*, explicabimus amplè n. 304.

208. VI. Cavendum tamen Hectori, ne vulnus lethale det Leandro, si minùs periculoso expedire se possit. Patet hæc assertio ex iisdem fundamentis, quibus niti vidimus *membrum III.*, non enim plus licebit in lædentem, quàm læsioni arcendæ sufficit. Novi, vulnus dari non posse cer-

(a) Vid. Carden. Crif. Theol. dissert. 21. c. 2. n. 10. (b) Apud Dian. p. 5. tr. 4. resol. 4. (c) Ibid. n. 50.

certo & destinato modo (quæ verba sunt CARPZOVII) (a) : *præsertim gladio, vel simili instrumento, ad homicidium perpetrandum apto* : hinc addidi *si minus periculoso expedire se possit.*

## §. III.

## De verberibus jam datis.

209. *Pramittuntur notanda.* 225. *Qui probatur esse sufficiens.*  
 210. *Ponitur conclusio quinque membrorum.* 226. *Affertur iterum alius, qui videtur efficacior.*  
 211. *Membrum I. Sententia docens licentiam post acceptam alapam è vestigio confodiendi adentem, quamvis utique falsa, tamen à nonnullis minus solide impugnatur. Quod ut offendatur,* 227. *Judicium nostrum circa hunc modum.*  
 212. *Affertur explicatio à multis authoribus non satis observata.* 228. *Membrum III. Damnat necem, fugienti si inferatur.*  
 213. *Et seq. Respondetur ad fundamenta illorum minus solida. Præcipue ad id, quod quaesita per necem existimatio sit spuria.* 215. *Et quod ea licentia in praxi conjuncta sit cum odio &c.* 220. 229. *Membrum IV. Damnat cum, qui post intervallum temporis vi, vel duello verberantem aggreditur.*  
 222. *Membro II. Negatur ea licentia,* 230. *Membrum V. examinat, an post intervallum liceat reddere alapam, vel cannam ad pedes ejus projicere, qui antè verberando laesit.*  
 223. *Ex fundamento solidiore, &* 231. *Explicatur difficultas.*  
 224. *Suggestitur mitior modus tuendi honorem,* 232. *Proponitur sententia affirmans licentiam.*  
 233. *Sed eligitur sententia negans.*  
 234. *Huic rigor, qui inesse videtur, aliquantum abstergitur :*  
 235. *Conatu non omnino inutili.*

209. Aliud jam malum se offert, cui difficilior medela est. Ferme sicut **A** facilius servatur valetudo corporis, quam perditâ recuperetur : sic honorem servare contra alapam intentatam tantæ artis non est, quam recuperare post datam. Fingamus itaque renovari hodie, quod ante annos non admodum multos est factum, & Hectorem, dum duellum subire detrectat cum Leandro, ab hoc colaphum accipere, vel aliud colapho æqui-



æquivalens probrum *juxta* n. 92. Vel fingamus, quacunque ex causa viro ingenuo, atque honorato crudam ejusmodi contumeliam inferri subito, antequam objecto gladio poterat præpedire. Quid consilii capiat probrosè cæsus? Syntagma in nostro statu naturali supra descripto n. 192. ita habet: *Ferientem è vestigio confode stricte gladio: nil proderit cunctari, & differre vindictam; nam macula ejusmodi semper elui debet sanguine, eoque non parè fuso, neglecta occasione prima postea provocandum erit ad duellum, nisi servilis, & vecordis animi notam circumferre velis.* Sed num hæc bene? Equidem si perfectionem Evangelicam attendamus, ferienti maxillam dextram etiam sinistram præbebimus, vel certè præbentem laudabimus tanquam rarâ in tetrâ avem; at si secernamus consilium à præcepto, gravi etiam vitio non poterimus vertere Hæctori, si durius ei accidat concoquere in silentio crudam nimis offensam, & satisfieri sibi pro injuria quærat. At qua id via ager? num post acceptam alapam illico licebit transfodere cædentem? an idem licebit post intervallum, vel etiam in fugientem? vel an projecta ad pedes arundine licebit ad duellum evocare?

Qua in re notandum primò, si Hæctor satisfactionem, seu reparationem honoris alia ratione acquirere possit, quam hac ferrea, & mortifera, quòd tunc non liceat vulnerare, aut occidere Leandrum: præcipuè si per Magistratum obtineri possit, ut in civitate bene ordinata, ubi regulæ saluberrimæ conditæ sunt pro abluendo probro per alapam fortè illato. *Lege sis dicta* n. 97. At ubi malo parata medela non est: ubi in statu naturali, vel in civitate malè ordinata, in qua receptum viget dictum syntagma, & Magistratus vel nullus datur, vel surdus est, aut eodem modo delirat, adeoque pro injuria satisfactio obtineri non potest, ibi enimvero nodus est intricatior, & difficile consilium. Notandum secundò, non esse hic quæstionem, an, si quis mox ab accepta alapa subito ira abreptus alterum confodiat, is peccatum grave coram DEO admittat: vel ad quam pœnam *extraordinariam* in tribunali humano debeat condemnari. Uti que primo æstui in utroque foro aliquid indulgendum. Sed quæstio jam de eo est, quod fit animo deliberato, quòdque jam hodie proponere sibi possit vir honoratus, & statuere apud animum suum pro eo articulo, quo fortè alius ei vibraret alapam, aut fuste percuteret. Qua in re conclusionem statuo sequentem, quinque continentem membra.

T

I. Quòd

210. I. Quòd liceat post datam alapam è vestigio confodere cadentem, reprobârunt nonnulli ex fundamentis non satis solidis.

II. Datur fundamentum, judicio nostro, solidius, quo negetur e licentia.

III. Multò minùs licet occidere fugientem post impactam alapam fustómve,

IV, Neque elapsa prima occasione licet post intervallum temporis cum, qui fustem vel colaphum impexit, interimere: aut aperto Marte seu duello aggredi.

V. Magis dubium videtur, an elapsa prima occasione, post intervallum temporis liceat cadenti reddere colaphum vel fustem: vel etiam occurrenti projicere cannam ante pedes juxta dicta n. 192. Explicanda veniunt singula,

211. MEMBRUM I. *Quòd liceat post datam alapam è vestigio confodere cadentem, reprobârunt nonnulli ex fundamentis non satis solidis.* Admiserunt hanc licentiam Doctores non pauci, quos inter NAVARRUS, MERCATUS, VICTORIA, ENRIQUEZ, CORDUBA &c. recensiti apud CARDENAM (a), & LESSIUM (b). Ratio potissima, qua nituntur, in eo stat, quòd honor per alapam ablatus, non minoris aestimetur, quàm res pretiosa, aurum, argentúmve. Cùm itaque talia auferentem vi oppugnare, quin occidere liceat, ut servantur opes, alia ratione non servandæ, *vid. n. 189.* eadem facultas pro servando honore negari non poterit, juxta horum quidem sententiam. Contra probationem hanc multis depugnant authores plurimi, & meritò. Sunt tamen nonnulli eorum, qui fundamentis non satis solidis innituntur. Nostra plurimum interest, hoc loco firmâ ab infirmis secernere.

212. Quod ut commodiùs, & in compendio fiat, noto, potissimum honorem Hectoris non positum esse in eo, quòd alapam non accipiat, seu in *negatione* alapæ: sed in eo, quòd alapam non patiat inultam abire. Equidem dans alapam pro sua parte non exhibet Hectori debitum honorem; nam honor est testificatio externa de alterius excellentia *juxta n. 63.* at non propterea contemnetur Hector ab aliis; eoquòd testificationi huic

---

(a) Dissert. 21. n. 64. (b) De Jure & Just. l. 2. c. 9. dubit. 12.

huic contrarium quidquam sit passus à malevolo homine. Existimatio bona, quam de eo habent comilitones; non concidit ad colaphum, improvisò impactum; quem prævertere utique non erat in potestate Hectoris. Tunc concidit ea existimatio, si servi instar cædi se sinat modo tam ignominioso, nec contrà honestæ mentis igniculis concitetur. Unde ab eo momento, quo vibratur colaphus, attoniti omnes expectant, an impunitam sit laturus injuriam! suspensi dubitant; an in virum egregium, vel nauci hominem ictus incidit. Si iners fileat, servilis animi arguitur. Si indignationem ostendat, & pulchras exsurgat in iras, firmatur nutans existimatio, ac liberatur ex periculo naufragii, in quod incidêrat per alienam proterviam. Atque hæc existimatio *honor* dicitur vulgari vocabulo. Etsi ergo ille honor, quem Leander percutiendò abstulit, recuperari nequeat, seu etsi jam fieri non possit, ut non irreverenter habuerit Hectorem (quod enim factum est, infectum fieri nequit): servari tamen existimatio bona potest in animis hominum; noménque viri strenui, id quod *servari honorem* dicimus. Et de hac existimatione, in judicio hominum residente, de hoc honore quæstio est, quâ ratione eum tueri liceat, si per alienam proterviam nutare incipiat: non de existimatione, aut externa existimationis testificatione unius triforciferi: hæc utique non est digna, ut magno impendio redimatur. Hoc ubi apud me expenderam, deprehendi, machinas, subruendo fundamento hujus laxioris sententiæ adhiberi solitas, tanti roboris non esse, ac multi existiment. Examinemus.

213. Opponitur I. ab Authoribus nonnullis rigidioribus: Occidendo furem, recuperò rem meam, quam possederam antè: econtra irruendo in eum, qui alapam dedit, non recuperò honorem *eum*, quem *is abstulit*: sed quæritur, & acquiritur *novus* apud corrupti judicii homines, habentes me pro viro strenuo. Itaque quod cæsus agit stringendo arma, vindictæ rationem habebit, non defensionis: sicut tamen defensionem moliri censetur is, qui furem interimit, urgente necessitate. Sic neque is censetur defendere sua, qui segetem inimici comburit, à quo sua fuit combusta. Ita ferme CARDENAS (a). Quin ait LUGO (b): .Data ea occi-

T 2

dendi "

dendi licentia, non erit ampliùs ratio, cur non etiam maritus adulter cum conjugē suā deprehensum licitè occidat: id quod tamen nemo hoc auctè asserere: ergo fundamentum hujus sententiæ ruit. R. Si perperam dantur cā, quæ antè notata sunt, patebit, nece illius, qui alāpam deo conservari, & firmari *eam ipsam* meam existimationem bonā, quā gerēbam antea, habitus pro viro strenuo. Itaque quod cæsus ago, defensionis rationem servat. Econtra comburendo inimici segetem, non servat & defendo segetem meam, utpote jam redactam in cineres. Adulter maritum quod spectat, non perdet ille existimationem bonā, si nō adulteri abstineat post deprehensum facinus; non enim receptum est stigma de adulterio, quod debeat cæde vindicari, sicut receptum est colapho, non nisi per pugnam eluendo. Unde non habet necesse maritus honorem suum ferro tueri post factam jam injuriam.

214. Opponitur II. ex LUGONE (a): "Defensio non habet locum, nisi contra invasorem, accipiendo saltem invadentem lato modo, quod nus comprehendit eum, qui decrevit lædere: vel eum etiam, qui postquam læsit, non restituit, nec satisfacit, cum possit; quatenus etiam aliquo modo dicitur *continuare invasionem in ordine ad continuationem damni*. Atqui talis invasor non est, qui alāpam dedit; jam enim non sinit invadere." R. Etiam qui me ignominia afficit, quamdiu non atque satisfactionem, nec læsum honorem reparat, potest dici *invasionem* honorem *continuare in ordine ad continuationem damni*, sicut fur non reddens ablatum. Existimat Lugo, disparem hinc rationem dari; quia scilicet à fure non meam, jam antè possessam repeto: non autem honorem meum prior possim repetere; utpote jam destructum per alāpam, sed alium novum. At enervatur hoc ex notatis n. 212.

215. Opponitur III. Qui furi infert vim, defendit *bonum verum* econtra qui ferit post datam alāpam, defendit *bonum spurium*, scilicet existimationem animi strehui, ortam, & fundatam in iniquo judicio contemptorum hominum, quod neque ad sanæ Philosophiæ; minùs ad Christi legis placita est exactum; ergo huic non licet, quod illi. R. Etiam qui ferit post datam alāpam, defendit *bonum verum*, existimationem f

(a) De Justit. tom. I. disp. 10. n. 194.

cet animi strenui, hæcenus licitis modis acquisitam, & conservatam, non quærit novam laudem, & famam: sed antiquam satagit tueri, cujus jacturam esset passurus per indolentiam.

216. Equidem fateor, hæc jactura oritura foret, & fundaretur in iniquo judicio hominum corruptorum: at, hoc non obstante, licitè eam amolior; qui enim *iniquè* vexationibus, utut *iniquis*, me objicit, reus est illati mihi mali, sive de jactura bonorum, sive honoris agatur. Sit illud judicium neque ad sanæ Philosophiæ, minùs ad Christianæ legis placita exactum: at neque illud judicium, quo ut ignavus contemnitur, qui nondum datam, sed *intentatam* alapam gladio non avertit, ad eas regulas exactum est: nihilominus gladio eam averti licitè docetur communiùs, ut §. *precedente* vidimus. Idem est de eo judicio, quo contemnitur, qui *fugit* injustè aggredientem corpus, & membra, dum posset interficere. Nihilominus Lugo (a) ait ad mentem aliorum. "Quando alius te invadit, ut interficiat, potes te defendere eum occidendo, si aliter effugere non potes: non potes autem aliter evadere, quia fuga tibi affert maximum ignominie, & dedecoris damnum, & licet id oriatur ex prava hominum existimatione, qui id dedecori, ac pusillanimitati tribuunt, quod potuisset pietati, & charitati tribui; sed tamen undecunque id proveniat, malum est tibi, ignavum, & timidum reputari, ac ab aliis communiter contemni." Hoc ipsissimum modo argumentum objectum refertur idem Lugo alibi (b). Sit ergo tæque quatèrque *iniquus* ille contemptus, & jactura bonæ existimationis, pressura omittentem vindicare acceptum colaphum: sufficit, quod *iniquè*, id est, non data causa, & præsciis mali, in quod me esset conjecturus per colaphum, colaphum dederit; nam, ut dixi, qui *iniquè iniquis* vexationibus me objicit, reus est de illato malo, contra quod licitè me tuebor artibus, nemini alteri noxiis, neque malis ex sua natura, seu *intrinsecè*, ut dictum n. 199. Addo, quod PIGNATELLUS (c) de SCORTIA ait, utente simili argumentatione. Hoc argumentum Scortie (d), verba sunt dicti Authoris, merè scoria est; licet enim perspicuum sit, eum vulgi sensum continere errorem crassum,

T 3

&

(a) Loc. cit. (b) De Justit. disp. 10. sect. §. n. 17. (c) Tom. 9. Consult. §§. n. 29. (d) In Select. Pontif. Constit. Theorem. 391.

& omni jure reprobatur: licet item certum sit, humanas actiones ad am-  
sim Divinarum legum, non ad vulgi depravatam judicium esse dirig-  
das; attamen lex Divina naturalis homini concedit, ut se, suaque tueri  
etiam cum periculo vitæ noxii inuasoris.

217. Opponitur IV. Id, quod dicit CARPZOVIVS (a), tunc so-  
cet ejusmodi ultionem armatam futuram fuisse licitam, " si decisio de  
„ menda foret ex dictorio illo germanico vulgari: *gladium pro ala*  
„ Verum, præterquam quod hoc planè irrationabile sit, ac nullo jure ni-  
„ tur, manifestè etiam illud repugnat moderamini inculpatæ tutelæ, q-  
„ sui defendendi causa aggressorem interficere ei solummodo permissi-  
„ est, qui periculum mortis aliter evadere nequit. „ R. CARPZOVIVS  
loqui de statu Civitatis bene ordinatæ; in quo utique talis armata ultio  
rationabilis est, nec ullo jure nititur; cùm satisfactio obtineri à Magistrato  
possit. Dein rectè ait CARPZOVIVS, *sui defendendi causa* aggressorem  
interficere tunc solummodo licere, quando periculum mortis aliter evi-  
nequit. At in nostro casu Hector interficeret non *sui*, seu sui corporis  
sed *fama sua* causa, ferme sicut, qui furem interficit, id non *sui*, sed  
*rei* causa id agit: sicut ergo furem occidere licet ob rem aliter non sa-  
vandam, sic idem dici videtur de honore periclitante ob colaphum.

218. Opponitur V. Quamvis in statu naturali privatis etiam  
ceat lædentem pœna quadam mulctare, ut dictum n. 179 pœna tamen mor-  
tis, aut gravis vulneris longè excederet delictum, data alapa commissum  
Edic enim, si tu in aliæna causa judex esses, num Cajum, qui Titio alapa  
influxit, capitis auderes damnare? cur ergo jam in causa propria id Hector  
liceat? R. Necem, si quidem ea danti alapam inferretur, non habitura  
fore rationem pœnæ: *sed dicendam fore defensionem existimationis hæc*  
*possessa*: ferme sicut mors furi illata pœna non rectè dicitur.

219. Opponitur VI. Ex data ejusmodi licentia oriuntur excessus  
rixæ & cædes. Ita VIVA (b): ergo neganda est ob bonum commune. R. In-  
ter viros honoratos adeò frequentes non esse colaphos; cùm ubique ge-  
tium hoc injuriæ genus abominationi sit, & ipse cædens doleat, ac pudor  
suffundatur, si eousque præcipiti iracundia abripi se passus sit. Dein retor-  
queo

(a) Pract. nov. p. 1. q. 30. n. 35. (b) Truvin. in propof. 18. Alexand. VII. n. 9.

quoque argumentum in alapam intentatam, quam gladio licitè averti : item in furem, quem, si opus sit, licitè interfici diximus.

220. Opponitur VII. Ejusmodi licentia *in praxi*, & actu, dum exercetur, conjuncta est cum odio, vindicta, & similibus malis affectibus : ergo *speculativè* solum probabilis est sententia, hanc licentiam docens, non *practicè*. Ita iterum *Viva loc. cit.* R. Intentio judicis omnes. Si quis animo ita comparatus sit, ut non nisi existimationem suam fartam, tectamque servare cupiat, tam parum peccabit ac ille, qui furem invadit, ut opes ferveret. Potest hic jam hodie in omnem eventum animo ita esse comparatus, ut non nisi suas opes : ergo & ille, ut non nisi suum honorem tueri ferro velit, occurrente necessitate. Item intentatæ solum alapæ se armatus quis opponere potest, quin ob odium aut vindictam peccet : ergo etiam alapæ jam inflictæ. Illud præterea considerandum, quod non omnis statim indignatio, aut zelus vindicantis justitiæ malus sit ; ex æquo enim indignamur protervo homini, & castigando efficiamus, ut pœniteat cum facti, nec facile is vel alius adeò rusticè in nos, aliòve irruat.

221. Opponitur VIII. Damnata est hæc doctrina ab INNOCENTIO XI. minimùm ut *scandalosa*, ita enim habet propositio inter reprobata trigesima : *Eus est viro honorato invasorem occidere, qui nititur calumniam inferre, si aliter hac ignominia vitari nequit : Idem quoque dicendum, si quis impingat alapam, vel fuste percutiat, & post impactam alapam, vel ictum fustis fugiat.* Ergo nequaquam jam est improbabilis sententia, de qua agimus in præsentī ; im si esset probabilis, haberet pro se fundamentum, ut argumentatur CARDENAS (a), ob quod prudenter posset præstari assensus : si haberet tale fundamentum, *scandalosa* esse non posset. Ergo dum scandalosa est, improbabilis est. R. Pontificem loqui de statu civitatis, in quo Magistratus procurata congrua satisfactione labem, honori inustam, reparare valer ; vel certè loquitur de casu, quo quis occideret *jam fugientem*. Id quod ex ipsi verbis propositionis damnatè patet.

Ex iis, quæ hæcenus ad objecta respondimus, colligitur, ni fallor, non temere me dixisse, sententiam hanc laxiorem reprobari à nonnullis ex fundamentis non omnino solidis. Itaque pergamus ad

222. MEMBRUM II. *Datur fundamentum iudicio nostro solidum quo negatur licentia post datam alapam à vestigio confodiendi cadentem.* Acciter vapulat doctrina licentiam illam asserens apud Authores tam acatholico CARPZOVIVM scilicet, PUFENDORFIVM, GROTIUM, MAURITIUM : quàm apud Catholicos. Certè VASQUEZ dicere non dubitat (a), "eam opinionem NATANIELIS VARRI, & MERCATI gentilitatem sapere : eam etiam à sceleratissimis reprobari, qui quamvis passione veluti coacti id faciant, bene tamen vident, & fatentur, se peccare graviter." Adstipulantur complures apud CARPZOVIVM DENAM, quorum tamen nonnulli intelligi possunt de nece, quæ non nisi puræ vindictæ causa exerceretur, quin necessaria foret ad conservandam existimationem. Quanti autem valeant eorum argumenta, ex præcedentibus cuique iudicandum relinquo.

223. Ego fundamentum laxioris illius doctrinæ assumo, & ex eo ipso ostendo, malè gladium reponi colapho, sic argumentando : non licet furem occidere, si mitiore via potissimam saltem ablata pecuniæ partem valeam servare, vel recuperare, ita ut damnum non nisi exiguum maneat. Ergo neque licet occidere cadentem, si potissimam periclitantis existimationis partem mitiore via servare, vel recuperare valeo. Atqui hoc valeo : ergo &c. Audiamus qua ratione fieri id queat.

224. Vel, qui alapam dedit unam, longiorem parat grandinem : vel continebit se post datam primam ? hoc tuum non est scire : ergo accepta prima alapa, exserere gladium licebit ad repellendas alapas fortè secururas. Ferrum ergo objice prima vice cadenti, & provoca crudum Cyclopem, ut repetitum det ictum, si ausit. Nihil in hoc mali. Uteris jure tuo pro avertendo secundo colapho, quod arcendo primo competere cuique diximus n. 206. Cur enim non liceat contra fortè secuturos agere, quod contra primum licebat ? equidem honor jam ablatus est primo : at longè magis auferetur secundo & tertio, si culei instar excipias baculum, aut veluti mancipium heri verbera. Si stringat & ipse gladium suum, te, qui præter defensionem tuam nihil cupis, aggressurus, *aggressorem injustum* habes, contra quem pugnare nefas non est. Si tergum ille tibi vertat, ac distendat,

ita

(a) In Opusc. de reſtit. c. 2. §. 1. dub. 9.



*Art. III. De Honore tuendo contra injurias reales. §. III. 153*

ita ut discessus fugæ speciem præseferat, habes, cur tibi gratuleris, ut n. 228. ostendam. Si non discedat: sed, viso tuo ensè nudo, suum quoque stringat, non te aggrediendi, sed semet tantummodo protegendi causa, si fortè irrueres; tunc dic nihilominus audacter, ut alteram tibi det alampam, si ausit. Quòd si regerat, se ultra nil tibi velle, satis sibi esse litatum, reponere, strenum non esse facinus inermem, & nil opinantem cedere, hoc scire crudum quemvis de rure Menalcam: etiam tuo satis esse litatum honori, quòd porterritum pecus redire timeat.

225. Ajo, hac ratione, quæ utique longè mitior est, quàm occisio, salva tibi manebit potissima saltem existimationis tuæ portio. Sit enim, judicetur vulgò ignavus, vecors, ignobilis, servilisque animi homo ille, qui colaphos fert patientia mancipii aut asini (rarissimus quippe est, qui ex virtute id faciat) si tamen tu objecto impigre ferro ulteriorem injuriam arceas: imò si invites, ut ausit repetitam inferre in sui jam custodiam intento; eo quòd nil opinantem & inermem obruere quivis de rure caudex nòrit: siquæ is arena discedat nil ultra audens, quid, quæso, est, quod ultra exigant rigidi honoris censores? intrepidi utique animi dedisti documentum. Volent, inquis, ut acceptam injuriam etiam sanguine vindicem, eoque non parèd fuso. Sed cur id? indolenter te non ferre contumelias (si tamen ex hoc placet nobilem animum metiri) nec abhorrrere à gladio utique vident: cur ergo ultra desiderant, ut vindices, & punias? Et quis inde tibi honor nasci poterit? vel resistet tibi alter, vel non? non resistantem vulnerare, vel occidere, quæ gloria? cum resistente pugnam ancipitem pugnare, & post acceptam alampam etiam mortis periculum subire, quæ insania? Sic deterior tua fit conditio, quàm protervi illius hominis sit; quia ultra commune utrique periculum etiam alampam habes. Nihilominus, ais, ita sancitum est; vel in arena confodiendus est, qui colaphum dedit: vel post ad duellum evocandus: præstat autem mox confodere, quàm periculoso postea duello se committere. Itane? ita sancitum est? ride tu hanc sanctionem. Procul te abesse à servili animo, aut pecudum patientia nemo non ex eo, quod fecisti, agnoscet. Itaque maxima existimationis tuæ pars in salvo est. Plura exigentem, dixi, ride: & siquidem ultra sanguinem sitiatur, dic, ut te aggredi ansit, secturum te ei veniam.

At instas, si morem non geram sanctioni illi, si alapam cruce sine vindicatione abire sinam, excludar æqualium societate cum contempnam etiam fortunæ, atque officiorum jacturam passurus. Exspecta sis, suo ludo docebo, quid agere liceat, ubi ejusmodi damnum imminet, impræcutionum non nisi de conservanda existimatione est sermo, seu de *evitanda timiditatis nota*. Ob hanc solam, cum duellum suscipere, nefas sit propositionem damnatam ab Alexandro VII., etiam cædes licita non est præsertim ubi potissima bonæ existimationis portio mihiore, ut ostendimur ratione salvari valet.

Non hæc eò à me dicta sunt, ut contra Christianam mansuetudinem, quæ in injuriarum tolerantia grande premium ponit, consilium figerem. Perfectiora sectetur inclyta hæc virtus pro more suo; non reviam volcbam ostendere, qua eluctari quis posset post acceptam alapam quin vel honoris *magnum* dispendium pateretur, vel conscientiam *graviter* culpa inquinaret; neque enim video, quid ultra desiderare valeat superstitiosum in tuendo honore studium: aut quid damnare possit sacer Theologiae rigor.

226. Quæres, an non supersit modus alius generosior, & ad sanctiones, de honore receptas accommodatior, quo simul plenè satisfiat jacticio corrupto hujus ævi: simul nihil contra conscientiam admittatur. Superesse juxta opinionem nonnemini, existimantis, illico ab accepta alapa fas tibi esse stringere gladium, eumque in alterius caput aliquoties generosè impingere: non quidem ea ex parte, quæ aciem habet: sed quæ plana est lamina. Si armis te petat, *aggressorem* injustum habes, ut super dictum, quem ex æquo oppugnabis. Si inultus ferat impactam sibi laminam, repetè dosin: & si velis, etiam baculum adde, & colaphos. Sic honorem tuum recuperas, relapsuro in illum probro; neque enim ita necessaria est sanguinis effusio, ut ei non æquivalet patientia asinina alterius in tolerandis tuis verberibus. Quod si post datam tibi alapam, aut post primam à te receptam, fuga se subducatur, & postea declarent commilitones, fuga adversarii non restitutum tibi satis fuisse honorem, sed opus esse acriori lixivio ad eluendam tantam maculam, occasionem aucupare, qua obvium habeas: tum eodem modo nudato ense para grandinem ejus capiti. Si iterum fugiat, cachinno persequere, vel etiam lapide aut gleba obvia, si id te non dedeeat.

227. Circa hunc modum tuendi honorem, quem meum non facio, judico imprimis, eum esse inutilem; quamprimum enim ille, qui colaphum impegit, fustémve, strictis armis peti se adverterit, confodiendi potius, quam verberandi causa fieri id arbitrabitur. Itaque, nisi monstrum inertia sit, arma armis opponet: dúmque tu brachium ad cædendum tolles, nudum tibi pectus fodiét. Neque facild continget, ut fugiat; námque & ipse fugam sibi probro ducit. Quod postremò dicitur, ut scilicet, captata post temporis intervallum occasione, eum inopinatò obruas, cædásque, hoc iterum difficultatem habet; nam solet quisque, datæ alapæ sibi conscius, circumspèctò incedere, ne talionem fortè recipiat. Et quid proderit dare verbera? pugnare gladio oportet juxta pseudo-legem. Si volet juxta hanc legem agere alter, tu debebis. Si malit à te verbera ferre, quàm pugnare, absolveris equidem tu: at ubi terrarum patientem ejusmodi incudem invenies? hæc de modica utilitate hujus vindicationis. De licentia si quærat, defumenda erit ex iis, quæ *membro V. hujus Conclusionis* sumus dicturi. Ibidem ostendemus, quo remedio coerceri queat protervorum audacia, ne viris quibusque honestis impunè ejusmodi contumeliàm faciant, quamvis hi, post objectum contra ultiores ictus gladium, se se continere obligentur.

228. MEMBRUM III. *Multo minùs licet occidere fugientem post impetam alapam, fustémve.* Ratio est; quia mitiore modo vales potissimam honoris tui portionem recuperare, ferme ut *membro præcedente* dictum. Si enim ad primam alapam mox ferrum arripias, quamvis solius arcendæ secundæ causa id agas, strenuus censeberis, & fugienti timorem incussisse. Quin fugiens, ut bene advertit MENDO, & LA CROIX (a), hoc ipso, quòd fugiat, satis se ipsum arguit, honorémque restituit, quantum restitui potest; non enim fugeret, nisi cum viro strenuo rem sibi esse agnosceret, id quod fugiendo declarat. Fugienti etiam minitarc strictam ensen: non facild redibit timidum pecus; & si rediret, vim tibi quamcunque fas esset armata manu retundere. Ergò facild exultationis tuæ portionem præcipuam servabis (in quo ea consistat dictum n. 212.) imò

U 2

faci-

(a) L. 3. p. 1. n. 804.

facilius, quàm si firmo pede peristeret: ergo multo minùs licebit occidere fugientem. Accedit, quòd nec ipsi superstitioni honoris vindices exigat ut fugientem persequaris; non enim hoc decere videtur virum grave. Id exigunt, ut postea dimicando te purges, de quo paulò pòst. Unde patet, quare fugientem furem telo liceat persequi: non verò fugientem qui dedit alapam; in illa quippe sententia statuitur, rem tuam aliter recuperare non posse; id, quod de honore in casu nostro dici non potest.

Unde ingenti zelo GROTIUS, & PUFENDORFIUS (a) contra laxam doctrinam detonant, ejusmodi licentiam asserentem. Nullo modo, hic, ferendum, quod nonnulli asserunt, non solum rectè cædem admitti posse ad vitandam alapam: sed etiam accepta alapa, si, qui eam impigerit, fugiat, eum posse occidi ad recuperandum honorem. Quare mirum non est, si provida Sedis Romanæ cura tanquam scandalosam eam rejiceret. *Vid. n. 220.*

229. MEMBRUM IV. *Neque elapsa prima occasione, licet post intervallum temporis eum, qui sustem, aut colaphum impigerit, perimere; aut aperso Marte, seu duello aggredi.* Sine, ut enarrem casum, qui multam cogitandi, & loquendi materiam dedit. Achilles, post acceptam à Themistocle alapam, totus extra se positus, bis, terve obambulabat cubile, repensans secum, quid consilii caperet. Mox abrupta deliberatione, Themistoclem subito obrutum gladio transfodit. Dubitatum fuit, an Achilles ex jure, & consuetudine egisset: vel an ex insidiis ferisse dicendus esset. Pòst convaluit ex vulnere Themistocles, usus thermis in regione extera; ex qua post annum redux par pari reddere Achilli statuit. Itaque operitur die quadam exeuntem ex templo, & sacris refectum. Mox exerto sclopo, ait: cum tu per insidias me petieris, malè ne veritas; si reddam paria; quibus dictis, globo ferali trajecit. Id jam non quæram, an Themistocles, subito Achillem interimens, jure egerit. Patet, iniquissimo hoc facto malè eum suo honori, & conscientie consuluisse: unde etiam exesse provincia jussus est. Neque quæritur, an Achilles, qui tunc primum dedit vulnus, postquam ambulando bis terve emensus erat cubiculum, dicendus

(a) Jur. N. & G. l. 2. c. 5. §. 12.

dus adhuc sit, egisse è vestigio, seu in continenti. *Id. n. 17.* Id quæritur, an, si quis in primo momento, quo fortè cæsus est, sui non satis compos, vel quomodocunque impeditus, impunè abire sinat cædentem, an primùm post notabile intervallum temporis, e. g. aliquot horarum, aut etiam dierum, transfodere eundem licitè possit: vel ad duellum evocare. R. Primum omnium minimè licere; quia si hoc ullam haberet speciem honesti, ac liciti, inde foret, quòd honor hoc modo recuperaretur: atqui non recuperatur, juxta ipsas etiam pseudo-leges duelli, utpotè quæ, licèt id approbent è vestigio, dum verberans sibi potest esse intectus, & debet: detestantur tamen vim, nihil opinanti factam post intervallum, more Sicariorum: ergo nulla species honesti, aut liciti ejusmodi facinori allini potest. Neque alterum licebit, scilicet aperto Marte aggredi, seu ad duellum evocare, si hoc omitrenti aliud damnum non nasceretur, quàm qualiscunque jactura existimationis, aut nota timiditatis, ut parebit *ex Articulo sequente.* Quid ergo licebit, quæris? R. Licebit hominem, dum obvium habebis proximè, per famulum invitare, ut, si ausit, redeat, & ictum similem det; strenuum non esse facinus inermem, & nil opinantem cedere, capulo simul admovebis manum, defensionì paratam. *Lege v. 224. 225.*

230. MEMBRUM V. *Magis dubium esse videtur, an elapsa prima occasione, post intervallum temporis liceat cadenti reddere fustem, aut colaphum: vel etiam occurrenti arundinem projicere ante pedes.* Accipe casum. Dederat Leander Hæctori crudum aded colaphum, ut copiosus mox sanguis naribus proruperit. Unde hic turbatus gladium oblitus est stringere, imò ebulliente cruore impeditus; aded ut è vestigio agere omiserit, quod pro eo rerum articulo leges de duello præscribebant. Quare, ut refarciret, quod omissum erat, post dies aliquot, de industria Leandro occurrens in platea, cannam suam, seu arundinem, quam ambulans manu ferebat, versus eundem projecit, id quod dictæ leges probant. Quo hic admonitus, stricto mox gladio non dubitavit satisfacere. Hæctor communi sententia judicabatur egisse juxta sanctiones honoris, indèque purgato ad aulam iterum, circulosque nobilium patebat accessus. Sed num sine noxa conscientie cannam projecit? idem quæri posset, si subitò Leandrum verberibus salutasset. Quamvis hoc non aded frequens sit, & factu facile; nam alampam qui dedit, cautè incedere incipit, & circumspicte, ne fors ab offen-

so reddatur par pari. Unde usitatum magis est arundinem projicere videnti obviam, quàm colapho aut baculo medelam malo quærere.

231. Quod projectionem arundinis attinet, decisio quæstionis dependet ex eo, an ea actio in communi hominum existimatione habeatur pro provocatione, eisque æquivalet. Si æquivalet, prohibita talis projectio erit, quandocunque ipsum duellum erit prohibitum. An autem æquivalet, non ita in expedito est. Hoc certum, quòd, si Leander omisisse stringere gladium ad projectam cannam, & omittenti Hector addidisse largiora verbera, quin iis ille ad arma capienda fuisset permotus, reputandus, futurus fuisset Hector recuperassè honorem; Leandro tunc ad fungos relegato. Sicut pari modo certum est, quòd si Leander, locò projectæ arundinis, colaphum, & post colaphum plures ejusmodi ictus sustinuisset, quin ad pugnam concitari se permisisset, absolvendus futurus fuisset Hector. At id quæritur, an reddere colaphum liceat post intervallum: item an projectio cannæ æquivalet provocationi? illud quod spectat,

232. Videtur sine graviore noxa reddi posse colaphum; non ea quidem mente, ut cruenta inde pugna sequatur: sed ut patienter fortè ferenti colaphum largior addatur hujusmodi offa, sicquæ existimatio naufragæ salvetur. Habet nempe colaphus rationem *retorsionis*. In injuriis *verbalibus* retorsiones *verbales* licitas esse, expediti juris est (a). Difficultas quidem major est, in retorsionibus *realibus* ob periculum odii, vindictæ, excessûs, rixarum, & cædium. Huic tamen periculo posse occurrì à viro moderato, agente cum deliberatione ac mora, & animò ad solam æquitatem respiciente, dictum est n. 219. Prævidet quidem Hector, Leandrum colapho vel concitandum fore ad pugnam, vel patientia sua grande subiturum honoris dispendium. At concitabitur ex propria culpa, à nemine coactus; neque enim colaphus est adeò arctè connexus cum pugna, ut separatus manere nequeat, modò velit Leander. Dispendium honoris, quod patiando incurreret, sibi met tribuat; prior enim ipse, & iniquè læsit Hector, quin pro læsione interea satisfecerit, ut debebat. Quæ cum ita sint, quid gravis noxæ timendum sit Hectori? denique meminisse oportet, nos in

(a) Ex L. Quæ omnia. 25. ff. de Procur.

in statu naturali jam versari, ubi Magistratus non est, qui honorem mutatum restauret.

Idem de projectione arundinis videtur dicendum, si quidem provocationi ad duellum non æquivalcat. Atqui videtur non æquivalere; nam Hector ea actione non censetur provocare ad duellum: sed amovere à se, & reddere alapam. Non vult *determinatè* pugnam: sed exigit, ut hanc purgationem suam æqui bonisque consulat, ac patienter ferat Leander. Neque indeterminatè seu disjunctivè exigit vel patientiam vel pugnam: sed determinatè patientiam optat; quia pugna ei incommoda esset, & periculosa: ergo projectio arundinis non æquivalet provocationi: ergo licita erit sicut verberatio: quin magis, utpote minus cruda.

233. Ita quidem dici posset. At contra est; quamvis in intentione sua Hector hoc signum externum ad amovendum alapæ probrum unioè detorqueat: in communi tamen existimatione videtur idem, ac si diceret: *agedum, stringe ferrum, si ausis; secus sensurus lignum, ac inter fungos abjiciendus*, quod utique est ad duellum adigere comminatione, & idem ac provocare, certè adversarius id tanquam datum pugnae signum habet. Eadem cum de reddito colapho communiter foveatur existimatio: & insuper vix unquam vibretur colaphus aut canna, quin cruenta pugna sequatur, adeoque inter utrumque satis arctus nexus ex more intercedat, censetur tam colaphus, quam projectio cannæ refragari conscientia, & utrumque esse prohibitum, *quandocunque* provocare ad pugnam, vel duellum prohibitum est.

234. Oppones. Rigida admodum & difficilis est doctrina, superioribus conclusionis membris II. III. IV. V. tradita; sic enim verberato licebit nihil, præterquam objicere gladium, ne repetita veniat alapa, juxta n. 205. at quid hoc inane fulgur, vanumque tonitru curat protervus homo? abit cum risu, proximè rediturus, eadem protervia vel id ipsum, vel alia salutaturus capita ac maxillas: sic probus quisque continuò habebit, quod sibi metuat; & ferrea casside caput involvere oportebit contra advolantes subito colaphos. Crescet improborum audacia, & societati humanæ magnæ molestiæ nascuntur. Acriori ergo consutatione compefci malum debebit; licebitque compefcere in statu naturali, ubi in superiore quadam potestate, nihil præsidii repositum est. R. Causam proborum necdum

peni-

penitus esse derelictam : nec omnino impunè grassari licere sceleri. Spicam lego ex agro SCHWARZII. *Statum naturalem*, ait is quodam loco (a), *consideratum per familias, plena libertate gaudentes, naturali jure aequales, ab invicem non dependentes, non carere tamen omni potestate quasi publica, per quam bonor proborum licitè defendi, ac vindicari possit. Exemplo esse posse* (modum si demas) *Dina injuriam à fratribus vindicatam.* Itaque si quis adoptare velit illud principium WOLFII suprà adductum n. 182. *Si quis te laesi, competis tibi jus eum adigendi, ne in posterum denuo laedas, & praevenendi, ne alii, ejus exemplum secuti, vel ipse etiam alios ledere audeat, id quod fit, malum ei quoddam inferendo per modum pœna*, si quis, inquam, hoc jure uti velit; implorata suæ familiæ opera, vel externis etiam quibuscunque in auxilium adfueris cogar verberonem ad petendam veniam : quin etiam parte bonorum mulctet, aut fustigatione castiget, si mitiora non credantur sufficere. Monitum tamen MOLINÆ huc apponendum est, qui de Brasiliæ populis, per familias dispersis, nulli subiectis caver, ut nemo ex familia privatus ex proprio, sed ex familiæ judicio, talia machinetur; eo quòd in propria causa nemo bonus iudex. Quòd si autem læsus dictis suppetiis, ac viribus destitutum se videat, ut adversam partem æquè validis aut majoribus auxiliis munitam, oportebit, ut vel invitatus abstinere privato hoc bello, prout etiam Gentes abstinere, si prævideant, se non prævalituras in bello publico contra hostem.

235. Repones. Parum, vel omnino nihil utilitatis afferri læsis per datum consilium; nam primò debilioribus non servit. Secundò juxta sanctiones nostri status naturalis, descripti *supra* n. 192. ejusmodi vindictio (sive castigationem malis appellare) nil valet ad reparandum honorem, ubi vel occidere è vestigio est necesse, vel postea projectionem baculi, aut verberationem adhibere. Tertio valeat utcumque datum consilium, numquid bella privata undique oritura societatis humanæ tranquillitatem turbabunt? R. Ad primum, utique me jam dixisse, ubi vires deficiunt, cedendum esse fati, prout etiam Gentes faciunt, de gerendo bello deliberantes. Anne in hoc orbe quodlibet crimen suam pœnam recipiet? an nihil æterni-

tati

(a) J. N. G. p. 1. tit. 4. q. 9.



tati reservari credamus? ad secundum ajo, dolendum esse, quòd illæ sanctiones respiciant hanc vindicationem, rectæ rationi magis consentaneam. Satis mihi est, quòd non ex doctrina Theologica, membris superioribus tradita, sequatur plena illa impunitas proterviæ: sed illa stante locus adhuc relinquatur salutari castigationi. Fors datum consilium usui aptius esse poterit ad calumniatorem compescendum *articulo sequente*. Ad tertium dico, bella illa privata futuros fore fructus, proprios statui naturali, propterea utique prudenter mutando in statum civitatis bene ordinatæ.

## ARTICULUS IV.

*An in statu naturali duello honorem tueri liceat contra Calumnias?*

Postquam discussimus, quid juris sit, dum quis injuriis *realibus*, verberibus præcipuè vel læsus, vel primùm lædendus est, ad aliud genus injuriarum descendimus, quod potissimum verbis absolvitur, & sub *Calumnia* nomine venit. Calumnia, ut n. 64. dictum est, sermo est, quò cuiquam imputantur imperfectiones, quibus minimè laborat, ut dum quis vel adulterii, vel fraudis admixtæ, alteriusve facti turpis reum quemquam affirmat. Si soli id in faciem exprobrat, *non divulgatam*, seu occultam dicimus calumniam: *divulgatam* autem, si coram aliis proclamet. Fac, viro honorato simile quid in faciem exprobrari à maledico, vel spargi in publicum: fac etiam judicem abesse, prout in nostro statu naturali abest, qui læso succurrat: quæritur, an liceat honori consulere inferendo necem, vel provocando ad duellum. Loquat mox tam de calumnia occulta, quàm divulgata; si enim huic nefas est occurrere nece, vel duello; multo minùs occultæ ita occurrere fas erit. I. Reprobabimus cruentam defensionem. II. Sugeremus mitiorem. III. Solve-

mus argumenta contraria.

## §. I.

## Reprobatur cruenta defensio.

236. *Affertur mens Sedis Pontificia.* *fensionem cruentam.*  
 237. *Nostri argumentatio contra de.* 238. *Speciatim contra duellum.*

236. **N**Otandum, quodd circa materiam præsentem Sedes Pontificia iusto laxiores quorundam Authorum sententias damnaverit. INNOCENTIUS XI. inter alias proscripsit sequentem, numero trigessimam: *Fas est viro honorato occidere invasorem, qui nititur calumniam inferre, si aliter hac ignominia vitari nequit.* ALEXANDER VII. reprobavit numero decimam septimam, docentem: *esse licitum Religioso, vel Clerico calumniatorem, gravia crimina de se, vel sua Religione spargere minantem, occidere, quando alius modus non suppetit, uti suppetere non videtur, si calumniator sit paratus vel ipsi Religioso, vel ejus Religioni publice, & coram gravissimis viris predicta impingere, nisi occidatur.* Ex his propositionibus intelligitur nova calumniarum divisio; alia enim jam est illata, alia primùm inferenda, juxta voces illas: *nititur inferre: spargere minantem: si calumniator paratus sit.* Omnia hæc calumniarum genera communibus argumentis ostendam, malè gladio retundi, idque in ipso etiam statu nostro naturali. Quinam Juris-Consulti doctrinam laxiorem docuerint, leges apud CARPZOVIVM (a).

237. Sic autem arguo. Ut pro honore meo tuendo vitam alterius invadere liceat, primò certus sim oportet, de damno aliàs secuturo; nam periculum *incertum* famæ prævalere utique non debet juri certo, quod alter habet ad vitam suam. Secundò certus sim oportet, quodd hac ratione damnum sit avertendum; prodigeretur enim humanus sanguis, si in remedium adhiberetur eventui dubio. Et quidem tertio certus sim oportet, quodd nulla alia ratione id damnum averti valeat; quando enim mitiora suppetunt remedia, ad extrema descendere sana ratio vetat. Quartò necesse est, ut ejusmodi licentia non cedat in perniciem societatis humanæ;

(a) Pract. Crim. q. 30. n. 63.

manæ; prohibuit quippe natura privatum commodum quærere cum perniciæ publica.

Jam autem I. unde certum est, ut observat ILSUNG (a) cum aliis, quod calumniator, qui nititur calumniam inferre, sit illaturus damnum? fortè mutabit mentem, & resorbebit concepta jam verba. Sæpe dum ebullit ira, minas spargimus, evanescentes paulò post cum æstu commoti animi. Dein effutiat licet contra nos calumniator, quidquid dicat mala mens, an *certum* est, quod audientes saltem prudentiores, fidem ei sint habituri? certè, quo quisque est prudentior, eo in habenda fide est cautior, in hodierna præcipuè calumniandi libidine, passim grassante, integerrimæ etiam virtuti parcere nescia. Ergo certus non sum de damno secuturo ex omiſſa cæde, aut duello.

II. Neque certus sum, damnum per gladium averſum iri. *Interfectio non est modus aptus ad tuendam existimationem*, pridem GROTIUS scripsit (b), & à nobis per integrum omnino *Articulum Capituli II. An. 113.* fusè demonstratum est, quàm inepta sit hæc vindicandi honoris ratio, quàm malè quadrans, quàm nihil conducens ad rem. Probrum-*ca non tollitur*, dixi: sed *augetur*; docet quippe experientia, patrata cæde, aut commisso duello curiosos homines in causam dissidii inquirere. Sic calumniam intelligunt: nec tamen illico calumniam fuisse credent. *Criminare audacter, semper aliquid hæret*, ajebat ille. Et cur non credant, eum esse furem, vel adulterum, qui homicida est? pronum erit judicare, hunc malè sibi consciùm ferro tentasse fauces obstruere spargenti mala: vel, cum revelato probro supervivere nolle, semet neci exposuisse in duello. Quis ergo per gladium aprè, & certò averteretur damnum, quod honori timeatur ex calumnia?

III. Etiam quaecunque hoc damnum, quod interdum privatus esset passurus ex calumnia, cedere deberet damno publico, quod societati humanæ certo certius accederet ex cædis, vel duelli licentia; cum enim ita comparati sint mortales, ut in deteriore partem faciliè accipiant, quæ vel joco incautior lingua profert: timeantque, ne minimo lapillo subruatur totus famæ

X 2

colof.

(a) Traët. 4. disp. 3. q. 2. n. 69. (b) De J. P. B. l. 2. c. 1. §. 10. n. 3.

colossus: cūmq; superbia excacati, quisque diffimulatis suis vitiis, laudes, & thura sibi deberi existimet, boni Superi! quā cito, & passim præceps philautia in arma rueret, quas cædes, & confictus non machinaretur, ex æquo se agere arbitratura; *mira quippe conciliatrix, & lena sui est natura* (a). Cui tum viro bono securo esse liceret, si quodvis inconsideratius verbum, in calumniam acceptum, expiandum esset vitæ periculo! Dabo, graves fuisse, quæ sparsæ sint, calumniæ: at cū tanta sit hinc inter homines ad maledicendum proclivitas: inde tam præceps in vindictam ardor, an non promiscuis brevī pugnīs, & cædibus miscerentur omnia, nisi lex illa frænum injiceret, quam in cordibus hominum naturæ Conditor scripsit?

IV. Neque id certum, quodd nulla alia ratione id damnum averti valeat. Non deest modus mitior, isque multiplex, calumniam eludendi, quo minùs noceat, etiam in statu nostro naturali, ubi nulla iudicis copia, futurus usui, & exponendus *sequente* §.

238. Interim ajo, etsi ex jure belli privati, quo status naturalis gaudet (*vid. n. 180.*) calumniam liceret *cæde* prosequi: necdum tamen etiam *duello* id agere æquum esset. Cū enim bellum, præcipuè *offensivum*, suscipere non liceat, nisi cum spe, eaque non inani, prævalendi; ne scilicet Respublica ruinæ exponatur, ut docent passim Authores post CAJETANUM (b): ita etiam ad duellum ejusmodi fiducia afferri deberet, ne vindex suam sibi perniciem stolidè accersat. Jam verò in *singulari certamine*, verba sunt PEREGRINI, per experientiam confirmata, *par est utriusque conditio, & eventus dubius*. Unde etiam sequitur, quodd, etsi aliquod bellum *panale* admittatur (c): singulare tamen ejusmodi certamen æquè utrique parti periculosum, pro pœna assumi nequeat; quia provocans non minùs semetipsum, quàm adversarium puniret.

Bellum autem *recuperativum rei* ablatæ, seu honoris, dici non potest; eo quodd manifestè *citato Articulo* demonstratum sit, duello probrum non elui, sed augeri. Ergo contra calumnias honorem tueri non licet cæde, minùs duello.

## §. II.

(a) Cicero de nat. Deor. lib. 1. (b) In 2. 2. D. Th. q. 95. art. 8. *Molin.* tract. 2. disp. 102. *Pelzhofer* Arcan. Stat. l. 9. c. 4. (c) *Vid. Molin.* l. cit.

§. II.

Suggestitur defensio mitior contra calumniam.

239. *Consilio Wolfii*

240. *Aliud superadditur consilium.*

239. **I**llustrem Juris Naturalis Interpretem, L. B. DE WOLF audire juvat. Contra calumnias, ait (a), fama, & existimatio aliter defendi nequit, nisi efficiendo, ne calumniatori fides habeatur ab aliis. Demonstrat ex eo, quod infamia, quam parit calumnia, judicium hominum sit de tuis imperfectionibus, & vitiis: impediendo itaque hoc judicium, impeditur infamia, quæ timenda est ex calumnia, & defenditur fama. Ex quæ veritate per modum Corollarii inferit, quod interfectio alterius, vel læsio corporis ipsius quæcunque, non sit medium aptum ad tuendam famam, argue existimationem.

Defensio potest esse duplex juxta hunc Authorem (b), alia *realis*, alia *verbalis*, dum scilicet vel factis, vel verbis contrarium probatur. Fama, & existimatio defenduntur verbis, ostendendo falsitatem eorum, quæ dicit calumniator, aut veritatem contrarii, & fidem calumniatoris labefactando: suspicionem verò ejus, quod objicitur ab ipso, à te avertendo; non autem defenduntur rependendo convicia, & calumnias; nam conviciari, & calumniari conviciatorem non magis aptum medium est ad famam, & existimationem defendendam, quam vi impetere ejus corpus. Quod si ea sit calumniatoris autoritas, ut alii faciliè ei fidem adhibeant, fidem ejus labefactabis, præsertim ubi tua plurimum refert, ne fides eidem habeatur (c). Falluntur aded, subdit, qui propalando ea, quæ ignominie sunt, vel etiam infamiae, calumniatori, aut socio ejus injuriam fieri existimant; cum lex naturæ prohibeat propalari talia. Enimvero hi non perpendunt, in collisione officiorum erga se ipsum, & erga alios vincere officium erga se ipsum. Cum licitum sit non parcere vitæ alterius, ut serves tuam, neque illicitum videri potest non parcere existimationi; ac famæ alterius, ut propriam serves. Hactenus WOLFII.

X 3

Quæ

(a) J. N. P. I. §. 1039. (b) Ibid. §. 1048. (c) Ibid. §. 1055.

Quæ dicta satis consonant cum doctrina nostra Theologica, juxta quam, si quis injustè læsit famam tuam, nec potes eam tueri, aut recuperare alia via, quàm imminuendo quoque famam illius, id licet: dummodo falsa non dicas, nec aliter, quàm ad conservandam tuam famam necesse est, nec magis hedas, quàm lædaris, collata tua cum alterius persona: neque crimen, quod de calumniatore tuo propalas, sub secreto servare debeas, aut modo iniquo ejus noticiam acquisiveris, aut ex ipso calumniatore, olim à te petente consilium, intellexeris. *Vide CARDENAM (a).* Concludamus. Quoniam ergo aliter defendi *nequit* fama, nisi verbis & factis, quibus probatur contrarium ejus, quod dicit calumniator, (adde, vel labefactando ejus fidem) etiam aliter defendere *non licet*; nam id solum ex jure adhibemus, quod fini servit, quem ex jure quaerimus.

240. Doctrinæ huic meritò acquiescere deberent, sanioris judicii qui sunt. Fors tamen abnuet quisquam, veritus, tum ne quandoque modus ille Wolfianus adhiberi, saltem cum effectu, non valeat: tum ne, si intra hos limites constringatur viri probi defensio, calumniatorum crescat protervia; quandoquidem sine freno, & impunè arrodere eis licebit obvium quemque, sicque societatem humanam continuis vexationibus turbare: acriore ergo confutatione opus esse videtur, ut calumniandi libido compescatur. Non prorsus abs re hic moveretur scrupulus, & si quidem in statu civili versaretur nostra disputatio, judicis esset, pœnis calumniandi libidinem coercere. At de statu naturali sermo est. Quis ergo satis efficaciter os maledicis obstruet? R. Usui hic iterum posse illa remedia esse, quæ supra, ubi de vindicandis verberibus dictum, suggesta sunt *n. 234. 235.* Eisdem viribus ad petendam veniam, & canendam palinodiam adigendus est calumniator: quæ tamen palinodia, ut WOLFIIUS insinuat, (b) potius rationem *Castigationis*, quàm *reparationis*, aut defensionis habitura est. Quod si hæc nihil proficiant, vel nequeant à te obtineri, valebit illud WOLFII (c): Patienter ferenda sunt, quæ mutari non possunt. Et tritum illud?

*Conscia mens recti fame mendacia videt.*

Quodsi autem ex calumnia nascerentur alia adhuc damna e. g. in fortunis, dignitatibus &c. tunc ad ea remedia licebit recurrere, quæ aliàs arcendis his damnis ex æquo convenire dicemus alibi.

Hæc

(a) Cris. Theol. in prepos. 43. Innoc. (b) Ibid. §. 1040. (c) Ibid. §. 1042.

Hæc de statu naturali dicta sunt. Difficultas minor est in statu civitatis, etiam malè ceteroquin ordinatæ; nulla enim facilè civitas tam malè est constituta, ut, quamvis ad vindicandas ignominias alias nil conferat sua potestate Magistratus: non tamen querelam de calumnia audiat, judicetque, quin ad armatam purgationem devenire necesse sit. Etiam inter viros militares mos viget, ut quis calumnia impetitus, causam suam ad judicem deferat, agâtque ex L. *diffamari*: ubi dein calumniator, si temere dixisse deprehenditur, infamia notatus pœnas luit; saltem si convincere eum judices possint, vel etiam velint. Pessimè itaque & ineptissimè agunt, qui vi barbara, ac privata innocentiam contra calumnias conantur tueri. Aliud foret, si causa malevolorum artibus turbaretur, & implicaretur de industria. *Vid. n. 71.*

### §. III.

#### Solvuntur argumenta contraria.

- |  |  |
|--|--|
| 241. <i>Obijcitur tritum illud: vita, &amp; fama pari passu ambulant.</i>      | <i>vita ex timenda nimia frequentia rixarum.</i> |
| 242. <i>Item illud: In statu naturali licet privatis, quod licet gentibus.</i> | 244. <i>Etiam captioso dilemmate.</i>            |
| 243. <i>Impugnatur nostra probatio, pe-</i>                                    | 245. <i>Respondetur ad casum Caramuelis</i>      |
|  | 246. <i>Geminato responso.</i>                   |

241. **O**pponitur I. *Vita & fama pari passu ambulant*, recepto passim aphorismo: idemque est gladio, quàm lingua percuti; vita naturali, ac civili spoliari: ergo quidquid licet in eum, qui vitam petit, idem licebit in eum, qui famam per calumnias aggreditur. Certè, qui *fidens conscientia sua, negligit famam suam, crudelis est*, ipso D. AUGUSTINO teste (a): "Hæc ratio, ait WOLFIVS (b), nonnullos decepit. At si vel maximè concedamus, famam vitæ æquiparari; dispar tamen est utriusque defendendæ ratio; vita enim cæde alterius defendi potest, & medium defensionis unicum est in eo casu, ubi id facere licet: at fama, & existimatio nece alterius defendi nequit, adeoque ex numero mediorum defensionis hac in parte prorsus excluditur hic defendendi modus. Juxta CARP-

„ ZOVIUM

(a) Serm. 355. aliàs 49. de divers. (b) P. 1. J. N. §. 1026.

23 zovium (a) iniqua prorsus, & irrationabilis est hæc sententia: Neque etiam  
 24 vulgatum illud Interpretum, quodd *vita, & fama pari passu ambulant*,  
 25 simpliciter verum est, neque ex textibus allegatis probatur; quia lex  
 26 octava, quodd *met. caus.* loquitur de speciali in corpus injuria, per stu-  
 27 prum illata, cujus causa Romanis legibus occidere permissum est (b).  
 28 Ineptius profertur lex nona *De manumiss. vindic.*, quæ de speciali manu-  
 29 missionis casu agit, nempe, ut minor justam causam habeat manumir-  
 30 tendi servi, sufficit per hunc illius vitam, vel famam esse conservatam.  
 31 At comparata in uno aliquo singulari non faciunt absolutè æqualia. Et  
 32 quis non intelligit latissimam hac in re vitæ, & famæ differentiam?  
 33 illa ablata non reparatur: hæc verò non aufertur revera per calumniam,  
 34 & si aufèrri, aut lædi visa est, restitui, ac reparari valet. „ Addo,  
 quodd malum intentatum ab armato hoste, qui stricto pugione vitam ag-  
 greditur, sit evidens: secus verò malum, quod calumniator molitur,  
 dum calumniam struit, seu inferre nititur. Denique considerandum venit,  
 quodd in licentia defendendi vitam non timeatur tantus abusus, tot malo-  
 rum post se appendicem trahens. *Vid. n. 237.* Qualiscunque ergo inter  
 vitam, & famam sit *pretii aequalitas*: diversa tamen est, qua uti fas est,  
*defendendi ratio*. Denique unum addo: si vita, & fama *pari passuambu-*  
 lant, cur pro servanda fama vitam potius exponis, quam famam pro  
 vita servanda.

242. Opponitur II. Homines duo, in statu naturali nulla ratione  
 2 se mutuo dependentes, idem jus habent ad defendendam famam contra  
 calumnias, ac duæ gentes liberæ: his autem famam bello defendere publi-  
 30 fas est, ut ostensum exemplis alibi allatis n. 190. Ergo idem de privatis  
 dicendum. Præcipuè si verum sit, quod ex P. SCHMIDT supra adduximus  
 n. 187. *Quotiescunque bellum publicum jure naturali inter duas civitates cen-*  
*setur indultum, toties bellum privatum inter aequales erit concessum*: cum dua  
 civitates, inter se considerata, pro aequalibus reputentur. Item si datur jus  
 puniendi, seu *belli privati vindicativi* stabilitum n. 182. Bc. Rarum fore casum,  
 quo gens genti bellum movere possit *ob calumniam*, quam utique sparsis per  
 orbem apologiis, minore impendio, ac periculo confutabit. Rarò, hodie  
 præ-

(a) Jurispr. Forens. Part. 4. Conf. 19. def. 6. (b) L. 1. §. 4. ff. ad L. Cornel. de Sicar.



præcipuè, ejusmodi quid occurreret, ut vel ex ipsis illis exemplis colligere est. Dein id præcipuè considerandum, quòd non tam præcípites sint gentes, ut properè in bellum ruant. Majoris hoc est moliminis opus, & ingentis apparatus. Matura præmittitur deliberatio, & prudentiùm audiuntur consilia. Longè frequentior econtra inter privatos calumnia est: prompiùs moveretur bellum privatum, ubi à sola exacerbata mente turbulentum consilium suggeritur, & non nisi unus stringendus est gladius. Itaque humanæ societati non ita timendum à belli publici, quo calumnia vindicaretur, atque à privati licentia. Hinc etiam allata P. SCHMIEER sententia cum grano salis erit accipienda. Neque ex jure puniendi seu *belli privati vindictivi* rectè deducitur, licitè calumniatorem occidi; nam pœna ex hoc jure emanans non debet semper consistere in malo extremo, in ipsa nece. Dein, quod præcipuè duellum attinet, mirabilis castigatio ea foret, quæ tam castigantem, quàm castigatum æquali discrimini exponeret vulnere, aut necis. Unde si quis etiam hoc jus exercere velit, mitiorem potiùs illum puniendi modum, n. 240. expositum, deberet adhibere, nisi Grotiana illa licentia, extensa in infinitum, uti fors velit in sensu non satis sano. *Vid. n. 183.*

243. Opponitur III. Æquè frequentia sunt litigia de bonis fortunæ, quàm de calumniis: nec tamen ideo illa defendere nefas est cæde, ac duello: (*vid. n. 189.*) ergo probationis nostræ membrum tertium nihil concludit, quo armatam contra calumnias defensionem improbavimus ob frequentiores turbas, inde orituras. R. Litigia illa circa fortunæ bona frequentia quidem esse, ubi jus datur dubium, neque certa est justa rei possessio. At negatur in casibus juris dubii, aut juris tantùm inchoati, præcipuè in statu civitatis, cruentam defensionem locum habere, præcipuè inter privatos; meritò quippe damnata est propositio 32. inter Innocentianas: *Non solum licitum est defendere defensione occisiva, qua actum possidemus: sed etiam ad qua jus inchoatum habemus, & qua nos possessuros speramus.* Item: *Licitum est tam heredi, quàm legatario contra injustè impediens, ne vel hereditas adeatur, vel legata solvantur, se taliter defendere: sicut & jus habens in cathedram, vel prabendam contra eorum possessorem injustè impediens.* Scio equidem, in statu naturali aliquando plus permitti ex defectu judicis, ad quem recurri possit in causa dubia: at eousque neque permisso illa extendi debet, ut promiscuis cædibus societas humana turbe-

tur, certò tunc turbanda, si Marte proprio calumnias vindicare permittatur, ut ex nostra probatione liquet.

244. Opponitur IV. Vel frequentes ergo essent sparsæ ejusmodi calumniæ, quæ, an gladio vindicari possint, disceptamus: vel raræ? si raræ sunt, nil metuendum societati humanæ. Si frequentes, certè moderatis, probisque viris malè consultum est, si famam suam dilacerandam inulti relinquere debeant Theoninis dentibus, passim & sæpe sævientibus. R. Frequenter quidem spargi calumnias: at rarò tales spargi, primò ex quibus damnum existimationis certum oriatur: & secundò certò reparandum per vim cruentam: & tertio ita ut ratione alia, explicata n. 234. non possit medela afferri. Aliæ calumniæ sunt frequentes; quibus tamen malè, & ineptè duello occurritur, hoc ipso, quòd ex iis non oriatur certum damnum existimationis, neque certò reparandum per vim cruentam, & fortè alia ratione medela possit afferri. Quid autem de illis rarioribus sentiendum, mox dicemus.

245. Opponitur V. Fingamus ergo casum, utut rarum accidere, quem CARAMUEL proponit (a). Si Titium Albericus, homo Laicus, infamat (hoc est, infamare pergit) perfidè nempe & injustè: & verum est, Titii opinionem, atque autoritatem his calumniis graviter lædi (nam leves jacturæ indignæ sunt remediis gravibus) si verbis se non possit defendere: si eum Respublica protegere, & defendere nolit, aut nequeat: & tandem si honorem suum verè tueri possit occidendo Albericum: & non aliter; in tali, inquam, circumstantiarum concurrentia, stando juri naturæ, poterit Titium Albericus occidere. Ita CARAMUEL. Statim autem subjungit: ànne eadem doctrina poterit admitti stando juri Civili, & Canonico? respondeo, ex neutro posse. Hactenus dictus Author. Jam quid de ejusmodi licentia sentiendum vi defensæ hucusque doctrinæ? R. Rarò ea omnia concurrere, quæ huic facto afficta sunt. Fingamus tamen, aliquando concurrere, saltem, teste CARDENA (b), non afficitur opinio CARAMUELIS damnatione Pontificia; eo quòd damnatio nil dicat de jure naturali: sed tantùm negat, *id esse licitum*: sicut etiam negat CARAMUEL. Id observo: " si naturali jure

(a) Theol. Fundam. Fundamento 55. n. 1580. (b) In propof. 30. art. 5. n. 51. seq.

jure ea occisio esset licita, Canonico jure, & Civili prohiberi vix pos-  
set; prohibitiva enim lex ejusmodi esset nimis ardua: atque aded indi-  
gna Legislatore humano. DEUS idcirco potest aliquam actionem arduam  
præcipere; quia simul dat vires, ut faciliè ponatur, juxta illud Trid.  
Sess. 6. c. 11. *DEUS impossibilia non jubet: sed jubendo monet & facere,*  
*quod possis, & petere, quod non possis, & adjuvat, ut possis.* At Legis-  
lator humanus non præbet vires ad ferendum onus præceptorum, &  
ideo non debet grave onus imponere. „ Ita in simili VIVA (a). Ajo ergo de  
licentia primò, cùm ejusmodi casus foret rarissimus, dari fortè eam licen-  
tiam; cessaret enim præcipua ratio, & finis naturæ prohibentis, nempe  
confusio societatis humanæ per promiscuas cædes. Reliqua nostra argu-  
menta etiam non haberent hîc locum, ut parebit consideranti; quia hîc fin-  
gitur calumnia certè noxia, & certa in gladio salus, & quidem in hoc unidè.

246. Ajo secundò, & fors meliùs cum VIVA (b): Quamvis (ejus  
verba recito) aliquando possit utrumque evidens apparere, & quòd grave  
damnum ex parante calumniam immineat: & quòd non suppetat ali-  
us modus id declinandi, quàm per necem infaustis: non perinde licita esse  
potest calumniatoris occisio; quia faciliè homines ex passione hallucinan-  
tur. Unde debuit absolūtè à natura tale medium ad vitandam calumniam  
prohiberi; eo quòd majus esset damnum in Republica ex frequentibus cæ-  
dibus, quæ haberentur: quàm bonum, quod inde sequeretur, &  
quia bonum publicum prævalere debet privato; idèd toleranda po-  
tiùs in aliquo casu ab innocente aliqua dehonoriatio, quàm per-  
mittenda ista defensio occisiva. Ad idem principium recurrit VIVA, ubi  
n. 7. defendit juxta propositionem 18. ALEXANDRI VII., *non licere inter-*  
*ficere accusatorem, falsos testes, ac judicem, à quo iniqua certò imminet sen-*  
*tentia; etsi alia via non possit innocens damnum evitare.* Quòd si aliquando,  
ait, non possit damnum impediri, id est per accidens, tribuendùmque  
proprio infortunio: non secus, ac si de cælo vita, aut propria bona tan-  
gerentur; non debuit enim natura propter bonum alicujus privati in aliquo  
raro casu permittere hanc defensionem immoderatam, quæ innumeris cæ-  
dibus ansam daret; cùm sibi ex passione quilibet faciliè persuadeat, judicem

(a) In propof. 17. Alex. VII. n. 7. (b) Loc. cit. n. 4.

esse infensum: ad eum modum, quo non debuit natura fornicationem permittere pro raro illo casu, quo aliquis putaret, bonam prolis educationem non esse defuturam; eo quoddam quilibet, cæstro percitus passionis, facile sibi persuaderet, quoddam hic & nunc bonæ prolis educationi esset prospectum, & sic luxuries ubique debaccharetur. Hastenus VIVA. Hæc interea ad casum CARAMUELIS, & totam de calumniis doctrinam sufficiant, donec ex sequentibus amplior lux affundatur.

## ARTICULUS V.

*An in statu naturali duello honorem tueri liceat contra convicia &c?*

**P**ECULIARI examine convicia, exprobrationes, irrisiones, illusiones, subfannationes &c. à calumnia secernimus; differunt enim (a). Calumnia falsitatem involvit, qualem in conviciis &c. intervenire necesse non est; nam hæc sæpe ob imperfectiones veras jaciuntur. Dein, si in gestulatione illusoria, aut vili agnomine consistunt, non tam facile in audiente, aut vidente bonam existimationem perimunt, atque calumniæ. Sunt tamen de cætero satis acerbæ, ac molestæ. De his itaque quaeritur, an in statu naturali, aut æquivalente, aliquando cæde, vel duello eis liceat finem imponere. Salebrosa indago est: ne impingamus, audiamus primò sententias Authorum; tum nostram edicamus.

### §. I.

Sententiæ Authorum circa vindicationem conviciorum &c.

- |   |  |
|---|--|
| 247. <i>Theologi licentiam affirmantes.</i> | 251. <i>Laymanus expresse de duello loquens,</i> |
| 248. <i>Theologi eandem negantes.</i>       | 252. <i>Crispin Seyboldi patitur.</i>            |
| 249. <i>Opinio Pufendorfi. &amp;</i>        |  |
| 250. <i>Huic adhibita lima Schwarzii.</i>   |  |

247. "**P**Otest occidi is, qui afficit contumeliis atrocibus, sive per verba, „ sive per signa, quando honor alia ratione defendi non potest. Ita BONACINA (b). „ Ejusdem sententiæ ait esse GOMEZ, RODRIQUEZ,

(a) Hærum definitiones vid. n. 64.

(b) Tract. de Restit. disp. 2. q. ult. sect. 1. punct. 10. n. 7.

QUEZ, LOPEZ, P. NAVAR. JUL. CLAR. " Ratio ejus est; quia licitum est " occidere invasorem facultatum: ergo etiam invasorem, inferentem igno- " miniam. Affirmativè respondit novissimè, ait DIANA (a), eruditus & " doctus JOAN. DE ESCOBAR, HENR. STROVERSDORF, & BALDELLUS. Possè " scilicet interfici, qui virum aliquem honoratum conviciis, & maledictis affi- " cit, nec potest aliter cogi, ut taceat; talis enim est invasor honoris, intel- " ligendo, quando contumeliæ sunt atroces; nec evitari aliter queunt. " Ratio enim naturalis dicitur, licitam esse eam defensionem, quæ neces- " saria sit ad contumeliam depellendam, & comprimendam: alioqui da- " retur licentia improbitati, optimos viros contumeliis vexandi, quæ ta- " men multò quàm damna rei familiaris sunt accerbiora, & magis affligunt " animum. „

248. " Verùm, pergit DIANA, his non obstantibus hanc senten- " tiam non approbat, & merito, HURTADO, PETR. BINSFELDIUS, MOLFESIUS, " LESSIUS, FILLIUCIUS, AZORIUS, & alii. Quia verbales injuriæ verbis re- " pelli possunt, quæ est legitima vindicta; tum quia sic repelli solent " etiam apud viros honoratos; quare, si factis repellerentur, jam fieret " excessus in defensione; eùm aliter & possint, & soleant repelli. Sed, " pergit, ut verum fatear, BALDELLUS, & alii primam sententiam docent " in casu, quo aliter contumelia tolli non potest, nisi interficiendo calu- " mniatorem; quia id solùm est vim vi repellere, & honorem tueri con- " tra injustum, & violentum dehonorentem. Ego verò, concludit DIA- " NA, non recedo à secunda sententia. „

249. " A Theologis ad juris naturalis Interpretes pergamus. " PUFENDORFIUS (b) ita habet: In statu naturali non potest ab aliquo exigi " patientia etiam modicæ injuriæ, præsertim continuatæ, quo minùs per " extrema quæque repellatur. Rationem dat hanc (c); quia tum demum " vita redderetur infociabilis, si licentiæ resistendi aliquis terminus pone- " retur inter eos, qui in naturali libertate vivunt; qualis enim vita, si al- " ter semper modicis verberibus (hæc exempli tantùm causa affert) infe- " stare pergeret? modesto cuique semper misero esse necessum foret, quo- " tiescunque privato cuiquam jus Naturæ violare placeret. „

Y 3

250. Hanc

(a) Resolut. Moral. p. 5. Tract. 4. Resol. 12. (b) De J. N. G. l. 2, c. 5. §. 12.  
(c) Ibid. §. 3.

250. Hanc doctrinam PUFENDORFII *nimium liberalem* appellat P. SCHWARZ (a): " Neque solidam judicat allatam rationem; quodd secus  
 „ vita redderetur infociabilis, si contra eum, qui modicas injurias con-  
 „ tinuare non desistit, extrema adhibere non liceret; nam si leves ipsa  
 „ *continuatio* sic coalescerent in gravem, ut vita redderetur infociabilis,  
 „ cessat suppositum asserti. „

251. Expresè de duello ita habet PAULUS LAYMAN (b): " Si ad  
 „ pugnam laceffens alterum crebra convicia, & contumelias adjiciat,  
 „ qua ille molestia, & subeundo dedecore aliter liberare se non potest;  
 „ nisi armis congregiatur, non audeo damnare eum, qui meræ defensio-  
 „ nis causa id fecerit, dummodo spes sit contra injustum adversarium  
 „ prævalendi; alioquin illicitum erit certo mortis periculo se exponere ad  
 „ vitandum dedecus, quod non ex hominis delicto, sed ex vulgi sinistra  
 „ opinione provenit; majus enim bonum est vita, quàm honor. „

252. At, ait P. SEYBOLD (c), " difficilis est hæc doctrina Layma-  
 „ niana ob propositionem, qua dicitur, quodd *vir equestris, ad duellum*  
 „ *provocatus, possit illud acceptare, ne timiditatis notam apud alios incur-*  
 „ *rat;* „ & alias fimiles, quæ tamen, cùm sint strictæ interpretationis, an  
 „ nihilominus, illis salvis, possit ea doctrina subsistere, judicet prudens Le-  
 „ ctor. Ita varii variè sentiunt. Sit itaque

## §. II.

### Nostra Sententia.

253. *Conclusio negans. si vexationes  
 sales sint, quales ut plurimum in-  
 ferri solent: ejusque Ratio.*

254. *Remedia leniora afferuntur.*  
 255. *De atrocibus præter ordinem dis-  
 feritur.*

253. **A** Jo, si convicia, exprobrationes, irrisiones, illusiones, subfanna-  
 tiones, durior agendi ratio &c. ejusmodi sint, quales ut pluri-  
 mum esse solent, ac inferri videmus, utut crudæ & acerbæ, non sufficiunt  
 ad

(a) I. N. G. P. 1. tit. 4. instruct. 7. q. 15. (b) L. 2. tr. 3. p. 3. c. 3.  
 (c) Erotem. Jur. p. 2. sect. 4. §. 1. n. 18.

ad cædem vel duellum, præcipuè si non sint continuatæ ac diuturnæ. Certè in asserenda tali licentia facilem non esse oportet; cùm enim hoc genus injuriarum frequentissimum sit, & quandoque vix ulla ratio occurrat, ab ea molestia se liberandi, quæ non damnorum seges inde pullularet, si quisque frequenti, vel etiam quotidiana ejusmodi vexatione fatigatus, perimere lædentem posset, aut ad conflictum evocare? uxor toxicum crudo marito pararet: servus duriori hero sicam: sodalis sodali obvium cultrum in pectus adigeret, ubi impatientes frequentis, ac diuturnæ vexationis, & omni alia ope destituti, accedente vehementi fortè ira abripi se sinerent. Non rarè in eadem legione, aut exercitu, vel in eadem curia imperiosius quidam homo commilitonem, collegam suum vexat, premit, persequitur modis amaris, quin huic liceat mutire. Si jam ejusmodi pressi audiant, licere sibi adhibere armatam vim, in quem, Superi! hæc licentia abusum abiret, quantum post se malorum syrma traheret! neque refert, quodd hoc exemplum ad statum civilem pertinere videatur: neque quodd servus contra dominum, aut uxor contra maritum jure status naturalis plerumque non gaudeat; nam satis est, exinde periculum manifestè detegi, quod timendum foret ex tali licentia in statu qualicunque. Securitati scilicet humanæ gentis cautum non satis esset. Dixi: *præcipuè si non sint continuatæ, aut diuturnæ*; id est, si non sint frequenter repetitæ, nec perduraturæ, quarum finis jam spectetur è propinquo: multo magis si jam sint præteritæ; nam hæc transcuntia patientiam viri strenui non deberent exhaurire. Adde etiam: *si aliud præter molestiam damnum secum non asserant*; secus enim ex ratione damni colligi debebit, quantum liceat.

254. Quid ergo miserè vexatis, pressisque remedii super? R. primo. Prudentis esse, patientia ejusmodi nimbos excipere. Præstat sæpe de suo jure aliquid remittere potiùs, quàm intempestiva defensione majori se, se periculo exponere, juxta illud MARTIALIS: (a)

*Miserere tui, rabido nec percitus ore  
Fumantem nasum vivi tentaveris urfi.*

Item

Item juxta ISOCRATEM, de se ipso prædicantem (a): *Ha mea artes fuerunt, ut ne quid ipse erga quemquam delinquerem; mihi verò si qua facta esset injuria, ut non me de inimicis vindicaret; sed controversias amicis eorum dirimendas permitterem.* Et hoc qua utilitate fiat, SENECA explicat (b). *Sapientia patientiam suadet, ira vindictam, & qui primis malis defungi potuimus, in majora devolvimur. Quosdam unius verbi contumelia, non aequo animo lata, in exilium projecit, & qui levem injuriam silentio ferre noluerant, gravissimis malis obruti sunt.*

Re. Secundò. Si patientia tua abutatur homo parum humanus, nec vexare desinat, remediis utere, suggestis n. 234. 235. Nolim tamen ejus remedii usum temere ad quævis convicia extendere. Horum acerbitas, & diuturnitas in considerationem antea veniat, oportet. Et, ut ibidem monuimus, alieno potius standum est judicio, quam proprio. His limitibus circumscripta, & instructa simul suis remediis defensionis privaræ licentia, tantum abest, ut vitam *insociabilem* reddat, prout PUFENDORFIUS timet: vel *modestissimum quemque miserum* esse cogat, ut potius licentia laxior sollicitatem horrendum in modum esset turbatura.

255. Sed id adhuc quæri potest, an unquam præter ordinem ita ingravescere possint hujus generis contumeliæ: an ita atroces, molestæ, ac diuturnæ, & graves evadere vexationes, ut, non suppetente alla via, armata manu invadere, quin etiam, reciproco periculo insuper habito, ad duellum provocare liceat? Re. quamdiu spes est mutationis, opis, finis, & quæque non admodum remota: aut quando mitiore illato malo compesci cavillator potest, ut moderatius saltem vexet, non licebit eoque progredi. Ratio, superius data, hoc prohibet. Quodsi nihil ejusmodi supersit, ipsæque injuriæ valde atroces sint, ita ut miser præ indignatione vix non crepet: vel certè concitatam semper bilem valetudini tandem nocere advertat, dubitari non abs re poterit, an tortorem suum occidere fas sit: quin etiam ad duellum, si hoc opportuniùs fieri queat, evocare. Namque revera intolerabilis vita foret, continuò sic vexanda: atque etiam præstaret, propriam vitam exponere duello periculoso, seu neci aut vulneri incerto



certo, quàm certè miseram ducere. Ego tamen crediderim, casum adeo atrocem esse rarissimum. Insuper difficillimum fore, judicare sine errandi periculo, an reverà talis sit: vel an ab impatienti solùm, & commota bile in tanta magnitudine depingatur; nam, quæ ab aliis patimur, per microscopium plerumque intuemur. Hæc ad hanc quæstionem dicta sufficiant.

## ARTICULUS VI.

*An ad evitandum dedecus, quod ex recusato duello resultaret, duellum subire liceat?*

**H**onorem lædi, & asserri dedecus per verbera, calumnias, convicia &c. non difficile captu est: & ex ipsa harum contumeliarum natura intelligitur, nisi quis totus quantus velit esse Philosophus. At id mirum, scholam monomachorum novum confinxisse probri genus, quod non ex natura sua, sed ex institutione, ac beneplacito hominum honori ac bonæ existimationi labem asserat, estque id recusatio duelli. Ignominia fortè quæquam affecisti: vel affectus fuisti ipse? si hoc, provocare teneris lædendum: si illud, provocanti parere necesse habes. Ita pseudo-lex imperat, toto Capite II. à nobis exagitata. Provocare: vel provocanti parere si renuas, ignaviæ notam tibi accerfis, reputandus inter timidos. Quærimus itaque hoc loco, an ad evitandum dedecus, quod ex recusato duello resultaret, duellum subire liceat? Quæstionem absolvemus §. unico; non enim alia hic damna, quæ ex ejusmodi recusatione sequi possent, stateræ imponimus: nil jam de exclusione à cœtu æqualium: nil de jactura dignitatum, aut ipsius sustentationis, ad vitam necessariæ, commemoramus. Solam timiditatis notam, conjunctumque apud homines contemptum in considerationem vocamus.

### §. unicus.

Statuitur Sententia negans.

256. *Affertur argumentum primum.* 258. *Solvitur oppositio.*  
257. *Affertur argumentum alterum.*

256. **A**gedum, ponderemus, an hæc notà, hic contemptus tantì momenti sit, ut quis sine conscientie noxa provocare ad duellum possit, vel provocationem acceptare. Quæ in re notà est doctrina ab ALEXAN-

ORDO VII. damnata (a). *Vir equeſtriu ad duellum provocatus, poteſt illud acceperare, ne timiditatis notam apud alios incurrat.* Huic damnationi, ſicut æquitate naturali nitiſtur, ita eidem ſubſcriberem, etſi à Sede Pontificia non profluxiſſet. Ego enim ſic exiſtimo. Duellum ejusmodi opus eſt, quod ſine graviffima neceſſitate adhibere nefas ſit : jam verò ubi nil niſi nota timidioris animi & conjunctus qualiscunque contemptus, ſeu ſiniſtrum hominum judicium ferendum eſt, talis neceſſitas non incumbit : ergo duellum tunc adhibere nefas erit. Primum aſſerti hujus membrum patet perpendenti, quin vel obiter legenti ea, quæ *toto Capite II.* uberius conſcripſimus, & quorum plurima ſtatui Naturali non minùs, ac Civili quadrant. Quodd autem in præſenti graviffima neceſſitas non urgeat, ex eo probamus ; quia non admodum difficile accidere debet viro prudenti, hanc notam, & ſiniſtrum quorundam hominum judicium æquo animo ferre, & contemptum contemptu vindicare ; eſt enim ejusmodi judicium ſtolidum, poſtquam abunde tum ratione, tum oraculis ſummorum Principum demonſtravimus per *totum Articulum III. Cap. II.* (b), acceptationem duelli non eſſe argumentum fortitudinis : neque recuſationem, timiditatis ; ſtolidi autem imprudentium judicia, *ſaltem quamdiu à judicio non proceditur ad ulterius damna, vel vexationes,* explodere non admodum difficile eſt viro cordato. Ain, ſi hæc turba à te exigeret, ut opes tuas omnes in mare demergas, vel certè extremo periculo committas, ſecùs te habitura pro avaro, & ſordido, num valeret apud te hæc veſania, vel difficile admodum accideret contemnere ? neutiquam. Cur ergo opes, fortunas omnes, unà cum vita, & animæ ſalute in diſcrimen adducere velis, ut timidi notam evites in cerebro horum ardelionum ; cùm tamen milleni & milleni alii prudentiores potiùs æſtimatione, quàm contemptu te dignum ſint judicaturi ? apparet ergo, eam notam tanti non eſſe, ut cum duelli licentia comparari poſſit. Notari autem velim, me id non probare ex eo, quodd judicium illud *iniquam* ſit ob ea, quæ diximus *n. 215.*, & dicturi ſumus alibi ; ſed ex eo, quodd non ita *difficile* ſit, illo iniquo judicio inſuperhabito, abſtinere duello ; utpote quod ejusmodi eſt, ut ſine graviffima neceſſitate adhiberi non debeat ob ſexcenta incommoda in humanam ſocietatem redundatura.

257. Præ-

257. Præterea & illud perpendi meretur, quàm tristes post se casus tractura esset talis licentia, deducta semel in usum, qua provocare, & provocanti parere fas esset ad effugiendam solam notam timidi. Certè cùm offensæ sint ferme quotidianæ: & declinanti duellum ab imprudentibus ignaviæ labes semper affricetur, etiam duella futura essent frequentissima, quo pejus cogitari nihil potest. Rectè ergo damnatam illam doctrinam unanimi quoque suo calculo damnaant, quotquot sapiunt.

258. Opponitur ex Card. DE LUGO (a): " Communis est Doctorum sententia, si quis ab armato hoste invasus, ex fuga, quam capefceret, dedecus magnum, & ignominiam hominis ignavi, ac timidi incurreret, posset firmo pede persistere, etiamsi necesse sit invadentem occidere ad sui defensionem (ut etiam à nobis uberius declaratum est à n. 195.) ergo etiam provocatus condicere in duellum potest; cùm recusatio æquè ignominiosa sit, ac ejusmodi fuga. „ Difficultatem hanc non levem appellat Lugo. Tum varias aliorum responsiones ad stateram appendit, quas, ubi non satis graves deprehendit, suam subjicit his verbis: " Differentia debet peti ex eo, quòd occisio in uno casu sit defensio; non in altero. Quando enim alius te *invadit*, ut interficiat, potes te defendere eum occidendo, si aliter effugere non potes; non potes autem aliter; quia fuga maximum affert tibi ignominiae damnum: & licèt illud oriatur ex prava hominum existimatione, qui id debilitati tribuunt, quod potuissent pietati tribui: undecunque tamen id proveniat, malum tibi est, ignavum reputari; unde non potes jam aliter sine gravi incommodo vitam tueri, quàm invasorem occidendo. At verò quando alius te ad duellum invitat, si acceptarès, & eum occideres, occisio illa non esset defensio tuæ vitæ; nemo enim te *invadit*, sed rogat solum, & invitat ad pugnam. Nec excusat timor dedecoris ex recusatatione duelli; quia id non facit, quòd occisio sit *defensio*; cùm nemo te *invadat*, aut velit inviro quid auferre. „ Dubito ego, num assignata differentia difficultatem propositam solvat; nam fortè quis

Instabit: Etiam hic provocans dicendus est *invadere*: si non vitam, saltem honorem; nam, nulla data causa dum provocat, injuriam facit; non tantum quia vitæ tuæ periculum parat: sed quia te, si quidem duelum, ut debes, recusās, iniquo contemptui iniquè exponit. Hic ergo resultans contemptus, cum ei *voluntarius in causa* sit, dici is homo potest *invadere* honorem tuum: & non desistendo à provocatione, *invasionem honoris continuare*, ferme ut dictum est n. 214.; ergo si, ommissa fuga, arma invadenti licet opponere; etiam erga provocantem id licebit. R. Utcunque se habeant, quæ hic de *invasione* dicuntur: nego ego in hac argumentatione consequentiam. Inter *invasionem*, quæ aliquo modo contineri videtur in provocatione: & inter *invasiones alias* latum discrimen intercedit, propter quod has, non autem illam liceat armis retundere. Hoc autem discrimen desumendum est ex gemina ponderosissima ratione, quam n. 256. 257. contra licentiam acceptandi provocationem pro evitanda nota timidi attulimus, quales non afferri poterunt contra licentiam opponendi arma invadenti, ommissa fuga, id quod patebit volenti vocare ad trutinam. Alia, quæ hic opponi possent, e. g. *volenti non fit injuria*, si in duello occidatur. Vel: *Vita, & fama pari passu ambulant* &c., alibi soluta sunt, vel solvantur adhuc.



## CAPUT IV.

AN DUELLUM LICITUM ESSE POSSIT  
IN STATU NATURALI AD VINDICANDAS  
UNA CUM HONORE FORTUNAS,  
SEU OPES.

**N**on solum detrimentum honoris cum contemptu ferunt, qui conscientia ducti, ac debito sibi amore retenti, duellum declinant: sed contingit quandoque, ut non levem etiam in rebus fortunæ cladem patiantur, atque obstructo fonte, ex quo opes hauserant, penuriâ incipiant premi, jam non habentes, ex quo se, suosque honestè posthac alant. Finge, afflictum ejusmodi in eo statu naturali vivere, quem supra n. 192. depinximus, unicam ei salutem in duello esse. Quæro, an pro servandis fortunis, ex illibato honore dependentibus, liceat ei provocationem acceptare: vel etiam provocare, siquidem hoc ignominiam passio necessarium sit ad servanda bona? Geminio Articulo gemino dubio quæramus exitum.

## ARTICULUS I.

*An ad servandas unâ cum honore opes liceat duellum acceptare?*

**C**asum, majoris claritatis gratia, statuamus, vestitum omnibus suis adjunctis, ad rem facientibus. Hector, vir inter suos honoratus, innocentè quidquam dixerat, quod Leander in malam partem accepit, maligna interpretatione susurronis abductus. Quare, ut suo, quem læsum opinabatur, honori consultum ireret, ab Hectore exegit, ut duello sibi satisfaceret pro injuria, more recepto. Excusabat dictum Hector, & saniora ingerere conabatur Leandro. Protestatus etiam est, se non timiditatis, at solius conscientiæ causâ pugnam averfari. Sed frustra fuit; immotus persistit ferox Leander: quamvis perbene nôsset, eo res Hectoris loco esse sitas, ut, si duellum hoc recusaret, ita ejus fortunæ essent accidendæ, ut,

pæne ad incitas redigendus, ægrè se, suosque esset aliturus posthac. Casum ejusmodi, quem modo in statu naturali fingimus accidere, metaphysicum non esse, satis patebit ex iis, quæ de statu civili n. 281. enarraturi sumus. Quatuor autem capita in præsentī factō probè notari velim. Primò, quòd Hector nulla vera offēsa Leandro causam provocandi dederit. Secundò, quòd recusando duellum ingens damnum sibi accersat. Tertiò, quòd alio remedio hoc damnum avertere non valeat. Quartò, quòd Leander, ferociter persistens in provocatione, satis prævideat secuturum Hectori damnum. Jam firmare argumentis sententiam stat: *altero §. solvere difficultates contrarias.*

## §. I.

Probatur, quòd licitè ad duellum comparuerit provocatus Hector.

259. *Comparatio instituitur inter provocantem, & raptorem.*

260. 261. 262. *Quæ non subruitur ter-  
no assensu.*

263. *Sed novum robur accipit ex ipsis principis præclari cujusdam adversarii.*

259. **S**i furari, aut rapere Leander Hectori ea bona, ad sustentationem honestam necessaria, tentaret, licitè pro illis pugnaret Hector. Patet hoc ex jure belli privati, vi cuius pugnare contra furem, aut raptorem licitum esse diximus ex communi Authorum (*vid. n. 189.*). Expressè de duello BONACINA, NIXUS assensu NAVARRI, BECANI, SANCHEZ &c. docet (a): "Ad defensionem rerum propriarum videtur esse licitum ac-  
ceptare duellum, quando aliquis eas invadit, nec aliud adest remedium  
ad eas defendendas præter acceptationem. In quo casu si invasus non  
habeat arma, potest ab invasore petere, ut sibi arma concedat. Un-  
de infero: ergo etiam licitè pugnat, & duello congreditur Hector, dum  
Leander iniquè provocans, similis damni ei causa est. In quo enim stat dif-  
ferentia? in eo solo, quòd in priore casu damnum Leandro sit *voluntarium*  
*secundum se*, ut loquuntur scholæ: in altero *voluntarium in causa.* *Volun-*  
*tarius*

*capius in causa* dicitur ille effectus, quem, etsi voluntas non intendat, ac velit in se: vult tamen causam illius effectus.

Atque ut hic effectus, malus si sit, imputetur ad culpam, mihi que tribuatur, duo requiruntur à Theologis. Primò, ut cognoscam nexum inter hanc causam, & illum effectum: quem utique nexum inter provocationem & jacturam opum perspectum habent monomachi, satis versati in ævi hodierni perversis judiciis. Secundò, ut actio, quæ effectum causat, non sit cæteroquin licita & utilis; si enim talis foret, neque ad effectum illum pravum intentio collimaret, ad culpam agenti non imputaretur. Sic mulier decorè compta exhibit licitè ad templum, aliàsve cognatas ædes pro more suo, licet prævideat, irritatum iri quemquam ex sua forma ad libidinem. Jam verò provocatio non est actio aliunde licita & utilis, sed prohibita: ergo qui provocat, prævidens simul damnum inde securum provocato, neque tamen à provocatione desistit, damnum inferre censendus est. Ergo damnum Leandro est *voluntarium in causa*, rectèque ei imputatur ad culpam. Ergo rectè ei se opponit Hector, pugnâtque veluti contra furem, aut raptorem: perinde enim irascor volenti mihi malum *in causa*, quàm si vellet *secundùm se*.

260. Neque dicas primò, provocationem non esse causam damni; sed recusationem duelli esse veram causam. B. Non nego, etiam recusationem hanc requiri, ut emergere damnum possit; ita tamen, ut ad hanc recusationem adstringatur provocatus per leges probitatis, quibus si, uti debet, adstrictus manet, non potest non recusare duellum: econtra provocans potest, & debet omittere provocationem: in hac nihilominus persistendo illam causam *iniquam* dat damno, de qua quærimus. Sic Vidua quædam, defuncto recentè marito, iniquè vexata à cognatis, à judice opem petit, quam etiam homo libidinosus addixit, si sui se voti libidinosi redderet compotem: quod dum casta fæmina recusât, deferta à judice non leve passa est damnum in fortunis suis. Quæ, edic, causâ damni fuit, an pia recusatio viduæ: an negatio opis?

261. Neque dicas secundò cum doctissimo recentiore, à me in hac materia consulto. " Damna, quæ sequuntur, originem suam trahunt à corrupto hominum judicio, habentium pro ignominia provocationem recusare, & abhorrentium à consortio recusantis, cui judicio corrigendo "

„nequa-

„ nequaquam proportionatum remedium est duellum. „ R. Cum bona venia tanti viri, me non dixisse, quoddam Hector duellum adhibeat corrigendo illi iudicio, quod utique neutiquam est *proportionatum medium* huic fini: sed id dixi, quoddam duellum Hector adhibeat pro servandis bonis, honestæ sustentationi necessariis. At quoddam damna, quæ sequuntur, originem suam trahant ex corrupto iudicio hominum, id distinguere liceat. Sequuntur ex hoc iudicio solo, hoc nego. Etiam, & fortè principaliter, ex provocatione Leandri, sic concedo. Si non provocaret Leander, nil illud corruptum iudicium noceret Hectori. Scilicet nil novi est, quoddam plures causæ concurrant ad idem damnum inferendum. Sic præter prodicionem Judæ causæ mortis Christo fuit corruptum iudicium Judæorum, habentium eum pro deceptore. Judas nihilominus reus fuit effusi Divini sanguinis; eo quoddam probè noverit, ex sua prodicione Christo inferenda fore mala extrema. Et si quidem Christus se, aut alius Christum, defendere voluisset, jure fuisset Judæ aggressurus: ergo etiam Leander, probè gnarus, quoddam stante corrupto iudicio monomachorum, Hector sit perditurus opes, si provocatus duellum recuset ob conscientiam, reus est damni, quoddam Hectori accersit non desistendo à provocatione, quoddamque damnum jure à se averzit Hector vi armata.

Unum addo. Nunquid si Leander, facti pœnitens, in sacro tribunali postea confiteatur, Hectorem, à se provocatum, ferme ad mendicitatem fuisse redactum: nec dissiteatur, se prævidisse ex recepto more ita futurum; nec tamen à provocatione destitisse, nunquid sacer Judex obstringet Leandrum, ut refarciat damnum Hectori, ei que de necessaria sustentatione prospiciat? ita certè faciendum nemo negabit, & docet expressè MOLINA (a). Quo autem jure id ager sacer judex, nisi judicet Hectorem iniquè læsum fuisse à Leandro, & provocationem fuisse veram damni causam? ergo Leander fuit injustus bonorum *aggressor*; ubi autem est injusta aggressio, ibi est iusta defensio: ergo provocatus noster defensorem agit bonorum, id quoddam licet.

262. Neque dicas tertio: Ex hac explicatione sequi, quoddam quiddam *defensio bonorum* sit licita, non autem *duellum*; duelli enim nomine infi-

(a) De Just. tract. 3. disp. 82. n. 2.



insigniri non poterit pugna Hectoris contra Leandrum: multo minus dici *duellum honoris vindex*: sed *opum*. B. Me semper abhorruisse à quæstionibus de nomine. Ajo, provocato, in his angustiis versanti, licitum esse ad provocationem comparere in arena. Hoc satis. Interim huic pugnae convenire videtur definitio duelli, posita n. 4. *Honoris vindex* dicitur; quia una cum bonis vindicatur honor; quamvis ad hunc, saltem primariò, non collimet intentio Hectoris: & quia ex honoris regulis ad has angustias fuit redactus.

263. Demum ut meæ sententiæ robur invictum addam, recenséo, quid hac in re sentiat vir cæteroquin Clarissimus, quamvis adversæ sit opinionis, & acriter eam tucatur. Nihilominus hæc scribere non dubitavit (a): " Non apparet, quomodo duellum offerens sit injustus aggressor, nisi fortè ideo principaliter ad duellum provocet, ut, cum sciat provocatum non acceptaturum duellum, hac via ipsum spoliaret officio suo, ac bonis; tunc, inquit, idem dicendum, quod dicitur de casu, quo acceptatio duelli necessaria est ad tuendam vitam, & bona fortunæ, scilicet licitam esse acceptationem, & oblationem duelli ad defensionem vitæ, & fortunarum, si alia ratio hæc defendendi non appareat. " Sic ille. At ego non video, quid discriminis inter hunc, & nostrum casum intercedat, nisi quoddam in hoc, ubi ea intentione provocatur, ut alter excidat bonis suis, damnum sit provocanti *voluntarium secundum se*: in nostro autem *voluntarium tantum in causa*. Ferme sicut mors Christi Judæis fuit *voluntaria secundum se*: Judæ tantum *in causa*; non enim crediderim, quoddam Judas rectè quæsierit Christi necem. Jam verò armata defensio licita est non tantum in eum, cui ruina meorum bonorum est *voluntaria secundum se*: sed etiam in eum, cui est *voluntaria in causa*, quamdiu hic à sua machinatione non desistit; præcipuè quando nemo adest, cui ea sit *voluntaria secundum se*, sicut in nostro casu accidit; sic enim ipse præcipua causa damni est.

Ad

§. II.

(a) P. Schmalzgrueber tit. de Cleric. pugna. in duell. n. 9.

## §. II.

## Respondetur ad argumenta contraria.

264. Obj. I. *Ea licentia obesset bono publico.*  
 265. Obj. II. *Provocans non est aggressor.*  
 266. Obj. III. *Provocatus non ageret juxta moderamen inculpatæ tutelæ.*  
 267. Obj. IV. *Sequeretur, etiam licitum esse furari &c.*  
 268. Obj. V. *Lex duellum prohibens est immutabilis.*  
 269. Obj. VI. *Ea licentia etiam extenderetur ad incommoda minora.*  
 270. Obj. VII. *Deberet provocans necesse potius tolli, quàm duello repelli.*  
 271. Obj. VIII. *Excommunicatio deo notat, malum jam in se esse tale duellum.*  
 272. Obj. IX. *Periculo salutis aeternæ se exponeret compars ob rancorem animi.*  
 273. Obj. X. *Malum exemplum daret.*

264. **O**pponitur I. ex SCHWARZIO (a), qui ita habet: " Duellum acceptandum in tali casu prorsus extraordinario etsi speculative defendi possit ut legi humanæ, vel etiam Divinæ naturali haud adversum: ejusmodi tamen licentia, ut in praxi absolute tuta probabilius defendi nequit; quia scilicet enervaret finem inadæquatum legis, etiam naturalis, prohibentis duellum simpliciter; nam finis adæquatus non consistit solum in præcavendo damno, tam privato, quàm publico: sed etiam in præcavendo ipso damni periculo communi, quod ex tali licentia nimium periculosa, quia excessibus nimis obnoxia, societati humanæ immineret, quàm maximè præjudiciosum, & vel ideo quàm maximè præcavendum; ergo, etsi talis lex per accidens in præjudicium privati hominis cederet, non cessaret: sed ob bonum commune, per se intentum, vim obligandi retineret in praxi. " Sic habet in compendio: Ex hac duelli licentia in societatem humanam redundaret ingens malum; quia ob hallucinationem, & frequentissimum hominum abusum multiplicarentur duella, ac cædes; ergo patiatur, oportet, provocatus qualemcunque bonorum jacturam; quia bonum privatum postponendum est publico. *Be. primò*, me neminem observasse alium ex Doctoribus adversariis, qui

(a) J. N. P. 1. tit. 4. q. 3.

qui hunc moveret scrupulum. Tum interrogare liceat, an rarus futurus esset ejusmodi casus, vel frequens? Rarum, imò *rarissimum* vocat R. P. SCHWARZ, prorsus *extraordinarium*, quin *moraliter vix possibilem*. At si aded rarus est, non apparet, quam sibi stragem ex ea licentia timere deberet hominum societas. Aliud foret, si de convicio, calumnia, nota ignaviæ &c. idem, quod de jactura opum, affirmaremus.

“ Homines, ait Clarissimus Author, in obviis casibus sibi facile “ persuaderent, se non modò in honore, sed etiam honori annexa digni- “ tate, officio, & consequenter in bonis fortunæ graviter lãsos; adeoque “ licitam etiam esse defensionem per duella haud segniter interpretarentur. „ At non dispicio satis, quomodo judicium sani hominis tam proclive, & lubricum esse facile possit, ut mox à qualicunque honoris diminutione devolvatur ad timendam bonorum stragem, incitas, & mendicitatem. Est hoc ejusmodi damnorum genus, quod phantasia non pro libitu exaggeratum depingit, velut convicium, & resultantem inde ignominiam, solet; sed quod, an reapse ingruat, provocatus utique luculentè videre potest; &, nisi ita videat, à duello abstinere tenebitur. Imò adhibeat pro majore securitate illud, quod ex MOLINA alibi (*vid. n. 237.*) monuimus, ut non ex proprio, sed ex familiæ, vel aliorum prudentum judicio agat. Quodd si autem dicere præplaceat, ejusmodi casum frequenter occursurum, sic sua stabit veritas ei, quod alibi diximus, nimis scilicet difficile fore humanæ conditioni, in frequentibus aded casibus destitutam esse omni remedio, & in tantam rerum suarum ruinam per legem prohibentem deturbari.

Quodd si seriò quærere velimus, an ex stabilita nostra licentia timenda sit nimia duellorum frequentia, crediderim ego, in statu naturali, si ibi eadem maligna persuasio obtineret, honorem scilicet læsum non nisi pugnando redimi; crediderim, inquam, in statu naturali frequentiora fore duella, atque hodie sint; cùm nulla lex civilis aggerem ei furori opponeret. At hoc vitium esset non licentiæ, quam nos asserimus: sed ipsius status naturalis, legum, & judicis præsidio nudati, & ex hoc capite statui civili longè postponendi. Nec dicas, etiam status naturalis fore vitium, si calumniæ, & convicii causa cruenta pugna sequatur: & tamen nos hanc pugnam damnasse capite præcedente art. 4. 5. ne, inquam, hoc dicas; nam

respondeo, vitium corruptæ nostræ naturæ esse, quoddam injectam ejusmodi scintillam veluti pulvis pyrius exardescat, & præcipiti ira detonet, & casu quidem frequentissimo. Vid. n. 237.

Dein neque id dissimulandum, quoddam sola conscientiae noxa, si qua contraheretur ex duello pro fortunis suscipiendo, paucos foret retentura, nisi vitæ amor, vel in statu civili timor pœnæ, frænum injicerent. Gravi enim piaculo sibi non admodum ducerent monomachi, in arduo hoc rerum situ ad arma recurrere; proprius amor, sicut augeret injuriam, sic etiam minueret peccati speciem. Consueverunt præterea parum ad regulas conscientiae respicere, ubi impotentis animi dolore abripiuntur. Unde non video, quid securitatis ex majore rigore Theologico humanæ societati esset accessurum.

265. Opponitur II. Ex P. SCHMALZGRUEBER (a), quod argumentum etiam probare videntur CASTROPALAO (b), LESSIUS (c), PIGNATELLUS (d). „ Qui duellum offert, non nititur me spoliare meo honore (idem dic de „ bonis fortunæ): sed, si istius amissio consequatur, per accidens solum „ consequitur. Igitur non apparet, quomodo duellum offerens sit injustus „ aggressor. Ubi autem non est aggressio, ibi non est defensio. „ B. Ex- „ si non nitatur ita, ut ea spoliatio fiat ei voluntaria secundum se: nititur ta- „ men ita, ut ei fiat voluntaria in causa, id quod in probatione hujus senten- „ tiæ abunde explicavimus.

266. Opponitur III. Ex eodem. „ Defendere se ipsum cum mode- „ ramine inculpatæ tutelæ ille duntaxat dicitur, quem alter invitum aggredi- „ tur, nec potest ullo modo vitare certamen; sed tenetur mori, vel cum gra- „ vi dedecore fugere, aut inavocem occidere. Atqui acceptans duel- „ lum, hoc casu potest vitare certamen: ergo defensor non est, qui ser- „ vet moderamen inculpatæ tutelæ: ergo culpam contrahet pugnando. „ B. Provocatum posse quidem evitare mortem, vel vitæ periculum: cum „ tamen jacturam bonorum evitare nequeat nisi pugnando, pugnabit cum „ moderamine inculpatæ tutelæ pro bonis suis; sicut qui cum prædone, invo- „ lante in pecunias, armis decertat, moderamen inculpatæ tutelæ adhibere „ dici-

(a) Tit. de Cler. pugn. n. 19. (b) De Charit. tract. 6. disp. 5. punct. 7. n. 8.  
(c) De Justit. l. 2. c. 9. n. 84. (d) Tom. 9. Consult. 88. n. 30.

dicitur in defendendis pecuniis; quamvis prædo ejus vitam aggressus non sit, nec vim corpori intulerit. Manet ergo in casu nostro *inculpata tutela*, non quidem corporis, sed *fortunatum*.

267. Opponitur IV. Ex eodem. "Non est licitum furari, fornicari &c., etsi minuetur Princeps, quoddam similia non faciat, accessum ad aulam vel honoratum officium &c. non sit habiturus; (addamus, etsi spoliationem bonorum minuetur): igitur neque licebit acceptare duellum, quamvis ex recusatione secutura sint ejusmodi damna. R. Hic ad eam quæstionem devolvimur, an duellum ex natura sua, seu *intrinsecè*, ut scholæ loquuntur, malum sit: sive an ita lege naturali prohibeatur, ut *licetè* committi nullo casu possit. Circa quod notandum, actiones quasdam morales hominum malas esse, quia prohibita sunt: e. g. opus servile tractare die dominico: alias autem esse prohibitas, quia sunt malæ jàm in se, veluti furari, blasphemare &c. Hæ actiones dicuntur *intrinsecè* malæ, ac lege naturali prohibita. Notandum tamen, inter has ipsas iterum discrimen intercedere. Quædam ab *objeto suo* accipiunt malitiam, ut hæc separabilis non sit, v. g. blasphemare. Aliæ verb sunt malæ, & repugnantes juri nature: quæ tamen cohonestari possunt, si jus exercendi tales actiones conferatur ab eo, qui conferendi potestatem habet. Sic auferre rem alienam, quod per se malum censetur, si fiat invito rei domino, mox cohonestatur, si is consentiat. Occisio innocentis e. g. Isaac, quæ per se mala reputatur, eo ipso cohonestatur, si DEUS, vitæ humanæ Dominus, consentiat. Unde hoc jus naturale *conditionatum* dicitur, illud *absolutum*. Qui hac ratione loquuntur, ait doctus recentior (a), nihil asserere videntur veræ doctrinæ contrarium: verbis tamen utuntur, vel ex quorundam imperitia ad falsas ideas formandas, vel ex aliorum malitia ad invidiam creandam aptissimis. In quo sensu autem illud jus *conditionatum mutabile* sit, vide apud SUARIUM (b), LAYMAN (c), & alios passim: item *n. sequente*. Quoddam jam de *duello* quæretur, ad quodnam genus prohibitorum pertineat, respondet CAJETANUS (d): "duellum cum bellum sit duorum, ex belli ratione considerandum esse. Et quoniam bellum non est malum ex genere suo, id est

A a 3

,, est

(a) R. P. Zach Dissert. 2. de Usur. §. 134. (b) De Leg. lib. 2. c. 35.

(c) Lib. 5. Tract. 10. part. 3. cap. 6. (d) in D. Th. 2. 2. q. 59. art. 8.

est, pro omni casu (multa namque sunt bella iusta, & unum ac multum non variat speciem) contingit procul dubio, esse bellum iustum inter me & alterum, sicut inter regnum & regnum.

In eundem sensum CASTROPALAO loquitur (a). Potest ergo duellum aliquando esse iustum, æquè ac bellum; & tale profectò in nostro casu censendum est, ubi duello quis redimitur honorem, conjunctum cum clade honorum; Deus enim ejusmodi provocato potestatem dedisse meritò creditur, defendendi res suas etiam per necem alterius. Si quæras, unde nobis innouerit hæc à DEO facta potestas? Ajo, ex eo, quod satis certò innouerit, similem potestatem concessam fuisse illi, qui à prædone liberare se nequit, nisi inito duello. Item illi, qui provocatus fuit ea intentione, ut recusaturus duellum fortunis exuatur (*Vid. n. 263.*) Par utrinque est conditio: par ergo etiam certandi facultas. Unde argumentum ex furto, fornicatione &c. petitum, sponte sua corrui; nam ad hæc datam fuisse à DEO licentiam, nemini innouit; ergo prohibita sunt illæ actiones, quin duellum prohibitum sit.

268. Opponitur V. ex Illustri B. WOLFFIO, cujus hæc est sententia (b): "*Omne duellum naturaliter est illicitum.*" Sic autem argumentatur: Qui duellum suscipiunt, vi imperunt sese invicem, vitam, & corpus exponentes periculo; quilibet verò hominum & vitam, & integritatem organi cujusdam corporis lædendi periculum cavere debet, quantum in se est, nullum habens dominium in vitam suam, nec in corpus suum, vel ullum ipsius organum; sive membrum: ergo duellum naturaliter illicitum est. Unde subjungit: quoniam duellum naturaliter illicitum est, ad idem non ineundum obligatus es. Quamobrem cum hæc obligatio *immutabilis* sit, adeoque qui te provocat, ab ea liberare minime possit, ad duellum provocatus id suscipere minime debes. Ita ille. Dum ego primò rigorem hujus conclusionis, *omne* duellum condemnantis, perpenderem, arbitrabar necessarium declarare, in quo sensu obligatio naturalis duellum interdicens (quam obligationem dari neque ego nego) *immutabilis* diceretur; ac primò quidem, juxta placita nostrorum

rum

(a) De Charit. tract. 6. disp. 5. punct. 7. n. 3. (b) J. N. P. V. §. 1091.

rum Theologorum, ac Jurisperitorum, Jus naturale, quod *num. precedente absolutum* diximus, nulla ratione mutabile est. *Conditionatum* autem dici potest *mutabile*, nempe *mutatione impropria, & indirecta*; eo quod per mutatas circumftantias, vel certas condiciones pofitas mutatur materia, vel objectum juris naturalis: confequenter nec jus naturale amplius obligat: vel potius pro circumftantiis mutatae materiae, vel fub hujusmodi conditionibus nunquam obligavit. Et hinc mutatio dicitur folum *impropria, & indirecta*. Sic in praefenti materia duellum jure naturali prohibitum effe fateamur: mutari tamen dicitur dicto modo ea lex, dum recufationem duelli grandis bonorum ftrages confequeretur, in hoc rerum articulo non obligare dicimus, imò nunquam obligaffe. (a) Quin, cum nunquam obligaverit, dici cum aliis potest, quod non fuerit mutata, & fit verè *immutabilis* (b), ceffabitque divifio in jus naturale *absolutum, & conditionatum*, de qua *n. precedente*. Jam verò in principiis Wolfianis obligatio naturalis dicitur, quæ in ipfa hominis, *rerumque effentia*, atque natura rationem fufficientem habet (c). Unde obligatio naturalis *necelfaria, & immutabilis* afferitur (d). " Quid enim mirum, fonant verba, quod illa quoque obligatio, quæ cum effentia, & natura hominis, rerumque ponitur, necelfaria fit, atque immutabilis? quamdiu itaque exiftent homines, & quamdiu in hoc exiturae funt res materiales eadem, tamdiu quoque obligabuntur naturaliter ad id, ad quod naturalis illorum obligatio fe fe extendit. "

Notandum autem ulterius, in quo fenfu dicatur obligatio naturalis habere rationem fufficientem in effentia hominis, & natura rerum immutabili. Scilicet non in eo fenfu, quali illud, quod femel malum, femper, & pro omnibus circumftantiis malum: quod bonum, femper necelfario bonum fit; ait enim alio in loco (e), actiones aliquas etiam propter determinationes accidentales in bonas vel malas abire poffe, & etiam has ipfas per hominis, *rerumque effentiam*, ac naturam bonas vel malas effe; quia fcilicet omnes actiones, quæ ad perfectionem vel imperfectionem noftram, ftatusque noftri tendunt, per ipfam *effentiam* atque naturam noftram, rerumque

(a) Vid. *Pichler*, aliòsque paffim in Prolegom. (b) Vid. *R. P. Zech de Ufur.* §. 123. (c) *J. N. P.* 1. §. 129. (d) *Ibid.* §. 130. (e) §. 123. *ibid.*

rúmque ad eas concurrentium ad eandem perfectionem vel imperfectionem tendunt (a). Ex quibus omnibus, operose combinatis, illud solum sequitur; duellum in iis circumstantiis, in quibus semel est malum & prohibitum, in iisdem semper esse tale; quia lex naturalis, pro illis circumstantiis prohibens, est *immutabilis*. Nondum autem apparet, quomodo semper & in omnibus circumstantiis malum, & prohibitum sit; quia potest ad imperfectionem nostram, statisque nostri tendere, ubi agitur de sola nota timiditatis vitanda: e contra ad perfectionem, ubi ad vindicandam necessariam sustentationem susciperetur, & sic nihilominus in utroque casu per ipsam hominis, rerúmque essentiam ac naturam jam malum, jam bonum esset in sensu declarato. Non ergo *omne* duellum naturaliter illicitum est.

Neque id unquam nobis in mentem venit, quod *provocans ab ea nos obligatione liberet*: sed provocatum liberat officium charitatis erga se ipsum, utpote cui optabilius est incertam pugnae aleam subire, quam certam necessariae sustentationis jacturam pati.

269. Opponitur VI. Concessa semel licentia comparendi ad duellum, ubi agitur de fortunis, extendetur faciliè ad alia damna e.g. dum sola dignitas, & officium periclitatur, remanentibus nihilominus opibus ad sustentationem necessariis: vel ubi de sola exclusionè ex societate, & commercio honoratorum agitur: vel ubi solus honor per illatam ignominiam labem patitur. Profectò nobilis mens atque ingenua non tam opibus tuendis studet, quàm servando honori. Sordidum est plus pro nummis, quàm pro fama laborare. E circulis honoratorum hominum proscribi, & veluti leprosum evitari, vel non posse comparere sine rubore, acerbius malum est, quàm aliquot florenorum millibus accidi rem familiarem. Officium dum perditur, solent ut plurimum etiam opes minui, & amitti jus frequentandi conventus nobiliores. Ergo concessam pro nostro casu licentiam ad alios extendere primum foret. Atqui hoc non tantum pugnaret contra sententias nostras tam præcedentes, quàm secuturas: sed etiam portam amplissimam aperiret duellis, invalidituris contra bonum societatis humanæ: ergo etiam in casu præsentis neganda est ea licentia.

R. Ca-



R. Casum, ubi amittere solum officium, aut dignitatem necesse foret recusato duello, cum ad statum naturalem non admodum pertineat, decidendum fore suo loco (*vid. n. 357.*). Neque diffiteor, circulis æqualium excludi acerbis animum rodere (si sensum nobilis animi spectemus) quam aliquot florenorum millibus accidi: at varia lenimina doloris sui exclusus ille invenit, & adjumenta, quibus accidendus noster caret, de quo *vide n. 368.* Sed & id notatum velim, non semper pro jactura aliquot millium florenorum avertenda licitum me duellum dixisse. Quæ debeat esse magnitudo damni, *vid. à n. 357.* Cæterum laudabile est, quod excellentes mentes non tam defendendis opibus studeant, quam servando honori: neque tamen conficitur ex hoc ad honorem affectu, licite cum duello defendi. In ratione defendendi latum discrimen est, quamvis in æstimatione honor adæquet, imò superet nummos, ferme uti suprà de vita diximus, occasionem dante illo syntagmate: *vita & fama pari passu ambulant.* *Vid. n. 241.* Perpendenda etiam veniunt argumenta, contra pugnam, honoris solius vindicem allata *n. 256.* ex quibus patebit, cur in nostro casu armata defensio conscientiam non lædat; læsura, ubi pro solo honore susceperetur.

270. Opponitur VII. EX NAVARRA (H) " Si possem occiden-  
do res meas salvare, deberem occidere provocantem: non tamen ad-  
mittere duellum; aliàs cooperarer peccato illius; cum enim ille peccet  
excundo ad duellum, & si ego evitato duello simpliciter occiderem,  
ille me non aggrederetur duello, jam videor per acceptionem duelli  
causa peccati illius. „ R. Hac via, si scilicet vel clanculum è medio  
provocantem tollerem, vel vi oppresso spiritum eliderem, non mihi fore  
rediturum deperditum honorem, & conjunctam bonorum jacturam non  
fore evitandam; quia soli justæ pugnae id privilegium sensus (sanum, vel  
insanum per me dixeris, de quo *vid. n. 215.*) hodierni aevi reservavit.

271. Opponitur VIII. Provocatus noster ob commissum duellum  
excommunicationem latæ sententiæ incurreret, ut pluribus explicabitur  
*Cap. VIII.*, ergo peccati reus sit oportet, & quidem aliunde contracti, quam  
ex violata lege purè Ecclesiastica; ergo jam in statu naturali. R. Si no-

Bb

ster

ster provocatus à peccato immunis est, nego, quodd excommunicationem incurrerit, quæ non fertur nisi ob peccatum, & quidem grave, ut docet Communis; & non nisi contra duella, jam ante Constitutiones Pontificum, lege naturæ prohibita, ut fusè ostendit PEREGRINUS (a).

272. Opponitur IX. Saltem periculum æternæ salutis amittendæ à duello provocatum nostrum deberet retrahere; oritur autem periculum præsentissimum ex odio, & vindicta ebulliente in provocato, dum veluti coactus pugnat. Hoc in statu, qui salvabitur? dilectio inimicorum etiam lege naturali præcepta est; quia diligere debes alterum, eo quodd homo, non quodd amicus sit. Et hæc obligatio nunquam tollitur, quamdiu vivit homo, ut demonstrat WOLFIIUS ex puris principiis juris naturalis (b). Jam verò quomodo dilectio inimici subitò cor occupabit, ubi quis lethali vulnere saucius, frendens, ac spumans spiritum evomit? R. Quavis hoc difficile sit viro, qui aliàs impotentis animi, nescit suis affectibus dominari: vel ei, qui præter expectationem laecessus ad pugnam sui colligendi spatium non habuit: viro tamen aliàs probo, qui post tentata alia omnia, non nisi necessitate ferrea adactus, animo bene comparato, in arenam descendit, impossibile non est, deposito rancore, datæque coram DEO venia, pugnare sine æstu, *ladente conscientiam*; non enim omnis ardor, quo nostra contra raptorem defendimus, peccatum est. Vidi talem, qui, Sacris antè in templo munitus, & deposito ad Christi pedes odio, certamen subiit, dum id ei licere ex conscientia suæ arbitro intellexit, qui tamen ego non fui. Videre etiam plerumque est, pugiles post pugnam mox redire in gratiam, & junctis dextris amicitiam firmare, veniam etiam generosè concedere, si cui eorum lethaliter saucio moriendum sit; ita ut appareat, non tam incitante odio pugnasse, quàm ut pseudo-legi facerent satis. Itaque ob odium *plerumque* periculosum utcumque sit duellum: non *semper* erit, saltem non ita, ut periculum sit valde propinquum, & removeri non valeat. *Vid. etiam dicta n. 219.*

273. Opponitur X. Pessimi exempli res esset duellum ejusmodi, unde complures relaxatæ conscientia homines sibi posthac non ducerent  
scru-

(a) De Duell. q. 3. (b) Wolf J. N. p. 1. §. 682.

scrupulo id, quod ab aliis factitari vident. Obligamur autem ruinam spiritualem proximi, seu *scandalum* evitare: ergo & duellum. R. Si constet in vulgus, in quas angustias conjectus fuerit Hector, id quod facile constare porcit, malo exemplo neminem offendet. Vidi ego in casu, cujus antè mentionem ingessi, populum frendere non contra Hectorem, sed contra Senatum bellicum, qui Hectorem malè destituerat.

## ARTICULUS II.

*An ad servandas unà cum honore opes etiam liceat provocare?*

**D**ifficiliores invenio Doctores nonnullos in asserenda licentia offerendi duellum, quàm accèptandi (a). Nec prorsus immeritò; tunc saltem mitius crimen est acceptantis, quàm offerentis, dum hic, nulla vera injuria læsus, alterum ad pugnam, vel invitum adigit. At maneamus in casu nostro, inversa solùm questione.

### §. unic.

*Affirmatur Licentia.*

274. *Statuitur casus,*

275. *In quo par est ratio cum casu superiore.*

276. *Par ad Objectiones responsio.*

277. *Par confirmatio ex adversario rum petita principiis.*

274. **F**ingamus ergo, Hectorem, nulla data causa, petulanti scommate, aut atra calumnia impetitum fuisse à Leandro: unde, nisi ab illata macula se purget, grave damnum in bonis fortunæ cogatur perferre. Nihil omittit Hector, ut Leandrum permoveat ad sufficientem satisfactionem, dandam vel petita venia, vel cantata palinodia, vel exhibitio alio humanitatis signo, quo macula in persuasionem hominum deleta censeatur. At nihil proficit, perstat Leander in sua protervia, fastuoso supercilio rejicit, ridetque malè mulctatum Hectorem, solo duello satisfacturum se

Bb 2

dicit:

---

(a) *Viva Trutin. ad propof. 2. Alexand. VII. n. 6.*

dicat: quamvis probè perspectum habeat ingens, quod hic laturus erit, damnum, si quidem duellum recuset pro nota suæ conscientiae teneritudine. Aliud ergo jam superest Hæctori nihil, quàm ut ad pugnam invitet Leandrum, aliàs misero sibi impunè insultaturum. Rebus ita constitutis

275. Ajo, licere Hæctori provocare Leandrum, sicut in casu priore licebat acceptare. Cohæret, nî fallor, utraque hæc doctrina: nec quemquam scio Doctorum, qui, concessa prima, *expresse* hanc secundam negarit. Ratio ubique par; scilicet necessaria bonorum defensio contra eum, qui per nefas non desistit dare causam damno, eamque tollere renuit mitiore satisfactione, uti deberet. Ejusdem rationis sunt, ajunt VALENTIA (a), & PIGNATELLUS (b), ad duellum provocare, ac illud accipere, quoties necessariae defensionis causa utrumque fit.

276. Par etiam est ad oppositiones responsio; nam si objicias, Leandrum non velle damnum Hæctoris: repono, hoc damnum ei esse *voluntarium in causa*; scilicet in offensa, quam præcivit, juxta stylum suæ communitatis elui non nisi duello ab Hæctore posse, si quidem ipse humiliore ratione satisfacere eidem detrectaret. Est simul *voluntarium indirectè*, ut vocant; quia damnum causat omittendo id, quod facere deberet, scilicet satisfacere modo alio.

277. Par quoque est confirmatio hujus sententiæ ex Principiis Clarissimi Adversarii, *suprà* n. 263. citati; is enim in superiore casu concessit, Leandrum fore injustum aggressorem, si ideo principaliter ad duellum provocet, ut, cum sciat provocatum non compariturum, hac via ipsum spoliaret bonis: tunc, ajebat, licitam esse acceptationem, & *oblationem* duelli ad defensionem fortunarum, si alia ratio hæc defendendi non occurrat. Ergo fingamus, Leandrum ideo convicium Hæctori fecisse, ut duellum recusantis bona vel pessumdaret, vel sibi acquireret. In hoc casu non negabit Hæctori facultatem provocandi: imò hoc, nî fallor, innuit dicendo, licitam esse acceptationem, & *oblationem* duelli; non enim posset *oblatio* ob illam perversam intentionem locum habere, nisi fingatur, Hæctori, ex hac intentione læso, necessitatem incumbere *offerendi* duellum.

Hoc

---

(a) 2. 2. disp. 3. quæst. 17. punct. 1. (b) Tom. 9. Consult. 88. n. 51.

*Art. II. Provocando ad servandas cum Honore opes. §. unic. 197*

Hoc dato , ajo , ut in casu præcedente dixi , etiam absente ea intentione licitum esse duellum offerre : modò Leander præviderit damnum secuturum ex ignominia , & satisfacere alio modo omitat . Licitè enim aggredior armis eum , qui damnum mihi inferre non desistit , quamvis hoc ei damnum tantùm sit *voluntarium in causa* , & *indirectè* ; præcipuè cùm nemo sit , cui damnum sit *voluntarium secundùm se* , & *directè* ; sic enim ipse præcipua causa damni est.



## CAPUT V.

### AN ASSERTA PRO STATU NATURALI LICENTIA APPLICARI ETIAM POSSIT STATUI CIVITATIS MALE ORDINATÆ.

**H**Actenus desudatum est in statu naturali hominis, descripto n. 192. cujus præcipuus character erat, carere iudice ac superiore quacunque potestate, quæ succurrat læso in honore. Hunc modum tractandi cur assumpserimus, rationem dedimus n. 170. Quid licitum, vel vetitum sit pro tuendo honore homini, in eo statu degenti, id expendere hucusque præcipuus labor erat. Unde jam doctrinæ ordo postulat, ad statum *civitatis*, & quidem *malè ordinatæ* gradum facere, ac quærere gemino Articulo, an asserta pro statu naturali licentia applicari etiam huic statui possit? & an *tui*?

### ARTICULUS I.

*Statuitur Sententia affirmans posse licentiam applicari etiam  
statui civitatis malè ordinatæ.*

**T**Repido, ut fatear, pede vadum hoc tento. *Mihi satis est*, ait P. BÖCKHN, *hanc doctrinam retulisse, quæ altiore decissionem exigit* (a). Equidem etiam mihi satis esse posset: at, spero, nemo vitio vertet, si modestè mentem aperiā, paratus dedoceri errorem à quocunque, qui pariter modestè id fecerit. Itaque §. I. explicabo statum quæstionis. §. II. Afferam argumenta pro mea sententia. §. III. Respondebo ad argumenta contraria.

§. I.

---

(a) Jur. Can. in Tit. de Clericis pugn. n. 7.

## §. I.

## Explicatur status quæstionis.

278. *Definitio civitatis.*279. *Divisio in bene, & male ordinatam.*280. *Male ordinatam in hoc sensu quidam existimat nullibi existere.*281. *At contrarium ostenditur ab experientia.*282. *Quid ergo consilii?*283. *Statuitur sententia.*

278. **E**st *Civitas* societas perfecta cum debita parentium, & imperantium subordinatione, ad civilem beatitudinem coadunata (a). Igitur non dicitur civitas à muris aut ædificiis: sed à pluribus civibus, in unum congregatis, in quo sensu CICERO pro Muræna, *Roma*, inquit, *urbs est, civitas eam insolit.* Perfecta societas dicitur, ut differat à societatibus imperfectis, scilicet à societate conjugali, à familia, & statu herili, quæ ad bene, beatèque vivendum sufficientes non sunt, ut demonstrat ARISTOTELIS (b). *Debita imperantium & parentium subordinatio* est vinculum, quo coheret civitas, & veluti vitalis spiritus, quem tot millia trahunt ad salutem, & vitam communem. Et hoc est, quod potissimum ad propositam materiam facit; in statu siquidem civitatis suprema datur potestas, quæ puniendo lædentem satisfaciat læso, omnemque prohibeat vim, privata auctoritate inferendam: quo præsidio destituitur status naturalis inter æquales vel personas, vel familias. *Ad civilem beatitudinem coadunata est*, ut scilicet, præter alia commoda, quisque securitatem habeat ab injuriis, quam præstare debet suprema potestas, penes quemcunque dein pro varietate regiminis resideat. Huic dum me subjicio abdicata libertate mea naturalis saltem quoad exercitium, præsidium vicissim mihi, & defensionem stipulor pacto expresso, vel tacito. Sive itaque forma regiminis Monarchica, sive Aristocratica, sive Democratica sit, penes quemcunque suprema potestas resideat, hujus est vindicare me, dum vel in corpore, vel fortunis, vel fama damnum mihi inferitur: & ita illius est me vindicare, ut mihi post delatas, auditasque querelas omnino vetitum sit privata auctoritate

(a) *Schmier* Jur. Univ. I. 1. c. 2. n. 137. (b) *I. Pol.* c. 1.

rate vim facere : secus enim rueret ordo, invalesceret perturbatio, & ipsa civitas desineret.

279. Inter ipsas civitates aliquas minùs bene, alias meliùs ordinatas atque constitutas cernere est, ubi nempe major vel minor legum bonitas, earumque observantia viget. Atque ut de duello hodierni moris loquar, videmus plerasque, vel omnes saluberrimis quidem contra hoc malum munitas mandatis : at in eo potissimum discrimen notatur, quòd in una civitate stet sua his legibus autoritas, alibi neglectui habeantur : suprema potestas alicubi vigilet, alicubi dormiat : hoc in loco nihil omittat, ut monomachias vel impediatur, vel puniatur : alibi autem, mandatum scripsisse contenta, de eo in usum deducendo parum curet. Boni Superi ! si ea adjuncta, quæ ex quinquagenis propè mandatis collecta, *Cap. II. art. I.* exposuimus, adhiberet supremus quivis Princeps, aut in republica senatus, easque reis penas infligeret, quas iustissimè statutas *Cap. IX.* recensēbimus, næ rarum nobis animal monomachus foret. - At ea est multorum Magistratuum socordia, ut jure merito censeantur indigni primo, quem in civitate occupant, loco.

280. Optarem, ut præclara illa opinio, quam de Magistratibus hodiernis fovet R. P. Бёкхнѣ (a) etiam digni essent omnes. " Indubitatum tenemus, ait, casum ejusmodi, quò ob defectum alterius medii  
 " usus hujus sententiæ liceat, posterioribus saltem sæculis, quibus vis  
 " omnis privata in Germania interdicta est, vix adhuc fuisse datum, nec  
 " unquam facilè deinceps dandum. Siquidem, dum communi omnium  
 " Imperii Statuum consensione omnes violentiæ, ac nominatim duella  
 " sunt prohibita, certè Imperii Status, modò implorati, hujusque propriæ  
 " sanctionis, quam sine læsione honoris sui ipsi neglectim habere  
 " haud possunt, admoniti fuerint, obligationi suæ haud deerunt. Sed  
 " esto, rem ab eis dissimulari, confugium ad supremum Imperii Monarcham  
 " patet, de cujus Majestatem citra summam temeritatem, ac sacrilegium  
 " asseruerit nemo, quòd nolit repellendo tanto flagitio, cujus ex-  
 " tirpationi severissima illa Imperialis Constitutio lata est, sua autoritate  
 inter-

(a) Loc. cit.



intervenire. Si difficilem dicas accessum, prudenter id credi nequit si-  
mili in negotio, præsertim quando implorans vir illustris est: erit saltem,  
qui supplicem tunc libellum offerat, ac, si nullum repereris, Diocæ-  
seos Ordinarium require, efficiet hic, ut preces tuæ ad competen-  
tem locum perveniant. Ipse Pontifex, si ad eum recurreris, pro pa-  
terna sua vigilantia, ac sollicitudine id curabit. Hæc media, si tenta-  
veris, moraliter erit certum, ita tibi consulendum fore, ut nec hono-  
rem, nec officium deperdas: nec à quoquam propterea sine gravi pœ-  
na tibi possit illudi. „

281. Veneror ego consilium clarissimi Authoris; & precor, ut  
eum, quem pollicetur, successum prosperum fortiat. Quid contigerit  
in variorum Principum terris, mox narrabo, dandi speciminis causa. A  
Principibus ad Imperii Comitia, vel Sacram Cæsaream Majestatem; vel  
ipsam Pontificiam Sedem confugisse quemquam, equidem mihi non con-  
stat: quo autem effectu id quis facturus fuisset, lucubrationis meæ lecto-  
ribus dijudicandum relinquo. Atque, ne detineamur hoc loco, & inof-  
fenso pede pergere in tractatione liceat, singamus Hectorem quemdam  
has fores pulsare vel non potuisse: vel etiam his pulsatis rerum suarum  
jacturam non evitasse. Jam de casibus particularibus ut loquar.

Noveram ego alibi terrarum ante annos complures virum nobilem,  
Centurionem officio, qui, ubi temere sibi verbulum elabi est passus, inno-  
xium, ut credebat, malignè autem ab audiente Sub-tribuno exceptum, il-  
lico gravi convicio ab hoc percussus, eò redactus est, ut vel gladio se pur-  
gare necesse habuerit, alterumque provocare, vel abdicato officio legionem  
excedere. Conscientiæ suæ metuens opem quærebat, ubi debebat, scili-  
cet apud senatum militare in Regia Principis, sub quo stipendia ambo  
merebantur. At rescripsit Senatus, se quidem duellum non imperare: nec  
tamen cogere etiam posse commilitones; ut militent cum eo socio, qui  
pugnati declinet. Et en! post integri anni tricas, tandem bonus Centurio  
duellum subire statuit. Obvio in platea Sub-tribuno stricto suo gladio si-  
gnum pugnandi dat, à quo lethaliter vulneratus paucas post horas expira-  
vit. Sub-Tribunus asylum quæsit; ubi postquam latuerat trimestri spa-  
tio, impunitus non solum libertati restitutus, sed & in locum occisi cen-  
turie præfectus est.

Casum non multum ab similem narrat P. SEYBOLD (a): "Cajus, obscuro genere natus, sed officio bellico nobilis, ad quod sua virtute eluctatus fuerat, è nobilissima quadam familia Germaniæ uxorem duxerat. Nescio, qua occasione dein idem Cajus ab alio quodam magnæ nobilitatis Officiali bellico, sed officio bellico non multum supra Cajum eminente, arundine ignominiosè est percussus. Nobilitatem, invaloris re- veritus, nulla usus est defensione, & resistentia Cajus. Vulgatur res in exercitum, Officiales reliqui contra eum protestantur, negant, cum eo stare milites velle, qui timidus alterius percussioni, licet parvis ferme dignitatis militaris esset, non resistit: cum ceu imbellem ex castris ex- cisse jubent. Princeps Imperii, in cujus cohorte percussus Centurionem agebat, ab eo imploratus, reponit, se ipsum non remove ab officio: cæterum cogere Officiales, & milites aliorum Principum se non pos- se, ut cum eo stent in armis, eumque tolerant: ipse sibi prospiciat. Frustra omnia. Aggressor interim ad Rhenum ex Hungaria cum sua turma vocatus est. Remedium recuperandi officium supererat nullum, nisi monomachia cum offensore. Quid juris? an totam vitam, officio jam expertis, agere inter rusticolas cogetur Cajus, atque redigi in sta- tum antiquæ fortunæ, unde ad hanc dignitatem tanto conatu fuerat eluctatus, perpetua cum paupertate luctaturus; prædia enim nulla, cen- sus nullos habebat, unicè ex officio suo militari se, uxoremque nobi- lem sustentans. An uxor nobilis inter rusticas jam fæminas marcido frusto panis, vestitu detrito, & vulgari sit contenta? difficilis eventus, in quo tamen Cajum, inter rusticolas cum uxore sua in pago degentem, ipse conspexit, officio suo militari orbatum. Ita P. SEYBOLD.

Huc referri potest ille infelix Bellidux, qui, duelli evitandi causa, in Moscoviam usque ex Germania se contulit. At neque ibi stationem invenit, dum ab adversario suo litteris denunciatus, redire opus habuit, & duello sibi fortunam servare. *Vid. n. 75.* Alius provocatus ad urbem nen- trarum partium, dum parere detrectat, extruditur à sua tumultuante legio- ne: & tandem misso ex curia mandato jubetur, eò se conferre, & ab an- tago-

(a) *Dicæomach. p. 2. sect. 4. §. 1. h. 14.*

agonista poscere, ut scommatis in se facti veritatem demonstret. Et quis adeo bardus est, ut non intelligat sensum hujus mandati?

Fuit Bohemus quidam de Comitum illustri genere in aula externa, qui, dum ad Principem querelam deferret de convicio in se totamque nobilitatem Bohemicam facto, aliud responsi tulit nihil, quam ut demonstraret, quam strenuus sit nobilitas Bohemica. Satis dictum. Pugnatum ab ambobus fuit prope Regiam, inspectante ex composito Principe. Atque utinam non sæpius acciderent similia, belli præcipue tempore in castris, ubi supremi præfecti vel tegunt silentio minorum duella, dissimulanda, ut ajunt, acuendæ fortitudinis causa: vel subitæ rixæ nomine palliant. Væ autem illi, qui renueret comparere provocatus, aut provocare accepta injuria.

282. Jam in ejusmodi rerum articulo constitutus vir probus civitatis quidem membrum est: sed profecto *civitas male ordinata*; nec bono illo frui jam potest, defensione scilicet honoris, & opum suarum contra vim privati hominis, quod tamen pacto tacito sibi quisque stipulatur, qui se potestati civili subjicit. In *civitate bene ordinata* si degeret, utique vi & armis abstinere deceret, quamdiu aliquid præsidii ab iis sperare licet, qui justitiæ gladium gestant. At cum videat hinc inimicum, nulla vera injuria læsum, flecti nescium, insistere provocationi: vel negando satisfactionem pro facto convicio, provocandi necessitatem imponere: illinc autem experiatur, frustra se tribunalium fores pulsare, in medio se vado destitui cum irreparabili non honoris tantum, sed & dignitatis, atque dependentis inde sustentationis necessariæ jactura; quid, quæso, ita inter saxum & saxum hærenti consilii suggerendum? Consulendum sanè, ut amore sanctæ pacis, ad Christi patientis exemplum, ærumnas potius ferat, quam ut Collegam, sèque ipsum in ultimum discrimen adducat, hoc, inquam, consulendum, omnique energia inculcandum est. Quod si tamen consilio huic morem gerere grave nimis accadat, &, an præcepto gravi ad id adstringatur, interroget, promittatque, se absque ebulliente odio (*vid. n. 272.*) cum adversario confecturum negotium, sua potius tuendi, quam alterum lædendi causa: quid responsi dabit æquus rerum æstimator Theologus?

283. Qua in re, uti & in cæteris, consultissimum judico, nihil dare immoderato rigori: nihil etiam molli indulgentiæ. Per hanc peccata non pauca irrepunt: illo lassati fideles totum jugum impatienter excutunt. Sapientissimè hodiernus SS. Pontifex BENEDICTUS XIV. profitetur (a), se non magis ab opinionibus laxis, quàm ab iis, qua nimium, & insolerabilem rigorem inducunt, alienum esse. Itaque ajo, me non posse damnare Theologum, qui viro illi militari, aut nobili declaret, quòd absque gravi conscientiæ noxa acceptare duellum possit: vel etiam, si ita res ferat, offerre. Adeoque quod in Statu Naturali licitum esse diximus, etiam in hoc Statu Civitatis male ordinata certo modo licitum asserimus. Jam probanda erit doctrina.

## §. II.

## Argumenta pro sententia affirmante licentiam.

284. *Rationem extrinsecam quod attinget, Authores antiquiores de hoc casu silent.* 288. *Ratio secunda; quia in illis antiquis quis redigitur ad statum naturalem.*  
 285. *Recentiores quidam nostram tenent sententiam.* 289. *Unde patet, quæstionem consultò antè juxta statum naturalem suis se examinatam.*  
 286. *Quidam contrariam.*  
 287. *Ratio intrinseca prima est; quia nulla lege prohibetur tale duellum.*

284. **N**ON ego discutiam hoc loco, quantum in quæstionibus moralibus Authorum numero, & præstantiæ sit deferendum: recensere tamen oportet, quid circa dubium præsens senserint, sentiántque adhuc. Noveris itaque, Authores antiquiores casum nostrum non attigisse; usui enim ævi sui servientes, iis ferre duntaxat duellis calamos suos commodârunt, quibus in judicio lites dirimi, vel inter privatos alia dissidia finire solebant (*vid. n. 160.*) donec erectis tribunalibus delira hominum fortitudo sanguinem suum jam non litigiis, sed honori libare cæpit, summo contemptu decreto in eos, qui inultam ignominiam ferrent. Tum iterum  
 multi

(a) In Epist. Encycl. de extensione Jubilæi, quæ incipit: *Celebrationem magni Jubilæi*. dat. 2. Jan. 1751.

multi Jurisperiti, ac Theologi sententiam dixere oppidè faventem hujus generis monomachis, uti videre est apud SANCHEZ (a), & BANNER (b), donec fulmen Varicanum, vibratum die XIV. Septembris anni MDCLXV. ab ALEXANDRO VII. summo Pontifice, latè terrorem sparsit, ubi proscripta est illa propositio: *Vir equestris ad duellum provocatus potest illud acceptare; ne timiditatis notam apud alios incurras.* Ab eo tempore reprobârunt pugnam, pro solo asserendo honore, aut eluenda ignominia susceptam. Econtra; docuere, sicut *raptorem bonorum* occidere fas est: sic etiam licitè duello contra eum eadem bona defendi, si alia ratione servari nequeant. Non faciliè autem quispiam, si LAYMANUS excipias, qui pridem ante annum MDCLXV. præclara sua opera ediderat (c), discessit casum, quo non rectè opes, sed primò honor, inde opes per connexionem invaderentur. Ultimis temporibus huic quæstioni operam dare inceperunt nonnulli.

285. Hos inter nostram sententiam apertè tenent P. REIFENSTUEL (d), P. SEYBOLD (e), P. PICHLER, P. HUTH (f), aliique necdum impressi, teste SCHWARZIO. Item P. SPORER (g), saltem quoad licentiam acceptandi provocationem, adducens etiam NAVARRUM. Huic numero accensendus quoque venit celeberrimus LAYMANUS (h), qui censet, licet ordinariè provocatus ad duellum, non possit id acceptare, ne ignaviæ, aut timiditatis notam apud alios incurrat: tamen si in rarissimo casu eo loco res sita est, ut miles in exercitu, vir equestris in aula Regia officio, dignitate, Ducis, aut Principis favore ob ignaviæ suspicionem deberet excidere, nisi provocanti se sistat, non audet damnare eum, qui meræ defensionis gratia comparet. Non equidem dicit LAYMAN, posse etiam offerri duellum in ejusmodi casu: at à nobis jam suprà (d n. 274.) ostensum est, quod par sit utriusque ratio. Neque exprimit idem Author satis, an jactura officii, & dignitatis, etiam *separata* à jactura bonorum necessariorum, sufficiat ad licentiam: vel an sufficiat tunc solum, quando *conjuncta* est, ut plerumque esse solet: interea meritò ejus autoritas firmandæ nostræ sententiæ adhibetur.

(a) L. 2. Summæ. C. 39. (b) 2. 2. q. 64. art. 7. dub. 3. (c) Mortuus Constantiæ A. 1635. (d) Jur. Can. ad tit. de Cleric. pugn. n. 20. (e) In Dictionaria P. II. sect. 4. §. 1. n. 14. (f) In tit. de Cleric. pugn. (g) Theol. Moral. tract. V. in §. Præcept. (h) L. 3. tit. 3. p. 3. c. 3. n. 3.

286. Ex his, qui præsentem casum ex instituto tractarunt, contrariam sententiam tuerentur P. SCHMALZGRUEBER (a) : non tamen apertè loquitur de jactura talis officii, quocum conjuncta est necessaria sustentatio pro vita honestè ducenda. Huic accedit P. SCHWARZ (b). Ad quorum argumenta suprâ responsum fuit, dum in statu naturali versabamur : neque singularem difficultatem pro statu civili facessunt. Ea responsa nostra, si unâ cum fundamento nostro perpendantur (*vid. à n. 259.*), deprehendemus, solidè dixisse PICHLERUM : *omnes eos Authores pro hac doctrina nostra adduci posse, quotquot duellum permittunt ob necessariam defensionem rerum temporalium magni momenti, quorum sunt plurimi*, inter alios LESSIUS (c) adducens BANNESIUM, & ANGELUM ; WIESTNER &c. non enim videtur pertinere ad rei summam, sive rectâ petentem fortunas meas duello compescam : sive petentem rectâ honorem, & per connexionem fortunas. Recole alibi dicta de damno *voluntario secundum se, & voluntario in causa n. 259.* Authores alios, qui non de industria casum, his vestiturum adjunctis, examinârunt, qualis cum aliis est PIGNATELLUS (d); hoc loco præterimus.

287. Omissa jam autoritate, rationes, ut vocant, *intrinsecas* afferre juvat. Prima sic habet : nulla lege in statu civitatis pro nostro casu prohibetur duellum. Non lege *naturali*; hæc enim tunc solum prohibet duellum cum prædone, & (quod nobis idem est *juxta n. 259.*) cum provocante suscipere, si aliud remedium præcavendo ingenti damno superfit. Non lege *positiva Divina*, expressa illo præcepto : *non occides* ; juxta communem enim doctrinam Patrum, ac Doctorum præcepta Decalogi (si tertium fortè excipias) sunt mera declaratio legis naturalis, quam pridem in cordibus hominum scriptam, cum invalescens malitia propemodum deleffet, lapideis tabulis incidit DEI digitus. Quodsi ergo ante Decalogum lex naturalis tale duellum non prohibuit, etiam per Decalogum prohibitum, non fuit. " De jure divino voluntario perfectiore, *Evangelico* scilicet, plus est difficultatis, ait GROTIUS (e). Quin DEUS, cui plus juris est in vitam nostram, quàm nobismet ipsis, potuerit patientiam eò usque exigere, ut etiam privatim in periculum adducti occidi deberemus potius, quàm

(a) In tit. de Cleric. pugn. (b) I. N. p. 1. tit. 4. instrukt. 3. §. 1. (c) De Just. & Jur. l. 2. c. 9. n. 48. (d) Consult. §§. tom. 9. (e) L. 1. c. 3. §. 3. n. 1. J. B. P.

quàm occidere (adde etiam: *privari bonis*) ego non dubito. An autem “voluerit nos eousque obstringere, id est, quod inquirimus. Sed verior, “& receptior est sententia, quod talis patientia non sit in obligatione. “Neque lege *humana* Ecclesiastica aut civili talis obligatio, ferendi scilicet damnum, imponitur. Non *Ecclesiastica*; nam Concilium Tridentinum, GREGORIUS XIII., & CLEMENS VIII. non voluerunt damnare duella, quæ jure naturæ licita sunt: sed solum, quæ hoc jure sunt prohibita. Ita SCHIARA (a), adducens SAYR. & FILLIUCIUM. Eadem est mens LUGONI (b); cùm enim Tridentinum dicat, *detestabilem duellorum usum, fabricante diabolo fuisse introductum*, colligunt ex his verbis Doctores, in iis casibus, in quibus antea licitè acceptabatur, posse etiamnum acceptari. Idem censendum est etiam de Constitutionibus Pontificum, ut tener LUGO, adstipulante MOLINA (c), & probat pluribus speciatim de Constitutione CLEMENTIS VIII. PEREGRINUS (d). Atqui duellum in nostro casu enarratum, ante Tridentinum prohibitum non erat: ergo neque nunc prohibitum est per Constitutiones Ecclesiasticas. Nec denique obstat lex *civilis*; non enim video, ait PUFENDORF (e), quomodo Magistratus jure irasci possit illis, qui more & ex opinione vulgi existimationem suam asserunt, ubi ille tales injurias insuper habuit. Nulla ergo lex obstat, quo minus duellum hoc etiam in statu civili licitè suscipiatur. Unde non capio, quomodo CARAMVEL dicat, in casu suo, de vindicatione honoris allato n. 245. duellum licitum quidem esse jure naturali: prohibitum tamen Civili & Canonico. Neque id capit CARDENAS “(f), si enim, ait, invasus habet jus naturale se defendendi, “non est facile intelligere, quomodo leges humanæ id possent prohibere. “

288. Jam etiam ratione altera stabilienda nostra est assertio. Ejusmodi homo, de quo casus noster loquitur, vel non volente, vel non valente succurrere Magistratu, videtur repositus esse in statum naturalem. Unde, quæ in isto licent, licebunt etiam homini, constituto quidem in statu civili, jam autem relicto suæ naturali libertati. Hoc eruitur ex principiis doctissimorum juris naturalis Interpretum. PUFENDORF (g) de eo, qui inimi-

(a) Theol. Bell. l. 1. diff. 19. n. 14. (b) Disp. 10. sect. 8. n. 171. (c) Tract. 3. disp. 17. n. 6. (d) De Duell. q. 3. (e) L. 2. c. 5. §. 12. J. N. (f) Crif. Theol. Dissert. 16. c. 2. art. 5. n. 53. (g) J. N. l. 2. c. 5. §. 7.

inimicum gravem sibi injuriam moliri advertit, ait, nequaquam ei licere machinationem occupare: sed ad communem imperantem rem esse deferendam, atque ab hoc exigendam cautionem. Tum addit: *hanc ubi Judex mihi denegaverit, tunc eo modo salutem mihi meam licebit expedire, acsi in libertate naturali forem constitutus.* Atqui etiam in nostro casu Judex mihi denegat cautionem, ac præsidium: ergo &c.

Grotianam doctrinam, quam adoptat etiam P. SCHMIDT, optimè exponit WOLFIIUS (a) verbis sequentibus. " In civitate judicia succedere in locum belli privati: & jus belli, natura hominì competens, quoad exercitium sublatum, aut, si mavis, non tam jus belli, quàm exercitium ejus sublatum est. Quòd si, qui in civitate coeunt, aut postea eidem se associant, jus belli abdicarent, eodem quoque uti in nullo casu possent; usus enim ejus, quod non habes, nullus est. Enimvero, cum saltem in hoc consensisse, aut consentire intelligantur, quòd in tuendo, & persequendo jure suo Judicis ope uti velint, exercitium quoque Juris belli proprium sibi reservârunt eo in casu, quo Judicis copia haberi nequit. Bellum itaque privatum in casu isto injustum non est; cum gerentes utantur jure suo. Tum gradum promovet. *Judicium cessat*, ait ex GROTIO, *momentanè*, quando Judex expectari non potest sine certo periculo, aut damno, ut dum nos prædo invadit. *Continuè autem cessat*; si Judex non adsit, qui controversiam decidere possit, vel velit. Et quidem *jure*, si versemur in loco, ab impetio Civili vacuo, e. g. in insula vacua. Vel *facto*, si Judex *cognitionem causæ apertè rejecerit, nec ab eo detur provocatio ad superiorem.* Quamobrem cum bellum privatum licitum sit, quando judicia *cessant*, in his quoque exemplis licitum erit. Sollicitè dein mœnet. Quando huc refertur, *si Judex cognitionem causæ apertè rejicit*, justitiæ *denegationem* non esse confundendam cum *protractione* ejusdem. „ Ecce ad cessationem judicii, & licentiam belli privati refertur etiam casus, quo Judex cognitionem causæ *apertè rejicit*. Et quid egere aliud Judices, ac Magistratus illi, de quibus suprà factum non unum enarravimus n. 281. ? Nónne *apertè* *reje-*

(a) P. §. J. N. §. 561. 562. 563.



*rejecerunt cognitionem causa, & denegarunt justitiam? Quid aliud sonant illa verba, quæ auctori rescribunt: Tu tibi consule, nos cogere non possumus commisiones, ut tecum militem &c.*

289. Patet ex adducta ratione, cur antè totam quæstionem in statu naturali ventilaverimus, quàm ad statum civitatis veniremus. Apparet etiam, operam bene locare eos Authores, qui omnem de jure & moribus doctrinam ad leges naturæ primò examinant. Audiui olim virum doctum multo cum desiderio optantem, ut quis Theologiæ moralis doctrinam, ad prima sua fundamenta reductam, orbi exhiberet. Deprehendi ego postea, ea inveniri ut plurimum in doctrina juris naturæ, separatim stabilita.

### §. III.

Respondetur ad argumenta contraria. -

290. Oppon. *Sequitur perturbatio.*

291. *Negligentia Magistratus non potest dare jus ad duellum:*

292. *Secus damnari non poterunt duellum la Veterum.*

293. *Doctrina hac affinis est propositioni damnata:*

294. *Et evertit finem Legis Ecclesiasticae.*

290. **O**pponitur I. Gravissimæ perturbationis periculum, timendum civitati, si ob negligentiam judicis, malè fungentis officio, privata sibi quisque auctoritate jus dicere ausit. Pronum utique est conjectare, plurimos fore, qui, quamprimum judicem in quacunque causa minus sibi faventem crediderint, aut partes suas remissius tueri, mox, conquærentes de denegata sibi justitia, vi aperta, vel artibus occultis sua sibi audebunt jura asserere, ac propulsare damna. Credent se repositos esse in statum naturalem, in quo suum cuique tribunal domi suæ est. Chaos inde timendum, cui præpediendo utique bonus civis jus suum privatum amore boni publici immolare in casu particulari deberet. Adhæc (quod bene notandum) non exspectabunt viri militares, donec apertè eis denegetur justitia: viso semel, iterumque exemplo, vel cognito stylo curiæ bellicæ, quamprimum contumelia insonuerit, ad duellum proruent, reputantes secum, quòd à Magistratu deserti, repositi jam sint in statum naturalem. En fontem uberrimum pugnarum, & cædium. R. Tunc equidem timendum foret civitati grave

De

peri-

periculum, si ob *qualemcunque negligentiam* judicis jus sibi privata auctoritate dicere licitum foret: non item si pro eo casu solum liceat, in quo *apertè denegatur justitia* à Principe, vel supremo ejus consilio, à quo ad altius non datur appellare. Hæc autem querela *apertè denegata justitia* non adedè faciliè locum habet (a). In casu autem, à nobis proposito, denegatio justitiæ manifesta est; quid enim aliud volunt rescripta illa frigida verba: *Tu videris. Nos cogere non possumus tuos commilitones, ut secum militent.* Quid hoc aliud, quàm *apertè denegare justitiam*, & actorem sibi relinquare? quoddam jam, qui ita durè rejiciuntur, perturbant Rempublicam, sibi jus dicendo, penes Rectores potius culpa est, quàm penes ipsos. Hoc quæcunque Reipublicæ malum præpedire privatus quisque ex virtute potest, si velit: at unde probatur, quodd obligetur cum jactura necessariæ sustentationis? Cur non etiam exigitur, ut prædonem, vi auferentem bona, non recuperanda per viam juris, nemo armis invadat, perturbationis evitandæ gratia? Tunc nempe obligatur bonus civis commodum proprium immolare bono publico, & malum ferre, ne civitas ferat, ubi hæc malum à se avertere nulla alia ratione potest. At posset in hoc casu; quid enim faciunt Reipublicæ Capita? num dormiunt? evigilent, præeant bono exemplo, curent ipsi salutem Reipublicæ; cur innocens civis tantam jacturam ferat ab iniquo furcifero ob negligentiam Judicis? Id, quod de viris militaribus dicitur, non ampliùs expectaturis, donec negetur justitia, peculiari ex ratione repugnat conscientiæ. Afferetur ea ratio *Cap. seq.*, ex qua patebit, pulsandas antea esse fores justitiæ, nec licere, non salutato JUDGE, avolare ad pugnas.

291. Opponitur II. Negligentia Magistratuum non dat mihi jus occidendi, vel vulnerandi civem; eccur enim civi liceat agere malum; quia Magistratus omittit bonum? R. In casu nostro Hector non acquirit jus ex negligentia Magistratûs: jus defendendi sua aliunde habet; neque de eo unquam abdicavit aliud quàm exercitium. *vid. n. 288.* Negligentia ergo Magistratûs occasio est, cur privatus homo jus hoc suum in his angustis exerceat. Non ideo pugnabit ergo Hector, quia JUDex officio suo non fungitur; sed quia non vult per injuriam exui bonis necessariis.

Unde

(a) Vid. *Mavium* P. 2. Decif. 154.

Unde nego, saltem in sensu adversarii, quod faciat malum; quia alter omittit bonum: sed *dum* alter omittit bonum, facit Hector, quod non injustum est. Idem haud dubie respondebit præclarus ille adversarius, de quo supra in casu, quo Hectori licentiam pugnandi concedit, si à Leandro *ea intentione* fuerit provocatus, ut recusanti damnum afferret. *vid. n. 263.*

292. Opponitur III. Ex his principiis etiam excusari possent duella veteris ævi, ad decidendas lites suscepta, dum Judex alio remedio succurrere vel non voluit, vel non potuit: atqui hoc diceret nimium; sunt enim vetita illa duella, utpote summè noxia, & sanæ rationi contraria. R. Meritò ea duella damnari; quia Judices alio remedio exitum liti debebant dare, quàm hoc inepto, iniquo, superstitioso. Nihilominus si quis rudi illo ævo id, quod *censè* suum erat, aliter non valuisset consequi: aut vitam contra accusatoris calumniam defendere, nisi acceptando coram Judice, vel etiam offerendo duellum, credo, sine labe conscientie id facturum fuisse, (*vid. n. 62.*) nisi fortè singulare quid obstat, quod in casu hodierno non occurrit.

293. Opponitur IV. Si quis cum altero judicio contendit, & ex sola injustitia Judicis, causa cadit, utique non poterit armis aggredi adversarium? Item damnata est doctrina, asserens: *licitum esse Judicem occidere, à quo iniqua certò imminet sententia, testis &c. si alia via non potest innocens damnum evitare* (a). Ergo neque licebit adversarium armis aggredi, ubi Judex ad causam delatam silet, connivet, & dissimulanter agit. R. primò, sequeretur ex hac argumentatione, quòd duellum neque tunc esset licitum, quando *ea intentione* Leander provocavit Hectorem, ut recusanti damnum afferret: quod tamen licere, Judice causam rejiciente, concedit adversarius noster non ignobilis. (*vid. n. 263.*) R. secundò, querendo, si, dum prædo domum meam expilare aggreditur, ego ad Magistratum curro auxilii causa: hic verò *apertè deneges* justitiam, & frigidis illis verbis: *Tu videris* &c. me rejiciat, an non licebit properare domum, & vim armatam prædoni objicere? Cur ergo idem non liceat Hectori contra Leandrum, qui, quomodo à prædone differat, & in quo cum eo

D d 2

con-

(a) Ab *Alexandro VII. An. 1665. n. 18.*

conveniat, dictum abundè est à n. 259. Propositionem illam damnatam quod attinet, disparè rationem inter eam, & nostram præsentem doctrinam intercedere ex ipso VIVA (a) colligimus. Ait, eam propositionem ideo damnatam fuisse; "quia non debuit natura propter bonum, alicujus privati in aliquo raro casu permittere defensionem tam immoderatam, occisionem scilicet Judicis, testium &c., quæ certo certius in numeris cædibus ansam daret; quilibet ex passione facillè sibi persuaderet, Judicem esse insensum." Certè nihil frequentius, quàm audire partes litigantes conqueri de iniquitate judicum, unde tam crebrò quosdam eorum *perhorrescunt*. Jam dicuntur partium studio occupati: jam corrupti muneribus: jam non satis docti. Nulla ferme fertur sententia, ubi pars, quæ causa cadit, non lamentetur de violata justitia, & facta sibi injuria. Econtra nil simile timendum, ubi licentia duello defendendi res suas ex honore dependentes, pro eo solum casu conceditur, ubi *aperitè denegatur* justitia; nam aperta denegatio res est longè manifestior, ac palpabilior, nec tot deceptionibus, ab amore proprio confingendis, subjecta; quàm injustitia in causam auditam, & ventilatam irrepens; præcipuè si frænum addatur, de quo n. *sequente*. Nempè verissimum est illud LESSII (b): *In jure defensionis semper considerandum esse, ne ejus usus in perniciem Reipublicæ vergat*: atqui usus defensionis, hîc à nobis approbatus, non cedit in perniciem Reipublicæ, saltem ex culpa utentis ea defensione, ut primùm antè explicavimus n. 290.

Aliam responsonem addo, non admodum à priore abluidentem: petitam ex solidissimis juris naturalis principiis, unde differentia inter casum *denegatè apertè justitia* in materia de duello, & inter casum *judicis male judicantis* satis apertè colligitur. Judicia in civitate successerunt bello privato. Cessare igitur debet bellum privatum, quando judex interponit suum officium. Si sententia sit injusta, perpendendum, etiam eventum belli esse dubium, nec victoriam ei certam esse, qui justam habet causam. Qui igitur in civitatem coeunt, censentur consentire, quòd velint se submittere sententiæ etiam injustæ, ne ex ipso belli privati remedio occasionem sumant

(a) Trutina in hanc proposuit. (b) L. 2. cap. 9. dub. 12. n. 82.

fumant suscitandi bellum privatum, cujus sublatio est maximè necessaria, & utilissima Reipublicæ. Cùm igitur pro conditione humanæ naturæ evitari non possint omnes sententiæ injustæ, cedere debet privatum incommodum bono publico; præcipuè cùm plurima remedia statuta sint ad reformandas sententias injustas, provocando, supplicando &c.

Ex iisdem principiis datur ratio propositionis damnatæ *de Judice; seſtibus* &c.; cùm enim ii, qui coeunt in civitatem, consentiant in judicem ad evitandum bellum privatum, & quidem in judicem *hominem*, à quo non possumus sperare sententias semper juri conformes, vel saltem quæ à partibus conformes credantur. Hinc contra omnem æquitatem naturalem; & bonum civitatis foret, si quis vellet sibi arrogare jus occidendi judicem, à quo iniquam sententiam timeret &c. Sic everterentur omnia fundamenta civitatis pacificæ. Alia ratio est in casu *apertè denegata* justitiæ; nam cùm jus belli privati, naturaliter competens, homo quilibet sibi servet, solumque ejus exercitium relinquat judici in civitate, hoc exercitium cuilibet competet, quando judex jus non dicit, seu quando judicis copia haberi nequit. Legere hoc uberius datur *in ratione secunda*, qua sententiam nostram stabilivimus n. 288.

Instabis. Si civis censendus est se abdicasse exercitio juris pro casu injustæ sententiæ, cur non etiam censeatur se abdicasse pro casu apertè denegatæ justitiæ? R. Pro casu injustæ sententiæ debuit se abdicasse; sedis ex ipso remedio belli privati, id est, ex judiciis, quorum pleraque parti victæ videntur injusta, orientur nova bella privata. Talis necessitas ad abdicandum exercitium etiam pro casu apertè denegatæ justitiæ afferri nequit. Dein quodd pro hoc casu exercitium juris servaverit sibi civis, ex eo patet; quodd occidere ei raptorem utique fas esset, domi suæ colligentem prædas, si ipse accurrens ad judicem, auditus non fuerit, & apertè ei negata justitia. *Vide etiam n. 288.*

294. Opponitur V. Hac stante licentia non obtinetur finis *adquatus* Tridentini, & Pontificum, qui est, non tantum impedire cædes, sed etiam *usum* duellorum abolere. Atqui usus duellorum sic non aboleretur: ergo &c. R. Pontifices *seriando pugiles* illa voluisse abolere duella, quæ in statu civitatis bene ordinatæ committuntur: ea, quæ committuntur in statu civitatis malè ordinatæ ad evitandum gravissimum damnum,

voluerunt abolere, pœnas severas dictando negligentibus Magistratibus, de quibus agemus *Cap. IX.* Hi ergo fungantur suo officio, & obtinebitur finis *adaquatus.*

## ARTICULUS II.

### *Sententia nostra tuta est in praxi.*

**D**Efendimus hætenus, licentiam duelli, pro statu naturali assertam *Capite precedente*, applicari etiam posse statui civitatis male ordinatæ. Attulimus argumenta nostra, & ad contraria respondimus. Sed necdum satis. Non una est sententia, quæ ratiocinatione quidem propugnari queat: quin tamen agere secundum eam liceat: sive quin *in praxi tuta* sit. Hoc ut etiam pro nostra sententia evincam, ostendere oportet. I. Quodd sit *satis probabilis.* II. Quodd sit non tantum *speculativè* probabilis: sed etiam *practicè.* III. Quodd possit etiam eligi, *relictâ tutiore.* Quibus positis tuta utique in praxi erit. *Tribus* paragraphis rem absolvam. Tum *quartum* addam, quo non inutiliter examinabo, an Hector noster sententiam hanc etiam *obligetur* sequi amore conjugis, & liberorum. Cæterum lingua Scho-lasticorum jam erit loquendum.

### §. I.

#### An nostra sententia sit satis probabilis?

295. *Premissis notandis.*

297. *Et extrinseca.*

296. *Ostenditur probabilitas intrinseca.*

295. **O**pinio *probabilis* juxta doctrinam, communi Doctorem consensu firmatam, est conclusio incerta, nixa motivo, *absolutè*, & *re-spectivè* gravi. *Motivum* autem *grave*, id est, non levis ponderis dicitur, quod de se aptum sit, virum prudentem permovere ad assensum. Si motivum non tantum in se spectatum sit tale: sed etiam comparatum cum motivis opinionis contrariæ, tunc dicitur grave tam *absolutè*, quam *respectivè*. Probabilitas alia est ab *intrinseco*, cujus nempe motivum stat in ratione gravi, quæ ex ipsa re petitur. Alia ab *extrinseco*, cujus motivum est auctoritas gravis eorum, qui ita sentiunt, ac docent. Hæc autem *auctoritas*

con-

consistit in peritia, probitate, sapientia, & veracitate &c. Hactenus LA Croix ex mente plurimorum Authorum (a).

296. Jam verò nostram sententiam à ratione intrinseca esse verè probabilem, consideranti, ut spero, facilè patebit. Pro statu naturali nihil admodum est, quod assensum retardet. Translata autem quaestio ad statum Civilem nil acquirit, quod novam difficultatem facessat: ut iterum colligere datur ex gemino nostro argumento, & responsis datis ad difficultates objectas.

297. Neque ratione extrinseca destituitur nostra sententia; ex iis certè, qui quaestionem hanc, debitis adjunctis vestitam, examinârunt accuratè, & ex instituto, pauci nobis contradicunt: &, si SCHWARZIUM excipias, vix unus clarè fati. Quin verbis fortè solis se contradicere fatebuntur, si quatuor illas conditiones velint legere, positas *Cap. IV. Art. I. ad init.* quibus hypothesin nostram vestivimus. Econtra nostram sententiam tucntur reliqui omnes, quotquot ex instituto hunc casum ventilârunt, cum aliis non immeritò annumerandis. Scio equidem, non semper majore Authorum numero confici majorem probabilitatem extrinsecam, nisi sint omni exceptione majores: an verò tales sint, non attinet hic examinare; cum ex judicio meo eorum authoritati non multum possit accedere. Interea plus ego rationibus intrinsecis confido, &, donec erroris convincar, teneo, sententiam nostram non *tenuiter*: sed *verè, & certè* probabilem esse, & non tantùm *aque probabilem*, ac sit adversa: sed etiam *probabiliorem*. *Certitudinem* tamen *moralem* ei tribuere nolim; nam, quamvis nihil sit, quod scrupulum mihi moveat: ignoro tamen, quid aliis videatur perspicacioribus me. Argui interim mea de duello doctrina non poterit, quasi ex laxioribus de Probabilissimo principiis fluxerit ea, quam assero, licentia.

## §. II.

An nostra sententia non tantum speculativè, sed etiam  
practicè sit satis probabilis ?

298. *Hic quærendi modus visus quibus-  
dam absurdus,*

299. *Rite explicatur ex Cardena,  
300. Et nostra applicatur sententia.*

298. **A** Bfurdæ hæc quibusdam quæstio videtur. Explodit inter alios BOECLERUS (a) hanc Scholasticorum distinctionem de licentia *speculativa*, & *practica*, velut minùs eruditam, incommodam, atque inutilem. Vehementiùs in eam detonat personatus PASCHALIS, seu Jansenisticus MONTALTUS in famosis *Litteris Provincialibus*, quem pro merito depexum dedit CLEANDER, & EUDOXUS (b). Idem, meliore tamen animo, sensit CARAMUEL (c), secutus JOANNEM SANCTIUM (d): non tam fortem se habere intellectum, ait, ut intelligere valeat, quomodo propositio speculativè possit esse probabilior, & in praxi minùs probabilis; cùm probabilitas, quæ est in praxi, ea ipsa numero probabilitas sit, quæ est in speculatione.

299. At CARDENAS egregiè offendit (e), non rarè dari opinionem speculativè probabilem, quæ sit practicè improbabilis; quia scilicet ea opinio speculativè probabilis non potest deduci ad praxin sine nova circumstantia, quæ vitiet actionem: quin tamen ea circumstantia consideretur in speculatione; eo quòd ad integritatem actionis non pertineat. Pro exemplo ponit actionem licitam, quando hæc tamen pro hîc & nunc sine scandalo exerceri non potest, quin tamen scandalum in speculatione considerandum se offerat: vel quæ exerceri ab hoc homine hîc & nunc nequit sine periculo labendi in peccatum mortale. Itaque, ait, licèt omni probabilitati practicæ debeat correspondere speculatio, quæ speculatur omnes circumstantias ejus praxis: non tamen omni probabilitati speculativæ debet correspondere similis probabilitas practica; quia potest dari speculatio,

(a) In notis ad *Græc.* de J. B. P. l. 2. c. 1. §. 10. (b) *Dialog. de diff. probab. in specul. & pract.* (c) In *Apolog. de probabilit.* (d) In *select. disp.* 44. n. 63. (e) *Tract. 1. Crif. Theol. disp.* 14.



tio, quæ præscindat circumstantiam repertam in praxi : & quæ circumstantia non ipsam rem afficiat, sed solum exercitium rei. Huic explicationi favere videntur communiter Doctores : &, qui videntur dissentire, aliud longè diversum à contradictorio hujus explicationis intendere. Haftenus de sensu hujus quæstionis.

300. Jam verò sunt nonnulli, quibus sententia nostra, haftenus propugnata, speculativè in dicto sensu videatur probabilis : non autem practicè. Hos inter eminet SCHWARZIUS (a). Ferme sicut LESSIUS (b), & alii speculativè, non tamen practicè licitum existimant armis persequi eum, qui post datam alapam aufugit, vel calumniæ denigrat. Ratio clarissimi viri est; quia talis licentia in praxi (id quod speculatio non perpendit) enervat finem legis humanæ, qui consistit in proscriptione duelli simpliciter sub quocunque prætextu, & circumstantiis alicujus casus per accidens, quas cum legislatores non ignoraverint, utique permoveri debuissent ad faciendas exceptiones : cum tamen has non fecerint, signum est, quòd simpliciter voluerint duellum proscribere. Idque ex hac potissimum causa; quia ex tali licentia, nimium periculosa, utpote excessibus nimis obnoxia, societati humanæ immineret grave incommodum. Hoc incommodum publicum constituit etiam finem inadæquatum legis naturalis, quæ duellum prohibendo tam bono privatorum, ac simul bono communi publico prospectum voluit. Speculatio autem nostra tantum considerat damnum, quod privatus ex declinatione duelli incurreret : non autem damnum, quod societati humanæ in praxi accederet. Hæc Negari à nobis tutò, quòd legislator vel *lex humana* unquam voluerit proscribere duellum, etiam pro casu, quando ipse legislator, & humana potestas publica læsum destituit (vid. n. 290). Non autem mirum est, quòd hunc casum legislatores non expressè excipiant; quia utique turpe esset, si, dum leges condunt, simul dubitarent, an non ipsimet fortè in casu quodam negatari essent præsidium suum læso. Quod spectat illium finem inadæquatum *legis naturalis*, scilicet bonum commune societatis, abunde responsum est suprà n. 264.

Illa quoque circumstantia, in praxi occurrens, hoc loco afferri posset, rancor scilicet, vindictæ æstus, ac odium, quo pugnantibus calere solent,

Eo

quæ-

(a) Loc. cit. (b) De Just. & Jur. l. 2. c. 9. dub. 12.

quæcunque demum pugnandi causa fuerit. Sed etiam hanc in speculatione jam expensam invenies supra n. 272.

Cùm itaque in praxi hoc duellum nil involvat novi, quod non in speculatione fuerit expensum à nobis diligenti studio, conficitur, sententiam nostram non tantum *speculativè*: sed etiam *practicè* esse probabilem.

### §. III.

An non contraria sententia debeat eligi; cùm sit magis tuta?

- |  |   |
|--|---|
| 301. <i>Ad hanc questionem nos cogit Cardenas.</i>   | 303. <i>Quaritur, an etiam in nostro casu.</i>                    |
| 302. <i>Declaratur, quomodo plerumque sequi liceat sententiam aequè probabilem, relicta tutiore.</i> | 304. <i>Auditur Cardenas.</i>                                     |
|  | 305. <i>Eidem respondetur.</i>                                    |
|  | 306. <i>Satisfis denique dubio, orto ex doctrina de censuris.</i> |

301. **O**ccasionem, imò & necessitatem discutiendi hoc dubium fecit mihi CARDENAS (a), qui, dum bellum movet iis, qui pro vindicanda *calumnia* duellum licitum esse statuunt, in prima acie ponit argumenta, quibus, si robur quoddam inest, neque pro vindicanda *suffestatione* necessaria, cum honore connexa, duellum licebit subire. Antè notanda quædam veniunt.

302. Primò passim hodie inter Auctores convenit, contra CARAMELEM, JOAN. SANCTIUM &c. inter sententias verè, theologicè probabiles esse aliquas magis, alias minùs *tutas* (b). Illa opinio dicitur *tutior*, quam sequendo à transgressione legis, & periculo peccandi sumi remotior, ac sequendo oppositam. *Minùs tuta* est, quam sequendo minùs sumi remotus. Pro exemplo serviat sententia, docens, non obligari quemquam statim agere pœnitentiam de peccato forrè commisso, sententia hæc & à ratione, & ab autoritate probabilis verè est, & probabilior, quàm opposita, minùs tamen tuta, quia, qui statim agit pœnitentiam, remotior est à transgressione legis, imperantis peccatori pœnitentiam agere.

Secun-

(a) Crif. Theol. dissert. 21. n. 10. (b) Vid. *Moya* de Opin. prob. q. 6. §. 7.

Secundò, factis hodie receptum est inter Authores Theologos (saltem de rigore nimio non suspectos) quòd liceat *plerumque* sequi sententiam probabiliorē: quin & æqualiter probabilem, quamvis sit minùs tuta. Quæ sententiâ ita stabilita est argumentis, & judicio innumerorum ex omni ordine, & ætate Doctorum, ut nesciam, an pio zelo agantur, qui contrà multa deblaterant, nil nisi antiquam crambem recoquentes. Quid? quòd & minùs, verè tamen, & *theologicè probabilem* eligi præ tutiore, ac probabiliorē posse, passim hodie in Scholis doceatur. Cui autem doctrinæ ut subscribam, jam animus mihi non est, neque necessarium ad institutum meum. Ego quosdam contra hanc doctrinam pugnantes, etiam ex Societate nostra, Authores præclaros veneror: alios autem insulsos cavillatores, qui non rarè ignorant, quid rei *Probabilismus* sit, plenis tamen buccis contra eum vociferantur, hos ego non moror; eo præsertim ex capite, quòd duellum, hætenus à nobis intra suos limites defensum, *probabilius*, vel saltem *æquè probabiliter* licitum esse existimem, quàm prohibitum: (vid. n. 296. 297.) & illos quoque ita existimaturos confidam, qui æquo animo, quæ scripsi, non gravabuntur legere.

Tertiò, conveniunt Scholæ, quòd *plerumque* liceat sequi sententiam probabiliorē, quin & æqualiter probabilem, relicta tutiore: non verò *semper*; agnoscunt enim in quibusdam materiis obligationem sequendi absolute partem tutiorē: in illis scilicet, in quibus, licet adsit *ignorantia invincibilis*, neque tamen pars probabilis, nec etiam probabilior juvat ad hoc, ut obtineatur finis quæsitus, ad quem procurandum datur obligatio. Sic etsi sint probabiles duæ oppositæ sententiæ circa aliquid concernens *valorem Sacramentorum*, sequenda est tutior; quia minùs tuta, licet fortè probabilior sit, & quis bona fide secundum illam operetur, facere non potest, ut Sacramentum sit tamen validum, si illud, quòd probabiliter requiritur, omittatur. Similiter *Advocati*, & *Medici*, qui per contractum, saltem tacitum, se obligarunt ad procurandam ægro sanitatem, vel causæ victoriam, hoc ipso obligantur ad adhibenda remedia, quæ judicaverint magis apta tali fini, scilicet tutiora: licet fortè occurrerent alia, æquè probabilia (a). Idem de Jdice certum habetur, quòd non possit uni

Ec 2

ex

(a) Vid. *la Croix* l. 1. n. 476.

ex duobus, æqualiter jus probabile habentibus, rem totam adjudicare præ altero: sed quiddam debeat pro tali casu procurare vel transactionem, vel compositionem, vel divisionem rei; nam in hoc casu non est dubium, dari legem prohibentem ferre talem sententiam, ubi æqualis utrinque militat causæ probabilitas; hæc enim lex tam ex ratione solidissima, quam ex unanimi Doctorum consensu manifestè patet: sed cadit dubium solummodo supra jus partium. Hinc iudex dictamen ultimum, quod practicum dicimus, & moraliter certum (id est, nulli prudenti dubio obnoxium) sit oportet, secum facere non potest: *Lex verè dubia non obligat: sed lex, mihi nunc prohibens ferre sententiam, est dubia: ergo non obligat me: adeoque possum licitè pro causa probabili sententiam ferre contra aequè probabilem.* Hoc, inquam, dictamen sibi facere non potest; quia secunda propositio est falsa. Econtra alter, de pœnitentia cogitans statim ab admissio peccato, applicare sibi hoc principium potest, & dicere: non obligor sequi sententiam minus probabilem, quamvis sit magis tuta: atque de hoc sum moraliter certus; atqui sententia docens esse pœnitendum ex obligatione statim ab admissio peccato, est minus probabilis, quamvis sit magis tuta: ergo moraliter certus sum, me non teneri statim ad pœnitendum. Huc referri etiam potest *venator*, qui, dubitans, feramne videat, vel hominem inter dumeta, & probabiliter, vel etiam probabilius iudicat feram esse: non tamen propterea telum licitè evibrat, ob rationes nempe similes. Plura de his dicere relinquamus Theologis.

303. Id jam quæritur, cum non semper liceat sequi æquè probabilem, aut etiam probabiliorē, relicta tutiore: sententia autem statuens, in nostro casu abstinendum esse duello, sit tutior: an debeat hæc eligi præ nostra, quamvis nostra sit probabilior, vel saltem æquè probabilis. Fors etiam hic aliquid occurrit singulare, quod libertatem restringat, sicut in materia de Sacramentis, de iudicio causæ, de cura ægroti, de telo venatoris restringi diximus. At non est par ratio cum materiis recensitis; nam primò in sacramentis probabilis mea opinio non supplet debitam materiam, & formam. Itaque charitas mihi, vel aliis debita, ad eligendum tutius me obligat. Econtra opinio probabilis, vel probabilior de licentia duelli, pro vindicanda sustentatione suscipiendi, obtinet finem suum, scilicet conservationem sustentationis cum immunitate à peccato, si quidem formetur

ira

ita dictamen : *Operando secundum sententiam aequè probabilem, vel probabiliorē, quamvis minus tutam, certè bene operor, nisi quid singulare obstat : atqui sententia asserens pro hoc casu duelli licentiam est aequè probabilis, vel probabilior adversa : neque aliquid singulare obstat : ergo certè bene operor.* Neque secundo huc Medicum facit, aut Advocatus; nam noster provocatus, aut ad provocandum ex perdurante alterius malitia adactus, nullo pacto obstrictus est ad patiendam potius jacturam bonorum, quàm ut ea armis tueatur. Tertio cum *Judice* videtur comparatio meliore jure institui; qui enim, à suprema potestate destitutus, in statum naturalem reponitur, *judex* jam suus est: ergo eandem habet cum *judice* obligationem, cui pro aequè probabili non licet ferre sententiam. At memento, quòd hic destitutus sit simul pars litigans; cui jus belli pro eo rerum articulo competit; quia jus ad bona, per malitiam alienam aliàs amittenda, non solum probabile, sed certum habet : & solum dubitatur, an in collisione jurium, dum scilicet hinc necessaria sustentatio, illinc vita offendentis periclitatur, liceat iniquè offendentis vitam aggredi pro conservanda sustentatione. Ferme sicut (quam comparisonem pro clypeo obtendemus etiam ad oppositiones sequentes) qui alapam sibi intentari advertit, vel bona à prædone eripi, gladium objicere, aut duello suum honorem, vel opes defendere licitè potest, dum collisio oritur inter jus ad vitam, & jus ad honorem, ac opes. Quarto *Venatori* licet probabilis videatur, subesse feram : non minus tamen ob hanc probabilitatem nocebit homini, si homo subsit, cui tamen ut noceat, jus nullum habet; neque enim innocens homo vitam vel bona venatoris est aggressus. Econtra in nostro casu bona mea tueor; alterius crimine in discrimen adducta. Nocebo sic quidem nocenti : non autem nocebo meæ conscientie; dictamine enim ultimo practico ita statuam : *sequendo sententiam probabiliorē, vel &c.* Venator autem dicere non potest : *atqui sententia probabilior, vel aequè probabilis est, quod in eo dubio emittere telum liceat*; hoc enim minimè probabile est ex rationibus indicatis.

304. Oporteret jam & CARDENÆ argumenta audire, quæ talia sunt, ut, si probent, non licere duellum pro abolenda calumnia, eodē pondere evincant, non licere pro defendendis bonis. De calumnia etiam nos negavimus licentiam (*vid. à n. 236.*) : sed ex aliis rationibus; hinc rationes CARDENÆ jam vocandæ ad trutinam sunt, & minus ponderis iussu

ostendendum. *Primò* sic ait : non licet hominem occidere propter solam opinionem probabilem : sed probabile solum est, quòd occidi possit, qui calumniam inferre pergit (dic : qui causat alteri unà cum ablato honore jacturam bonorum) ergo ejusmodi hominem occidere non licet : &, quod consequitur, duello appetere. *Primam* propositionem ex terminorum intelligentia evidentem esse credit : quid enim ? si non mihi licet spoliare hominem bonis fortunæ propter rationes probabiles de proprietate mihi competente, quamdiu homo habet legitimam possessionem talium bonorum, utique à fortiori non erit licitum privare hominem vita, quam à Deo datam possidet, propter solas rationes probabiles. *Secundò* eandem propositionem roborat exemplo malefactorum, quos Magistratui nefas esset ad mortem condemnare cum semiplena probatione juris, vel facti ; semiplena autem probatio, ait, quid aliud est, quam probabilitas ? ergo multo minus privata autoritate licebit occidere hominem propter solas rationes probabiles. *Tertiò* demum per se clarum est, quòd jus certum non amittatur propter jus probabile contrarium : certum autem est jus ejus, quem aggredior armis, ad vitam suam : meum autem jus aggrediendi est solum probabile : ergo &c.

305. Hæc argumenta opposita ut diluamus, probè norari velim, quid in nostro casu dicatur probabile. Non damnum, in bonis injustè secuturum, est tantum probabile : neque malitia alterius, nolentis per recantationem, similémve modum aptum, damnum impedire, solum probabilis est ; hoc utrumque certum esse statuit casus recensitus. *Vid. Cap. IV. Art. I. princ.* Id ergo solum probabile est, quòd in hac certitudine duello petere liceat alterum, habentem alias jus certum ad vitam suam, probabilitate cadente supra licentiam duelli, non supra alia. Hinc distinguo effatum, quòd ex terminorum intelligentia est evidens CARDENÆ : non licet occidere hominem, si probabilitas cadat supra alia, quæ licentiæ fundamentum facere deberent : facere autem non possunt, utpotè dubia, & incerta, hoc concedimus. Non licet occidere universè, dum probabilitas cadit in ipsam licentiam, fundatam in factis certis, hoc negatur. Sic CARDENAS admittit (a), paratam alapam gladio posse intercepti, quæ tamen sententia moralem

(a) Loc. cit. n. 69.

ralem certitudinem non habet: sed intra fines probabilitatis consistit. His iisdem argumentis si hanc ejus sententiam impugnarem, non video, quid alius esset responsurus, quam quod ego respondeo. In *primo* argumento fingitur, quòd quis velit eripere bona cum jure solùm probabili ad ea bona; econtra noster Hector habet jus certum ad sustentationem necessariam. In *secundo* probabilitas cadit supra probationes de crimine admisso: econtra in nostro casu malitia rapientis bona, cum honore connexa, est manifesta. In *tertio* notandum, quòd non tantùm jus ejus, quem aggredior, ad vitam suam certum sit; sed etiam jus meum ad mea bona est certum. Datur ergo collisio jurium certorum. Quæritur ergo, an non liceat pugnare contra eum, qui jus meum certum raperè pergit, dum meliore modo & mea mihi bona, & suam sibi vitam servare posset, ac deberet, si scilicet provocatione abstineret, vel mitiore interpretatione, aut etiam petita venia ignominiam abstergere non renueret. Dico: æquè probabile, vel etiam probabilius est, quòd liceat, quam quòd non liceat: quo probato sententiam nostram amplecti potest tanquam *tutam in praxi*.

306. Pro coronide annecto argumentum, petiit ex doctrina de Censuris Ecclesiasticis, quo everti videtur licentia sequendi probabilitatem nostræ sententiæ. *vid. LA CROIX* (a) qui sic habet: quamvis tibi etiam probabilius sit, aliquid esse licitum: & superior, etiam sub opinione tantùm probabili, sub censura tibi injungat oppositum: si contravenias, non excusaris à peccato, & censura: atqui Pontifex sub censura injunxit omittere duellum, scilicet sub excommunicatione (*vid. Cap. VIII.*): ergo debes abstinere, quamvis probabilis tantùm esset opinio de prohibitione duelli pro positis suprà circumstantiis. R. Quòd hæc doctrina locum habeat tunc, quando *certè* constat de lata in quoddam factum censura: æquitas autem, cui innititur censura lata, tantùm est probabilis. Apud nos autem neutiquam *certè* constat de censura lata in tale duellum; quia gravis censura ferri non potest, nisi in grave peccatum: & quidquid excusat à peccato gravi, etiam excusat à censura: atqui probabilius excusatur Hector noster à culpa gravi: ergo *probabilius* etiam à censura: imò ergo *certè*. Dein Pontifex non damnavit, & censuris affecit, nisi illa duella, quæ an-

tica

(a) L. 7. n. 94.

res jam fuerant mala. (vid. n. 287.) atqui nostrum tale non erat, ergo &c. Dissimulare hoc loco non possum doctrinam recentioris cujusdam Theologi, ceteroquin non mollis, scilicet PII THOMÆ MILANTE Ord. Prædicat., qui in Exercitationibus Dogmatico-Moralibus in propositiones ab ALEXANDRO VII. proscriptas, docet, Officiale bellicum, qui metu cadente in virum constantem perdendi honorem, famam, autoritatem in subditos, ipsūque suum officium, duellum acceptat, non incurrere pœnas Ecclesiasticas, eo quod Ecclesia non velit obligare sub conditionibus adeo duris (a). Sed de hoc satis. Cùm itaque sententia nostra in praxi tuta sit, quæres,

## §. IV.

An aliquando detur obligatio sequendi nostram sententiam amore conjugis, & liberorum?

307. *Declaratur obligatio Patris ad alendam familiam.*

308. *Quæ videtur etiam obstringere ad duellum in casu nostro.*

309. *Sed statuitur contrarium.*

307. **I**N casu, quem ex P. SEYBOLD n. 281. enarravimus, vidimus, Ducentium militem, recusato duello, ita redactum fuisse ad incitas, tenuemque adeo fortunam, ut vix haberet, quod unâ cum amantissima conjugē, & liberis roderet. Tristis hercle fors! quam pro se solo utique eligere potuit; *nemo enim sibi met facit injuriam*: at dum eadem involvi etiam vidit eos, quos natura non amare solum, sed & honestè alere jubet, conscientia fors poterat sibi ducere, si recusaret duellum. “Juxta Theod., logos peccant parentes, si non adhibeant diligentiam, ut acquirant bona, quibus filii alantur, habeantque hæreditatem secundum statum suum. Vel si dilapidando impotentes se reddant ad liberos honestè secundum statum suum educandos, ac dotandos.” Sic BONAC. AZOR. FILLIUC. apud LA CROIX (b). Accedunt juris naturalis Interpretes. GROTIUS teste, disputant Juris-Consulti, an alimenta à parentibus liberis debeantur: & quidam sentiunt, esse quidem naturali rationi consentaneum, ut à parentibus alantur.

(a) Vid. Memoires de Trevoux Fevr. 1741. art. 11. (b) L. 3. p. 1. n. 695.



alantur liberi: debitum tamen non esse. Nos distinguendum arbitramur, ait GROTIUS (a), in voce *debiti*, quod strictè interdum sumitur pro ea obligatione, quam inducit jus *expletorium* (justitiam *commutativam* dicunt Scholastici) interdum laxius, quod non nisi inhonestè omitti non potest, honestate ex alio fonte profecta. GRONOVIVS in notis censet, potius distinguendum esse inter tempus, quo liberi non possunt sibiimet alimenta quærere: & tempus, quo id possunt. Priori tempore omnino, & ex jure stricto parentes liberos alere tenentur. Unde JUSTINIANUS statuit: *Filium, vel filiam alere patri necesse est propter ipsam naturam* (b). PUFENDORFIO quoque persuasum est (c), parentibus perfectam obligationem incumbere alendi liberos, quamdiu ipsi se alere nequeunt; generando enim videntur se obstrinxisse, quodd; quantum in se est, operam dare velint, ut vita, quam dederunt, conservetur. At ego non video, cui se potuerint obstringere. An suis liberis nondum existentibus? quidquid sit; obligatio parentum est rigorosa, nisi fors desint vires, & occasio. Ubi dein sufficiet adesse voluntatem perpetuam, atque constantem eos bonis augendi, teste WOLFIO (d). Hæc autem obligatio respicit statum, ac conditionem parentum, in qua nati, & aliquamdiu educati fuere liberi.

308. Quodsi ergo centurio, antehac honestæ fortunæ, ad stivam, & mucidum panem suam secum familiam reducere cogiter, quæritur, an non satius faceret, si suscipiendo duellum, sibi, suisque priorem fortunam stabiliret: imò, an non per conscientiam obstringatur id facere? videtur ita obstringi ex eo, quodd cives minantem urbi, aut patriæ hostem armis, & vitæ periculo teneantur repellere. Quid autem est urbs & patria, nisi chara cujusque familia, cum fortunis pro sua cuilibet conditione necessariis? hanc charitatem debent singuli communitati: ergo etiam quisque suæ familiæ (quia in communitate suam quoque familiam habet) eandem debet, non tantum tempore belli publici: sed etiam dum ad necessitatem belli privati redactum se videt, & una salus in armis est. Item dum tyrannus urbi certum exitium minatur, nisi civem innocentem ejus potestati tradat,

Ff

(a) De Jur. B. ac P. lib. 2. c. 7. n. 4. (b) L. ult. §. Ipsum. C. De bon. quæ lib.  
(c) L. 4. c. 11. §. 4. (d) J. N. p. 7. §. 729.

tradat, deferi hic non tantum potest à civitate: sed, si Soto fides (a), tenetur hic civis, prævifa licet certa morte, se hosti tradere, si quidem traditio necessaria sit ad avertendam patriæ ruinam. Addit GROTIUS, talein teneri ex charitate, sive ex officio & amore, quem patriæ debet; „ Sunt enim (sonant ejus verba) quædam, non justitiæ propriè dictæ, „ sed dilectionis officia, quæ non tantum cum laude præstantur, sed etiam „ omitti sine culpa nequeunt. „

309. Nec tamen hæ, similésve rationes sufficiunt ad imponendam nostro Centurioni tam gravem obligationem. Respublica ad capeffenda arma, & repellendam vim hostilem utique obligare civem potest, utpote *subditum* sibi, qui etiam, cum ad civitatem accederet, ex hac percepturus sua commoda, quorum non infimum defensio, vicissim se quoque aliis *obstrinxit* ad præstandam defensionem. Non ita *subditus*, aut *obstrictus* est paterfamilias conjugi, vel liberis. Conjux sub potestate viri est, & hujus est dominari illi, sive dein ex jure naturæ, sive ex libero DEI præcepto hic dominatus originem trahat, de quo vid. SCHMIER (b). Major adhuc est subiectio liberorum, quam aliqui extra statum civitatis usque ad vitam liberorum extendunt. An bene? non vacat examinare. Obligatio quidem, incumbens parentibus ad alendos liberos, certa est: sed non tam gravis, ut etiam vitæ periculo se exponere jubeat patrem. Pro patria servanda, tyranno quoddam tradi, vel potius relinqui possit civis, mirum non est; membrum enim à civitate separatur, ne corpus totum intereat. At paterfamilias non quaecunque domi suæ membrum est: simul est caput, quod si in duello cadat, membra quoque eadem clade involvuntur; ubi enim patre orbat conjux, & liberi alimenta acquirunt? Civis illius traditio *certain* fingitur salutem afferre patriæ: duellum patris familiæ non nisi *dubiam*. Præoptabunt itaque egestatem cum patre pati bene morata uxor, & chara pignora, quam eum mortis periculo exponere; & certè, nisi hoc præoptent, minus amant patrem, indigni eo ipso, quibus pater succurrat tanto suo impendio.

CA-

---

(a) De Just. & Jur. L. V. q. 1. art. 7. (b) Jur. Univ. l. 1. c. 2. n. 30.

## CAPUT VI.

ENUCLEANTUR TRES CONDITIONES,  
SUB QUIBUS DUELLUM ALIQUANDO  
LICITUM DIXIMUS.

**A**Grè à memetipso impetrare potui, ut præsens Operis mei Caput publici juris facerem; doctrinæ enim continet, utiles quidem eas scitu: at quas in caliginè oportebat querere per calles minimè tritos, duce ferme nemine, solo jure naturali lucernam præferente, spargentem tamen aded tenuè quandoque lumen, ut primum esset, in hanc vel illam partem impingere. Satiùs tamen duxi, viam superare per quascunquè difficultates, quàm ab incepto desistere, opusque mancum luci dare. Sententias itaque hoc capite exponam complures, quas si minùs feliciter produxero: campum tamen amplum cogitandi præbunt illis; qui post me de Duellò scripturi sunt. Casus, seu facta passim adjungam, non quasi theoreticam doctrinam per casus traditurus: sed theoriæ facilitatem quamdam, & amœnitatem veluti per exempla allaturus.

Duellum dum licitum aliquando esse diximus *precedente Capite*, non nisi sub tribus id conditionibus ausi sumus affirmare. Primò quidem, si Hæctori nostro *iniquè* fuerit ablati honor, & *iniquè* retineatur; cùm tamen restitui deberet: secùs *provocare* nefas ei fore dictum est. Ut autem ipse licitè ad duellum *compareat*, *iniqua* pariter debet esse provocatio, ita ut ille innocenter, quin ullam offensam *iniquam* intulerit, in necessitate comparendi reponatur. Secundò, *damnum* oriturum in declinato duello debet esse admodum grave. Tertio, à Magistratu, vel Principe *aperitè denegari justitia*. Ex tribus his conditionibus multa scaturiunt dubia, tribus Articulis evolvenda, quorum primo ventilabitur *iniqua læssio*, altero *damnum grave*, tertio *denegata justitia*. Equidem si negàssem priore Capite, fas esse sub his conditionibus duellum suscipere, labore enucleandi

has conditiones meritò superfederem : at quod ibi veritatis studio dixi, evolvere jam stat, ut saltem de conatu meo nihil desiderari patiar.

## ARTICULUS I.

*Enucleatur prima conditio, id est, Læsis iniqua.*

**V**aria distinctis paragraphis quæremus. Et primò quidem, an sufficiat ad licitam *provocationem* læsis mihi illata sine malevolo animo, seu injuria, ut dicunt, *materialis*. Secundò an sufficiat læsis mihi illata consilio non satis deliberato, seu cum *advertentia semiplena*. Tertiò an sufficiat læsis mihi illata per exprobrationem criminis veri. Quartò an sufficiat læsis mihi illata, quam ego per illatam antè alteri læsionem mihi acci-vi. Quintò quæritur, an prohibitum sit *comparere* ad duellum, dum quis provocatur ab eo, quem iniquè læsit. Sextò etiam ubi læsit animo tantum semideliberato, vel exprobrando crimen verum. Septimò an aliquando provocatus comparere possit ex charitate erga provocantem. Denique octavò an duellum suscipi possit ab eo quoque, qui non læsus fuit; vel contra eum, qui non læsit, scilicet à vicario, vel contra vicarium.

### §. I.

An ad licitam provocationem sufficiat læsis illata sine malevolo animo, seu injuria *materialis*?

310. *Proponitur casus.*

312. *Occurritur argumento contrario.*

311. *Statuitur sententia negans.*

310. **P**ercipere casum juvat, ut quæstioni accedat claritas. Tribunus legionis equestris nepotem quemdam suum, ryonem inexpertum, centuriæ præfecit, posthabitis veteranis & exercitatis; unde ad gravem indignationem, & invidiam concitati plerique, occasione imminebant perdedi juvenem. Dúmque hic fortè incautior joco perstringit veteranum quemdam Centurionem, nescius adhuc, quanti talis sarcasmus inter milites valeret, ecce illico flammam fomes præparatus concipit, conclamant omnes, duello castigandam esse petulantiam juvenilem, frustra excusationem obrendente bono

bono juvene. Tribunus, utut nepotem expedire turbis optabat: perstreptum tamen numero, ut suæ exultationi confuleret, cedendum judicavit, & miserum suis fati relinquere. Læsus veteranus Centurio lubens veniam dedisset imprudenti dicto, nisi, prævalente militari licentia, eò se redactum vidisset, ut vel pugnare, vel legione excedere summo cum suo damno necesse haberet; quippe, nisi remerarium dictum vindicaret, gravioribus & feriis conviciis eum perstricturi erant malevoli, quibus notatus juxta receptam pseudo-legem ineptus reddebatur, qui ultrà militaret. Cogitabat quidem veteranus, vix probus, ad speciem tantùm manus conficere, vel levi perstrictum vulnere juvenem dimittere: at patrini negabant satisfieri, nisi ferid dimicaretur.

311. Negandum autem, veterano id licuisse salva conscientia; nam innocentis vitam petere absque concessa potestate ab iis, quorum est concedere, malum semper est. Noster autem tyro miles innocens erat; jecerat quippe dictum ignominiosum, quin ignominiam adverteret. Post etiam declaravit, qua mente id dixerit. Quodsi ergo veteranus in sua legione tolerandus non sit sine duello, non id malitiæ juvenis, sed reliquorum Ducum malevolentiae tribuendum erit. Hos ergo ad supremum tribunal deferat; ubi si non auditus prævalere videat commotam turbam: neque pugnare cum omnibus & singulis vacet, legione decedat necesse est, & jacturam dignitatis, atque bonorum iniquitati temporum adscribere.

312. Oppones fortassis. Æquum est, ut ille potius ferat damnum, qui injuria saltem *materiali* alterum affecit, quamvis mala mente id factum non fuerit: quàm ille, qui est omnino innocens. Etsi etiam ex toto foret innocens, quid tum? nunquid si, persequente hoste, non possis mortem effugere, nisi per angustam viam, in qua ægrotus vel infans jacens esset obtinendus, fas est nihilominus fugere cum hujus periculo & interitu, præter tuam voluntatem secuturo, quamvis innocens periret (a): ergo etiam dum effugere non potest veteranus jacturam bonorum, necessarium ad vitam sustentandam, nisi armis petat juvenem, licet eum petere, fortè occubiturum: at invito veterano. B.

Ff 3

mni

(a) Ita *Fillius. Less. &c.* apud *la Croix* l. 3. p. 1. n. §22.

nni sint infesti Duces, nolentes acquiescere, faciat is, si potest, ut hi potius damnum ferant, quam ipse. Si hoc non possit, innocentem juvenem non aggrediatur, qui eluere læsionem etiam *materiam* pro viribus laboravit. Fugiens ille huc non quadrat; jacentem enim in via *prater suam intentionem* proteret; quia nec *pro fine* propositam sibi habet necem, neque pro admiculo seu *medio* ad servandam vitam. Adeoque in hoc rerum articulo sine conscientie noxa fugam prosequetur. At pugna illa periculosa *medium* est veterano, & quidem unicum ad vitandam jacturam bonorum: ergo mors, vel grave vulnus innocentis non veniret *prater intentionem*.

## §. II.

An ad licitam provocationem sufficiat læsio illata non satis consideratè, seu cum *advertentia* semiplena?

313. *Lesio triplex considerata venit.*

314. *I. de conviciis casus statuitur.*

315. *Deciditur, quod semideliberatè ladens non possit licitè provocari.*

316. *Quod neque teneatur ad resarciendum damnum totum.*

317. *Dubitatur: an ad partem?*

318. *Et quid si hanc partem renueret solvere?*

319. *II. De calumniis casus fingitur.*

320. *Ad recantationem nimis damnicam ladens adigi non potest:*

321. *Nisi in judicio.*

322. *Extra hoc neque cogi potest ad duellum, neque ad resarciendum damnum totum:*

323. 324. 325. 326. *Quidquid opponatur in contrarium.*

327. *III. De verberibus idem dicendum, quod de calumniis.*

313. **R**espondere ad hanc quæstionem necessarium duco; eo quòd ignominie, duellorum causæ, sæpius ex præcipiti motu animi, quàm plena cum consideratione inferantur. Viderur autem non esse par ratio in quibuslibet ignominiiis: unde primò de *Conviciis*: tum de *Calumniis*: demum de *Verberibus* oportebit sententiam dicere.

314. **I.** De *conviciis* casum non fictum, sed factum accipe. Venatum exiverant viri militares, dignitate conspicui, bella moturi feris; jamque Themistocles emissos suos per nemus canes lepori instare ex latratu notabat, & tam dextrè urgere, ut propèdiem prædam sibi affuturam ad ictum crederet. Cùm ecce! alius canis, venandi parum gnarus, intervenit, qui dum sine lege oberrans turbat reliquos, lepus feliciter eva-

evadit paratam jamjam perniciem. Venator miles in iras actus, *cujus trifurciferi*, ait, *hic sanis est?* prolapsus temere vocabulum exceptum fuit à duobus, non procul stantibus, qui domum à sylvis reduces illud imprimis agebant, ut Sophoclem de jacto in eum convicio monerent; pertinere quippe ad dominum, dictum de cane. Idem monent Themistoclem, vix recordantem ampliùs dicti, per iram effusi. Nec mora, totam legionem perstrepit rumor de immani hac offensa, quam non nisi sanguine expiari posse censebat militaris ferocia. Quid multis? Themistocles fassus quidem est præcipitis iræ qualemcumque culpam; satisfactionem tamen armatam dare Sophocli non abnuit: modò petat. Quòd si hanc petere Sophocles horreat, exclusus à legione sua, & non recipiendus ab alia, ad maximam penuriam erit redigendus. Itaque dimicatur: & quidem animos accendentibus aliis, qui ex alterutra nece commodum sibi sperabant, satis truentè.

315. *Quæres*, an dum Sophocles pro qualicumque illa injuria sibi satisfieri petiit, provocavitque Themistoclem, id per conscientiam ei licuerit? ad quam quæstionem notare te velim, ex hæcenus dictis colligi, quòd Sophocles, si *gravi* injuria, & *consideratè* fuisset læsus à Themistocle, & per hunc, nullo modo volentem satisfacere, redigendus esset ad incitas, quin ullus succurrere vellet Magistratus, quòd inquam, tunc Sophocli fas esset provocare ad pugnam, utpote ad viam unicam, qua naufragium evaderet. Colligitur etiam, quòd si *nulla* esset affectus injuria, vel *materiali* tantum, quòd fas tunc non esset. At cùm convicium hoc de se quidem grave, propter inconsultum tamen æstum tenui tantum cum attentione jactum, in foro Theologico culpam levem non excedat, fas non est Sophocli Themistoclem evocare; evocari enim ad vitam periculo exponendam grave malum est, majus longè, quàm levis culpa moreatur. Accedit, quòd Themistocles non injustè detineat ablatum honorem Sophoclis; quem enim abstulisse in foro militum creditur, restituit, quantum ipse quidem potuit, fatendo, id sibi dictum à præcipiti ira fuisse excussum: de cætero optimè se, & perquam honorificè sentire de Sophocle. Damnum ergo, cum convicio junctum, jam non ipse iniquè infert: sed malefanum aliorum judicium. Ut quid ergo ad damnum hoc evitandum Themistocles periculum vulneris, aut necis subcat?

316. Oppones. Æquum est, ut hoc in se periculum suscipiat quomodocunque nocens, ne pars innocens læsa certam subeat jacturam sustentationis congruæ: vel debebit Themistocles Sophocli damnum totum refarcire, si quidem hic duello abstinere debeat; nam ut demonstrat WOLFIIUS (a), si damnum ejus, cujus culpa accidit, colliditur cum damno alterius, qui omni culpa vacat, damnum ferre debet is, cujus culpa est. R. Æquum quidem esse, ut saltem *partem* damni leviter nocens Themistocles innocenti refarciat: non autem æquum esse, ut *vitam* exponat ad impediendum *totum* damnum: neque ut, postquam damnum fuerit secutum, *totum* refarciat ex bonis suis. Quodsi enim leges, quas natura posuit, rite perpendamus, deprehendimus

*Primò.* Quodd spectato jure naturali non sit obligatio restituendi pro damno, sine ulla culpa Theologica illato. Ratio est; quia in foro conscientie non potest obligatio compensandi nasci ex injuria, nisi in foro conscientie commissa sit injuria: atqui ubi nulla adfuit culpa Theologica, nulla facta est in conscientia injuria: ergo &c.

*Secundò,* si damnum grave causatum sit per culpam Theologicam levem, *venialem* quam dicunt, ex defectu deliberationis, & attentionis plenæ ad jus alienum, non datur obligatio gravis ad illud reparandum totum ante sententiam Judicis, & extra peculiarem *contractum*, seu pactum. Ratio est; quia ubi non est perfecta injuria, non debuit nasci perfecta, & gravis obligatio restituendi totum; cum hæc obligatio non nascatur ex re ipsa, seu damno gravi, sed ex injuria, eaque levi. Item homines nunquam in talem gravem obligationem, sibi ob culpam subrepticam imponendam, consensissent, si ante omnem casum interrogati fuissent: ergo de jure naturæ non datur hæc obligatio, juxta regulam satis receptam. *vid. n. 176.* Contradidunt equidem huic doctrinæ Authores reliqui, non ignobiles: at plures stant pro illa (b). Id

317. *Tertiò,* magis dubium est, an, cum non detur obligatio ad compensandum *totum*, saltem non detur ad *partem*: Item, quomodo definiri debeat pars illa. Item, an hæc obligatio ad partem sit gravis, vel  
levis,

---

(a) J. N. p. 2. §. 629. (b) Vid. *la Croix* l. 3. p. 2. n. 185.



levis, id est, sub peccato, quod *mortale* dicimus: vel sub *veniali* tantum præcepta. R. *Ad primum*, videri æquitati conformius, ut saltem ad partem damni Themistocles teneatur compensandam Sophocli, abstinenti, ut debet, à duello. Ratio est; quia omnis injuria inducit inæqualitatem: ergo cum justitia tendat ad æqualitatem, hoc est, ut unusquisque habeat, quæ sua sunt, & nemo sine suis rebus maneat, ut loquitur Lugo (a), existit obligatio reparandi: non quidem tantum, quantum detractum fuit per culpam levem; sed quantum imponi sibi levis culpa meretur. Neque obstat, quod ex pacto, voto, vel juramento, factis cum imperfecta attentione, nulla prorsus obligatio oriatur quidquam præstandi; nam per pacta, vota, & juramenta homo sua se libertate abdicat, id quod sanè perfectam attentionem requirit, ut inde oriri valeat obligatio; econtra ad peccandum, &, quod sequitur, etiam ad inferendam injuriam sufficit attentio imperfecta, trahens post se obligationem reparandi jus læsum (b).

*Ad secundum* docet BONACINA (c), posse aliquando tam levem esse culpam *venialem*, ut vix obliget ad centesimam partem damni: econtra posse aliquando esse tam gravem, adhuc tamen *venialem*, ut obliget ad partem decimam. In nostro ergo casu, cum ex ira subita convicium Themistocli exciderit, de quo ipse dolet, ipsumque convicium non tam in Sophoclem, quam ejus canem fuerit directum, *videtur*, quod plus dare pro compensando damno non teneatur, quam circiter trigessimam partem annui proventus, e. g. triginta tres aureos, si Sophocles in proventibus annuis numeravit aureos mille. Cum tamen triginta tres aurei ad sustentationem, etiam tenuem, vix Sophocli sint suffecturi, fortè (saltem ex charitate) plus aliquantum obligabitur dare Themistocles.

*Ad tertium*, an ad hanc summam in singulos annos pendendam, obligetur Themistocles sub peccato gravi, vel levi tantum? existimat LA CROIX (d), sub levi tantum obligari, licet triginta tres aurei sint materia gravis, qua admodum indiget Sophocles, spoliatus officio. Ratio ejus est; quia hæc obligatio non oritur ex materia ipsa, seu magnitudine damni:

G g fed

(a) Disp. I. sect. 3. n. 52. (b) Vid. *La Croix* l. 3. p. 2. n. 192. (c) De restit. d. 1. q. 1. p. 3. n. 9. (d) L. 3. p. 2. n. 191.

sed ex injuria *formali*, seu prout est in conscientia, quæ tantum levis est. At malim dicere cum BONACINA (a), & PLATELIO, quod obligatio pendendi triginta tres aureos sit gravis. Verum equidem est, quod, dum quaeritur, an *solum* damnum, vel *pars* tantum compensanda sit, quodd, inquam, *tunc* non tam ad materiam, quam ad culpam attendatur; secus materia culpam excederet: at dum jam non nisi pars, *ad parvitatem culpa jam redacta*, solvenda restat, obligationem ex alio metiri non poterimus, quam ex ipsa materia; quæ, cum gravis sit, gravis etiam obligatio erit ad solvendam hanc partem. Et en!

318. Quæstio ex quæstione oritur. Quid si (ut facile contingere posset) hanc partem quotannis pendere recusaret Themistocles, tenax auri, vel mædens ferro satisfacere: quod si neque judex esset, qui hanc causam, jam semel à se rejectam, veller judicare, quid, rogo, tunc auxilii superesset misero Sophocli? R. Si Sophocles jus *certainum* haberet ad illam partem damni exigendam, *tacita compensationi* locus esset; sic enim omnes adessent conditiones, quas requirunt Theologi ad licentiam utendi ea compensatione. Et si hæc via non pateret Sophocli, fors etiam armis adigere posset Themistoclem, ut triginta tres aureos pendere, omnino necessarios acciperet suæ fortunæ. At cum jus ad eam partem tantum sit *probabile* (neque enim certitudinem ausim assignare huic doctrinæ, pro qua non militat ratio *convincens*: neque consensus Authorum tantus est, ut non præclari quidam dissentiant) compensatio occulta locum non habebit; cum ad hanc necesse sit, ut constet tibi *certitudine morali*, rem esse tuam, vel tibi deberi. Quod si autem compensatio tacita locum non habet; multo minus vi armata, & privato bello licebit extorquere contra possidentem, quod debetur tantum probabiliter, vel etiam probabilius; æquè enim difficiles debemus esse in concedendo bello privato, quam compensatione occulta ob rationes ferme similes.

319. II. De *Calumniis* ita habet: Finita expeditione bellica cum Menander, ad altiorum gradum aspirans, præhaberi sibi Colinum cerne-  
ret, invidia, & indignatione commotus, non satis consideratè conqueri  
audi-

auditus est, quod homo sibi fuisset prælatus, *qui ignavè egisset in pralio ultimo*. Divulgato dicto filere non potuit Colinus, nisi turpi notatus probro ejici ex legione veller; Judicem ergo adiit: at æmulum invidia ita implicata, & dubia specie, causa confusa fuit, ut non nisi duello terminari jam posset. Quod ergo se vertat, suæ sibi virtutis conscius? Equidem Menander tandem facti pœnitens, Colino se excusaverat: renuebat tamen palinodiam canere publicè; eo quod hoc honori suo; & fortunæ summè noxium nōsser fore; ad calumniatorem quippe divertere solet malefusta fors, quæ antè passò calumniam erat exitum allatura. Et reſervetur licet honor recantanti quocunque jure communi, vel provinciali; militari certè more pessumidatur honor, quamprimum quis fatetur falsò se malum dixisse de comilitone, etsi addat non satis consideratè id factum. At sic Colinus, quamvis crederet inconsiderantiam, tamen in salvo non erat. Quid ergo hic ferunt regulæ conscientiæ?

320. Videtur, Colinum non posse exigere à Menandro revocationem tam arduam, allaturam stragem famæ, & fortunarum. Docet enim LUGO (a), eum qui *venialem solum negligentiam, & inadvertentiam* habuit in sua detractioe, non teneri cum gravi detrimento, & incommodo reparare damnum illatum; quia ex injuria veniali, & levi, undecunque levitas illa proveniat, non potest oriri obligatio gravis, & difficilis restituendi; adducit etiam sententiam MOLINÆ. Quodsi ergo Menander non obligatur recantare tanto cum suo damno, Colinus jus non habet cum adigendi ad recantationem: aut, hac non obrenta, ad duellum.

321. Qua in re satis certum mihi est, *si judicis copia esset Colino*, rectè hunc facturum, si peteret illius autoritate palinodiam præcipi Menandro. Verum equidem est, ex doctrina LUGONIS, & MOLINÆ ritè deduci, Menandrum non teneri, ut ipse sponte sua recantet tanto cum suo damno: &, cum obligatio, & jus sint reciproca, utique etiam læsus Colinus non habebit jus lædentem Menandrum obligandi, ut is sponte sua recantet: nihilominus manet læso jus recurrenti ad judicem, utpote ad quem recurrere licet etiam tunc, ubi ex culpa tantum *juridica* damnum est datum (b),

Gg 2

vel

(a) Disp. 15. n. 7. (b) ff. Si quadrup. pauper. sec. dic. item Ad Leg. Aquil.

vel illata injuria. Judici dein relinquatur, quam poenam statuendam judicet in calumniam, animo non satis deliberato impactam. Si hic recantationem imponeret, habebit læsus, quod merito expectabat. Quodsi postea ea recantatio stragem honoris, & bonorum post se trahat, nihil hæc appendix ad læsum pertinebit.

322. At, cum in nostro casu *copia judicis non sit*, disputari potest, an in conscientia obligetur Menander recantare sponte sua, ita exigente Colino: vel, si recantare renuat, an à Colino possit ad duellum adigi, si quidem hoc proficuum Colinus videat firmandæ suæ fortunæ, & honori: non aliter, ac si calumniam consideratè cum peccato gravi effudisset.

Quod obligationem recantandi attinet, vis dubii in eo stat; quòd vel infamatus Colinus sine obtenta recantatione debeat excidere honore, & fortunis, vel Menander, si recantet: culpa autem Menandri non fuerit satis deliberata. Si quidem tamen inhærere placeat fundamento Theologico, jam posito *Paragrapho precedente*, & iterum n. 320., quòd scilicet culpæ levi tam gravis obligatio respondere nequeat, dici debebit, quòd, ubi judicis copia non est, recantare non obligetur Menander: &, quoniam ubi obligatio non datur *passiva* ad aliquid faciendum, *jus ætivum* ad hoc exigendum dari non potest, etiam Colinus cum huc adigere non possit vi armata. Quæres, an totum ergo damnum unà cum infamia ferendum infelici Colino sit? R. Ut paulò antè n. 317. videri æquitati conformius, ut saltem ad partem damni Menander teneatur, compensandam Colino, abstinenti à duello, quam tamen partem majorem velim, quam illam Themistoclis §. *precedente* definivèram; quia *calumnia* est injuria acrior, & evitatu facilior, quàm *convicium*, quale Themistocli exciderat. Contra

323. Oppones I. Menandrum *ad nihil* teneri; eo quòd, dum Colino se excusavit de jacta præpropere calumnia, ex nocente factus sit innocens, neque jam dici amplius possit *iniquus aggressor* honoris, ac fortunarum Colini. Ferme sicut docet LUGO (a), Petrum à me licitè defendi armis contra Paulum, etsi Petrus prior Paulo vim intulerit: modò jam Petrus  
à vi

à vi iniqua cesset, & pacem petat; quia, licet à principio fuerit nocens: modò factus est innocens. R. In materia de detractiōe honoris non statim pro innocente habendum, qui soli læso fatetur culpam, vel de culpa dolet, paratus desistere ab ulteriore calumnia: sed necesse est honorem ablatum reddere apud eos, apud quos detraxit. Sicut qui habuit hucusque sine gravi culpa domi suæ alienum bovem, quàmprimum agnoscit esse alienum, tenetur non detinere, sed facere, ut redeat ad dominum, saltem si sine gravissimo suo incommodo possit; secùs peccabit detinendo (a). Reddere ergo honorem cum sine suo gravissimo incommodo non possit Menander, sub gravi culpa non obligabitur reddere: manebit tamen obligatus ad compensandam partem damni ex culpa præcedente levi.

324. Oppones II. Menandrum teneri ad *recantationem*, quantumvis damnificam: vel ad refarciendum *totum* damnum, idque eo potissimum ex argumento, quòd fas Colino esset recantationem illam petere à iudice imponendam Menandro, si quidem iudicis copia foret. Cum ergo iudicis copia non sit, vel apertè ab hoc denegetur iustitia, iudex sibi suus in causa propria Colinus erit (*vid. n. 177.*), ita ut, quidquid aliàs iudici in reum licet, etiam Menandro liceat, id est, recantationem imperare: vel, si negetur, vi armata extorquere: vel petere denique totius damni compensationem. R. Inter iudicem publicum, & privatum id præter alia discrimen intercedere, quòd sententia iudicis publici novam sæpe in reo obligationem pariat, qua hic ante sententiam non stringebatur. Sic in hac ipsa materia de damno gravi, per peccatum leve illato, communiter docetur, post sententiam iudicis obligationem gravem nasci præstandi totum id, quod iudicatum fuerit. Debetur hæc reverentia sententiæ publici iudicis ob bonum publicum, & necessarium Reipublicæ ordinem. At iudex privatus aliam ei, à quo læsus est, obligationem nequit imponere, nisi quam ex ipsa læsionis natura contraxit. Cum ergo hæc in Menandro talis non sit, ut ad recantationem usque adedò damnificam, vel refarciendum damnum totum adstringat, in hætenus dictum: etiam Colinus ei hanc imponere non poterit: neque armata vi extorquere.

---

(a) Vid. *Lug. disp. 15. n. 3.*

325. Oppones III. Colinus non tenetur credere, Menandro calumniam inconsideratè excidisse: ergo idem erit, acsi gravi cum noxa offensam fuisset passus. R. Tenetur id credere tunc saltem, si fide nobili, aut jurejurando id affirmet: nisi fortè hæc assertio falsitatis convincatur argumentis claris. Id extra dubium est, facilius effutiri qualescunque convicium animo non satis deliberato, quàm calumniam; præsertim si hæc plurimum auribus, & diversis temporibus ingeratur.

326. Oppones IV. Quòd Menander non teneatur totum refarcire damnum, recitata recantatione, est sententia neutiquam moraliter certa; sed probabilior tantum, vel æquè probabilis, ac adversa; docent enim ANG. PANORM. COVARR. VASQ. TURR. MEDIN. PALLAVIC. &c. totum damnum esse restituendum (a). Ergo Colinus uti poterit sententia probabili, pro se militante, atque Menandrum, recantare tergiversantem, adigere pugnando, ut se indemnem servet, sicut in casu nostro principali (b) diximus, Hectorem licitè suscipere duellum; eo quòd probabilis sit ea licentia (c). R. Probabile esse, quòd Menander teneatur refarcire damnum totum: probabile esse, quòd tantum partem damni: item probabile esse, quòd neque partem, ut patet ex dictis; hæc enim in re cum non satis clarè luceat jus naturæ, in varias partes, cum fundamento ubique non levi, abivere auctores. Quo stante, ut totum damnum sibi compensetur; exigere nequit Colinus: sed compositionem amicam cum Menandro debet inire; cum enim ipse, denegata sibi justitia, munus judicis occupet, judex autem stante utrinque vera probabilitate, & in æquilibrio fluctuante bilance, non possit causam totam adjudicare uni parti: sed vel rem dividere; vel ad amicam compositionem deducere partes litigantes debeat, ut docet communis, idem faciendum erit Colino. Aliter se res habet in casu nostro principali, ubi non erat tantum *probabile*, quòd Leander Hectori *iniqua* læsione noceat; sed hoc erat *certum*: certumque, quòd ei obligetur *totum* damnum vel avertere, vel refarcire. Probabile solum erat (sive non omnino moraliter certum) quòd, stante hac læsione certè iniqua, & adjectis reliquis duabus conditionibus, offerre, vel acceptare duellum possit (d).

327. III.

(a) Vid. *la Croix* I. 3. p. 2. n. 185. (b) Vid. Caput IV. art. 3. (c) A n. 295.  
(d) Vid. à n. 364.

327. III. De *verberibus* paucis ita habeto. Sicut, qui atra calumnia fuit denigratus, purgari non potest, nisi recantet calumniator: vel in statu prorsus heteroclitico Reipublicæ, nisi duello se vindicet: sic qui percussus est fuste, vel colapho, honorem recuperare nequit, nisi, qui ferit, supplex petat veniam, & porrecta arundine ad verbera se offerat pro verberati arbitrio, similive humili ratione: vel in communitate pariter heteroclitica nisi sanguine probum eluat. Sicut autem recantans perniciem sibi accersit: sic etiam submitbens se verberati arbitrio exesse castris, aut nobilium cœtu, cum magno sæpe fortunarum damno, debet. Sicut ergo reus de calumnia inconsideratè prolata, ad tam arduam satisfactionem obligari vix potest: sic videtur etiam reus de verberibus datis ad eam obligari vix posse, & uterque ob culpam levem à satisfactione difficillima excusari. Itaque quidquid membro præcedente *hujus §.* per omnes numeros dictum est de calumniis, applicandum etiam veniet quæstioni de verberibus.

## §. III.

An ad provocationem sufficiat læsio, mihi illata per exprobrationem criminis veri?

328. *Casus statuitur.*

329. *In hoc poterat evitari duellum, si fuisset imploratus iudex.*

330. *At cum imploratus non fuerit, provocatio reprobat.*

331. *Si autem iudex imploratus negasset justiciam.*

332. *Provocationis licentia dependeret ab illata injuria: & hac à notorie-*

*tate criminis noti, vel notorietate facti, vel juris.*

333. *Quarum neutra cum adfuerit, non iniquè videtur fuisse provocatus Cleantus, aliter volens satisfacere.*

334. *Sed, quares, quam potuisses satisfactionem aliam dare?*

328. **C**asum accipe. Ab ipsa usque Suecia in superiorem Germaniam advenerat vir militaris, & nobilis, suam addicturus operam Principum cuidam. Admissus legionis jam Tribunum agebat ultra annum; cum ecce! alius non nemo (Cleantus dicimus) nescio, cur infestus, de illo inter Duces evulgar, quoddam ex Suecia se subducere habuerit necesse, utpote qui ibi clepaces manus militari ærario iniecisset. Tribunus malè sibi consilius, volens inquisitioni filum præscindere sua, vel adversarii nec, ad duel-

duellum provocat, tanto etiam securius, quod audisset, duello licitè peccatum iniquum calumniatorem ad evitandam grandem infamiam, conjunctam cum gravi damno fortunarum, ubi nil præsidii in iudice est. Provocato nil tergiversante pugnatum est. Cecidit provocatus, cujus ore obturato, nihil ultra molestiæ motum Tribuno à quopiam est, saltem ad tempus.

329. Quæres : num bene hæc acta sint? R. inprimis duellum potuisse evitari, si ex æquo fuisset actum; nam provocatus, si se obtulisset ad demonstrandam criminis imputati veritatem, documentis ex Suecia petendis (quod tamen periculosum, & molestum nimis sibi ducebat) Tribunus arma debebat suspensa tenere juxta regulam etiam militarem. Tribunus autem, si bene sibi fuisset conscius, recusato duello, *jure retorsionis* uti poterat, & infamem calumniatoris notam impingere, nisi imputatum crimen irret demonstratum. Jam verò cum hic non consultum duceret ad remedia juris provocare, acerbè tamen sentiret, injuriam quam sibi credebat à *propalante* illutam, & damnum imminens, sicque provocaret ad pugnam,

330. Quæstio oritur, num contra conscientiam egerit? R. Omnino; nam re penitus inspecta, quamvis gemina conditio adesset, iniqua scilicet læsio, & gravè inde fluens damnum: tertia abest, scilicet denegata apertè justitia. Non enim jam tribunal Suecicum, sed Princeps ille, cujus servitio uterque erat addictus, debebat jus dicere, quicquid causa ad se delata, onus probandi utique detulisset criminanti. Cum verò Tribunus timuerit, ne plenior notitia ex ipsa usque Suecia peteretur, utique sibi obfutura potius, quam profutura, haud dubiè ipsum hunc Judicem declinandum, & famam, ferro sibi asserendam, satius duxit, ne scilicet movendo mephizim suscitaret scetorem, quem suppressum mallet. At num ideo iustus in conscientia fuit? neutiquam. Sibi tribuat, & malæ causæ suæ, quod jam ipse horrere debeat, & declinare judicium: neque propterea credat, sibi licitum esse privata autoritate lædentem aggredi; non enim reputare se potest repositum in statum naturalem, quamvis Judex non apertè denegat justitiam (*vid. n. 290.*)

331. Quodsi autem fingamus, Tribunum, malè quidem sibi conscius in animo, sui tamen securum fuisse de bono successu, si res ad judicium deferretur; eo quod bene sciret, adversarium, cui onus probandi tunc incumberet, nihil argumentorum valiturum asferre ex Suecia, in qua accu-



accusatore mortuo iudex sibi favens acta, & indicia omnia studiosè suppressisset: & hac ipsa de causa, quòd securum se sciverit apud præpositos duces, vel iudices alios nunc in Germania competentes, de calumnia Cleanturum detulisse: sed quoniam tunc erat heteroclita justitiæ facies, & malevoli in advenam conspirarent, causam fuisse rejectam, quin discuteretur. Hæc, inquam, si fingamus, quæri potest, num Tribunus Cleantum, pro *injuria* nolentem alia ratione *satisfacere*, poruerit ad servandum honorem, in hac regione extera à nemine alio violatum, & ad servandum officium vitæ sustentandæ necessarium, ad duellum provocare? Videntur tres conditiones, ad duelli licentiam requisitæ, omnes adesse, negata scilicet justitia, grande damnum, & injuria nulla satisfactione expiata.

Huic quæstioni, ut satisfiat, inquirendum primò, qualis *injuria* illata Tribuno fuerit à Cleanto. Secundò, quam satisfactionem ei debuisset Cleantus.

332. Injuriam sibi Tribunus ideo fuisse illatam credit, eo quòd crimen suum Cleantus propalaverit in hac regione extera, ubi nemini erat notum. Circa hoc breviter referre placet Theologorum doctrinam. Potest crimen ignotum fieri notum vel *jure*, vel *facto*. *Jure*, si constet per confessionem rei in judicio publico, vel per sententiam judicis. *Facto*, si plurium hominum conspectui expositum sit, vel notitia constat ita evidenti, ut nulla tergiversatione celari possit (a). Si quidem notum sit *notorietate facti*, potest quidem absque peccato gravi, saltem detractionis, id referri ignorantibus in eodem loco, quin etiam in locis vicinis, aut per commercium ita conjunctis, ut notitia illius satis certò perventura credatur; tunc enim fama bona jam quasi amissa his omnibus in locis censetur; ad amissam autem famam non habet jus reus: ergo neque reo à narrante fit injuria. At ejusmodi crimen in loco divulgare, quòd notitia ob locorum disjunctionem, vel rarissimum incolarum commercium vix erat perventura, peccatum est detractionis, violans jus, quòd alter habet ad famam suam. Itaque obligationem inducit reparandi famam, & quidquid damnorum in bonis fortunæ secuturum prævideri potuit. Ita plurimi

Hh

Autho-

(a) Gloss. in c. vestra, de Cohab. Cler. & Mulier.

Authores apud FRANC. HENNO (a) contra tamen non paucos. Ratio est; amissa uno in loco fama non est amissa ubique terrarum: neque renunciat juri suo peccans pro omni loco, quamvis tacitè renunciet pro eo loco, in quo peccat publicè. Ex hoc nondum apparet, quomodo potuerit crimen Tribuni propalari sine facta ei injuria.

Jam etiam anj fuerit *jure notum* audiamus. Meretur audiiri MOLINA (b): " Quando locus, in quo quis degit, qui in alio publica sententia fuit punitus, aded distat à loco, in quo ille laborat infamia, adeoque infrequens est commercium ab uno eorum locorum in alium, ut verisimile sit, eam infamiam ad eum locum non perventuram, probabile judicant NAVARRUS, & LEDESMIUS, culpam esse lethalem, cum restituendi onere, detegere ibi peccatum illius; tametsi contrarium non judicent etiam improbabile. Ac certè, quando fama delinquentis simul fuisset cum delicto condemnata, ut condemnatur in crimine hæreseos, ac læsæ Majestatis, non auderem condemnare culpæ lethalis eum, qui crimen detegeret in tali loco remoto; quando verò non directè damnatur fama delinquentis, non caret probabilitate sententia NAVARRI, maxime, si ille alibi infamatus mores mutasset, crevissetque in reputatione. Non tamen adeò firmus sum in ea sententia, ut auderem injungere in eo evenru onus restituendi famam, & alia damna, si quæ inde ulterius essent secuta; tum quia eo ipso, quod quis est publicè damnatus, & punitus de aliquo crimine, videtur in pœnam ejus criminis concessum diffundere eam notitiam in alios absque exceptione aliqua: tum quoniam in dubio, an ex ea detectio quis teneatur ad restitutionem famæ, melior est conditio possidentis sua omnia bona, ut eam non restituere teneatur, id subeundo onus. "

333. Quod Tribunal nostrum attinet, causa ejus, in Suecia dum erat, ventilari jam cœperat: at vix ad umbilicum deducta, potenti patrocini abrupta est, sive sopita; fors quia malus timebatur exitus: neque tamen ita fuit dealbata, ut non notaretur passim transparens nigredo; unde & ipse in exteras se terras subducere consultius duxit, quàm ut malè purgatus in statione persisteret. Id, cum probè perspectum haberet

Clean-

(a) Tract. in Decal. disp. 8. q. 3. art. 3. conclus. 1. (b) Tract. 4. disp. 33. n. 5.

Cleantus, salva quidem veritate revelare crimen potuit in superiore Germania: non tamen salva de cætero conscientia.

MOLINAM audiamus (a): "Quando crimen aliquod solum est ita notorium juris notorietate, quod nondum est lata sententia, qua delinquens de eo publicè damnetur, nefas est illud detegere in loco, in quo delinquens non laborat infamia, ut si quis fassus jam est crimen suum in judicio: vel in judicio est id jam crimen plenè probatum, sed nondum lata est sententia. Ratio est, quia delinquens adhuc in eo loco habet suam famam illasam, necdumque in penam delictum ejus factum est publicum: ergo nefas est privatis ante sententiam lacerare ejus famam quasi penam criminis exequendo, & utendo ea facultate, quæ virtute datur privatis per sententiam publicam diffundendi notitiam in alios."

Inharendo huic doctrinæ dicendum videtur, Tribuno fuisse illatam gravem injuriam, & lationem iniquam, nisi fortè ex alio bono fine crimen aperuisset adversarius. Jus ergo ille ad famam, & bonæ suæ cum pessumdari cerneret, nec satisfacere vellet iniquus obrectator, nec succurrere judex veller; videtur pro se habuisse omnes illas conditiones, ex quibus licitum duellum reddi hætenus diximus.

Nec dicas, verè tamen fuisse reum Tribunal, & malitiosè appellasse ad judicem, consequenter non posse conqueri de *denegata justitia*. R. Ex hoc, quod Tribunus verè fuerit reus, tantum sequitur, quod Cleantus non fuerit mendax calumniator: non sequitur, quod injuriam non fecerit. Nec malitiosè appellavit ad judicem; veram enim injuriam examinandam obtulit, & rectè petiit, ut silentium imponeretur maledico ori, si in probatione deficeret.

334. De satisfactione adhuc quæres, qualem Cleantus dare, aut expectare Tribunus potuisset ante provocationem ad duellum? Nulla videtur superfuisset. Mentitum se edicat Cleantus? et crimen, quod *novit esse verum*, propalavit. Dicat æquivocè, se male locutum, & loquendo injuriam fecisse? cultrum jugulo suo admovebit, si idem videatur sensus, ac falsum se dixisse; volat quippe irrevocabile verbum inter milites, & pro infamia reputatur propriis dictis fidem abrogare. Si alius sensus ingeratur,

Hh 2

tur,

(a) Ibid. n. 6.

rum, Tribunus non sanabitur. Num alia laude compenſet damnum, & Tribunal præſtante de cætero virum eſſe aſſerat? At inter milites non quadrat hoc emplaſtrum illi vulnerei. Quiddi ergo impoſſibile eſt altariuſ generiſ ſatiſfactionem dare, & famam reſtituere, non cenſebitur Tribuno per *injuſtam læſionem* damnum afferri; hæc enim ceſſat, quamprimum lædens verè paratuſ eſt occaſionem reſarciendi damnum arripere, ſi ſuppetat. R. Si pro ratione *notorietatiſ* Tribuno facta eſt per propalationem vera injuria, reuſ debebit profiteri, *ſe male locutuſ, & loquendo feciſſe injuriã*, in quocunq; dein ſenſu alii ſint accepturi. Si in ſenſu, qui Tribuno favet, & Cleanto obſit, hic ſibi met tribuet, & temeritati linguæ ſuæ, quod incurrit, malum. Quiddi accipiatuſ in ſenſu alio, quo non purgetuſ Tribunal, feciſſe cenſenduſ eſt Cleantuſ, quod potuit: aliud ſalva veritate dicere non poterat. Fatuſ itaque ſuū patienter Tribunuſ ferat quoad detrimentuſ famæ: quoad alia damna inde ſecutura, vid. MOLINA (a).

#### §. IV.

An ad provocationem licitam ſufficiat læſio mihi illata, quam ego per illatam antè alteri læſionem mihi accivi?

335. *Proponitur caſuſ.*

336. *Duplici modo.*

337. *Respondetur ad primum.*

338. *Respondetur ad ſecunduſ.*

335. **I**N caupona ad prandiuſ aſſidebant variæ conditioniſ, & nationiſ viri nobileſ, ac militateſ. Dum variis ſermonibuſ condiuntur epulæ, Themistocleſ, nobiliſ, & antehac militiam ſectatuſ, nescio quid, audituſ eſt inferre, & multiſ firmare ſuam ſententiã. Contradixit ei Sophocleſ, diſputatuſ, & dūnq; neuter palmam vult cedere, ait denique Sophocleſ, Themistocleſ ſic palam facere, quàm *rudieſ* eſſet in re militari. Concitatuſ Themistocleſ regerit illico, *vilem homuncioneſ* eſſe, qui rudem ſe dicere. Flamma utrinque exardeſcente, in arena fuiſſet pugnatuſ: at hoſpiteſ cæteri hoc ſibi moleſtuſ fore oſtendebant, precan-  
teſ,

(a) Loc. cit. n. 1.

tes, ut abirent, & alibi sibi forum pro hac lite quærerent. Parent ambo. Sophocles *vilis homuncionis* vituperium ut à se amoliretur, ad duellum provocat Themistoclem post longiorem moram interpositam. Consultius utique egisset, si mox extra cauponæ limina stricto gladio satisfieri sibi periisset; ex prima ira poterat fors peti excusatio: certè rixa audiisset talis pugna, nec duelli odiosum nomen fuisset sortita, quidquid sit de conscientia. Jam autem

336. Statuamus primò, Sophoclem, convicio hoc dedecoratùm, ed redactum fuisse, ut à nullo iudice auditus, ac honori restitutus, gravissimum fortunarum damnum debuisset incurrere. Sic quæramus, an, non obstante læsione sua præcedente, qua Themistoclem *rudem* in re militari dixerat, duello nihilominus *vilis homuncionis* notam, aded damnificam, vindicare licitè potuerit.

Statuamus secundò, mutato casu Sophoclem, irritatum *vilis homuncionis* appellatione, sonantem è vestigio alapam dedisse Themistocli: unde hic, copioso manante è naribus sanguine, sibimet ereptus, oblitus sit gladio invadere è vestigio percussorem. Cùm jam percussio via alia ad recuperandum honorem non suppeteret (*juxta n. 192.*), quàm arundinem versùs obvium sibi proximè Sophoclem projicere, quæramus, an licitè id acre valuerit, quamvis certus esset de secutura mox pugna satis acri.

337. Primum quod spectat, non miror, quòd Themistocles imperitiam sibi in confesso tam honorato exprobrari acerbè senserit; qui enim ex nobilissima familia oriundus, aliquamdiu castra secutus est, ferre tale convicium vix volet. Equidem composito ad gravitatem vultu, vel capite abnuendo, modestiam imperare poterat Sophocli, & jubere, ut meminisset, cui, & quid loqueretur; fors hic in tempore adhuc leniore voce mitigasset jactum temere verbum: at præsentia testium, & exacerbatio mentis fecèrè, ut acre dictum acriore rependeret, *vilemque homuncionem* vocaret. Quodsi æqualis esset in utroque dicto contemptus, non haberet Sophocles, cur satisfieri sibi exigeret; eo quòd nihil ei tum deberet Themistocles; nam paria delicta mutua compensatione tolluntur (a). Unde Di-

Hh 3

CASIL-

(a) Ex cap. 7. de Adult. L. Si ambo. ff. L. ultim. C. de Compens.

CASTILLO (a) asserit : " licitam esse compensationem in debitis, sive in actionibus quæ nascuntur ex delicto, ut si Petrus & Paulus se mutuo conviciis affecerunt, possent uti compensatione, ita ut Petrus non teneatur restituere Paulo, nolente Paulo restituere Petro. Nempe sicut licita videtur compensatio in facultatibus, ita etiam in delictis. Et quidem de injuriis ejusdem generis certius est ; qui enim similibus contumeliis se affecerunt, illi omnium judicio pares censentur, & in praxi receptissimum est. " Tum citat magnum Authorum numerum : PETRO NAVARRA autem contrarium sentienti respondet. " Etsi damnum à te illatum, non tollatur per infamiam, tibi vicissim illatum, tamen tollitur debitum sive obligatio refarciendi illud damnum, si alter nolit refarcire, quod à se illatum est. Quod etiam usuvenit in damnis fortunarum ; si enim incendiisti domum Petri, & Petrus vicissim tuam, non tollitur per hoc damnum, à te illatum Petro : sed tamen tollitur debitum satisfaciendi Petro per compensationem. "

Ex qua doctrina patet, quod dixi : si æqualis esset in utroque dicto contemptus, non haberet Sophocles, cur satisfieri sibi exigeret. Jam si utrumque convicium in balance appendatur profani judicii, dictum Themistoclis, appellantis Sophoclem *vilem homuncionem*, alteri, quo Sophocles Themistoclem *imperitum* pronunciaverat, præponderare æstimabitur. In quo tamen considerandum venit, quòd convicium præponderans, & acrius ex altero satis acri sponte velut sua, & ipso ex usu, fluxerit. Et quamvis, ubi de conscientia est quæstio, ad sacrum, & Theologicum tribunal spectet dicere sententiam : nihilominus quantum probum, quantaque injuria ejusmodi dicto contineatur, ex ipso usu, & æstimatione profanorum metiendum est, sicut voces aliæ omnes valorem suum habent ex libera hominum, ac recepta institutione, ut Dialectici dicunt. Cùm jam appellatio *vile homuncionis* aliquantum quidem appellationi *imperiti* militis præponderet : simul tamen appellatio *imperiti* talis sit, quæ solcat sine singulari injustitia alteram post se trahere ; non videtur excessus conviciandi in Themistocle esse tantus, ut propterea Sophocles in honore se admodum graviter læsum dice-

---

(a) De Justit. l. 2. tract. 2. disp. 9. à n. 120.

dicere, & duello satisfactionem querere per conscientiam possit. Compensatur injuria per injuriam, & si quid residui ex una parte maneat, id tantum non est, ut iniqua & gravis læsio, sine qua licentia ad duellum nunquam datur, merito æstimanda sit. Sophocles itaque suæ linguæ præcipiti damnum, quod patitur, tribuat: vel roget Themistoclem, quod alium quemdam rogasse in casu, infra recensendo n. 350. audiemus.

338. Ad secundum id imprimis perpendendum, quod Themistocles nobilissimo fuerit ortus sanguine. Lætionem quidem præmiserat, vilis homuncionis nomine contemnens Sophoclem, quam tamen ferme adæquavit conviciū præmissum. Si quid residui mansit, tantum non fuit, ut colaphum mereretur. Petere debebat Sophocles pro hoc residuo satisfieri sibi alio quocunque modo. Certè colaphus abjectissimum ignominiae genus est, ut dictum alibi. Unde aulam adire Themistocles sine rubore non amplius poterat, nec alibi comparere sine metu, ne fortè recoqueretur dedecus cum magna sua molestia. Princeps loci, utrum vellet, qui læso optularetur, non inveniebat; eo quod Sophocles ad legationem exteri Principis pertineret. Apud hunc si querelas deponeret Themistocles, sperare aliud non poterat, quàm exprobrationem, scribendam tum Sophocli, tum & sibi, cum mandato, ut Sophocles humanitatis quodam officio sibi Themistoclem reconciliare satageret. At hoc quaecunque humanitatis officium abstergere notam tam turpem non valet in æstimatione profanorum. Aliud foret, si juberetur Sophocles supplex accidere Themistocli, eique arundinem porrigere, veluti paratus talionem recipere. At hoc sperare non licebat. Rebus sic stantibus, decisio quæstionis dependet ab eo, an ejusmodi projectio arundinis idem valeat, ac provocatio? Si non æquivalet: sed in æstimatione ævi hodierni idem sit, ac purè reddere alapam, & à se acceptam amoliri, videtur Themistocles jus sufficiens habuisse ad id faciendum. Quodsi verò æquivalet provocationi, (de quo *vid. n. 231.*) perpendendum erit, an tres conditiones, ad licitam provocationem requisitæ adfuerint, scilicet *iniqua læsio*, quam non defuisse existimo. *Damnum* æstimari debebit ex eo, an gravis contemptus, & exclusio ex nobilium circulis æquivalet gravissimo damno, in rebus fortunæ ferendo, de quo à n. 368. Denique quod *judicem* spectat, certè exspectandum erat, donec hic *apertè* denegaret justitiam juxta dicenda *Articulo III. hujus Capituli.*

## §. V.

An licitum sit *comparere* ad duellum, dum quis provocatur ab eo, quem antè iniquè, & confidèratè læsit: vel quo alio modo satisfacere debeat?

339. *In positis casibus comparere non licet.*

340. *Si quis vel calumnia,*

341. *vel alapa,*

342. *vel alio convicio antè læsit provocantem.*

343. *Nec juvat aliqua probabilitas in contrarium.*

344. *Nec excusat grave damnum non comparentis. Ad quod tamen evitandum*

345. *Suggestitur ei consilium salubre,*

346. *Cujus aqutitas probatur.*

347. *Nec obstat, quod sic detur bellum utrinque justum.*

339. **H**Actenus examinare laboravimus, qualis, & quanta debeat esse in læsione iniquitas, ut, concurrentibus conditionibus reliquis, *provocare* ad duellum liceat. Jam expendendum, num provocato, qui iniqua læsione, eaque deliberato animo facta, provocationi causam dedit, liceat *comparere*. Casus ergo recolamus, alibi jam recensitos, ubi Centurionem, aliòsve viros nobiles, & spectatæ dignitatis vidimus, qui, dum graviter in honore læsi, apertè justitiam negante Judice, veluti infames æqualium consortio se exclusos, & reductos propemodum ad stivam, ac mendicantem vidère, denique lædentem, nolentem alio modo satisfacere, provocarunt ad duellum. Jam quæstio oritur, num ejusmodi provocato *comparere* per conscientiam licuerit?

Et in hac quidem quæstione singulariter respondendum esse arbitror ad triplex genus injuriæ, quæ illata est. Vel *calumnia* appetitus est Themistocles à Sophocle? vel *fuste*, aut *alapa*: vel alio *ignominioso convicio*? & hoc quidem animo deliberato, & attentione plena?

340. Si *calumnia*; certum est, inconsultò & malè agi, dum remedium juris negligitur, quod etiam in statu civitatís, cæteroquin non optimè ordinatæ, plerumque locum habet; cùm enim calumnia apud judicem discuti possit, Sophocles provocanti se offerre debet vel ad probandam dicti sui veritatem, vel ad canendam, si in probando deficiat, palinodiam; nam asserti veritatem probare si valet, ut quid suam ille, & alterius vitam accipi-



capiti gladio exponat? ſi probare non valeat, recantationem ei, jam jure naturæ præceptam, etiam Judex imponet, reſervato, vel non reſervato honore, prout convenire judicaverit, aut mos provinciæ tulerit (*vid. n. 99.*). Parere autem juri naturæ, & ſententiæ judicis debet Sophocles, ac vi ultiorē abſtinere, ea etiam ex ratione; quòd duello honorem, quem debet, non poſſit reſtituere Themistocli; eo quòd duellum remedium ineptum ſit ad hunc finem, ut alibi à *n. 113.* demonſtravimus. Unde conficitur, fas non eſſe ad duellum comparere.

341. Quòdſi *fuſſe*, aut *alapa* injuria ſit facta, & deliberato quidem conſilio, fas erit Themistocli, fruſtra imploranti judicem, & graviffimum damnum aliàs paſſuro, arundinem projicere adverſus Sophoclem. Nego autem; tunc fas eſſe Sophocli manus cum Themistocle conferere. Nam, ſi quidem ea projectio puram purgationem ſignificet, & Themistoclem à turpi nota liberet, modò patienter eam ferat Sophocles, (de quo *vid. n. 231.*) tunc nil facit Themistocles, niſi quòd reddat dedecus, iniquè acceptum, ſicque utatur jure ſuo. Quòdſi autem ex monomachia legibus ea projectio non ſit mera purgatio, ſed certaminis denuntiatio, ut ego quidem *loc. cit.* exiſtimavi, tum quæri poteſt, an liceat Sophocli huic invitationi morem gerere? Exiſtimo ego, quòd non liceat: ſed potiùs ſupplex veniam debebit petere ea ſubmiſſione, quæ ſufficiat Themistocli indemni ſervando.

342. Idem judicium eſto, ſi Sophocles *aliud convicii genus* animo ſatis deliberato intulerit, quo ſe per duellum purgare neceſſe habeat Themistocles. Ratio eſt; quia Themistocles provocando non petit rectā pugnam: ſed ſatiſficari ſibi primò petit per ſubmiſſam petitionem veniā, utpote opportūnam pro avertendo fortunarum ſuarum excidio: hanc ergo ſi non præſtet Sophocles, duellum ille, tanquam ultimum remedium non niſi invitus proponit. Sicut ergo peccaret Themistocles non acceptando eam petitionem veniæ: ſic Sophocles peccat, eam negando, & ſic cogendo Themistoclem, ut ad pugnam deſcendat. Confirmatur ex ſequenti ratione: Themistocles, ad hanc uſque extremitatem reductus, habet jus pugnandi contra Sophoclem, ut alibi fuſè oſtendimus: ergo Sophocles non habet jus pugnandi contra Themistoclem; non enim datur jus contra jus, aut bellum, ut ajunt Scholæ, utrinque *materialiter* juſtum. Certe

de bello publico inter Gentes id non procedit. Sic GROTIUS ait (a): Illud displicet, quod docent, justam esse defensionem etiam eorum, qui bellum promeriti sunt, hoc est, ut subdit GRONOVIVS, qui injuria facta alteri causam belli dederunt. Sed qui in alterum peccavit, debet primum ei, quem læsit, offerre satisfactionem viri boni arbitrato, ac tum demum pia erunt ejus arma. Sic EZECHIAS (b), cum fœdere non sterisset, quod cum Rege Assyrio Majores ejus pepigerant, bello petitus, fatetur culpam, & Regi permittit arbitrium multæ: idque cum fecisset, & postea iterum bello laceraretur, fretus bona conscientia, vim hostium sustinuit, & DEUM habuit faventem. Alterum exemplum addit ex Historia Romana (c). Jam verò à bello publico ad privatum hoc ex capite bene argumentari videmur.

343. Oppones primò, sunt Authores non ignobiles (d), qui judicant, justè quemque posse defendere vitam suam contra alium justè agredientem; quia defensio vitæ est de jure naturæ licita: ergo Sophocles pugnare potest contra Themistoclem moventem bellum. Accedit, quòd licentia; qua bellum movet Themistocles, tantum sit probabilis, neutiquam moraliter certa: ergo etiam probabile est, quòd non gaudeat hac licentia: ergo licebit Sophocli pugnare contra Themistoclem. R. Opinioni illorum Authorem opponi opinionem contrariam aliorum complurium, quos inter MOLINA meritò dubitat de veritate ejus sententiæ; quia sic se defendens resistit juri alterius; secus etiam contra carnificem reus suam poterit vitam defendere occidendo, si opus sit. Vel certè prædò licitè necabit eum, qui prædantem justis armis invadit, quod nemo facile sentiet. Sit etiam licentia illa, qua bellum movet Themistocles Sophocli, tantum probabilis, quid tum? ergo, dicis, etiam probabile est, quòd non gaudeat hac licentia. Etiam hoc concedo: sed quid demum inferes? ergo licebit Sophocli pugnare contra Themistoclem. Hanc consecutionem nego. Id infero: ergo Sophocles non tenebitur comparere. Sic bene. Aliud autem est, an possit comparere, si velit. De hoc ajo, quòd non, saltem si de tali duello sit sermo, in quo Sophocles, seriò agens contra Themistoclem, ad vulnera, & necem procedere tentaret. Prohibitum hoc est Sophocli; quia

(a) L. 2. c. 1. §. 18. J. B. P. (b) 2. Reg. 18. (c) Apud Liv. dec. 1. l. 9. c. 1.  
(d) Soins, Azor, Burghab. aliiq. apud la Croix lib. 3. p. 1. n. 170.

quia recitando, vel petendo veniam obligatur satisfacere iniquè à se læso. Id tamen dabo, quoddam Themistocles Sophoclem neque volentem recantare, aut petere veniam: neque volentem comparere in arena, armis invaderet, posset hic se stricto gladio defendere potius, quàm ut mactari se indefensum permittat; Themistocles enim honorem suum, fortunâsque satis servat, ubi Sophocles, pertinaciter duellum recusans infamem timidi notam contrahit: non ergo est, cur pugnare nolentem etiam armis invadatur: ergo justa etiam erit Sophoclis in hoc casu defensio.

344. Oppones secundò, quid ager ergo miser Sophocles? duello congregari non licet. Si recantet, vel supplice gestu verberibus se subjiciat, suum sibi honorem, & quidquid fortunarum cum honore connexum est, evertit. Sic in barathrum incidit, quod evadere conatur Themistocles. R. Rectè omnino: neque est, cur de injuria conqueratur; quoddam enim (dicebamus suprà ex WOLFIO) damnum ejus, cujus culpa accidit, colliditur cum damno alterius, qui omni culpa vacat, damnum ferre debet is, cujus culpa est. Addo: maxime ubi culpa fuit *consideratè* commissa. Dein Themistocles non querit damnum Sophoclis, sed humilem petitionem veniæ, aut recantationem. Si ex hac sequatur damnum, eorum culpa sequitur, qui actui justitiæ, quem recantans, vel veniam petens Sophocles exercet, infamiam præpostero judicio affingunt. De his ergo corrupti judicii hominibus conqueratur. Equidem verum est aliqua ratione, quoddam Themistocles Sophoclem his vexationibus *iniquis* exponat: at non exponit *iniquè*, id quod notari velim, ne contradicere videar dictis n. 215.

345. Quæres, an ergo infelici Sophocli via nulla sit super, qua perniciem suam evitet? R. Superesse consilium, quo in ancipiti hoc rerum suarum statu utcumque sibi possit prospectum ire, quod quanti valeat, cujuslibet judicio æstimandum relinquo. Scripto, vel per internuncium, prout videbitur, Themistocli amicè declaret, se, cum petere veniam pro *convicio* modo nimis humili noxium nimis esset rebus suis: armis autem ejus vitam petere in duello prohiberetur sit per leges conscientie, non tamen defuturum, quo minus gladio turbas finiat. Ne gravetur itaque Themistocles, se, ubicunque obvium habuerit, aggredi: declinaturum se quidem ictus omni, qua polleteret, dexteritate: nullum tamen se in ejus corpus libraturum. Equidem neutiquam se dubitare, quin tam

strenuo adversario animus etiam suffecturus esset ad excipiendam vim feriam; at per conscientiam se prohiberi, quo minus ei hoc argumentum demonstranda virtutis præberet. Sperare se, si quidem Themistocli juxta artis regulas ferire placeret, innoxium sibi certamen fore: de reliquo omnia se ejus generoso animo relinquere.

Idem consilium, nî fallor, quadrabit Sophocli, casu quo Themistocles acceptam *alapam* abstersurus baculum contra eum projiceret; declarare enim idem poterit verbis, quod antea scripto. Gravis noxa non erit, excipiendo, atque excutiendo intentatos ictus defendere se, & sic servare dignitatem, opésque.

Quid? quodd certo modo etiam tum utile hoc consilium esse possit Sophocli, quando per *calumniam* læsit Sophoclem. Si nempe hic palinodiam non exigit: si ipse non ad judicem, sed ad gladium provocet: eaque insanorum passim invaluerit persuasio, ut per duellum credant Themistoclem verè purgatum: neque scandalum inde probi accipiant. Sed quia rarè hæc conveniunt, non facilè usui id remedium erit in casu jactæ calumniæ.

346. At, quæret quis, quâ probatur consilii hujus æquitas, & asserta periclitanti Sophocli licentia? R. Ex eo, quia primò Themistocli nulla sit injuria, liberatur ab infami nota, sibi per *alapam*, *calumniam*, aliudve genus convicii aspersa. Neque ullo periculo exponitur, modò fidem servet Sophocles, qua non nisi propriæ defensionis in conflictu se intentum fore spondit. Si fortè verba dederit Sophocles: aut incalefcent in medio pugne ferid incipiat agere, & destinatis imminere ictibus, tunc novam Themistocles causam sortietur impetendi, vel retundendi iniquum antagonistam, fractæ fidei reum. Vereberis fortè, ne patrini assistentes advertant, Sophoclem minùs ferid agere, dum contentus se defendere, ab offendendo abstinet. Ajo, Sophoclem fortè uno, alteròve simulato ictu aërem posse ferire. Quodd hoc vel securum non sit, adeoque prohibitum: vel inobservatum abire non possit; Themistocles tamen jure dicet sibi fuisse satisfactum; neque enim suum erat, antagonistam cogere, ut feriret. Neque Sophocles ad feriendum obligari potest, qui utique nimium quantum se generosum demonstrat, accipere dum mavult vulnus, quàm dare: quidquid contra obstrepat insanum illud syntagma: *pro elucenda alapa opus*

est

est sanguine, eoque non parce fuso; cui, credo, in tali casu non multum fore authoritatis futurum. Secundò, neque Sophocles argui potest læsæ charitatis, quam sibi met debet. Equidem periculo sese exponit: sed ad servandum honorem, dignitatem, & opes necessarias, quorum omnium jacturam certam incerto vulnere si redimere velit, quis vitio vertat? certè non alia de causa Gentes cruenta bella suscipiunt. Dein licet juxta Theologos, antesignano D. THOMA (a), quandoque *indirectè* se occidere, hoc est, aliquid facere, vel omittere, ex quo præter intentionem mors certò sequatur; quia præceptum conservandi vitam, utpote *affirmativum*, non semper obligat: sed potest omitti quandoque ad bonum finem, necessitatem, vel magnam utilitatem. In præsentī casu mors non sequetur certa: imò grave vulnus incertum est; præcipuè cum Themistocles humanitati Sophoclis id haud dubiè daturus sit, ut acrius non sæviat, quàm recuperando honori necessum sit. Tertid, neque terrere debet *scandalum*, sive pravam exemplum, dimanaturum in alios, si à duello non abstineant viri, cæteroquin æstimati; cum enim passim notum esse possit, quòd Themistoclem post acceptum conviciū, aut alapam, & apertè negatam justitiam, feralis necessitas cogat offerendo duellum, aut projiciendo baculum servare bona famæ, & fortunæ, nemini offenciculum dabit provocatione sua, cæteroquin moderata, nec spirante vindictam. Certè dum ego præsens olim in urbe quadam spectaveram provocationem ejusmodi, neminem bonorum ea vidi offensus: sed contra illum Senatum passim fremebant, cui aures ad depositas querelas obsurduerant. Neque à Sophocle pravam exemplum manabit; modò constet id cum agere pro aver-tendo summo damno, & suo, si non compareret, & Themistoclis, si hic non provocaret; præcipuè si resciretur, cum statuisset ab inferendo vulnere sibi cavere, laudem prudentiæ potiùs, ac moderationis ferret.

347. Oppones. Sic bellum privatum dabitur utrinque justum, non tantum *formaliter*, sive in conscientia: sed etiam *materialiter*, seu ratione causæ, ac rei, propter quam, vel pro qua pugnatur. Hoc, cum in bello publico fieri nequeat, impossibile etiam erit in bello privato: ergo malè hoc remedium suggeritur Sophocli. R. Utrique hic dari bellum of-

*defensum* ex parte una: defensivum ex altera, justum tam *materialiter*, quam *formaliter*. Cur hoc in bello publico fieri nequeat, ratio est; quia si gens una *offensivè* agendo quærat obtinere, quod sibi debetur: gens altera agendo *defensivè*, illam à consequendo suo jure impediret, quod est iniquum. Econtra in casu nostri belli privati, quamvis contra Themistoclem, ex æquo pugnantem, se defendat Sophocles, non impedit illum per hoc à consequendo bono, quod justè quærit; nihilominus enim servabit dignitatem cum opibus ad vitam honestè sustentandam necessariis. Fors erit, qui hanc pugnam nollet dici bellum privatum, seu *duellum propriè dictum*, de quo non disputabo; ex eo enim dependet, an ad duellum requiratur *utrinque* mens inferendi vulnera, vel necem. Cæterùm, ut dixi n. 345. quanti hoc consilium valeat, cujusque judicio æstimandum relinquo.

## §. VI.

An licitum sit comparere ad duellum, dum quis provocatur ab eo, quem antè iniquè læsit tantùm semi-deliberatè, vel exprobrando crimen verum?

348. *Ponitur fundamentum.*

349. *Applicatur casibus occurrentibus.*

348. Sicut §. II. & III. examinavimus, an liceat *provocare* ob acceptam læsionem tantùm semi-deliberatam; vel ortam ex exprobratione criminis veri: sic modò quæritur, an quis licitè *compareat* provocatus ab eo, quem tantùm læsit semi-deliberatè, aut exprobratione criminis veri. Circa quod fixa hæc regula sit: Quoties læsus justè provocat, toties lædens injustè comparet ad duellum utrinque serium. Dico *utrinque* serium ob n. 345. Et vicissim, si læsus injustè provocat, lædens, in gravissima necessitate constitutus, justè comparet. Ratio petitur ex principio alibi posito; quia non datur jus contra jus, & bellum serium utrinque *materialiter* justum, ut patet in bello publico, quod Gentes gerunt.

349. Unde colliges primò: Si subito Themistocles Sophoclem aggrediretur, paratum cæteroquin in judicio rem finire, &, si opus sit, satisfacere; armata defensio Sophoclis non erit prohibita. Secundò: Pugna, seu defensio prohibita non erit Sophocli, si Themistocles, definita  
per

per judicem satisfactione non contentus, pōst adhuc vim molitur; in utroque enim casu est injusta provocatio; eo quodd ubi datur judicis copia, apud hunc, & juxta hunc finienda est lis. At ubi judicis copia non est, tunc videndum, quid læsus à lædente exigere possit spectata læsionis natura, seu ad quid lædens obligetur in conscientia ante omnem judicis sententiam, id quod *ex precedentibus* §§. colligitur. Et si quidem lædens paratus sit præstare totum id pro viribus, non habebit læsus jus ad inferendam vim ulteriorem: si nihilominus inferre tenter, vel ad duellum provocando in eas angustias læsum conjiciat, ut vel comparere, vel gravissimum in bonis damnum pati deberet, licebit huic provocato vim retundere, quib̄ etiam ad duellum comparere in statu Civitatis malè ordinatæ, de quo nunc loquimur; habent enim hic locum principia *Cap. IV.* posita.

## §. VII.

An aliquando provocatus comparere possit ex charitate  
erga provocantem?

350. Narratur mirabilis casus.

ritatem provocanti:

351. Videsur comparens exhibuisse cha-

352. Neque provocans egisse malè.

350. **Q**uæstio sanè paradoxa! sed casum accipe factum, non fictum. Narraverat Epaminondas Themistocli, quodd nuper in duello Sophocli arma feliciter excusserit de manibus, & sic gloriosum fecerit pugnae finem. Themistocles impositum tricis innoxium finem gratulatus est primò Epaminondæ: tum etiam Sophocli, sibi fortè obvio. At negabat hic, quodd ab Epaminonda fuerit exarmatus. Themistocles id se accepisse, ait, ex ore Epaminondæ, secum veniret, idem ex eodem intellecturus. Eunt, Epaminondam interrogant, an perseveraret affirmare, quodd Sophoclem exarmasset in duello. Vanæ jactantiæ sibi conscius Epaminondas negat, id à se unquam fuisse affirmatum. Exhorrescit Themistocles, utpote in quem figmentum debebat recidere; quare absque mora commilitones testes adducit, in quorum præsentia antè Epaminondas id asseveraverat. Horum testimonio convictus Epaminondas fatetur tandem, id sibi excidisse non satis perpensum. Themistocli equidem sufficit hæc declaratio: at bonus Epaminondas illico proclamatur mendax, utpote qui con-

finxe-

finxerit excussum à se gladium: simul calumniæ reus agitur; eo quodd falsitatis notam Themistocli tentasset allinere. Abit nihilominus Epaminondas ad legionem suam pedestrem, alibi præsidia tenentem. Hic obstrepentes invenit Duces cum milite, recusantes cum infami militare. Recurrit ad Regiam Epaminondas, flagitaturus opem; non auditur. Coactum ergo se videt, deserta militia, in vili egestate vivere. Sed en! ultima necessitas consilium suggessit, & opportunam ostendit naufraganti tabulam. Noverat Epaminondas nobilem Themistoclis animum: hunc ergo rogat, ut in duellum descendat secum: nōsse se quidem, quodd is nullo nomine ad id obstringatur: at gratiam sibi fieri, si hanc ultimam malo suo medelam non neget. Subriscit Themistocles, &, habe sis, inquit, hoc animi in te mei argumentum, gladium stringam in tui gratiam, ut firmatus in tua statione, habeas, unde vivas decenter. Age rem gnaviter; duobus enim, qui ex tua legione advenerunt, patrinis certamen frigidum, & umbratile non satisfaciet. De me certus esto, me tibi nil mali velle, neque illaturum. Id attendas, opto, ut tui bene compos gladium vibres ad leges palæstræ. Prodivere in pugnam. Themistocles, ut constituerat animo, defendere se contentus, satis habuit declinare ictus: id quod ea dexteritate prælicit, ut pugna innoxia transferit, gratulantibus ipsis patrinis.

351. Queritur jam, an salva conscientia hoc *præstare* Themistocles, & *petere* Epaminondas potuerit? R. Certum esse, Themistoclem ad id præstandum nulla ratione fuisse obstrictum; non enim ipse in causa erat, quodd Epaminondæ immineret fortunarum suarum jactura: ergo neque extrahere hunc tenebatur ex imminente miseria. Quin, cum ab hac pugna, sponte suscepta, non absit periculum omnis vulneris, prohibitam eam dicerem Themistocli, si familiam aleret, viventem ex incolumitate patris. Quodd verò eidem hæc actio licita fuerit, quamvis conjuncta cum periculo alicujus vulneris, aut etiam necis periculo, saltem remotiore, sic probō: Epaminondas, si proprio periculo res suas servare valeret, rectè se eidem exponeret, e.g. in casu incendii; nam licet vita hominis secundum se sit majus bonum omnibus fortunæ bonis: vita tamen ipsa sine honesto statu, & cum magna miseria conjuncta, magnum malum est, & gravius aliquibus amisso statu vivere, quam eo integro mori (a): ergo

(a) *Lugo ex Coninch. de Just. disp. 16, sect. 7. n. 149.*



ergo etiam Themistocles idem in se qualecunque periculum ex impulsu charitatis suscipit, non minus laudabiliter, ac illi, qui ad restringendum incendium alienæ domus in pericula non levia se non raro immittunt: aut ex vicini, fortè absentis, ædibus furem expellunt vi armata, & proprio cum discrimine. Neque dicas, Themistoclem pugnantem pravò exemplo firmare pseudo-legem, quæ duello docet finienda esse litigia; namque è contrario laudem tulit passim generosa virtus, qua misero succurrit, nullo ad id nomine obstrictus. Id tamen non negaverim, malum exemplum à supremo Magistratu promanasse, cujus erat Epaminondæ convicto vel missionem dare, vel punitum suæ legioni restituere, quin necesse fuerit per bellum privatum rei exitum quærere.

352. De Epaminonda si quæras, an petendo duellum (pugnam per me voca, si velis (a)) conscientiam læserit, ajo, quòd non; Epaminondæ enim licitum est petere, quòd Themistocles non prohibetur reddere; sic enim mali nil petit. At objicies: non semper licitè peti, quòd licitè præstatur: sic in conjugio viro habenti votum castitatis uxor licitè reddit debitum, saltem si sit ignara voti (b), quin vir possit petere. In ipsa materia duelli licet quandoque comparere provocato, quin provocanti id liceat exigere: ergo, quamvis Themistocles licitè condicat ad conflictum, non sequitur, quòd licitè id roget Epaminondas. R. Illos aliunde prohiberi, ne petant: non autem apparet, unde vetita sit petitio Epaminondæ. Sic etiam in naufragio licet ab altero petere, ut suam mihi tabulam cedat, qua ego enatem. Nec dando fortè scàndalo prohibebatur Epaminondas; constat enim in publicum, quòd primò duellum subterfugerit, rum à Principe fuerit destitutus, demum à Themistocle, ad duellum neutiquam obligato etiam per leges profanas, pugnam pro gratia acceperit. Scandalum igitur promanasse censendum est à supremo Magistratu, ferme ut numero præcedente dictum. Sic denique spectatis omnibus censeo, quòd ipse Themistocles tunc censuit, eum scilicet charitatem exhibuisse Epaminondæ. Mirabile equidem hoc videtur: sed quid mirum, si ex mirabili monomachorum delirio, & pseudo-lege, conjuncta socordia Magistratus, mirabile paradoxum enascatur?

Kk

§. VIII.

(a) Vid. n. 347. (b) *la Croix* l. 6. p. 3. n. 353.

## §. VIII.

An duellum suscipi possit etiam ab eo, qui non læsus fuit: vel contra eum, qui non læsit; scilicet à vicariis, vel contra vicarium?

353. *Declaratur questio.*

354. *Deciditur, an licitè pugnet vicarius.*

355. *Item, an licitè pugnetur contra vicarium.*

353. **T**hemistocles, ab Epaminondæ gravi læsus injuria, ex qua proximè ad incitas erat redigendus, non suppetente aliunde auxilio, Epaminondam, renitentem satisfacere alia ratione, provocat, idque jure ex hætenus disputatis. Epaminondas equidem non detrectabat pugnam: at Sophocles amicus, minus fidens Epaminondæ dexteritati, vices ejus obire, & in arena comparere voluit. Themistoeli comes, seu patrinus advenerat Agamemnon, qui æquè veritus amicum Themistoclem Sophocli fortiori antagonistæ objicere, ipse pro Themistocle stringit gladium contra Sophoclem. Stabant itaque

*Hinc Themistocles:*

*Vicarius*

Agamemnon.

*Inde Epaminondas:*

*Vicarius*

Sophocles.

Quid apud Veteres circa Procuratores (*Campiones* dicebantur) observatum fuerit, satis dictum est n. 44. Nostro ævo si Monomachorum Alcoranum, seu duelli leges, consulo, per procuratorem certare nemo tenetur, si ipse pugnae non quadrat. Nemo etiam, cui tyrannica pugnandi necessitas incumbit, cum procuratore, aliòve manus obligatur conferere, nisi quocum ipsi negotium est. Accidere ramen posset, ut cum Themistocle pugnare non detrectaret Sophocles, vices subiturus Epaminondæ: neque cum Agamemnone, procuratore Themistoclis, Epaminondas, vel Sophocles. Unde juvat discutere, an bene Agamemnon, & Sophocles potuerint se offerre ad subeundas in duello amicorum vices? Secundo, an Themistocles æquè contra vicarium Sophoclem, quàm contra ipsum Epaminondam confligere potuerit?

354. *Ad*

354. *Ad primum*, quod scilicet Agamemnonem spectat, pro bona is causa Themistoclis; meo iudicio; potuit dimicare, si à Themistocle hac ratione possit damnum grave & iniquum amoliri: & æquè commilitonibus satisfiat per succedaneum pugilem. Suadetur ex eo; quodd, (verba MOLINÆ recito (a);) in omnibus eventibus; in quibus aliquis, se aut sua defensurus; potest licitè interficere injustum aggressorem, in eisdem sit licitum cæteris; eum proximum defendendo, interficere eundem aggressorem, quando ita necessarium est ad talem proximi, bonorumque ejus defensionem. Æquitati enim naturali consentaneum est, ait LAYMAN (b) ex S. ANTONINO, ut aliis quoque licitum sit vim injustam passo assistere, & auxilium ferre: estque hæc ipsa ratio, cur Principem, aut Rempublicam, bellum justum gerentem contra aliam, juvare liceat, ut in materia de Bellis docetur passim. Commune hanc esse Authorem doctrinam testatur LUGO (c); quin addit licitum esse, eum defendere, etsi defendi nolit; quia adhuc ejus damnum aliquo modo ad me pertinet; cum sit damnum ejus, qui charitatis nexu; & conjunctione naturæ mihi conjunctus est. Jam verò Epaminondas si non est *aggressor injustus*, tali certè æquivaleret juxta dicta n. 275. Robur hæc sententia ex eo accipit; quodd *cuiuslibet liceat suo vicino, vel proximo pro repellenda ipsius injuria suum impertiri auxilium* (d). Dixi tamen: si à Themistocle amoliri possit grave damnum; si enim non acceptetur apud commilitones succedanea hostia, quid proderit Agamemnonem inutiliter subjicere discrimini?

Interim, quæ diximus licitè fieri; juxta eosdem Doctores ex obligatione fiunt; ubi quis *proximum*, vel ejus bona externa absque notabili suo damno commodè defendere valeat. Quodd si autem is, quem occidere, vel contra quem pugnare oporteret, esset filius tuus, durissimum esset ad eum occidendum te obligare pro servanda vita innocentis. Si verò esset Pater tuus, LESSIUS negat, te posse facere licitè; quia id repugnaret pietati in parentes.

Quantum autem ad Sophoclem attinet, qui pro amico Epaminonda aleam subire tentat: decisio dependet ab eo, an ipse Epaminondas, pro-

Kk 2

voca-

(a) De Just. tract. 3. disp. 18. (b) L. 3. p. 3. c. 3. (c) Disp. 70. sect. 11.

(d) Ex C. Dilecto. §. Et quidem. de sentent. excomm. in 6.

vocatus à Themistocle, licitè comparere possit? id quod §. V. hujus Articuli examinavimus. Procuratori licitum esse nequit, quod prohibitum est actori principali.

355. Jam *ad quasitum secundum*, an Themistocles æquè pugnare cum Sophocle potuisset, ac cum Epaminonda? R. omnino, si cum eo, quem quærit, fructu id facere censeatur. Rationem affero ex WOLFIO (a): „ Quidquid alius quicumque in gratiam aggressoris licitæ tuæ defensionis „ sese opponens facit, id licitum non est, sed injustum, & sese opponendo „ tibi injuriam facit. „ Propositionem hanc apud eundem demonstratam leges. Addit, principium hoc probè tenendum esse; usui enim futurum in jure Gentium, ubi definiendum erit, quandonam aliis, bello implicitis, auxilium ferre liceat. Pergit; Quicumque alius in gratiam aggressoris licitæ tuæ defensionis sese opponit, in eum eadem licet, quæ in aggressorem; quoniam enim, sonat demonstratio (b), qui in gratiam aggressoris licitæ tuæ defensionis se opponit, causam hujus agit: hic verò te lædere conatur; ipse quoque læsionem tuam intendit, si non semper directè, atamen indirectè; cum aggressore igitur eodem loco habendus. Quidquid aded in aggressorem licet, idem quoque licet in alium quemcunque, licet tuæ defensionis sese opponentem. Jam verò Themistoclem pro fortunis suis servandis, ac defendendis in arenam descendere, & Epaminondam certo modo *aggressorem* haberi posse; alibi dictum n. 275. In hujus ergo gratiam cum Sophocles se opponat; quin cum totam ejus causam in se suscipiat, & personam Epaminondæ agere sustineat, idem jus Themistocli erit in Sophoclem, ac in Epaminondam sit, si, ut dictum, cum eo, quem quærit, fructu id facere censeatur.

## ARTICULUS II.

*Enucleatur secunda Conditio, id est, damnum grave.*

**D**Um Capite IV. ad duellum, licitè ineundum, requisivimus damnum grave, quod illo omisso esset ferendum, tale damnum statuimus, quod sustentationem, statui conservando necessariam, pessumdaret. At  
cùm

(a) Jur. Nat. P. I. §. 986. (b) Ibid. §. 987.

cum non semper de ejusmodi jactura agatur : sed minus quoque in fortunis damnum, aut alterius etiam generis dispendium duelli recusatio afferre possit, de hujusmodi quoque instituendus sermo est. Itaque quaeremus I. an damnum, non auferens sustentationem necessariam, sufficere possit ad duelli licentiam? II. An excludi cœtu Nobilium, non æquiva-  
leat jacturæ sustentationis necessariæ?

§. I.

An damnum, non auferens sustentationem necessariam, sufficiat  
ad duelli licentiam?

- |   |  |
|---|--|
| 356. <i>Damnum quadruplex considerandum est.</i>                        | 363. <i>IV. Ubi agitur de bono, primum acquirendo, et si ex eo dependeat sustentatio,</i>                      |
| 357. <i>I. In casu, ubi tantum agitur de dignitate amittenda,</i>       | 364. <i>Non est licitum duellum, postquam iudex pronuntiavit de causa duelli:</i>                              |
| 358. <i>Negatur licitum esse duellum.</i>                               | 365. <i>In denegata aperte justitia fors licitum: saltem licentiam asserens sententia non videtur damnata.</i> |
| 359. <i>II. Si dignitas sit eminens, non est improbabilis licentia.</i> | 366. <i>Ubi sustentatio necessaria in salvo manet tota, illicitum dicimus.</i>                                 |
| 360. <i>III. Ubi agitur de sustentatione, tantum accidenda:</i>         |  |
| 361. <i>Notatis variis,</i>   |  |
| 362. <i>Neganda videtur licentia.</i>                                   |  |

356. **E**jusmodi damnum quadruplex sub considerationem venit. Primo potest esse damnum consistens in jactura solius dignitatis qualiscunque, salvis opibus ad sustentationem requisitis. Secundo, potest consistere in jactura dignitatis prorsus eminentis. Tertio, potest esse damnum, quo non quidem tollatur, accidatur tamen sustentatio necessaria. Quarto, potest damnum versari circa bonum primum acquirendum. Examinemus singula.

357. I. Casum habe, ubi de amittenda sola dignitate agebatur. Militaverat compluribus annis Centurio sub signis Principis sui, cum tandem in expeditione quadam, exercitu ad prælium procedente, ipse cum suorum manipulo ad custodienda impedimenta relinquitur. Cæditur exercitus, &, dum in fuga sparsis legionibus recedit, Centurio ad suos ait: Bonâ fors, ô focii! hac statione nos locavit; en ut malè mulctati commi-

lirones redeant! Verba hæc excepit Pro-Centurio fortè præteriens, & pridem insensus Centurioni. Quare ad fugientium injuriam illud temere dictum pertinere ratus, *fungi*, aiebat elatiore voce, *hoc dictum est, non militis strenui*. Qui ponè incedebant Duces, dissimulabant quidem pro iis rerum angustiis hoc convicium: at ubi, finito brevi pòst bello, urbis cujusdam præsidium ténuere, gliscentem sub cineribus ignem suscitârunt ea vehementia, ut bonus Centurio, nec quidquam obtendens, verba illa innocenter sibi excidisse, ad subeundum duellum à legione universa condemnaretur, recusante militare cum - vel sub nauci homine. Implorat Centurio supremum Consilium bellicum: sed nullo fructu, suis is fatis relinquitur. Itaque vel valedicendum erat legioni, vel duello purgandum probum. Habebat alibi terrarum prædia, ac bona, quæ sufficerent viro nobili, privatam jam vitam acturo: nil opus erat, ut miles maneret. Quin ipse jam antè consilium animo volverat mittendi Mavorti nuntium, & reliquum vitæ agendi in quiete. Nolebat tamen discedere non confecto negotio, ne jullo tempore inustam sibi notam quisquam exprobrare posset. Deposito itaque odio, Sacramentis Ecclesiæ se munit: tum in angiportu operitur antagonistam, quo comparente datur pugnæ signum; dimicatur, & lethali vulnere configitur Centurio, post aliquot horas exutus vita inter Christianæ pietatis signa. Erant, qui licitè duellum suscepisse crederent: imò erat Theologus, qui ei ediceret, licitam fore pugnam ex conscientiae legibus; quo persuasus antè Ecclesiæ Sacramentis se muniit. At quidquid sit de bona fide, quacum fors ex errore innocuo in arenam descendit Centurio, illum ego Theologum jam impugnabo.

358. Ajo, revera non fuisse licitum Centurioni hoc duellum; si enim, alibi habuit prædiâ, & bona, unde nobiliter viveret vitam privatam, quid opus erat militare sibi munus ferro asserere? præsertim postquam consilium deferendi militiam jam antè animo volverat? Non ergo hîc militat illa ratio, cui *Capite IV.* doctrinam nostram superstruximus: Timor, ne unquam fortè sibi exprobraretur macula non extincta, tanti non valebat, ut vitam & suam, & alienam ei discrimini prudenter objiceret, id quod patet ex *Art. VI. Cap. III. à n. 256*. Accessit & id, quodd Sub-Centurio communi judicio dexteritate tractandi gladium Centurionem multum superaret, unde malè quisque pro hoc jam ante pugnam ominabatur.

batur. Non licet autem duellum suscipere, etsi adsint conditiones reliquæ, si non sit etiam prudens spes prosperi exitus. *Vid. n. 191.*

359. II. Sit alius, qui, recusato duello, non dignitatem qualem-  
cunque, sed præcellentem sibi, totique stemmati suo maximè honorificam,  
utut lucri non admodum feracem, deberet perdere. Militiæ id contingere  
potest, ubi, etiam qui prima munia tenent, à pseudo-lege duelli exempti  
non habentur in materia, ad imperium militare non pertinente. Dimi-  
candum itaque erit, si injuria poposcerit: vel parere volet nemo. Quæ-  
ritur, an damnum hoc, non auferens cæteroquin sustentationem necessa-  
riam, sufficiat ad duelli licentiam? *Re.* Si alia evadendi ratio non superfit,  
non improbabilius talem dignitatem defendi duello posse. Non est enim  
qualiscunque dignitas (de qualibus fortè Authores loquuntur, duellum  
reprobantes, pro servanda dignitate, aut officio initum) sed præcellens  
esse statuitur, totique familiæ honorem allatura etiam apud Posteror.  
Hæc ergo, justè acquisita, dum ad altiorem ordinem virum evexit, eum  
in alio veluti statu, & conditione reposuit: sicut ergo opes, statui & con-  
ditioni servandæ necessarias, licitè duello tuemur, juxta dicta *Cap. IV.*  
sic ipsum quoque statum, & conditionem eadem ratione servabimus.  
Certè graviorem crederemus esse lapsum, dum *e. g.* Gallicorum centu-  
rum supremus Præfectus, vel alterius exercitus Imperator dignitate sua  
cum dedecore deberet decedere, quàm si Centurio, suo deperdito officio,  
alere se velut homo de plebe deberet.

Oppones: Dignitas Centurionis Themistocli æquè pretiosa est, ac  
Epaminondæ dignitas primi ordinis: ergo etiam illi, vel neutri licebit  
labantem fortunam duello tueri. *Re.* Si Themistocli aliunde sufficiant opes,  
deget in vita privata ferme æquè honorificè, ac in gradu-Centurionis vixe-  
rat: discrimen certè non erit adèd notabile; nam pecuniæ obediunt omnia.  
Si opes aliundè non suppetant, pugnare ei licebit vi juris, quod habet ad  
sustentationem decentem. Econtra dejici dignitate præcellenti, præter-  
quam quodd probum afferat, per complures provincias resonans, & re-  
sonaturum in lustrâ plurima, virum ex statu, & conditione sua deturbat;  
maximo suo, & suæ familiæ luctu. Nota autem, plus me non asseruisse,  
quàm non esse improbabile. Gradum probabilitatis cuilibet metiendum ad  
sui judicii Decempedam relinquo.

360. III. Statuamus damnum, quo non quidem tollatur, accidatur tamen congrua sustentatio. Dicamus, proventus annuos imminui trecentis aureis ad familiarum splendorem alias utiliter impendendis. Circa hanc questionem non ausim ego certi quid de licentia statuere. Trecentorum aureorum proventus annui summam utique faciunt, etiam viro diviti æstimabilem. Et quamvis necessaria sustentatio in illis non sit reposita: ad eam tamen summam recipiendam jure stricto gaudet possessor officii. Hoc jure cum eum iniquè deturbet is, qui vel petulanter provocat, vel petulanti ignominia, pro qua satisfacere nolit, provocandi necessitatem imponit, cur non liceat id jus, negante Magistratu auxilium, duello vindicare? Qua in re

361. Certum est primò, si argumenta contra meam sententiam allata n. 265. &c. vim haberent, satis claram decisionem acciperet præsens quaestio; ubi enim pro ipsa sustentatione necessaria dimicare nefas esset, multo minùs fas esset pro evitando detrimento minore. At soluta illa argumenta fuisse satis solidè existimo. Satis certum est secundò, etsi quis pro præsentis casu duellum licitum diceret, nil ad eum pertineret lata in duas propositiones damnatio Pontificia, quarum una docet, *regulariter occidi posse furem pro conservatione unius aurei* (a): & altera duellum approbat, *ad evitandam timiditatis notam si suscipiatur* (b); neque enim pro uno aureo hic mors inferretur: neque ad evitandam solam timiditatis notam. Tertiò, probabile, & probabilius est, quòd fas sit occidere pro re magni momenti, si aliter fervari, aut recuperari non valeat, eamque actu invadat fur, aut raptor. Docetur id communissimè ab Authoribus, quorum plures quàm centum adductis locis, & verbis enumerat VINDEXTABERNÆ (c). Legi præ reliquis meretur MOLINA (d); ubi apposité explicat mentem D. AUGUSTINI, qui videri cuiquam possit contrariæ mentis, utpote negare visus à peccato liberos esse, qui pro his rebus, quas contemnere oportet, id est, quas homines inviti amittere possunt, humana cade polluantur.

(a) Innocent. XI. Prop. 31. (b) Alex. VII. Prop. 2. (c) In Collect. ad Prop. 8. (d) Tomi. 4. de Just. tract. 3. disp. 16.



tur (a). At fermo ei est de homicidio, perpetrato ex odio, aut sine servato *moderamine inculcata tutela*.

Id e contra non satis liquet, quæ sit res *magni momenti*. CARDENAS (b) rem magni momenti *absoluit, & respectu omnium* putat esse quadringentos argenteos (vulgò (c) Quarenta Patacones): "etiamsi ablatio illorum non sit cum extremo detrimento damni: si verò ablatio fiat infra quadringentos argenteos, mensura valoris in ordine ad defensionem occisivam desumenda est à detrimento, quod patietur is, à quo ea quantitas auferitur; si enim ex quantitate ablata detrimentum, quod patitur dominus rei, sit maximum, erit sufficiens pro ejusmodi defensione. Si verò detrimentum non sit maximum, præfata quantitas non erit sufficiens pro tali modo defensionis." LA CROIX hos quarenta patacones ait valere quadraginta Imperiales. At obscurum est illud: *Etiamsi ablatio non sit cum extremo detrimento damni*. Fortè dicere vult: etsi ex hoc furto dominus rei non patiatur damnum, seu detrimentum extremum, id est, etsi non conjiciatur propterea in extremam necessitatem: quin etsi non deperdat inde sustentationem necessariam conservando suo statui; debet tamen detrimentum esse *maximum*, considerando cujusque fortunas, & conditionem. Alii Authores apud LUGONEM (d) eò mentem suam declarant, quòd occidere non liceat, si res valeat non nisi quinque *Ducatos*. Juxta VASQUIUM res tanta debet esse, ut amittens *notabile* damnum patiatur.

362. In hac Authorum fluctuantium varietate certum mihi videtur, quòd rigidum potius Doctorem esse oporteat in permittenda occisione, quàm laxum; fur enim spoliabitur non solum vita corporis, sed salute etiam animæ. Equidem ex sua ille culpa geminum hoc sibi malum accersit: nihilominus adhuc grande sit oportet detrimentum opum mearum, cui avertendo furem in extremæ miseriæ barathrum præcipitem do. Ajo itaque, certum non esse, an pro avertendo tali damno, quale in præfenti casu definivimus, trecentorum scilicet aureorum, quot annis recipiendorum, salva tamen sustentatione honesta, *occidere furem* liceret. Et si hoc

LI

cer-

(a) De lib. arbit. l. r. c. 5. (b) Crif. Theol. dissert. 21. n. 88. seq.

(c) Ita habet editio Hîspal. an. 1687. & Colonienf. 1690.

(d) De Just. disp. 10. n. 178.

certum esset, tamen certum non est, licere damnum id passo ad duellum progredi. Ratio est; quia duellum ejusmodi remedium est, quod sine gravissima necessitate adhibere non licet ob rationes solidissimas, alibi fusiùs declaratas, neque locum habentes in occisione furis. *vid. n. 256.* Non autem sat gravis mihi videtur jactura illa trecentorum aureorum, si homo adèd sit locuples, ut status illius nihilominus subsistere valeat, quamvis aliquantum accisus, ita ut de splendore potiùs, quàm de necessitate quidquam amittat. Accedit, quòd in nece furis de vita aliena, in duello etiam de mea propria agatur; ex lege autem ordinatæ charitatis plurius cuilibet facienda sit vita propria, quàm aliena, nisi aliæ præter ordinem graves causæ interveniant: ergo majus debet esse damnum id, quod per duellum, quàm quod per eandem furis, mihi non periculosam, avertere satago. Sic etiam (ut ex ipsa cæde furis doceamur) si interimere furem non possem sine *propria vita* periculo, majus meo judicio debebit illud damnum esse, quod timeo, & proximè ad jacturam necessariæ sustentationis accedere. Quid? quòd & illud attendi mereatur: quid scilicet profuturum sit servasse partem suarum opum, si vita amittatur? Familiam fors alit homo, cui prospicere teneatur. Hæc, si patrem amat, optabit magis saluum habere patrem, quàm ejus periculo servare partem proventuum. Si sine familia vivat sui juris, adhuc faciliùs patietur opes sibi aliquantum accidi. Unde, spectatis omnibus, mihi probabilius videtur, jacturam trecentorum aureorum tantam non esse, quæ sufficiat stabiliendæ licentiæ ad duellum ineundum. Dixi *probabiliùs* mihi videri: unde non est animus dammare sentientem contrarium.

363. IV. Statuamus damnum versari circa bonum primùm acquirendum. Sit scilicet quidam, qui quidem officio, utpote cùm nullum habeat, non excideret: recusando tamen duellum aditum sibi præcluderet ad aliquod acquirendum, cujus spem non vanam jam conceperat. Sit *e.g.* Ordinis equestris candidatus, cui dum adscribi petit, ad duellum fortè provocatur, quod si subterfugiat, certò se rejiciendum sciat, ferme ut refertur de Ordine S. Jacobi in Hispania, candidatum, antequam recipiatur, inter alia interrogari, an nunquam duellum recusarit. Vel fingamus, quòd jam admissus ad Ordinem preñset acquirere beneficium Equestre, sive Commendam, non. obtinendam recusato duello. Vel, si placet, audiamus

mus casum apertius. Nobilis Ordinis cujusdam Eques in aula exteri Principis cum forte alium virum nobilem in alearum lusu male multasset, ab hoc aliquot hebdomadis post, haustis hinc inde indiciis, ut videbatur, non levibus, admittæ fraudis arguitur. Causa delata ad iudicium, diuque ventilata, declaratur tandem, indicia probandæ fraudi non adesse sufficientia: neque tamen delator nobilis, qui denunciantis potius, quam accusantis personam se egisse dicebat, condemnabatur ad canendam palinodiam: sed iussi sunt mutuò redire in gratiam, injurias epistolas restituere, vi ulteriore abstinere interposita fide nobili, & sic conquirere; hac enim ratione utriusque honori videbatur consultum. At verebatur Eques, ne, si plenam non faceret purgationem suam, Commendam, cujus proximè obtinendæ spem habebat, non obtineret. Itaque insuper habita promissione facta iudici de non inferenda ultra vi, gladio aggreditur adversarium, forte obeuntem plateas.

364. Quæres, num bene? R. Neutiquam, quod quidem conscientia forum attinet. Etsi sustentationem necessariam nobili suo statui aliundè non habuisset, quàm ex Commenda, quam sperabat: & licet in conscientia sua innocentem se deprehendisset, nihilominus duello non fas erat aggredi adversarium; quia hic, postquam iudicis sententiæ se submisit, omni eo, quod iussus erat, præstito, jam non ampliùs injuriam faciebat Equiti: ergo, hic innocentem aggressus est, quod non licet.

Oppones: Sententia iudicis ob non imperatam recantationem injusta fuit: vel saltem pro injusta eam habuit Eques, si suæ sibi innocentia conscientius fuit: adeoque ea sententia Equitem non obligavit in conscientia ad destituendum suum honorem, nondum satis dealbatum; eo quòd sententia injusta nullum habeat robur in conscientia, neque auferat parti læsæ jus suum, ut docent D. THOMAS, SAYR. BONAC. TRULL. &c. R. Etsi Eques innocentem se scivisset, nihilominus debebat acquiescere; nam quod dicitur de sententia injusta, non habente robur in conscientia, locum ibi habet, ubi rem certè meam, vel certè mihi debitam retinet ille, qui per sententiam certè injustam victor evasit. Licebit tum victo, si fieri absque scandalo possit, recuperare tacitè bona sua: at nunquam licebit victoris vitam invadere, præsertim si hic bona fide possideat bona sibi adjudicata. Neque facere id Eques poterat absque scandalo; scandalosum enim est, seu

actio pravi exempli sententiæ latæ publicè refragari, &, nequidquam data fide nobili, bellum renovare.

365. Major difficultas foret, si quis Eques per malevoli cujusdam hominis calumniam ita fuisset læsus, ut hinc jacturam certam pateretur Commendæ, ad decenter sustentandam vitam necessariæ: illinc judicem, qui audire, vel purgare eum vellet, invenire non posset, & apertè denegaretur justitia. Hic, insistendo principiis hætenus adoptatis, videtur ferro sibi posse asserere Commendam, qua eum calumniator, recantare nolens, sciens & volens spoliatur. At obstare videtur huic sententiæ, quòd spe solum teneat Commendam, utpote à favore conferentis dependentem: vel ad summum habeat jus *ad rem*, ut Scholæ loquuntur, tum scilicet, si fortè Commenda vi statuti conferenda est illi, qui annis præcedit, aut ex certa familia sit oriundus. Jam verò tam *spes*, quàm *jus ad rem* profligari videntur per geminas propositiones damnatas (a): *Non solum licitum est defendere defensione occisiva, qua actu possidemus: sed etiam, ad qua jus inchoatum habemus, & qua nos possessuros speramus.* Item: *Licitum est taliter se defendere jus habenti in cashedram, vel prabendam contra eorum possessionem injustè impediensem.*

Non dubito, ex merito reprobatas has propositiones fuisse (b): illud tamen non ita perspicuum est, an ita sint universales, ut etiam casum nostrum comprehendant. Fors loquuntur solum de casu, quo judex adiri potest functurus officio; fors de casu, quo evidens non est, damnum fore oriturum, & quidem ex culpa occidendi: vel non evidens, quòd alia ratione damnum impediri nequeat. Profectò si rationes Patris Viva considero (c), ita non malè me divinare deprehendo; in casu autem nostro fingimus omnino contraria. Neque novi quid est, propositionem aliquam damnari ob nimiam *universalitatem*, ut docent Authores, unde pessimus abusus posset invalescere. Sic damnata est propositio illa (d): *Famuli, & famula domestica possunt occultè heris suis surripere ad compensandam operam suam, quam majorem judicant salario, quod recipiunt.* "Nihilomi-

(a) Ab Innoc. XI. prop. 32. 33. (b) Vid. Carden. & Viva in prop. 17. Alex. VIII.  
(c) Loc. cit. n. 8. (d) Ab Innoc. XI. prop. 37.

hilominus (verba sunt Patris LA CROIX (a)) possunt etiam famulantes uti occulta compensatione, si adsint conditiones, aliàs ad occultam compensationem requisitæ. Unde per hanc damnationem non restringitur ullus usus licitæ compensationis; nam compensatio, hic damnata, semper fuit illicita, quia defuerunt ei conditiones, ad licitum usum necessariæ; quia propositio damnata dicebat sufficere, quod famulus judicet salarium esse minus, quàm operam: hoc autem falsum est, quia requiritur, ut hoc certum sit: tum etiam, quia licet labor sit fortè major: tamen famulus ad eum non est conductus, & ex propria voluntate facit, vel saltem ex spe alterius commodi, aut gratiæ. „ Quid si ergo etiam noster de duello casus à damnatione diceretur eximius? Id interea certum, eum Equitem faciliùs hanc notam evitaturum unà cum peccato, qui Commendam quærit ex jure ætatis, aut originis, quàm alterum, qui solo favore conferentis sperat se illa potiturum; quamvis enim etiam hic jus habeat, ne per cujusquam calumniam impediatur à consequendo bono, quod sperat, ira, ut calumniator postea compensationem facere teneatur, quantam spes concepta valebat: in illo tamen casu præter simile *jus reflexum* militat etiam illud *directum*, quod ætas, vel genus tribuit.

366. Quodsi autem in periculum non adducatur necessaria sustentatio: sed ea, etiam non obtenta illa dignitate equestri, tota in salvo sit: vel si proventuum nihil omnino afferat ea dignitas, duellum locum non habere dicendum videtur; neque enim nuda dignitas Equitis, aut Commendatoris tanti valoris est, ut duello, cui non nisi gravissima de causâ licentia debet indulgeri, (*vid. n. 256.*) vindicetur. Quod denique de Equitibus S. Jacobi narratur, ita accipiendum dicunt MOLINA, aliisque, ut duellum nunquam ex metu tantùm periculi recusatum fuisse intelligatur.

## §. II.

An excludi cœtu Nobilium non æquivalcat jacturæ sustentationis  
necessariæ?

367. *Explicatur status questionis.*

*esse damnatam,*

368. *Statuitur non æquivalere de se:*

370. *Nec carere omni probabilitate:*

369. *Sententiam tamen docentem in  
præsenti casu duellum licitum, non*

371. *Non facile tamen esse tradendam.*

367. **S**I quis honorem suum, labe notatum, purgare duello omittit, vel provocanti parere: tunc quandoque enormi se contemptui exponit. "Fuit Princeps, ait GOBAT (a), ad supremum duellorum judicem, pridem evocatus, qui quemdam generoso equo donavit, quiddam ab alio petitus convicio levi, mox ad duellum provocasset conviciatorem: recusantem, autem exponere ob ejusmodi nugas vitam utriusque periculo, percussisset, velut imbellem feminam, baculo. „Non ego huic Principi Philippicam hic paro: sed miseri illius sortem doleo, qui infami hac ratione percussus, haud dubie in publico comparere absque rubore jam non poterat: aditu aulae, & Nobilium circulis excluderetur: & enormi cum contemptu, veluti carcinoma, horrore fuit. Neq. unicus hic casus est, quo duellum recusans acerbam aded sortem expertus est, ut aequalium societate excluderetur: ut, eo veniente ad commune hospitium, aut mensam, tacite omnes reliqui, veluti à leproso, recederent: ut cum eo ambulare, confidere, aut quancunque operam jungere, vel commercium tractare abhorrerent. Contigit, ut, dum solenni convivio adhibebantur Ordinis Equites, unus publice protestatus sit, se non accubiturum cum Florono Equite, utpote ferente infamem maculam. Surgere à mensa, & exesse debuit Floronus: unde recta etiam ad pugnam descendere, sibi ille quidem fas esse arbitrabatur. Quam dire hæc animum honestiorem vexent, nemo est, qui non facile capiat. An autem hæc vexatio tam gravis sit, ut æquivalcat jacturæ sustentationis necessariæ, & quod consequitur, duellum (saltem

(a) Experim. Theol. tom. 1. p. 1. tract. 7. n. 573.

(saltem si adsint conditiones reliquæ) licitum reddat, difficilius est indaginis. Meo judicio dispiciendum erit imprimis, an ille, quocum pseudo-lex congregari jubet, injuriam tibi palmarem, & manifestam fecerit? si hoc; postulabis, ut rogando veniam, vel recantando te restituat in priorem statum. Si renuat, nec quidquam flexus acerbis, quas perferre te scit, molestiis, ac vexationibus, idem erit, ac si omnes has molestias, ac vexationes ipsius tibi inferret; qui enim *facit per alium, est perinde, ac si faciat per se ipsum* (a). Censetur autem facere per alium, qui hunc non prohibet, dum tamen potest prohibere, ac debet. Si quæras, inferenti has molestias ac vexationes qua ratione occurrere liceat tum, ubi iudicis copia non est: vel aperte ab hoc denegatur iustitia?

368. Respondeo I. Sustainatione necessaria privari majus malum esse, quàm excludi societate æqualium. Primum, quia exclusus, modò publico abstineat, vitam privatam tranquillè nihilominus, ac commodè degere potest, vel ruri in prædiis, vel in regione alia, vel in ipsa civitate sua, modò frequentiores Nobilium circulos evitet. At spoliatus sustainatione necessaria, ex honorato loco descendere, ferre inopiam, ac per servilem operam, aut in ipsa stiva, ut n. 281. narravimus, panem quærere sibi, & familiæ debet. Difficillimum ei accidet ex emendicatis gratiis vivere, postquam antehac in alios conferre est solitus. Secundò, dum ita probrosè excluderis à compluribus, aliqui tamen erunt, qui à tua consuetudine non adeò abhorreant: qui probitati potius tuæ, quàm ignaviæ adscribant recusatum à te duellum. Mora fors cæteros mitigabit: vel alia occasio se offeret strenuè agendi, & eluendi contractam notam. Dein, etsi æquales respuant consortium tuum, habebis pro solatio homines gradus nonnihil inferioris, aut conditionis alterius. Quoddam tertiò conspiratio æqualium contra te sit unanimes, & cum aliis agere non detur, uti militiæ contingere potest, conjuncta ut plurimum erit huic exclusioni ja-ctura dignitatis, & sustainationis, sæpe ab ea dependentis. Quid autem pro tuenda sustainatione, aut dignitate liceat, dictum §. *precedente* est. Ex quibus conficio, sustainatione necessaria privari majus malum esse, quàm

(a) R. J. 72. in 6.

quàm æqualium commercio excludi. Infero: ergo ex hoc, quòd pro fervanda sustentatione duellum aliquando inire liceat, inferri tutò non potest, quòd etiam liceat pro fervando illo commercio; quamvis non diffitear, nobili, vel militari animo probrosam exclusionem meritò accidere molestissimam.

369. Respondeo II. Si quis tamen doceret, etiam pro asserendo sibi commercio, licet ab excluso duellum suscipi, doctrinam hanc in propositione damnante duellum, quod vir equestris suscipit, *ne timiditatis notam incurrat*, non contineri: neque in ulla alia. Certè non agitur hic de inani honoris umbra, aut crabrone nidulante in cerebro: agitur de vita tranquilla, ac honesta, de bono illo socialis commercii, de jure frequentandi honoratos conventus, & circulos, de honore liberorum, ac totius familiæ agitur. Estimabile hoc bonum non crediderim comprehendi in *nota timiditatis*, de qua propositio PAPÆ ALEXANDRI. Alia autem damnata propositio, huc quadrans, non occurrit: ergo hæc sententia, si quis eam doceret, pro damnata habenda non foret.

370. Respondeo III. Neque ea doctrina careret omni prorsus probabilitate. Pro fundamento suo poneret jus illud, quod quilibet habet ad sociale commercium pro ratione status sui: quod sicut est maximè estimabile, ita eo privari est summè acerbum. Exclusus hoc jus vindicat contra eum, qui exclusionis inchoatæ causa extitit injuriosè lædendo, aut iniquè provocando: & exclusionis continuatæ causa existit adhuc, dum satisfacere pro læsione, vel desistere à provocatione non vult, ut tamen deberet. Ferme sicut alius rapit jus ad sustentationem necessariam, ut explicatum est à n. 259.

Contrà opponi ex SCHWARZIO quædam possunt (a): "Negatur, scilicet, quòd ille exclusus sit *invasus*, & quòd honori suo non melius possit prospicere vel via juris, vel via contestationis, naturæ rationali congrua, dicendo: sese paratum, haud sanè fuga, sed defensione justa se tueri adversus injustum aggressorem: duellum tamen non acceptare; quia naturalibus, Divinis, & humanis legibus adversum. Unde negatur

---

(a) J. N. P. I. tit. 4. instr. 3. q. 3.



tur rursus suppositum; reculationem talem esse ullatenus ignominiosam, « nisi fortè apud militum vappam, hac in re pessimè persuasam, apud « homunciones improbos, & diaboli spiritu animatos, quorum persua- « sioni si quid tribuendum foret, etiam provocatio ob qualemqualem in- « juriam foret licita, quod, teste P. VIVA, nemo hæctenus tam fuit insa- « nae mentis, ut somniaret. Item quævis vindicta de inimico esset su- « menda, & pleraque scelera ex respectu humano licitè perpetranda. »  
 R. Utur laudatissimo hæc zelo dicta sint, non video tamen, qui miserè exclusum juri suo restituant. Ea contestatione aërem verberabit, & surdis canet fabulam; certè sæpe contingere poterit, ut usui esse nequeat suggestum consilium (*vid. n. 83. 84.*). Neque etiam cum *militum vappa*, aut homuncionibus *improbis* ei res est; primores Duces, virisque cæterà sectatores honesti, ac decori, passim æstimati, atque in autoritate constituti cum refugiant. Et quid tum si improbi sint? hoc argumentum SCORTIA jam supra *n. 215.* PIGNATELLUS *scoriam* dixit. Via juris, excluso commendata, repagulo clauditur, ubi apertè denegatur justitia. Neque sequitur, provocationem ob *qualemqualem* injuriam fore licitam; non enim alia tam *clara*, tam *ponderosa* erit atque isthæc exclusio: nec tam *cerrè*, & unicè per duellum averti poterit. De *calumnia* ostendimus alibi, quòd incertum sit, oriturum exin grave damnum: & adhuc incertius, quòd damnum illud qualecunque per duellum possit tolli, & quidem unicè. In nostro autem casu exclusus commercio certus est de damno suo: certus quoque est, hæc ratione se restitutum iri suo juri: nec alia ei ratio apta occurrit consequendi jus suum. Accedit, quòd tantum malum non sit timendum societati humanæ, si ab exclusionem hac ignominiosa liberare se liceat armata dextera, quàm si in casu calumniæ hoc liceret; proni enim nimium quantum sumus ad dicenda mala de aliis, & æquè proni ad ea in deteriore partem accipienda, si de nobis dicantur. Dein quotidianæ sunt calumniæ: non autem quotidie post frustra adhibitas curas alias quis de societate excluditur. Eadem ferme ratio est, cur *convicia*, exprobrationes, illusiones &c. duello rectè vindicari negavimus: neque adeò durum est hos, quamvis repetitos, sarcasmos concoquere, quàm videre sodales, refugientes à nobis, velut à lue publica. Responsum hoc fortiori jure illi injuriæ applicabitur, quæ inulta *solum timiditatis* notam afferret. Neque sequitur, *vindictam*.

Mm

(saltem

(saltem puram) *aliâve scelera* in hac doctrina patrociniū invenire; si quidem sint intrinsicè mala, ut ostensum est *n. 267.* Demum & illud non stringit, quòd exclusus non sit *invasus*; invaditur enim, ut dictum est *numero precedente*, ejus jus, quod habet ad commercium cum honoratis viris, etsi corpus, & vita non invadatur,

371. Respondeo quartò, antequam statuatur, num licitum sit pro præfenti difficultate duellum, bene perpendendum id, quod sæpius jam inculcatum est; duellum scilicet malum esse, cujus licentiam non nisi gravissima de causa asserere liceat, *vid. n. 256.*

Neque opponas, nobilem animum non ferre mitiùs probrosam hanc exclusionem, quàm jacturam nescio quantam opum, vel ipsius etiam sustentationis necessariæ. R. Licèt non minùs acriter à quopiam sentiat; minus tamen in se malum est, ut dictum *n. 368.* Dein recolenda sunt ea, quæ disputata sunt *n. 269.* in simili difficultate, ubi nempe vidimus, in ratione defensionis quandoque debere esse discrimen, quamvis in pretio res, quæ defenduntur, non admodum differant, uti *e. g.* fama & vita, quæ æquali passu dicuntur ambulare, non tamen æquali ratione defenduntur licitè. Idem ergo de exclusionem probrosa dici poterit, quamvis nobilem animum non minùs cruciet, quàm jactura opum, nescio quanta. Quæ cum ita sint, nihil in hac quæstione certi decidere ausim. Exspectabo, quid post me dicturi sint doctiores me; ante me enim nullum scio, qui expressè hanc quæstionem examinaverit.

### ARTICULUS III.

*Enucleatur tertia Conditio, id est, Justitia apertè denegata.*

**S**uperest examinanda tertia Conditio ad duelli licentiam requisita. Quid sit apertè denegari justitiam, explicavimus *n. 290.*, quòd non rarè apertè denegetur, ostensum fuit *n. 281.*, quòd eà sic denegatà licitè quis ad duellum progrediatur, colligere est ex *n. 288.* Quærendum hoc loco superest, primò, an debeat adiri etiam ille judex, qui præscitur denegaturus justitiam. Secundò, an non aliquando uti quis possit *licentia præsumpta* Principis sui ad duellum.

§. I.

An debeat adiri Iudex, qui præscitur denegaturus Iustitiam?

372. *Explicatur questio.*

373. *Videtur, non adiri debere.*

374. *Sed statuitur contrarium.*

375. *Nisi fortè res moram non patiatur.*

372. **A**uditus est non unus vir militaris, læsus in honore, secum ipso ita disputare: Quid agam? Sopiri malum apud legionem meam jam non potest, postquam in flammam erupit. Ad tribunal judicis recurram? At novi, aliis hoc Palladium auxilio non fuisse. Interèa, dum inutiles moras traho, nota timiditatis ferenda est, & nihiloscius demum pugnae alea erit tentanda, nisi fortunis exiti miser malim. Præstat ergo sine ambagibus malo exitum quærere. Quid juvat pulsare fores, quas non aperiendas fore scio. Qui, inito ita secum consilio, ad duellum descendit, num excusari æquè mereatur, ac alius, qui implorare judicem non neglexit, modò stat inquirere.

373. Videtur omnino; ut quid enim opem quærat ibi, ubi eam se non inventurum prævidet? accedit, quòd ipsimet ejusmodi Judices, ac Principes gratum habeant, si nemo ipsis aurem vellicet, ut scilicet tanto faciliùs connivere possint. Athleta ergo noster non ex inani fundamento credit se repositum in statu naturali (*vid. n. 288.*), idque ex tacita voluntate, aut licentia judicis.

374. Dicendum tamen videtur, nulla ratione licere, brevi hoc compendio ad duellum procedere. Sanè doctrina, hanc licentiam asserens, perniciofa esset ut quàm maximè; sic enim lex, præcipiens læso implorare officium judicis, paulatim in defuetudinem veniret; ab illata recenter injuria fumantes viri militares, aliisque nobiles, moræ impatientes, persuaderent sibi facilè, nihil præsidii in superiore potestate sibi esse reliquum, nihil spei. Modò unum, alterumve tale exemplum memoria tenerent, mox, eo firmati, causam suam eodem loco censerent repositam, unàmque in armis esse salutem. Sic sæpe, etiam dum vellent judices opitulari, neglecti præterirentur, quo quid ad effrænem duellorum licentiam propagandam nocentius excogitari possit, non video. Insuper iniquitas

compendiariæ hujus conclusionis ex eo pater; primò, quòd *presumptio stet pro iudice*, isque existimandus sit suo non defuturus officio, nisi manifestis argumentis suam negligentiam demonstret. Secundò, si minùs strenuum se exhibuit in causâ una, non sequitur, eum etiam in altera fore somnolentum; non semper dormit Princeps, aut iudex: fortè aliàs partium studiis abreptus, vel sinistrè edoctus opem non tulit, laturus tamen modò. Tertid Senatus militaris Senatores suos non rarò mutat, succedentibus aliis, quorum unus quandoque vir integer, atque magnanimus collegas suos animare, & exulem Themidem reducere valeat. Itaque spectatis his omnibus, exspectandum esse arbitror, donec clarè deprehendatur, suppremam potestatem, nec quidquam imploratam, nolle succurrere, seu apertè denegare justitiam. Præcipuè cum exinde nulla gravis molestia accedat imploranti, & exspectanti; quòd si enun profiteatur, se, æquitate naturali, non timore ullo inductum causam ad iudicem competentem detulisse, paratum cæteroquin defendere stylo ferreo se, suæque bona, si quidem ille patrocinium negaret, nihil interea, vel parum vexationis sustinebit.

375. Quòd si autem naufragium fortunæ tuæ ita jam in propinquo esset, ut moram non admitteret, certò peritura damno nunquam reparando, si tempus ad justitiæ fores teratur, tunc crediderim licere sine ambagibus absolvere negotium: ferme sicut contra prædonem, aut furem armis licitum est sua tueri, si properato sit opus, nec vacet adire iudicem. Sed simul existimo, rarum prorsus ejusmodi fore casum ex causa ignominiarum, ubi urgens necessitas viam juris querere prohibeat.

Habeto tamen factum, ubi id prohibuit. Cajus in militari quadam dignitate constitutus, clam subduxit Titio nobili marsupium ducentis scutum aureis, quo viarico lætus (exterus quippe erat) citis equis in patriam abiit. Titius, notato furto, insequitur Cajum, ex indiciis non inanibus, imò gravissimis, sibi suspectum. Cùmque in nocturna statione sui securum deprehendit, restitui sibi postulat ablatum. Negante Cajo, & contra injuriam obstrepente, profert indicia Titius: unde territus, ac in ruborem datus ille subducere se parat, ac viam profequi, nullo relicto dubio de furto admissio. Iudex in loco non aderat, qui delato ad se reo manus injiceret: neque equi, quibus Titius vestigia fugituri premeret; utpote qui  
ab

ab hoc jam erant conducti. Itaque Titius, ne occasionem ultimam recuperandi aureos suos omitteret, stricto gladio jus suum exigit: dumque alter, tam ad nummos, quam ad famam servandam arma armis opponit, fit pugna. Nemo, credo, erit, qui Titium volet obligatum dicere, ut, omissa vi armata, judicem adiret, & interea elabendi spatium daret Cajo. Aliter se res habet in aliis casibus, prout *num. precedente* recensiti sunt.

## §. II.

An non aliquando uti quis possit licentia præsumpta sui Principis ad duellum?

376. 377. 378. *Tota questio illustratur triplici casu, negaturque ubique licentia.*

376. **U**T clarior sit questio, triplicem proponam casum, auditu non indignum. I. Leander, vir militaris, ac nobilis inconsculte aliquando per contemptum acre soomma effutiverat in Principem exterum, quod ubi audierat præfens fortè Hector, Principi huic à servitiis, ad se pertinere ratus ejus honorem vindicare, acriore rejecto in Leandrum convicio, ad duellum provocavit. Post tempus, ubi se in sacro pœnitentiæ tribunali stitit, narravit equidem factum, nil tamen admodum se peccasse credebat. Negante sacro Judice, hoc duellum fuisse licitum, opponit Hector, *præsumpsisse* se, ac persuasisse sibi, id probandum fore Principi suo, cui, cum in exterum hominem, extra ditionem suam existentem, nil juris esset, neque puniendi occasio, utique fas fuisse demandare sibi provinciam vindicandi injuriam. Non omni specie veri carere videtur excusatio pœnitentis hujus. Competebat urique suo Principi jus belli publici contra nationem, vel Principem exterum, si quidem ab his læderetur graviter: ergo videtur eidem competere jus belli privati contra hominem privatum; & cum ibi mittere exercitum fas sit, hic mittere virum unum poterit, data facultate, quin etiam mandato, ut duello petat protervum hominem. Quod si autem Princeps hanc facultatem, aut mandatum *expresse* dare posset, ubi adesset præfens; poterit etiam dare *tacite*, & hanc datam sibi *præsumere* fidelis subditus; tunc enim rectè *præsumimus* facultatem, quando prudenter arbitramur, eam futuram fore voluntatem præpositi, si quidem præfens esset, vel de re edoceri posset.

Sed contra sic arguo: Princeps ab extero privato homine læsus in honore, non potest cuiquam suorum demandare provinciam reum evocandi ad duellum: ergo multo minùs Hector uti potuit hac facultate, tanquam *presumpta*. Princeps juxta jus naturæ, & gentium tenetur, querela sua ad Principem lædentis delata, exigere, ut hic pro honore læso satisfieri sibi curet; sicut enim regio, sic & potestas regentis limites habet, quos transilire si daretur, quæ rerum confusio nasceretur! Quoddâ Princeps requisitus petulantiam sui subditi castigando, satisfacere curet læso, contentus hic sit oportet: & restituto sic honore, nil alia violentia est opus. Si satisfactionem non obtineat læsus Princeps, per omnes provinciæ suæ fines promulgari curet, ut nebulo ille, quamprimum apprehendi à quopiam possit, illico detur custodiæ, trahendus ad pœnam debitam. Hoc modo satis vindicata existimatur summa autoritas, dum, quantum in se est, inultum non sinit abire jactum probrum. Et hæc vindicationis ratio plus affert ad existimationem tuendam, quàm monomachia inter duos privatos celebrata; nam si fortè vindex sui Principis etiam succumberet, an non risu exciperetur inanis conatus? cùm ergo Princeps læsus pugnandi officium Leandro suo demandare salva recta ratione non potuit, multo minùs hoc officium sibi demandatum *presumere* Hector debebat. Multo minùs, inquam; nam dato etiam, quod facultatem committere Princeps posset: non tamen illico commissæ præsumi potest ad quodvis convicium; fortè Princeps mallet alia via honorem suum vindicare: fors de convicio monitus solo contemptu id judicaret dignum. Id certum, si privati cujusque iudicio res decidenda relinqueretur, plurimos abusus fore secuturos. Ergo peccavit Hector, nisi conscientia, *invincibiliter erroneam* quam dicunt, eum excuset, qualem dari posse etiam in iis rebus, quæ naturæ jure prohibentur, si ex primis juris naturæ principiis *mediate*, & *oposè* deduci debeant, docet communior cum D. THOMA (a).

377. II. Imperante LEOPOLDO Cæsare, ut notus ejus vitæ Scriptor Latinus narrat, Heisterus, celebre bello nomen, cum Legato cujusdam Regis exteri convivio adhibebatur in aula neutrarum Partium, quo tempore

(a) 1. 2. q. 100. a. 1.

pore bellum duos illos summos Principes colliserat. Super mensam primò Regis Legatus poculum libabat in sanitatem sui Regis, cui respondere non dubitavit Heisterus. At hic paulò pòst etiam Imperatoris incolumitati coronato cyathò bene precatus, convivas, Legatum præcipuè, invitabat, ut paria rependeret. Dum verò hic primò cunctaretur, tum apertè abnuìt, ecce! Heisterus vas, ùt plenum mero erat, ei audaci jactu in faciem effundit. Territi convivæ surgunt à mensa, omnémque vim ulteriorem inhibent. In ædes suas reversus Legatus, probri accepti impatiens, aliud sibi nil credebatur superesse, quàm ut Heisterum ad duellum evocaret; id enim credebatur exigere honorem Regis sui, læsi in Legato. Idem honori proprio necessarium ducebat; nam faciliè divinabat, se in Regia contemptui futurum, quandocunque rediret inulto probro. Cùm ergo neque in aula Heisteri, neque in sua auxilii quidquam speraret, quærìt fors nonnemo, an non potuerit sibi persuadere, seu *præsumere* à Rege suo tacitè sibi fieri facultatem movendi bellum privatum Heistero?

Ajo, non poterat; Regis enim honor factò Heisteri passus nil fuerat. Veneratus est Regem Heisterus: idem quoque rependere Imperatori debebat Legatus; hæc certè voluntas erat Regis, ut redderentur humanitatis officia, quamvis hosti. Errorem ergo jam suum luat, quem quidem, ut fatear, Heisterus nonnihil justo acriùs ei exprobravit, correctione admodum dura, qua modum excessisse videri poterat: nec tamen ideo Legatus jus acquisivit eum aggrediendi duello; nam alibi jam statuimus (*vid. n. 335.*), nefas esse provocare ob læsionem acceptam, quam sibi quis per illatam antea læsionem accivit. Ergo defuit conditio prima, ad duellum licitum requisita. Neque secùndò in judicem culpam rejicere potest apertè denegantem sibi justitiam; non enim, credo, ad Regem causam suam deferre auderet Legatus, vel etiam auditus juberetur sibi imputare malum, quod ineptè accersiverat in caput suum. Vel si deferre ad suam, vel aulam Heisteri causam se posse speret cum fructu, deferat omisso duello. Tertiò, necdum constat de tanto fortunarum dispendio, ut etiam sustentatio necessaria esset peritura. Nulla ergo conditionum ad erat, sine quibus duellum illicitum pronuntiavimus.

378. III. Narravi suprà n. 281. qua ratione Bohemus quidam Comes in Aula extera probrum, jactum in totam Nobilitatem patriæ suæ, duel-

duello vindicaverit, spectante Principe extero, renuente alio modo satisfactionem præstare læsis. Sed num bene juxta leges conscientiae? de laude enim profana, quam copiosè utique collegerit, nihil ei hæc detractum velim. Bc. Neutiquam; si enim ipsemet Rex Bohemiae fuisset scommate impetitus, duellum Comiti fuisset illicitum, ut ex *Casu 1. hujus* §. patet: ergo multo minùs, dum Nobilitas fuit læsa; hæc enim jus belli publici non habet: ergo neque committere potuit. Neque habebat jus belli privati pro hoc casu; quia à Rege suo poterat, & debebat flagitare, ut, patrocinio causæ in se suscepto apud Principem exterum, conviciatoris dominum, flagitaret pœnam reo: vel etiam hac negata, promulgaret per univèrsam Regnum, ut nebulo, deprehendi si ullo unquam tempore possit, custodiæ detur. Satis jam videntur explicatæ tres illæ conditiones, sub quibus licitum diximus duellum esse. Unde progredi modò juvat ulterius.





## CAPUT VII.

### QUOMODO IN STATU CIVITATIS BENE ORDINATÆ DUELLUM PROHI- BEATUR LEGE DIVINA.

**E**Merſimus tandem ex Babylonia, ſeu Statu Civitatis malè ordinatæ, in qua leges quidem aliquæ, contra duellum latæ, extant (quæ enim hodie gens eſt, quæ hoc certandi genus non prohibuerit?) at malè cuſtoditæ cedere debent pseudo-legi tyrannicæ. Nunc ingredi juvat Civitatē bene ordinatam, ſive illam, in qua duellorum licentia coercetur, dum Magiſtratus legibus authoritatem, bonſque cives obedientiam præſtant. Cūque variis legibus idem crimen prohiberi queat, Civili, Eccleſiaſtica, Divina &c., per hæc omnia legum genera duellum circumducemus, à *Lege Divina* facturi initium præſenti Capite, in quo geminis Articulis *primò* declarabitur Lex Divina duellum prohibens. *Secundò* reſpondens. hujus legis transgreſſioni Pœna, & Obligatio.

#### ARTICULUS I.

##### *Declaratur Lex Divina duellum prohibens.*

**L**Ex Divina alia poteſt dici *Naturalis*: alia *Poſitiva*. Legem naturalem, alibi, n. 175., jam definitam, *Divinam* non immeritò appello; paſſim enim dicitur, quodd fit *ordinatio Divina Sapientia* &c. vel *voluntas DEI neceſſariò obligantis* &c. exolevitque illa definitio Vaſquii docentis, legem Naturalem eſſe ipſam naturam rationalem (a). Unde etiam SENECA (b) legem naturalem expreſſè appellat *Divinam*. Hanc juxta Apoſtolum (c) *ſcripſit DEUS in cordibus hominū*. Econtra lex illa dicitur *Divina poſitiva*, quæ

Nn

autho-

(a) Vid. Suarez de LL. l. 2. c. 3. n. 5. (b) De Benef. l. 4. c. 7. (c) Rom. 2.

authore Deo liberè condita ultra juris naturalis placita aliquid ponit. Ad hanc spectant veteris Testamenti leges judiciales, cæremoniales, quin etiam morales illæ, quas in Decalogi tabulis exaratas legimus; licet enim hæ (fortè unica excepta) sint juris naturalis: tamen placuit Deo ea repetere, & scripto tradere, ut tanto magis inculcarentur intellectui humano, per Originale peccatum obfuscato, & de humanarum actionum bonitate, vel malitia sinistrum sæpe ferenti judicium, ut docet D. THOMAS (a). Igitur videamus, quomodo duellum in Civitate bene ordinata prohibeatur, tam lege Divina naturali, quàm positiva: sive tam illa, quam DEUS scripsit in cordibus nostris, quàm altera, quam scripsit in tabulis Moyfis.

## §. I.

Quomodo duellum in Statu Civitatis bene ordinatæ prohibeatur  
lege Divina naturali?

379. *Premissis notandis,*

380. *Demonstratur duellum ea lege  
prohiberi clarè, atque*

381. *Confirmatur sententiâ Principum,  
& communi aliorum.*

379. **E**quidem alibi (scilicet *Cap. IV.*) probavimus, quod in Statu naturali duellum prohibitum non sit pro uno, alteròve casu: notandum autem, aliud esse, quod in *Statu Naturali* non sit prohibitum jure naturæ: aliud quod non sit *jure natura* prohibitum in statu Civitatis bene ordinatæ; nam jus naturæ, quod viger in utroque hoc statu, pro statu uno concedere potest, quod prohibet pro altero. Sicut ergo pro Statu naturali non prohibet, ut quis vindicet privata autoritate sua sibi bona: quàmvis id pro Statu Civitatis bene ordinatæ interdicit, ubi judex læso patrocinator: sic potuit jus naturæ pro Statu naturali in uno, alteròve casu non vetare armatas honoris vindicias, easdem tamen damnare pro Statu Civitatis bene ordinatæ. Sic jus naturale (Constitutiones varias, præcipuè *Art. 17. §. 7. Instrumenti P. IV.* huc non refero) concedit Statibus immediatis Imperii bellum

(a) Apud *Saarez* de LL. l. 9. c. 4. num. 19.

lum gerere contra externos, nulli tribunali Imperiali subditos: vetat autem bellum Statûs contra Statum, eo quodd isti iudicem agnoscant.

380. Ut jam demonstrem, duellum honoris vindex pro *Statu Civitatis bene ordinata* jure naturæ damnari, recole, quod alibi dictum (n. 176.) illud scilicet refragari juri naturali, quod ad felicem humanæ naturæ statum expedit esse prohibitum. Cujus felicitatis deprehendendæ indicium suggesti, consensum scilicet hominum in eam interdictionem, si ante omnem casum particularem fuisset consulti. Jam verò expedire ad felicem naturæ humanæ statum, ut duellum honoris vindex prohibitum sit: atque in hæc interdictionem homines antecederent ad omnem particularem casum consensuros fuisse, non est dubium, modò quis consideratò legere velit, quæ fusè toto *Cap. II.* peroravimus. Demonstratum ibi fuit, duellum nentiquam esse veræ fortitudinis argumentum: esse ineptum ad finem suum: esse crudele: injuriosum Magistratibus: noxium Reipublicæ: ignorum olim moratis gentibus: Christianæ legi summè contrarium. Et ne malè objiceretur illud (a): *quod non est licitum in lege, necessitas facit licitum*, fusius ostendi ex sapientissimorum Principum Statutis, cruentas has honoris vindicias neutiquam esse necessarias, modò supremi Magistratus saluberrimis suis Constitutionibus firmi inhæcant. Cùmque hoc agere soleant in Statu Civitatis bene ordinatæ, satis clarè sequitur, pro eo statu duellorum vesaniam felicitati humanæ gentis repugnare, adeoque jure naturæ prohiberi.

381. Condemnarunt eandem expressè, tanquam juri naturæ contrariam plura sapientissimorum Principum edicta, lata contra duellum: nominatim Conclusum Imperii (b), Edictum Brunswicense Electorale (c), Saxo-Gothaicum (d), Guelphier-Bytanum (e).

Aphorismi Monomachorum e.g. *Vita, & fama pari passu ambulant*, tum alii similes, jam alibi ventilati sunt, & vel in ipso Statu naturali rejecti inter paleas; non opus est pluribus. Profectò neminem facile ita efferum vidi, qui non duellum proprio quoque suffragio ex solo rationis lumine damnaverit, modò Magistratus, & Principes honorem læsum reparare, nutantem firmare,

Nn 2

mare,

(a) C. 4. de R. J. (b) An. 1667. (c) An. 1714. (d) An. 1646. (e) An. 1646.

mare, & oritura damna præpedire vellent serid, & possent cum efficacia. Ita sæpius candidè testantes audivi. Et quis miretur? non exigua servitus est, quam nemine invidente Nobilitas inter suas prærogativas numerat, paratum quotidie sanguinem circumferre, effundendum ad convivium unius trifurciferi.

## §. II.

## Quomodo prohibeatur Legè Divina positiva?

382. *Prohibetur Præcepto V. Decalogi; primò quia DEUS habet dominium vitæ,*  
 383. *Cujus affertur genuina ratio.*  
 384. *Potest tamen potestatem occidendi alius quandoque committere,*  
 385. *Quam Monomachis promiscuè concessam male probat Anonymus quidam.*  
 386. *Affertur altera ratio prohibiti à DEO duelli.*

382. **M**andatum illud: *Non occides*, lex Divina est, & *positiva*, quatenus inserta est Decalogo. Prohibet DEUS, ne quis ausit necem moliri cuiquam hominum, & hoc quidem æquissimè; indignè fero, si quis servum meum, vel bovem occidat, cur DEUS hominem aliena malitia perimi sinat? DEI, qui mortis, & vitæ potestatem habet (a), dominium invaditur, dum invaditur vita hominis: qui solus fecit hominem, sibi quoque potestatem vitæ, & necis reservavit. Quo præcepto non id duntaxat vetatur, ne quisquam in alienam vitam grassetur: sed etiam, ne in suammet, nisi ad id auctoritatem à supremo Domino acceperit, prout Ducibus D. AUGUSTINO (b), & THOMA (c), communis & certa Doctorum censet, quamvis modum hanc veritatem probandi arripiant varium.

383. WOLFIVS homini non competere dominium in vitam suam demonstrat ex eo (d); quòd obligatus sit *ad vitam conservandam*, hoc est, ad facienda ea, quæ ad corporis conservationem conferre possunt; & ad non facienda, quæ idem destruunt. Ut tamen verum fatear, quomodo ex obligatione conservandi, negetur *dominium*, non satis perspicio; ipse illu-

(a) Sap. 16. (b) L. 1. de Civ. c. 20. (c) 2. 2. q. 64. art. 5. (d) J. N. P. l. 5. 351.

Illustis hic Author (a) docet, hominem obligari ad conservandum patrimonium, quo nomine intelligit omnia bona sua (b), & contra jus naturale agere, si dilapidet (c), maximè si alar familiam: & tamen docet (d), patrimonii sui quemlibet habere dominium. Ergo ex obligatione aliquod bonum conservandi non bene negatur dominium. Rationem aliam dant alii hanc (e); quia scilicet vita, & membra non sunt fructus industriæ nostræ, sed misericordis Dei prima, & summa gratia in ordine naturali: quæ proin tantum precariò, non proprio jure possidemus. Verùm etiam hæc probatio fors difficultatem pateretur, si opponerentur feræ, & illæ fruges terræ, quæ nec ipsæ sunt fructus nostræ industriæ: dominio tamen nostro subjectæ sunt. Itaque tertio alii sic probant: Ex una parte certum est, Deum, utpote Creatorem & Conservatorem obtinere vitæ dominium, non secus ac figulus est dominus vasis à se facti: ex altera verò parte neque ex SS. Litteris, neque ex ratione quadam naturali constat, quòd Deus potestatem, seu dominium in vitam nobis concesserit. Ex SS. Litteris constat potius contrarium, juxta illud: *Non occides*. Meretur in hanc rem legi AUGUSTINUS refutans infaniam Circumcellionum, occisionem suimet habentium pro perfectissimo Martyrii genere. Item illa ejus verba: "Non frustra in sanctis Canonicis Libris nusquam nobis divinitus præceptum, permixtumque reperiri potest, ut vel ipsius adipiscendæ immortalitatis, vel ullius carenti, cavendique mali causa nobismet ipsis necem inferamus; nam & prohibitos nos esse intelligendum est, ubi lex ait: *Non occides*, præsertim quia non addit: *proximum tuum*." Ex ratione quoque naturali colligitur contrarium; periculum namque foret, ne data tali licentia, plurimi, vitæ hujus pertæsi, horrore ærumnarum præsentium, aut desiderio vitæ futuræ se ipsos occiderent; si enim nunc, dum viget persuasio de gravi mandato prohibente, non desint, qui ad finiendas hujus vitæ molestias sibimet violentas manus inferant; vel vano honoris stimulo impulsu monomachiis, & rixis se exponant, licet præsciant, se hac via mortem æternam incurfuros: quantus eorum esset futurus numerus, si licitè id fieri posset sine conscientie repagulo, ac dispendio salutis æternæ?

Nn 3

Neque

(a) P. II. J. N. §. 458. (b) §. 452. (c) §. 460. (d) §. 456. (e) Cum Schmier  
Jurispr. Can. Civ. l. 3. tit. 2. c. 2. n. 357.

Neque habet homo membrorum suorum tale dominium, ut pro libitu possit ea abscindere, aut mutilationi (quod in duello fit) temere obijcere, prout pridem ULPIANUS edixit (a): *Dominus membrorum suorum nemo videtur*. Ratio est eadem; DEUS creando, & conservando fit dominus membrorum: ergo nemo, absque injuria erga DEUM, suum, vel alterius corpus mutilare valet, nisi ad hoc DEUS ipse fecerit potestatem. Atqui fecisse cuivis hanc potestatem, nec ex SS. Litteris, nec ex ratione naturali constat, imò constat contrarium: ergo &c.

Ex his liquet, utrumque monomachum, tam provocatum, quam provocantem contra jus Divinum facere, dum ex condicto in pugnam descendunt; quia neuter accepit potestatem à Deo, ut in alterum sæviat. Neque alter alteri hanc potestatem facere potest; disponderet quippe de re, & jure alieno.

384. Econtra DEUS, sicut ipse dominus vasis pro libitu vas confringit: sic hanc potestatem, si convenire videatur suæ sapientiæ, communicare aliis potest. Et hanc concessisse Magistratibus censetur, id quod colligitur non tantum ex SS. Paginis, sed etiam ex ratione naturali; ut scilicet noxii ex Republica tollantur homines, & reliqui contineantur in officio. Utrum autem hæc potestas Magistratibus sit *dominium*, & Magistratus dicendus sit *dominus vite*, & *neque*, ad modum loquendi pertinet. Dicas pace mea *dominium imperfectum*; quia tantum nomine, & auctoritate DEI hanc potestatem Magistratus exercet. Pari ratione hanc potestatem privato cuique homini pro certo rerum articulo concessam fuisse ex ratione naturali colligimus, ut scilicet contra vim injustam moderatè se defendere possit, nec bonus quisque pati debeat à violentia malorum se opprimi tunc, dum in Magistratu nullum est auxilium. Colligimus etiam, quod non bona corporis tantum, sed & bona fortunæ magni pretii tueri privato liceat etiam nece prædonis, si opus sit. Item quod semet rectè exponat periculo ad certum, & grave ejusmodi damnum avertendum: quin & membrum abscindere possit sibi met ad conservandam vitam corporis.

Oppo-

---

(a) L. 13. ff. ad L. Aquil.

Oppones. Si Deus hominibus non concessit potestatem in duello occidendi, & mutilandi, quo jure à nobis *Cap. IV.* defendi potuit, licite factam, & acceptatam fuisse eam provocationem? R. Provocationem illam extitisse in Statu naturali, vel in Statu Civitatis malè ordinatæ, qui quoad hoc illi æquivaler; cùm in neutro præsidium in judice læsus, aut provocatus inveniant. Sicut ergo in casu, quo quis bona sua contra vim prædonis servare non potest ope judicis, potestas pugnandi contra prædonem, quin & occidendi, si opus sit, à Deo concessa tum ex SS. Paginis, tum ex ratione naturali colligitur: sic & nos bene arguimus, pro defendendo contra injustè lædentem honore, cujus jactura cum ingenti bonorum strage conjuncta est, à Deo concessam fuisse potestatem pugnandi, etiam cum vitæ periculo, si opus sit.

385. Ex his patet, Anonymum quendam non ita pridem promiscuam pro duello licentiam in scripto quodam suo, quod per multorum manus circumvolitabat, minùs scitè asseruisse. Abrahamum afferbat, cui potestas facta à Deo est occidendi filium: Israelitas item, quibus jus belli ab eodem collatum: ergo, concludebat, viris quoque militaribus, ac nobilibus data facultas est vitam exponendi in duello. Quàm misera hæc consecutio! cur non intulit: ergo etiam patri cuique fas est occidere proles suas? vel: ergo etiam Catholici jus obtinere à Deo cruento bello everrendi absque ullo jure ac titulo regiones A catholicorum, atque infidelium, ferme sicut Israelitæ occisis incolis occupare terram promissionis? Nempe aliud est, quòd Deus possit dare potestatem: aliud quòd dederit. Hoc probari debet: non autem ex concessa potestate pro uno casu bene inferitur, etiam eandem pro altero casu fuisse concessam, nisi in utroque par sit ratio. In casu, quo ego duellum licitum dixi, par est ratio cum casu illo, quo contra prædonem mea bona tueor (*vid. n. 259.*): cùm ergo pro hoc casu DEUS concessisset potestatem occidendi prædonem merito credatur: etiam pro casu, quo duellum initur, debitis conditionibus vestitum, concessisse credendus est facultatem occidendi, si opus sit, iniquum antagonistam. At quàm dispar omnino ratio intercedit inter factum Abrahami, & inter promiscuam illam duellorum licentiam! Imò, quis Abrahami factum probaret, vel Israelitarum bella, nisi datum eis mandatum ex Dei verbo clarè intelligeremus? ostendat ille Anonymus simile mandatum: vel

vel ex ratione simillima suam facultatem confirmet; secùs cariosa est ejus argumentatio. At utinam fidem non invenisset malè claudicans Dialécticus apud sui similes!

386. Duellum lege Divina vetari hætenus ostendimus ex dominio DEI in vitam hominum. Et en! nova emergit ratio. Hujus vitæ usumfructum, vel administrationem, homini concessit DEUS ille, *qui vitæ, & mortis habet potestatem* (a). Hoc ergo usufructu qui tentat privare hominem, injuriam huic infert, læditque charitatem eo graviùs, quo pretiosior homini is ususfructus est. Atqui hoc facit monomachus, qui iniquè vel provocat, vel alterum, negando satisfactionem, ad provocandum cogit; vulnera enim, ipsamque fortè necem infert, vel certè inferre non horret. Dum verò semetipsum neci, & vulneribus exponit, contra charitatem peccat, quam sibi debet: itè contra jus DEI, qui bonum, vitam scilicet, & integritatem membrorum, in usumfructum concessit ea lege, ut servaretur incolume, nec exitio frivoltè exponeretur: ergo monomachus multiplici nomine legem Divinam tam naturalem, quàm positivam violat, utpote in DEUM injurius, & hominem.

## ARTICULUS II.

*Declaratur respondens transgressioni Legis Divina pœna,  
& obligatio.*

**C**Audata sunt delicta pleraque; trahunt etenim pœnas post se, dandas Divinæ Nemese; & si quidem damnum cuiquam hominum inferant, obligationem id resarciendi. Utrumque in duello illicito accidere potest; eo quoddam monomachus, ut primùm antè dixi, in DEUM, hominemque injurius sit. Itaque primò *Pœnam*, quam DEO debet: tum secundo loco *Obligationem*, qua læso satisfacere obstringitur, ponderabimus.

§. I.

---

(a) Sap. 14.



§. I.

Quam pœnam debeat Monomachus violatæ Legi Divinæ?

387. *Pœnam æternam ei debere, ostenditur ex ratione,*

389. *Necquidquam obstrepentibus monomachis.*

388. *Et ex testimonio Principum.*

387. **D**Uellum, extra tres conditiones à nobis statutas susceptum, transgressio est Legis Divinæ in materia gravi: ergo grave peccatum est, seu *mortale*, ut vocamus. Itaque ejusmodi pugil summi Numinis gratia excidit, qua orbatus jacturam patitur, quam sanguineis, si rite intelligeret, lacrymis esset deploraturus. Et si quidem ex hac vita decedat, gratia necdum per veram pœnitentiam recuperata, etiam beatitudinem æternam perdit, quæ sola privatio, si cætera in orco supplicia abessent, hominem reddit longè miserrimum. Arbitror autem, monomachos non nisi difficulter recuperare pretiosam illam gratiam; nam si in duello graviter faucii mox, vel paulò post obeant, turbati animo, sui parum compotes, de salute corporis tantum solliciti, destituti salutari auxilio, quomodo grande salutis negotium tractabunt? Demus, uno ad DEUM suspirio veram absolvi pœnitentiam posse. At noveris, in suspirio illo contineri debere odium duelli, non ut lethale est corpori, sed ut displicet Deo, quem jam morituriens amet super-omnia, paratus mille provocaciones rejicere, aut convicia pati, quam hæc tali ratione vindicare posthac, aut illas acceptare. Ut nil dicam de danda ex corde victori suo venia. Satis apparet, animum ita comparatum eo in rerum articulo, esse quid rarum, & admirabile. Monomachus alius, qui salvus ex arena rediit, quando is incipiet duellum suum, tanquam verè summum malum, utpote peccatum, detestari? quando erit animo obfirmatus, redeunte causa simili, abstinere à duello, quo nunc tam feliciter suum, ut ipse credit, honorem vindicavit. Et tamen nulla datur peccati venia, nisi ita constitutus sit animo.

388. Unde non miror, summos Principes, Acatholicos æquè ac Catholicos, duello non levem ruinam animarum imputare. Audiamus, saltem aliquos, quam graviter sentiant. FRIDERICUS WILHELMUS Elector

Oo

Brân-

Brandenburgicus, dum in Ediſto ſuo (a) duella, ſimilésque dimicationes damnat, expreſſè ait, cades in eis patrari *cum jactura aeternae beatitudinis*. FRIDERICUS III. itidem Elector Brandenburgicus (b) dolet, duello *pretioſas animas, Chriſti emptas ſanguine, periculo evidenti exponi*. CAROLUS XI. Rex Sueciae proficitur (c) ſeveras ſe in duello leges ferre, ut præcaveatur ruina duplex, *anima ſcilicet, ac corporis*. AUGUSTUS Dux Guelpherbytanus hunc, ait (d), peſſimum duelli fructum, ut non rarè cum integritate corporis vitam quoque anima deperdas *infelix pugil, rectè descendens ad diabolum in inferni abyſſum: vel vita utcumque ſervata, turbam gravi piaculo conſcientiam circumferas*. Marchio Haſſo-Caſſelanus CAROLUS (e) eudacter aſſerit, *occuſum ſine dolore, ac poenitentia emori. & aeterna ſalute ex-cidere*. In eandem ſententiam abeunt Respublica HAMBURGENSIS, & LUBECENSIS (f). Huc etiam pertinet teſtimonium CONDÆI Principis, ſulque Paſtoris. *vid. n. 128.*

389. Facile diſpicio, monomachorum quosdam fidem abrogaturos his dictis, quamvis ſolidiſſima ratione firmatis; at nempe ex eorum numero ſunt, de quibus Apoſtolus Timotheo ſcribit (g): *Bonam conſcientiam quidam repellentes circa fidem naufragaverunt*. Non credunt, quia credere nolunt; quid enim eſt, quod intellectum ab aſſenſu retineat? fors poenarum aeternitatem pro ſaſto unico, brevique haud rectè convenire autumant? at meminerint, quis eo ſaſto offendatur: & quantum is ipſe in honore ſit paſſus amore noſtri. Meminerint, majorem non eſſe poenam decretam in violantes DEI mandata, quam præmium promiſſum ſervantibus, & DEUM non iniquè agere deprehendent. Cæterum; ſi humanà decempeđà peccatum metiri velint, non aeterna ſolùm, ſed temporalis etiam poena nimia videbitur. Sed obſtrepant, quantum velint, propter hos Ardeliones nec unus in Decalogo apex mutabitur.

## §. II.

(a) An. 1652. (b) An. 1688. (c) An. 1682. (d) An. 1646. (e) An. 1684.  
(f) *Hamburgenſe* publicatum 1699. renovatum 1720. *Lubecenſe* publicatum 1704. Renovatum 1720. (g) I. i. v. 19.

§. II.

Quæ sit obligatio reparandi damna per duellum illata?

390. *Ex duplici fonte hujus obligationis unus alibi fuit declaratus.*  
 391. *Alter declarandus venit per quinque quæstiones.*  
 392. *Q. I. An provocans victor provocato debeat compensationem?*  
 393. *Etiâ tunc, ubi hic non invitatus comparuit?*  
 394. *Q. II. An absque data causa provocatus, & invitatus comparens teneatur refarcire damnum provocanti illatum cum vulnere? affirmat Molina.*  
 395. *Sed ex argumento non satis solido.*  
 396. *Q. III. An non tunc saltem teneatur, ubi præcedente injuria provocationem causavit?*  
 397. *Q. IV. An ad liberos, & uxorem se extendat obligatio illa, si provocans damnum patitur?*  
 398. *Quousque, si provocatus?*  
 399. *An etiâ ad creditores?*  
 400. *Q. V. Cum moriens dare veniam in vario sensu possit,*  
 401. *Quando data venia extinguat obligationem compensandi damna?*

390. **D**uplici ex fonte monomachus damnum afferre adversario suo potest. Primum, si eum iniquè provocat, & conscientia causa comparere recusantem conjiciat in damnum fortunarum: vel si satisfacere renuat iniquè a se læso, nolenti provocare metu peccati, & sic patienti grave dispendium in dignitate, vel opibus. Quid ex hoc capite præstare debeat monomachia candidatus, ut læsum indemnem server, colligere datur ex Cap. VI. Art. I. §. II. III. IV. V. VI. Fons alter compensationis est mutatio, vel occisio, vel noxia vel ipsi infelici pugili, vel suis. Ad casum unicum redigimus, quidquid ferme in hac materia utiliter disputari potest.

391. Titius, dum Cajum verbo ignominioso offenderat, ab hoc provocatur ad duellum. Monet eum Titius caelebs, meminisset charæ prolis, quam in egestate relicturus esset orphanam unâ cum uxore, si sinistra pugna caderet. Alieno insuper ære gravatus Cajus ex militari stipendio tertiam quotannis partem creditoribus per sententiam iussus erat relinquere. Pugnat nihilominus, vulnere affligitur, quo ineptus obeundo suo officio egere capit, tandem etiâ mortuus ex vulnere; datâ tamen antè veniam Titio. Ex hac narratione quinque oriuntur quæstiones. I. An, si provocans provocatum vicisset: non verò provocatus provocantem, uti in casu fingitur, damna compensare debuisset? II. An provocatus absque

data causa, dum provocanti damnum cum vulnere intulit, non teneatur ad damnum refarciendum? III. An non teneatur etiam tunc, ubi præcedente injuria provocationem causavit? IV. Quousque se extendat obligatio compensandi? V. An data venia non extinguat hanc obligationem?

Notandum primò, hic nobis quæstionem esse de obligatione in conscientia, orta ex ipsa natura læsionis; quando enim iudex compensationem damnorum imperare possit, vel debeat, alibi dicitur. Secundò, distinguendum est inter duellum justè, & injustè susceptum: defendebamus in prioribus, posse aliquando licitè offerri, aut acceptari duellum. In tali casu, habens justam pugnandi causam, non facit alteri injuriam: ergo non est, cur damna secuta ei compenset. Quærimus ergo de duellis illicitis, & quidem

392. Q. I. An, si provocans provocatum vicisset, damna compensare debuisset? R. Non videtur dubium; Titius enim invitum se pertrahi ad pugnam est passus à Cajo, necessitate tuendi honoris. Cùm itaque Cajus violaverit jus Titii, quod habet ad vitam, & membra, injuriam intulit: damnum autem cum injuria illatum, compensationem exigit. Neque contrà dicas; *scienti, & consentienti non fieri injuriam* (a); nego enim, quòd *efficaciter, & seriò* consenserit Titius. *Contra voluntas est quidem nihilominus voluntas*: at non talis, quæ excuset injuriam, LA CROIX (b) ex SALON. & SANCH.

393. Quòd si autem provocatus non invitus comparuit, ajo ex MOLINA (c), : " Si propria utriusque sponte certamen committatur, novum eorum teneri alteri restituere pro damno, quod fortè illatum est. Ratio est; quoniam licèt peccent lethaliter contra charitatem, & simul suo etiam modo contra justitiam adversùs DEUM, & Rempublicam: nihilominus in se ipsos non peccant contra justitiam ob mutuum pactum, tacitum saltèm, quo Cajus vult se exponere periculis damnorum, quæ ex tali certamine subsequuntur, ut Titius eisdem similiter periculis se exponat. Contrarium tuetur PEREGRINUS (d), etsi pactum fuisset expressè additum: nisi tamen factum fuerit post duellum, & læsionem. At ego

(a) R. J. 27. in 6. (b) L. 3. p. 2. n. 30j. (c) Tract. 3. disp. 82. de Jur. & Just. (d) De duell. c. 39.

ego non video, cur remittere sibi possint post duellum obligationem compensandi, & non etiam ante duellum. Namque pactum hac in re duplex sancitur: primò committendi duellum; secundò, non compensandi damnum. Pactum de duello nullius momenti est, utpote de re prohibita (a). At pactum alterum de se cur malum sit, & nullum? Contendit PEREGRINUS id probare *ex L. Oratio. ff. de Sponsal.* ubi, cùm Senatoribus certæ nuptiæ fuerint interdictæ, declaratur, id etiam intelligendum esse de Sponsalibus, adeoque, ait, eadem est ratio finis, & eorum, quæ tendunt ad finem. At nego, quòd pactum de remittenda compensatione sit *medium* ad duellum. Neque inter hæc duo pacta, est eadem similitudo, & ordo, qualis est inter sponsalia, & matrimonium. Cætera, quæ affert PEREGRINUS, non sunt magni ponderis. Unde sentio cum MOLINA in casu, quo propria utriusque sponte certamen committitur.

394. Q. II. An absque data causa provocatus, & invitè compars, teneatur refarcire damnum, provocanti illatum cum vulnere? " Circa hanc quæstionem, ait MOLINA, se non probare eorum sententiam, qui Titium ab obligatione compensandi damna vulnerato Cajo " absolvunt; cùm enim quis non *invasus*, sed *invitatus* in certamen descendit, non interficit licitè invitantem. Quare, sicut non est *medium " ticitum* ad honorem defendendum acceptare duellum, & eum interficere, qui ad illud invitavit: ita neque est *medium* ad id *justum*. Neque in hoc eventu potest excusari invitatus à restituendi onere ob pactum tacitum ex parte invitantis, quo condonare censetur damna, quæ in eo certamine acceperit; quoniam non censetur condonare, nisi ut vicissim ipse simili modo non teneatur restituere damna, si quæ in eo certamine dederit; quare cùm invitans restituere teneatur damna, si quæ in eo certamine dederit, consequens est, ut invitatus ex eo capite non excusetur à restitutione damnorum, quæ in eo certamine dederit. "

395. At non persuadet hæc ratio; nam quòd *injustum*, id est, *iniquum*, seu *malum* remedium servandi honorem sit acceptatio duelli, hoc non nego. An autem in eo sensu *injustum* sit, ut, veluti injuria stri-

(a) Cap. fin. de pact.

Et talis, obligationem compensandi post se trahat, hoc nego. Ex eo certè, quòd non sit licitum, non sequitur, quòd sit in hoc sensu injustum. Dein ego provocatum non excuso à restituendi onere ob pactionem illam tacitam: sed mea ratio hæc est; quòd provocans, eo ipso dum alterum ad duellum proleat, potestatem alteri faciat vitæ sibi eripiendæ, si possit: hac facta potestate, quæ potestas utique in ratione duelli continetur, non facit injuriam provocatus provocanti, si eum lædat, vel etiam occidat: ergo ex inflicto vulnere, vel nece oriri non potest obligatio compensandi. Neque dicas, hominem non posse talem potestatem alteri contra se dare; cùm non sit dominus vitæ, & membrorum. Ajo, dare ei potestatem in jus administrationis, vel usumfructum, quem habet (*vid. N. 386.*) quamvis dominium non habeat. Provocatus ergo, tollens vitam provocantis, injuriam Deo, Domino vitæ, infert, qui tamen talem restitutionem non imponit: tollendo autem administrationem, vel usumfructum non infert provocanti injuriam, utpote qui suo jure cessisse censendus est, dum ad duellum provocato aliquam necessitatem id acceptandi imposuit, non sine molestia evitandam. Concordant hæc cum iis, quæ MOLINA docet alibi (a). Neque urgeas, dicāsque, provocantem jure administrationis non cessisse, nisi iterum ealge, & pacto tacito, ut etiam provocatus cedat: si ergo provocatus dicatur non cessisse, etiam provocans non cessisse, adeoque injuriam pati censendus est à provocato lædente; hoc, inquam, ne dicas; falsum enim videtur. Quæso, ex quo fundamento provocans persuadeat sibi, provocatum, invitum ad pugnam pertractum, tacitè in id consentire, qui interrogatus certè id esset negaturus? si ergo nihilominus urget pugnam provocans, *ultra*, & *simpliciter* renunciâsse juri suo censendus est. Et profectò (verba LUGONIS (b) sunt) videtur repugnare in terminis, quòd, dum provocas, & compellis ad pugnam, adhuc velis jus retinere ad recuperanda damna, si qua patiaris. Tandem etiam MOLINA (c) aliquam viam excogitavit excusandi provocatum à compensatione, quam ventilare pluribùs supervacaneum duco. Quare provocatum malim ab ob-

liga-

---

(a) Traët. 3. disp. 7. (b) De Just. disp. 11. n. 69. (c) L. cit. disp. 82.

ligatione restitutionis absolvere ex ratione mea, quam probat etiam PIGNATELLUS (a), & SALON (b). Videre etiam proderit LA CROIX (c).

396. Q. III. An provocatus non teneatur ad damnum refarciendum, etiam tunc, ubi præcedente injuria provocationem causavit? R. Pariter non teneri; namque præcedens illa injuria, consistens in verbis contumeliosis, non potuit (& fors nulla alia) jus dare Cajo ad provocandum Titium. Sic docet TAMBURINUS (d). " Si Titius dat causam rixæ, per sola contumeliosa verba, & potest occidatur à Cajo, Cajum teneri, ad restitutionem pro damnis; quia verbum contumeliosum non potuit jus dare ad occidendum; Ergo, & ego ajo: verba contumeliosa, prolata in casu nostro à Titio, non potuere jus facere Cajo ad provocandum: ergo neque dederunt ei jus ad exigendam compensationem damni, quod ad eam provocationem sequitur: ergo etiam hic non potest Titius condemnari ad restitutionem ob præmissa contumeliosa verba saltem in foro conscientiae. Aliud pro foro externo potest statuere, & injungere iudex, ut scilicet per ejusmodi pœnam tanto magis absterreantur viri militares, & nobiles etiam ab acceptando duello.

397. Q. IV. Quousque se extendat obligatio compensandi damna? Hac in re discrimen facere oportet, & aliud statuere, ubi *provocans* damnum patitur: aliud ubi *provocatus*. In casu nostro absolvimus *provocatum* Titium, qui nihil debeat Cajo, fortè superviventi malè affecto corpore, quo ineptus ad obeundum posthac officium egere incipiat, vel etiam morienti cum magno damno suorum. Si quæras, an Titius non saltem aliquid debeat uxori, liberis, ac creditoribus, qui ex mutilatione, aut nece Caji damnum rerum suarum patiuntur? Respondeo, quòd nihil debeat, & sic argumentor cum LUGONE. Si absque vi, & fraude patri Cajo confuleret Titius, ut semet occideret, vel non daret filiis alimenta, peccaret Titius; non contra iustitiam, sed peccato scandali contra charitatem, & contra illam etiam virtutem, contra quam peccaret pater ea omnia faciendo; quia cooperaretur ad peccatum patris, ac inde, & non aliunde sumeret

(a) Tom. 9. Consultat. 88. n. 21. 22. (b) In 2. 2. D. Th. q. 62. art. 2. Contr. 11. (c) L. 3. p. 2. n. 305. (d) De Just. disp. 11. n. 71.

ret malitiam ejus consilium, & cooperatio. Similiter autem se habet, qui occidit patrem volentem, vel saltem dantem facultatem occidendi; nam licet respectu patris peccet peccato homicidii, quatenus privata auctoritate occidit sine necessitate defensionis; in ordine tamen ad uxorem, & filios peccat solum, quatenus cooperatur ipsi patri, qui non obstante debito ipsos alendi, vult occidi cum eorum damno, quod peccatum, cum in patre non sit contra justitiam, sic nec in cooperante, & occidente est contra justitiam: sed contra illam virtutem, qua pater tenebatur ad procuranda alimenta. Ideo communiter provocatus, occidens provocantem, non est obligandus ad restitutionem pro damnis. Ita dictus Purpuratus.

398. At si provocans Cajus ita vicisset, & læssisset Titium, tunc, sicut ille huic obligatur compensare damna, ut ad primum diximus: sic, an etiam ad alios damnum passos, & quousque hæc obligatio se extendat, discutiendum est. Decisio petenda est ex generali doctrina de restitutione facienda ab occidentibus, vel mutilantibus, quam passim Theologi tractant. In compendio ajo, quamvis pro vita & membris restitui propriè nil debeat; cum sint bona superioris ordinis, ad quem pertingere pecunia nequit, ut docet probabilior sententia, tamen in conscientia exoritur obligatio restituendi pro damnis, quæ bonis fortunæ occiso, vel vulnus intulit. Unde refarciri debent impensæ factæ in medicamenta: item cum officio fungi mutilatus posthac nequeat, ex quo vixerat, ita ei succurrendum, ut vivat decenter, quin egeat.

Quod attinet hæredes, & agnatos, rectè dicunt SANCHEZ, & TAMBURINUS, expensas pro curando vulnerato, qui postea moritur: item alia ipsi ante mortem debita, restitui debere *hæredibus*; quia hi succedunt in jura defuncti: aut si nullus sit hæres, dandum esse pauperibus. Unde Edictum Colonienſe novissimum adstruit actionem *tanquam ad hæredes ob interesse transitoriam*. Uxori, si post maritum occisum æquè commodè nupsit, vel possit nubere, nil opus est restituere; tum quia reipsa non fuit damnificata: tum etiam quia occisor ideo teneretur, eo quodd succedat in obligationem mariti, qui eam debuisset alere: maritus autem non tenetur alere, si aliunde ei esset provisum: ergo. De filiis quantum eis occisor debeat, & quot eorum, & quamdiu debeat alere, legi potest



potest in BEJA (a). Cæteris agnatis, ut *fratribus*, & *sororibus*, dicunt Doctores communiùs, nihil esse restituendum, eo quòd censeantur velut extranei, & per accidens pariantur damnum, nisi fortè per sententiam judicis occisus eos tenebatur alere (b).

399. Peculiaris difficultas est de *creditoribus*, qui in præsentì casu ex stipendio menstruo Caji tertiam sibi partem vendicabant. Olim passim docebatur, tunc homicidam creditoribus obligari, si animo his nocendi occidit: secùs non. Communem hanc suo ævo sententiam dicit MOLINA (c). Sed contrà bene arguit PEREGRINUS (d), nihil referre, an animum nocendi creditoribus habuerit, vel non; quia danti operam rei illicitæ, & quidem illicitæ ex præcepto justitiæ, imputantur omnia, quæ inde sequuntur damna. Intentio inferendi damnum necessitatem restituendi non inducit; justum enim, & injustum non in bonitate, aut pravitate animorum consistit: sed in æqualitate, & inæqualitate, ob quas restitutione utimur. Etiam animus non erat homicidæ nocere uxori, & liberis: restituere his debet tamen; sufficit nempe, quòd prævidere potuerit, aliqua damna consequi posse actionem suam malam. Neque placet illa altera ratio, quam contra creditores afferunt: hos scilicet jus acquirere ea lege, ut maneat pendens à periculis vitæ, & bonorum debitoris: ergo creditores debere ferre damnum, veluti casu fortuito datum; nego enim, bene comparari delictum deliberatum homicidæ cum casu fortuito. Perpensis omnibus utramque sententiam probabilem censent LAYMANN, & BUSENBAUM (e).

Placet consilium MOLINÆ (f) dicentis, has, similésque restitutiones meliùs definiri, & ad effectum perducì facta transactione, & compositione cum iis, quorum interest, qui ut plurimùm solent partem aliquam remittere, cùsque hac in re utilem Confessarii operam, qui de consensu homicidæ consentientis, aut consilium petentis eos alloquitur, quibus restitutio faciendà foret, à quibus vel obtinet partem, vel saltem securitatem conscientiæ in arbitrando, seu definiendo, quod justum est.

---

(a) P. 1. Caf. 43. (b) Vid. *la Croix* L. 3. P. 2. n. 309. 310. (c) *Traët.* 3. disp. 83. n. 8. (d) *De duell.* q. 40. (e) *De restitut. faciend. ab homicid.* (f) *Loc. cit.* n. 10.

400. Q. V. An data à moriente venia non extinguat obligationem compensandi damna? Notandum, *veniam dare, reconciliari, injuriam remittere* &c., variam posse habere significationem. Primò, quòd quis rancorem deponat ex animo, & charitate iterum Christiana amplecti inimicum incipiat, id quod necessarium est volenti salutem consequi. Secundò possumus remittere injuriam ita, ut nullam propterea actionem, neque civilem, neque criminalem intentare velimus lædenti. Et hæc remissio diversa est à priore, neque jure continetur in illa; quoniam rancor, & appetitus vindictæ illicitus diversum quid est à jure, quod læsus habet ad petendam à ministris publicis justam vindictam in commune, ac proprium suum bonum, estque actus virtutis, scilicet justitiæ vindicativæ, modò aliunde non inficiatur. Itaque remanere actio injuriarum potest post dignè susceptum Sacramentum Pœnitentiæ, eaque, ubi per leges patrias licet, hæredibus committi. Quòd si tamen dicat morituriens, se *ex animo dare veniam*, censetur non solum deposuisse rancorem: verum etiam actioni injuriarum renuntiassè, ut probat MOLINA (a). Atque ut ita faciat, suadendum est pœniteni, ne quis aculeus rancoris taciti hæreat. Qua remissione non obstante nihilominus potestas publica armare se debet ad id delictum puniendum, quantum commune bonum postulaverit. Facta utraque hac remissione superest tertio remissio pro illato damno in bonis externis. Ratio est; quia actio ad compensationem damnorum est merè civilis, & distincta ab actione ad pœnam.

401. Nunc ergo quæritur, an obligationem, quam occidens contraxit ad compensanda damna, remittere moriens valeat. Et quidem si sermo sit de damnis, ipsi vulnerato causatis ob expensas, factas in morbum, aut lucrum eo tempore amissum &c. satis patet, remittendi potestatem penes eum esse, modò hæc remissio legitimam filiis illæsam relinquat. Rarè tamen damna, ante mortem adhuc incubitura bonis patrisfamilias, tanta erunt, ut liberis graviter accendant legitimam. Si tamen ex hac remissione aliquid de solutione creditoribus decederet, non videtur salva conscientia concedi. Difficultas ergo potissima est circa damna, quæ

UXO-

---

(a) De just. tract. 3. disp. 42. n. 3.

*Art. II. Declaratur obligatio respondens Legi Divinae. §. II. 259*

uxori, liberis, creditoribus, & similibus personis erunt ferenda post mortem patrisfamilias, ad quorum compensationem quando, & quousque homicida teneatur, suprà explicatum est. Docent aliqui, facta hac remissione ex voluntate morientis ultrà ad nihil teneri homicidam. Ita SALON, SANCHEZ cum- & apud MOLINAM (a). Sed præstat cum LUGONE (b) dicere, patrem non posse aut validè, aut licitè eam remissionem facere; nam si res attentè consideretur, datur in hoc negotio duplex injuria: una inferitur patri, cui vita aufertur; altera uxori, ac liberis, quibus hac morte auferuntur alimenta &c. Ex hac secunda, non ex prima injuria oritur filiis, ac uxori jus ad compensationem, exigendam ab homicida: quod jus cum nullo modo pertineat ad patrem, ejus etiam dispositioni non subiacet. Unde inutilis est disputatio de summa, quam remittere possit pater, & de ea, quam relinquere deberet filiis juxta leges patrias; attendendum hic solummodo ad damnum, quod patiuntur filii; hi enim jus habent, ne status eorum reddatur deterior per mortem patris. Quanto ergo cum deteriore reddit interfector, tanto plus contribuere debet ad reparandum damnum, quin huic juri liberorum renunciare possit parens. Idem de uxore, ac creditoribus dicendum.

Nolim esse longior in discutiendis ejusmodi obligationibus, utpote quæ dependent ex principiis generalibus de restitutione ob homicidium facienda, quæ materia abunde ab aliis ventilata legitur passim.

(a) Disp. 85. tract. 3. (b) De Jur. disp. 11. n. 63.



## CAPUT VIII.

### QUOMODO DUELLUM PROHIBEA- TUR LEGE ECCLESIASTICA.

**I**N Statu Civitatis bene ordinatæ progredi volentibus, de Legibus quoque Ecclesiasticis agendum est. Quæ licet etiam in Statu Civitatis malè ordinatæ, non desinant prohibere duellum: vim tamen obligandi *in actu secundo* non exerunt, quando ipsa lex Divina in quibusdam casibus duellum permittit. Mirum nemini videbitur, quòd idem crimen, lege Divina jam prohibitum, non rarò etiam interdicatur Ecclesiastica lege, sicut & Civili. At illud breviter notare expediet, qua autoritate lex Ecclesiastica contra duellum lata fuerit. Qua de re id extra dubium est, potestatem quamdam præcipiendi, & puniendi à Christo Ecclesiæ relictam fuisse, ut veterum aequè, ac recentiorum testimoniis abunde comprobatur. Et quamvis in eo Catholici à Protestantibus dissideamus, quomodo ad Ecclesiæ Rectorem ea potestas devenerit; an scilicet per Ecclesiam, seu per *Collegium* profitentium eundem DEI cultum (ut vocat (a) PFAFFIUS) transcribentem Rectori id, quod à Christo potestatis accepit: vel an à Christo rectè ad Apostolos, & eorum Successores, utpote quibus solis claves contulisse legitur: Item an ille Rector, penes quem Ecclesiastica potestas resideat, Princeps sit, idem Religionis, qui Regionis Caput: vel an Pontifex cum Episcopis, hi Ecclesiæ quisque suæ particularis, ille Pastor universæ: in his, inquam, quamvis Catholici à Protestantibus dissideamus, convenimus tamen in eo, quòd in Ecclesia resideat potestas ferendi leges, tum temporibus, tum populorum moribus congruas, quas violare nefas sit, & dignum castigari etiam *excommunicatione*, de qua plura *Art. II.* Ne verò existiment Monomachi, severiùs secum agere Ecclesiam, legant Edicta Principum etiam Protestantium, in quibus duellum atris coloribus non so-  
lùm

(a) De Orig. Jur. Eccl. Edit. Tubing. ann. 1719.

lūm depingunt, & impedire conantur (a); sed & severissimas in id pœnas decernere non dubitant (b): ægrè non ferent, Ecclesiam Catholicam pro salute suorum sollicitam, toto potestatis suæ pondere incumbere ad opprimendam duellorum licentiam. Nos in præsentī *Articulo I.* declarabimus leges Ecclesiasticas duellum prohibentes. *II.* Pœnas in duellum statutas. *III.* Impedimentum, quod duellum asserre possit usui Sacramentorum.

## ARTICULUS I.

### *Declarantur Leges Ecclesiasticæ Duellum prohibentes.*

**L**eges, Decreta, & Constitutiones primo loco afferemus: tum exponemus, quæ actiones in iis prohibeantur: ac dein, quæ personæ illis comprehendantur.

#### §. I.

#### Recensentur Leges, Decreta, Constitutiones &c.

402. *Canones, ac Constitutiones antiquiores.*  
403. *Decretum Concilii Tridentini.*

404. *Constitutio Gregorii XIII.*  
405. *Constitutio Clementis VIII.*

402. **D**uellum prohibitum pridem fuit Jure Canonico antiquiore, ut patet ex *can. Monomachiam. canf. 2. q. 5.* Item ex *cap. 2. de Cler. pugn. in Duel.* ubi cum Presbyter pugilem sibi substituisset, qui deficientibus testibus, pugnando convinceret laicum, quem super furto civiliter convenerat Presbyter, CÆLESTINUS III. hunc prohibuit in sacris ultra ministrare, eo quod laicus suo mandato fuisset occisus. Item ex *cap. 1. & 2. de Torneam.* in quorum priore dixit Pontifex ALEXANDER III. in Concilio Lateranensi: *Felicitis memoria, Innocentii, & Eugenii prædecessorum nostrorum vestigiis inhaerentes, detestabiles illas mundanas, vel serias, quas vulgò Torneamenta vocant, in quibus milites ex conditō convenire solent, & ad ostentationem virium suarum, & audacia temere congrēdi, unde mortes hominum, & ani-*

Pp 3

MARUM

(a) Vid. Cap. II. (b) Vid. Cap. IX.

*marum pericula saepe proveniunt, fieri prohibemus. Quodsi quis ibidem mortuus fuerit, quamvis ei poscenti pœnitentia non negetur, Ecclesiastica tamen careat sepultura.* Secutæ sunt Constitutiones variorum Pontificum, expressè contra duellum conceptæ, qualis est illa JUVENII II. an. 1508. LEONIS X. an. 1519. PII IV. an. 1560.

403. Accedit Decretum Concilii Tridentini, ita contra monomachiam statuens (a): “ Detestabilis duellorum usus fabricante diabolo introductus, ut cruenta corporum morte animarum etiam perniciem lucretur, ex Christiano orbe penitus exterminetur. Imperator, Reges, Duces, Principes, Marchiones, Comites, & quocunque alio nomine Domini temporales, qui locum ad monomachiam in terris suis inter Christianos concesserint, eo ipso sint excommunicati, ac jurisdictione, & dominio civitatis, castri, aut loci, in quo, vel apud quem duellum fieri permiserint, quod ab Ecclesia obtinent, privati intelligantur, & si feudalialia sint, directis Dominis statim acquirantur. ”

“ Qui verò pugnam commiserint, & qui eorum patrini vocantur, excommunicationis, ac omnium bonorum suorum proscriptionis, ac perpetuæ infamiæ pœnam incurrant, & ut homicidæ juxta sacros Canones puniri debeant: & si in ipso conflictu decesserint, perpetuò careant Ecclesiastica sepultura. ”

“ Illi etiam, qui consilium in causa duelli tam in jure, quam factò dederint, aut alia quacunque ratione ad id quemquam suaserint: nec non spectatores excommunicationis, ac perpetuæ maledictionis vinculo teneantur. Non obstante quocunque privilegio, seu prava consuetudine etiam immemorabili. ”

404. Hactenus non nisi duella judicialia prohibita fuisse, videri poterat, atque publica, seu solemnia. Sed tandem, ne effugio locus esset, GREGORIUS XIII. an. 1582. edita Constitutione Tridentini Decretum extendit etiam ad Duellum privatum. Ita habet: Ad tollendum detestabilem duellorum usum Concilium Trid. excommunicationem, & alias pœnas gravissimas in concedentes locum ad monomachiam, ac pariter in pugnantes, nec

non

non patrínos, consúlentes, suadentes, & spectatores salubriter quidem decrevit: sed crescente hominum malitia facinorosi non desunt, qui, quod publicè prohibitum est, privatim exequi non dubitent, dum se pœnas prædictas hoc modo eludere posse arbitrantur. Nos ad hæc coërcende plenius, evidentiusque providendum esse rati, considerantésque duellum privatum non minùs cruentum, & animæ, & corpori noxium esse, quàm quod publicè perpetratur, Authoritate Apostolica statuimus omnes illos, qui ex condicío, statuto tempore, & in loco convento monomachiam commiserint, etiãsi nulli patrini, sociive ad id vocati fuerint, nec loci securitas habita, nullave provocatoriæ literæ, aut denuntiationis chartulæ præcefferint, censuris, & pœnis omnibus à dicto Concilio propositis teneri, perinde ac si publico, & consueto abusu singulare certamen inivissent.

Volentes etiam locorum Dominos, si certamen ex condicío hujusmodi permiserint, aut quantum in se fuerit, non prohibuerint, omnesque illud fieri mandantes, instigantes, auxilium, consilium, vel favorem dantes, equos, arma, pecuniam, commeatum, & alia subsidia scienter subministrantes, aut ex composito spectatores, vel socios quovis modo sese præbentes eisdem censuris, & pœnis subjacere; etiãsi illi, qui ad locum destinatum pugnaturi accesserunt, impediti pugnam non commiserunt, si per ipsos non steterit, quo minùs illa committatur.

Non obstantibus privilegiis, immunitatibus, exemptionibus, cæterisque contrariis quibuscunque: Constitutionibus tamen, & aliis Sanctionibus Apostolicis hac de re disponentibus in suo robore duraturis. Datum Romæ apud S. Petrum Anno Incarnat. Dominicæ 1582. Non. Decembr. Pontificatus Nostri Anno undecimo.

405. Denique coronidem addidit Constitutio CLEMENTIS VIII. an. 1592. qua nulla explicatio, ac clarior. Cùmque hæc jus novissimum in hac materia constituat, judicavi, eam hoc loco integram esse reponendam. Ita habet:

*CLEMENS Episcopus Servus Servorum DEI,  
ad perpetuam rei memoriam.*

I. Illius vices, licet immeriti, gerentes, qui ut animas suorum fidelium à peccato, & diaboli laqueis liberaret; è cælo descendens, humana

mana carne assumpta, ne proprio quidem suo pretiosissimo sanguini pepercit, sed se ipsum in Ara Crucis immaculatam hostiam æterno Patri offerre voluit; in hanc præcipuè curam summo studio incumbimus, ut easdem animas inæstimabili pretio redemptas, adversus sathanæ fraudes, quantum in nobis est, illas præservemus; præsertim verò totis viribus nobis à Domino traditis exterminemus exitialia quædam, atque enormia peccata, quibus Divina Majestas gravius offenditur, quæque eodem fabricante humani generis hoste inventa, atque introducta sunt, ut ex cruenta corporum morte, animarum etiam simul interitus ac perniciēs sequatur.

II. Rectè siquidem, & salubriter fel. record. Pius Papa iv. Prædecessor noster post alios complures suos, nostrósque Prædecessores, qui detestandum Divina, naturalisque lege, ac sacris Canonibus damnatum duellorum abusum suis etiam Constitutionibus severè prohibuerunt, gravesque pœnas contra quoscunque temporali ditioni S. R. E. mediare, vel immediate subiectos, ejus criminis quomodolibet reos, vel participes inflixerant, cupiens non solum in terris prædictis, sed aliis ubilibet, animarum periculis obviare, Principes, ac Domicellos permittentes in suis dominiis id patrari, ac etiam extra terras, & loca ditioni Ecclesiasticæ subiecta, hujusmodi duella, seu singularia certamina, aut dissidationes desuper facientes, ac ad id invitantes, provocantes, auxilium, consilium, vel favorem dantes, illisque astantes, & interesse, nec non chartas desuper subscribentes, aut publicantes, seu de illis se intromittentes, singulos, Imperatore, ac Regibus inferiores, majoris excommunicationis, ac (si Ecclesiastici fuerint) ultra eam etiam privationis omnium dignitatum, beneficiorum, & officiorum Ecclesiasticorum, inhabilitatisque ad illa, & alia imposterum obtinenda, pœnis subiacere, easque incurrere voluit, à quibus non nisi à Romano Pontifice absolvi possit.

III. Sed & postmodum Generalis Tridentina Synodus ad exterminandum penitus ex Christiano Orbe hoc malum statuit, ut Imperator, Reges, Duces, Principes, Marchiones, Comites, & quocunque alio nomine Domini temporales, qui locum ad monomachiam in terris suis inter Christianos concesserint, eo ipso sint excommunicati, ac jurisdictione, & dominio civitatis, castri, aut loci, in quo, vel ad quem duellum fieri per-



permiserint, quod ab Ecclesia obtinent, privati intelligantur, & si feudalia sint, directis dominis statim acquirantur. Qui verò pugnam commiserint, & qui eorum patrini vocantur, excommunicationis, ac omnium bonorum suorum proscriptionis, ac perpetuæ infamiæ pœnam incurrant, & ut homicidæ juxta sacros Canones puniri debeant: & si in ipso conflictu decesserint, perpetuò careant Ecclesiastica sepultura. Illi etiam, qui consilium in causa duelli tam in jure, quàm facto dederint, aut alia quacunque ratione ad id, quemquam suaserint, nec non spectatores, excommunicationis, & perpetuæ maledictionis vinculo teneantur.

IV. Quas pœnas novissimè piæ memor. GREGORIUS Papa XIII. praeceperit Prædecessor noster extendit adversus illos etiam omnes, qui non publicè, sed privatim ex conducto, statuto tempore, & in loco convento monomachiam commississent, etiam patrinis, sociisque non vocatis, & loci securitate non habita, & provocatoriis literis minimè præcedentibus, etiam contra locorum dominos, si id (quantum in se fuerit) non prohibuissent, cæterosque supra dictos criminis socios, & ex composito spectatores, etiam si pugnam ob aliquod impedimentum non commississent, si ad locum accessissent pugnaturi, & per eos non sterisset, quominus pugnarent.

V. Verùm quia cum magna animi nostri molestia intelleximus, adhuc in quibusdam, præsertim transalpinis, ac remotis regionibus, & potissimum ubi bella vigent, castrensi quadam, & militari licentia, seu veriùs audacia, perniciosum hoc scelus inter fideles exerceri, quasi fas sit in solo hostili, ubi Christiani nominis, seu Catholicæ fidei hostes tyrannidem exercent, sive hæreses, & schismata impunè grassantur, sive inter signa, & castra militaria in caput suorum fratrum impios convertere mucrones, quos multo salubriùs contra Christi adversarios stringi par esset.

VI. Nos nefaria diaboli arma salutari Ecclesiæ gladiò ad continendos in officio fideles nobis præcipuè ipsius Domini auctoritate tradito rerundere, atque à cervicibus gregis Domini nostræ curæ crediti, quantum (eodem Deo Adjutore) eniti possumus, propulsare cupientes, prædictas omnes Constitutiones, ac Decretum Concilii Trident. cum omnibus, & singulis in eis contentis censuris, & pœnis decretis, extensionibus, qua-

rum, & quorum omnium tenores præsentibus habere volumus pro expressis, & ad verbum insertis, autoritate Apostolica tenore præsentium perpetuè approbamus, confirmamus, & innovamus.

VII. Ac insuper autoritate, & tenore præmissis decernimus, & declaramus, easdem Constitutiones, ac Decretum locum habere ubique gentium, & terrarum, inter quascunque personas, etiam armatas, & in castris, seu propugnaculis militantes, etiam ubi nostrorum, & S. R. E. aut Catholicæ fidei hostium furor impunè grassatur, vel in dominiis per eos occupatis, & detentis.

VIII. Idem quoque juris censendum esse, si publico, & forsan iusto bello indicto miles aliquis contra alterum in adversariorum exercitu militantem, sive aliàs in hostium castris, præsidiis, aut terris degentem, privatas similtates, atque inimicitias publicæ causæ intermiscendo, etiam Ducum permisso ex condicto ad singulare certamen descendat, aut illum provocet.

IX. Nec non iisdem pœnis, Decreto, & Constitutionibus teneri eos, inter quos pactiones initæ sint, de dirimendo certamine, cum primùm alteruter vulneratus fuerit, seu sanguinem effuderit, aut certus ictuum numerus utrinque illatus fuerit, vel si convenerint, ut non singuli cum singulis, sed bini, terni, aut plures hinc inde pugnent.

X. Et non solum locorum Dominos, sed etiam Magistratus, Præsides, Locum-tenentes, aut etiam militum Duces, & Capitaneos in castris, vel extra ea, in alieno, vel hostili solo, vel cum militibus exercitiis adversariorum monomachiam, in quocunque casu per præsentem, vel alias Constitutiones huiusmodi prohibito, permittentes: vel quantum in ipsis est, non prohibentes, aut post admissum crimen veniam, & impunitatem concedentes.

XI. Præterea pari ratione prohibemus omnia, & singula ejus generis scripta, Manifesta, seu fides vulgò appellata, quæ etiam sine expressa provocatione ad certamen, tamen quasi præparatoria quædam ad chartulas, seu libellos provocatorios, & ad duellum, illorumque veluti radices, aut semina, ut plurimum lacessendi aliquem ad pugnam, & suscitandæ similtatis, atque inimicitie materiam, & occasionem præbent. Dum scilicet in illis per modum epistolæ, libelli, aut publicæ attestationis,

&

& intimationis, sive per authentica documenta, sive per unius, pluriumve chirographum, subscriptiones, aut relationes sub prætenu proprii, vel alieni honoris, & famæ more militari, atque ut vulgò dicitur, cavalleresco, tuendi, aut lædendi, sive ad illatæ, propulsatæve contumeliæ, aut injuriæ probationem, seu tollendam illius suspensionem rei alicujus gestæ ad id pertinentis, vel verborum, aut responsionum series, & ordo narratur.

XII. Vel ex simili abusu hac de causa aliquid tale aded firmiter asseritur, aut negatur, ut qui contradixerit, is, sive nominatim, sive in genere mendacii arguatur, aut mentiri dicatur.

XIII. Aut ad hunc effectum ex militari etiam consuetudine queritur, declaratur, aut responderetur, qua mente, aut quo sensu quippiam ejusmodi, quod ad superius expressa spectet, gestum, dictumve sit.

XIV. Vel denique offert se quispiam contra certam, vel incertam personam, vel generatim contra quemcunque ad probandum armis, & verificandum etiam inito certamine aliquid ita esse, aut fuisse, vel non fuisse.

XV. Nec non quascunque etiam sine scripto factas talium rerum supradicta quoquo modo concernentium, & ob hujusmodi causas in locis publicis, vel privatis, ubi hominum multitudo convenire soleat, denuntiationes, narrationes, declarationes, & testificationes.

XVI. Volentes, eos omnes, & singulos, qui suo, vel alieno nomine ad effectum, de quo superius dictum est, prædicta, vel his similia, multoque magis ad certandum provocatoria scripta, libellos, epistolas, earumve exempla dictaverint, composuerint, scripserint, miserint, detulerint, divulgaverint, affixerint, exemplaverint, typis imprefferint, subscripserint, intimaverint, vel etiam verbo denunciaverint, sive attestati fuerint.

XVII. Quive aliis ad singulare certamen publicè, vel occultè ineundum, vel ad provocandum aliquem ad pugnam, sive ad hujus generis scripta, quæ Manifesta, quæque chartulæ provocatoriæ appellantur, scribenda, dictanda, mittenda, deferenda, divulganda, auxilium, consilium, operam, vel favorem præstiterint, sive id suaserint, aut mandaverint, quive in præmissis, vel eorum aliquo se quomodolibet immiscuerint, etiam si neque pugna aliqua, nec certamen, aut effectus, nec accessus, aut actus ad pugnam proximus, neque expressa, & aperta provocatio subsecuta

fuerit, neque scriptiones prædictæ, quæ Manifesta dicuntur, in publicum prodierint, aut cuiquam intimatæ extiterint, si per eos non steterit, quo minùs publicatio, aut denunciatio fieret, nihilominus censuris, & pœnis omnibus in præsentì, & aliis prædictis Constitutionibus, & Decreto contentis subiacere, tam si superiùs enumeratis, quàm si aliis etiam maioribus Ecclesiasticis, vel mundanis dignitatibus, gradibus, & præeminentiiis excellant.

XVIII. Quinimo de novo etiam per præsentès ex parte Omnipotentis DEI Patris, & Filii, & Spiritus Sancti excommunicamus, & anathematizamus, maledicimus, & execramur omnes, & quoscunque publicè, vel privatim, palam, vel occultè, in quibuscunque locis, modis, & formis, ac casibus sub præsentì nostra, vel aliis prædictis Constitutionibus, ac Decreto comprehensis, singulare certamen (quod duellum vulgò dicitur) ex composito ineuntes, nec non id scelus suadentes, aut provocantes, opem, consilium, vel favorem præstantes, equos, arma, & com meatus præbentes, aut comitantes; vel circa chartulas, seu libellos, literas, nuncios, aut quæcunque alia scripta hujusmodi quomodolibet peccantes, hujusque delicti socios, de industria spectatores, patrilinos, fautores, defensores, quacunque tam superiùs expressa, quàm alia Ecclesiastica, vel mundana præfulgeant dignitate, ita ut singulares etiam personæ ejuslibet Communitatis, Universitatis, Collegii, aut Reipublicæ, quæ hujus criminis participes quoquo modo fuerint, nequaquam excusentur, & supradictos omnes, eorùmq; singulos ipso facto absque ulla monitione, judicis decreto, aut ministerio perpetui anathematis, excommunicationis majoris; & maledictionis æternæ mucrone percussos, & damnatos harum serie declaramus, & si in ipso conflictu obierint, sepultura Ecclesiastica perpetuò privatos esse volumus.

XIX. Ipsas verò Civitates, terras, oppida, vel castra, & loca, in quorum territoriis id facinus scientibus, & tacitè, vel expressè permittentibus, aut tolerantibus Dominis, aut Magistratibus, vel Senatu, aut populo admissum fuerit, Ecclesiastico supponimus interdicto; cujus interdicti relaxationem, aut excommunicationis absolutionem ab alio, quàm à Nobis, aut pro tempore existente Romano Pontifice, penitentiâ, & satisfactione congruè peracta, nisi in mortis articulo constituti, nequeant obtinere, etiam

etiam prætextu quarumvis facultatum, & indultorum, quibusvis personis tam Ecclesiasticis cujuscunque Ordinis, aut militiæ, status, gradus, aut conditionis existentibus, quàm laicis, etiam Imperiali, Regali, vel alia mundana præeminentia insignitis per Sedem Apostolicam in genere, vel in specie concessorum. Quæ omnia quoad præmissa nolumus cuiquam in aliquo suffragari. Pœnis aliis tam spiritualibus, quàm temporalibus contra eos inflictis nihilominus in suo robore permanfuris.

XX. Universos autem, & singulos charissimos in Christo Filios Nostros, Imperatorem, Reges, ac dilectos Filios, nobiles Viros, Duces etiam armorum, & exercituum, Marchiones, cæterosque Principes Christianos, nec non Dominia, Potentatus, Communitates, & Universitates, civitatum, oppidorum, & castrorum, illorúmque Domicellos, & Dominos temporales, ac etiam militum, & copiarum tam equestrium, quàm pedestrium Duces, Tribunos, Præfectos, Capitaneos, in quibuscunque etiam Nobis, & S. R. E. temporali jurisdictioni non subiectis locis constitutos, cujuscunque gradus, præeminentiae, & nobilitatis existentes, hortamur, rogamus, & obtestamur per viscera D. N. Jesu Christi, ut ejus Divini Nominis intuitu pro sua erga eundem DEUM, per quem regnant Reges, & à quo principatus acceperunt, pietate, atque erga Nos, & sanctam hanc Sedem reverentia, & devotione, non modò nihil tale in suis dominiis fieri permittant, nec ullo modo conniveant: sed hoc malum omni studio, diligentia, & auctoritate exterminare totis viribus procurent, contra quoscunque delinquentes, & (ut præfertur) quomodolibet complices, & participes etiam temporalibus pœnis gravissimis animadvertant, & per suos Officiales, & Curiae Ministros procedi curent, scituri se obsequium DEO pergratum, pèrque acceptum præstituros, si quo gladio ad tutelam bonorum, & ad propulsandos perditorum conatus sunt accincti, eundem ad vindictam hujus peccati, & ad sumendas de hujusmodi criminis reis debitas pœnas exercuerint: contra verò memores, si in re tam gravi malè se gesserint, se in districto DEI judicio rationem in novissimo die reddituros. Volumus autem, ut præsentium transumptis etiam impressis Notarii publici manu subscriptis, & personæ in dignitate Ecclesiastica constitutæ Sigillo obsignatis eadem prorsus fides ubique gentium, & locorum adhibeatur, quæ ipsis præsentibus adhiberetur exhibitis, vel ostensis: quòd-

que eadem præsentibus in Lateran. ac Principis Apostolorum de Urbe Basilicarum, & Cancellariæ Apostolicæ valvis de more publicentur, affixis inibi earum exemplis per aliquem ex cursoribus nostris, & dimissis; quòdque eadem publicatio, qui in urbe sunt, post triduum, qui verò extra eam, & citra montes, post duos menses: ultra montes verò post quatuor menses omnes, quos concernunt, perinde arêter, & afficiat, ac si eorum cuilibet personaliter intimatæ fuissent.

XXI. Nulli ergo omnino hominum liceat hanc paginam nostræ approbationis, confirmationis, innovationis, decretorum, declarationis, prohibitionis, excommunicationis, anathematizationis, maledictionis, excommunicationis, hortationis, rogationis, obtestationis, & voluntatis infringere, vel ei ausu temerario contraire. Si quis autem hoc attentare præsumperit, indignationem Omnipotentis DEI, ac Beatorum Petri, & Pauli Apostolorum se noverit incursum. Datum Romæ in Monte Quirinali Anno Incarnationis Dominicæ 1592. 16. Kalendas Septembr. Pontificatus Nostri anno primo.

## §. II.

## Quæ actiones prohibeantur in allatis legibus?

- |   |                                       |
|---|---------------------------------------|
| 406. Prohibentur in Constitutione Clementina actiones jam aliàs prohibita; & alia nova. | 408. Provocationes.                   |
| 407. Scilicet duellum, vario modo initum.   | 409. Declarationes,                   |
|   | 410. Et libelli,                      |
|   | 411. Etiam pro duello privato tantum. |

406. CUM Constitutio CLEMENTIS VIII. jus novissimum, ut dixi, hac in materia constituat, in eaque studiosè collectum fuerit, quidquid in præcedentibus Decretis, ac Constitutionibus continebatur, in hac exponenda potissimum laboramus. Itaque respondeo: in hac Constitutione primò prohiberi omnes illas actiones, quæ jam in præcedentibus Pontificum, aut Concilii Tridentini statutis fuere prohibitæ, juxta verba illa: *Prædictas omnes Constitutiones, ac Decretum Concilii Trident. cum omnibus suis, & singulis in eis contentis censuris, & pœnis decretis, extensionibus, quarum, & quorum omnium tenores præsentibus haberi volumus pro expressis, & ad verbum insertis, auctoritate Apostolica tenore præsentium perpetuò approbamus, confirmamus.*

*firmamus, & innovamus. vid. §. VI. Constit.* Secundò prohibentur eæ actiões, ad quas insuper CLEMENS VIII. hanc suam Constitutionem extendere voluit.

407. Itaque primò prohibetur duellum publicum, ac solemne, quod fieri solet cum securitate loci, literis provocatoris præmissis, cum patrinis &c. Et cum hoc etiam privatum, & non solemne. *vid. §. XVIII.* Item duellum in castris, aut propugnaculis inter personas militares, aut institutum in terris hæreticorum. *vid. §. VII.* Etiam si pactum additum fuerit de dirimendo certamine, cum primò alteruter vulneratus fuerit, sive sanguinem effuderit, aut certus ictuum numerus utrinque illatus. *vid. §. IX.* Omnia hæc prohibita sunt, non solum quando singuli cum singulis, sed etiam quando bini, aut terni, aut plures hinc inde pugnant. *vid. §. III.*

408. Secundò, prohibentur etiam provocaciones ad singulare certamen publicè, vel occultè ineundum. *vid. §. XVII.* De eo autem dubitarent nonnulli, an hic condemnentur provocaciones non expressæ, sed tacitæ, quarum exempla dedimus N. 24. *præsentis nostri tractatus*; credebant nempe ad incurrendas pœnas requiri delictum externum, nec intentionem sufficere. (a). At meo judicio provocatio ejusmodi quamvis tacita, sub involucrio verborum testæ, delictum externum est, æquè malum, ac sit provocatio expressa. Assentitur LUGO (b).

409. Tertiò, prohibentur narrationes, declarationes, testificationes, & similia in locis publicis, vel etiam privatis, ubi hominum multitudo convenire solet, sub prætextu tamen proprii, vel alieni honoris, & famæ more militari tuendæ, aut lædendæ, sive ad dilatare, propulsareve contumeliæ, aut injuriæ probationem, sive tollendam illius suspicionem. *vid. §§. XI. XV.* Huc pertinet, quando quis offert se contra certam, vel incertam personam, vel generatim contra quamcunque ad probandum armis, & verificandum etiam inito certamine, aliquid ita esse, vel fuisse, vel non fuisse. *vid. §. XIV.* Item quando tale aliquid aded firmiter asseritur, aut negatur, ut, qui contradixerit, is sive nominatim, sive in genere mendacii arguatur, aut mentiri dicatur. *vid. §. XII.* Item si ad hunc effectum,

ex

(a) La Croix l. 3. p. 1. n. 850. (b) Resp. mor. L. 2. D. L.

ex militari etiam consuetudine, quæritur, aut declaratur, aut respondetur, qua mente, aut quo sensu quidpiam ejusmodi gestum, dictumve sit. *vid. §. XIII.*

410. Quartò, cavetur, ne quis scribat libellos publicos (vulgò *Manifesta*) sub prætextu indicato *Numero* *precedente*, etiam sine expressa provocacione ad duellum; quia tamen sunt præparatoria quædam ad chartulas, sive libellos provocatorios, & quasi radices, ac semina ad pugnam. *vid. §. XI.*

Quæres, num ergo malum sit interrogare publicè, in quo sensu hoc, illudve de me dictum voluerit adversarius: vel mendacii arguere eum, quiscunque sit, qui de me falsum sparfit? Resp. mala hæc, & damnata sunt, si ita fiant, ut ex usu, & consuetudine tacitam vim provocandi habeant: & ita notetur ille, qui ea proclamatione petitur, ut salvo honore suo filere jam non possit. Unde hæc proclamatio fit etiam *præparatoria*, & veluti *radix* ad duellum, sicut de libellis dicitur.

411. Quintò, intelligenda hæc veniunt non tantùm de duello, vel præparatoriis ad duellum illud, quod veritatis indagandæ studio committitur, seu de duello judiciali. Equidem, si de antiquioribus prohibitionibus sermo sit, hoc credere videntur NICOLAUS DE LYRA (a), & MASCARDUS (b), ea ratione ducti, quòd *duellum* propriè dictum à longo antea tempore non nisi pro duello judiciali significando adhibitum fuerit: Decreta autem has pœnas dictantia, sint strictæ interpretationis. Sed de CLEMENSINA Constitutione simile quid dici non potest, cùm CLEMENS VIII. conqueratur de ingentibus damnis, pernicie animarum, & corporum, quam duella inferrent, meritò novis constitutionibus coërcenda: atqui ea tempestate duellum judiciale, aut veritatis indagandæ studiò institutum, quod ad divinationem referre solebant antiquiores Theologi, vix amplius in usu erat; pace enim publica introducta (id quod contigit anno MCCCCLXXXVI.) & Camera Imperiali instituta, desinebant sensim hæc cruenta judicia. Itaque CLEMENS VIII. integrâ pòst annorum centuriâ non censendus est voluisse nova fulmina cudere in duellum, cujus usus jam emori cæperat. *Finis autem*

---

(a) In 1. Reg. 17. (b) De probat. in procem. q. 4. n. 7.



autem debet ad ea potius aptari, quæ & frequenter, & faciliè, quàm quæ per-  
rare contingunt (a). Accedit, quòd Clementina speciatim condemnet mili-  
tem, qui in bello publico contra alterum adversi exercitus ob privatas ini-  
micitias ad singulare certamen descendit. Ergo non de solo duello judi-  
ciali, aut solemnì sermo est. Et hæc de actionibus in Clementina præcipuè  
prohibitis.

Quodnam autem discrimen intercedat inter actiones jam prohibi-  
tas ante Clementinam, & inter eas, quæ primùm per hanc damnatæ sunt,  
N. 453. docebimus. Discrimen scilicet datur in licentia ab iisdem absolven-  
di, ita ut hodie, saltem intra Italiam, ab aliquibus possint absolvere Privi-  
legiati, ab aliis non.

### §. III.

Quæ personæ in iis Legibus comprehendantur?

- |  |  |
|--|--|
| 412. Qui pugnat.                                     | 417. Consulescentes.                       |
| 413. Etiam pugna non secuta, pro-<br>vocans.         | 418. Fautores.                             |
| 414. Ac provocatus.                                  | 419. Sudentes.                             |
| 415. Præpositi permittentes, vel non<br>impedientes. | 420. Mandantes.                            |
| 416. Operam vario modo conferentes<br>cum peccato.   | 421. Auxilium præstantes.                  |
|  | 422. Spectatores.                          |
|  | 423. Et quomodocunque se immiscen-<br>tes. |

412. **P**rimum haud dubiè locum sibi vendicant duo pugiles, qui duello  
congregi non sunt veriti, sed in mutua coivère vulnera. Quòd-  
si autem sola fuerit facta provocatio, quin pugna secuta sit, quaeritur, num  
tam provocans, quàm provocatus hac lege damnentur, poenámque incurrant?

413. De provocante res est facta aperta; equidem Tridentinum lo-  
quitur de iis tantùm, qui pugnam commiserint: Dein GREGORIUS XIII. in sua  
Constitutione ait: poenis eos subici, etsi ob aliquod impedimentum non com-  
mississent pugnam, si ad locum tamen accesserunt pugnaturi, & per eos non  
fuerit, quo minus pugnarent. (vid. §. IV. Clem.) at CLEMENS VIII. non requi-  
rit,

Rr

rit,

(a) L. nam ad ea. ff. de Leg.

### 314 Caput VIII. De Lege Ecclesiastica prohibente Duellum.

rit, ut secuta fuerit pugna, vel ut ad locum accesserint pugnaturi: sufficit ei, si provocaverint. Ita colligitur ex §. VIII. Constitutionis, ubi dicitur: *Siquis ad singulare certamen descendat, aut alterum provocet.* Præcipue ex §. XVII. ubi operam conferentes damnantur, etsi *neque pugna aliqua, aut effectus, nec accessus, aut actus ad pugnam proximus subsequutus sit.* Ergo idem multo magis de principalibus, provocante scilicet, & provocato, intelligendum venit. Et ita certè Doctores intellexere hactenus.

414. De provocato, qui provocationem acceptavit, mitius fors quam sentire volet non secuto duello: nec omnino abs re; nam notandum, quòd in nulla Constitutione, aut Decreto de hoc acceptante fiat mentio: sed tantum de provocante, aut pugnante. Fors etiam Pontifex clementius agere cum ejusmodi voluit, utpote qui ægrè, nec sine molestia recusare poruit provocationem. Id certum, quòd odia sint restringenda. (a) At tenendum est contrarium; quamvis enim nulla uspiam fiat mentio de acceptante provocationem, nec tamen pugnante: satis est, quòd inter duos antagonistas nunquam ulla constitutio faciat discrimen: sed eos, siquidem pugnent, pari modo condemnet. Sicut ergo, dum pugna committitur, juxta omnes æquale subeunt fatum: ita etiam dum pugna impedita non consequitur, æqualem sortem habeant, necesse est. Atqui provocans, etiam non secuta pugna, feritur: ergo etiam provocationem acceptans. Si Pontifex odia voluisset restringere erga eum, qui provocationem acceptat, id fecisset etiam tunc, ubi pugna sequitur; nam vel etiam in hoc casu dignus est aliqua clementia: vel in neutro.

415. Loco secundo veniunt locorum Domini, Duces, Marchiones, & regionum Principes, Regesque, ac Imperatores, qui duellis inter Christianos locum in suis terris concedunt. Nota illud: *Inter Christianos.* Judæi, aliæ infideles his Constitutionibus non comprehenduntur; nam ad Pontificem non pertinet *de iisdem judicare, qui foris sunt.* Et quomodo excommunicari poterunt, qui per baptismum non sunt ingressi Ecclesiam? Puniri ergo tales debent juxta leges Principum, sub quorum dominio sunt. Quòd si sint in statu Ecclesiastico, iis pœnis ex hac Constitutione subjacent, qua-

(a) R. J. 15. in 6.

quarum capaces sunt. (a) Cùm ergo Ecclesiæ nihil cum his negotiis sit: etiam Principes duellum iis concedentes non voluit ferire suis Constitutionibus. *Vid. Cap. seq. N. 519.* Huc pertinent etiam Magistratus, Præsides, Locumtenentes, aut etiam militum Duces, & Capitanei in castris, vel extra ea; in alieno, vel hostili solo, vel cum militibus exercitus hostilis permittentes duellum in quocunque casu, per præsentem, vel alias ejusmodi Constitutiones, prohibito. Nota tamen, posse dari singulare certamen licitum inter milites nonnullos diversorum exercituum, quod, licitum cùm sit, ut N. 48. nostri tractatus exposuimus, nec per præsentem, nec per alias ejusmodi Constitutiones est prohibitum. Eadem personæ feriantur, si, quantum in ipsis est, non prohibeant, aut post admissum crimen veniam, & impunitatem concedant, de quo plura dicemus *Cap. sequente.*

416. Tertiò: In Constitutione recensentur ii, qui ad duellum, vel ad provocationem, five etiam ad hujus generis scripta, quæ Manifesta, vel provocatoriæ chartulæ appellantur, scribenda, dictanda, mittenda, deferenda, divulganda præstiterint *auxilium, consilium, operam, vel favorem*: five *suaserint, mandaverint*, vel qui se quomodolibet *immiscuerint*. Plurima his paucis verbis comprehenduntur, amplam differendi materiam hoc loco præbitura, nisi ut plurimum ex illis principiis Theologicis declarari deberent, ex quibus eruitur, quando liceat alterius peccato cooperari materialiter. Interim hic nota pauca ex LA CROIX (b). Qui facit aliquid indifferens, ignorans, an alter sit abusus, nec ne, non dicitur cooperari, si hoc faciat ex rationabili causa absque intentione, ut alter abutatur; quia in dubio præsumi debet alter non abusus. Item non pecco, si faciam opus indifferens, & remotè concurrens ad peccatum, quo posito alter peccat, adhuc peccaturus, licet ego opus non fecissem. Addit is Author (c), quòd si famulus dubitet, an literæ contineant e.g. provocationem ad duellum, deferre non possè juxta SANCHEZ: posse autem id facere juxta CASTROPALAO: juxta REBELLUM, & alios etiam debere; quia famulus tenetur obedire, ubi non est peccatum, & in dubio stat præsumptio pro domino.

(a) *Vid. Peregrin. de duell. q. 11.* (b) *L. 2. à n. 250.* (c) *N. 273.*

417. Speciatim de *consulensibus* noto, eos peti Romano fulmine, sive mediâtè, sive immediâtè: directè sive indirectè consilium præstent, quod colligi viderur ex verbis *quomodolibet se immiscentes*. Præterea cùm prohibeatur consilium, & auxilium simpliciter, omne consilium, & auxilium, quod malitiam continet, prohibitum esse censetur; nam ubi lex non distinguit, neque nos debemus distinguere. Voluit nempe sollicitudo summi Pastoris omnem duello viam præcludere. Huc puto referri posse etiam illos, qui narrant aliquid, ex quo videant, audientem ad duellum fore concitandum. Si eo fine narrant, ut concitent, pœnis hujus Constitutionis subjacent. Si verò non eo fine, utut prævideant, nihilominus eum effectum secururum, eximit eos P. SPORER (a). In quo ego ægrè assentior; nam si sine necessitate, aut gravi ratione id narrent, peccant, dum flammam stupæ admovent. Cur ergo eximendi sint?

418. Circa *Fautores* discrimen facio inter personas publicas, & privatas. Publicæ, habentes gladii potestatem, ex sola omissione possunt dici Fautores, scilicet non prohibendo, non puniendo, ut deberent vi muneris, quod gerunt: vel non capiendo, si sint justitiæ Ministri; quia qui crimina, quæ potest, non corrigit, ipse committit (b). Privatæ verò personæ ex sola omissione fautores non sunt; quia ad id non tenentur; favere tamen possunt dictis, vel factis. Dictis, si laudent cogitantem inire duellum. Dico: *cogitantem inire*; nam si post commissum laudent, peccant quidem: non autem subjacent Pontificiæ damnationi. Factis faverent, si e. g. excubarent in propinquo, ne pugnares turbarentur, vel caperentur à ministris justitiæ.

419. Cum *suadentibus* etiam involvuntur *instigantes*. Suadere est aliquem placidè rationibus hortari. Instigare est, quadam cum objurigatione impellere. Ita maritum suum nobilis fœmina alicubi instigavit ad duellum, minitando, se ei fores domus occlusuram, si non vindictus rediret.

420. *Mandantes* etiam illi sunt, qui quidem abstinent verbo imperante *jubeo*: iis tamen utuntur verbis, quæ ex eorum autoritate vim man-

(a) Theol. Moral. Tract. V. in Præcept. V. (b) C. Negligere. II. q. 7.

mandati acquirunt. Sic quandoque Dux supremus, aut Curia militaris laesum in honore, vel provocatum, ad eos confugientem ea responsione dimittit, qua duellum imperari videatur. Ubi dein non sonus verborum, sed sensus attenditur, ut docet BARTOLUS (a).

421. *Operam, seu opem praestantes* sunt illi, qui juvant, ut duellum committatur: non autem, qui praestant auxilium post duellum *e. g.* ad fugam, & ex officio non tenentur hanc impedire. Ad hanc classem spectant praecipue *Patrini* dominati §. XVIII. *Constitutionis*, & à nobis de peccato convicti *Cap. I. n. 35*. Item *arma praebentes*, si ideo praebant, ut securius pugnent, & ex hac securitate animus eis addatur, ad pugnam non declinandam. Aliud est, si commodem amico post conceptum jam firmum pugnandi propositum arma meliora pro sua securitate. Equidem PEREGRINUS etiam hoc condemnat (b): at malim sentire cum FLORONO (c).

422. *Spectatores* quoque nominat Constitutio: non tamen omnes, & quicunque huc pertinent; nam quamvis PIUS IV. loquatur simpliciter de adstantibus, & Tridentinum de Spectatoribus, tamen GREGORIUS XIII. velut declaraturus illa verba, non dixit sine addito *Spectatores*, sed *ex composito*: & CLEMENS VIII. de *industria*. Sic nempe Leges generaliter loquentes declarantur, & restringuntur per subsequentes (d). Itaque qui fortuito supervenit monomachiae, & attentus aliquamdiu sistit gradum, spectatque cum horrore, non pertinet ad damnatos hic Spectatores. Sicut neque illi, qui latent occulti, videntes pugnam post fenestram, vel per rimam januae, nec ipsi visi à monomachis; sic enim non cohonestant pugnam, neque excitant pugiles ad acriorem dimicationem, quæ utraque ratio suberat, cur Pontifex in spectatores animadvertit. Unde etiam illos excusat DIANA, & TAMBURINUS (e), qui sola curiositate ducti spectatum adsunt, cæterum ad pugnam nil conferunt. At meo iudicio deberent hi esse personæ valde viles, ex quarum præsentia neque cohonestari pugna, nec animari pugiles certum esset. Aliqui Authores excusant spectatum acce-

Rr 3

den-

(a) In L. Non solum. §. Mandato. ff. de injuri. (b) De duell. q. 25. (c) In Tract. de prohib. duell. c. 11. §. 3. (d) L. Non est novum. ff. de leg. (e) Apud la Croix l. 3. p. 1. n. 1158.

dentes tunc, quando pugna fortuitò fuerit impedita, ita P. SEYBOLD (a). At mihi contrarium videtur probabilius, quia CLEMENS VIII. de industria spectantes numerat cum provocantibus, consilium, opem, vel favorem præstantibus, delicti sociis, & patrinis &c. §. XVIII. atqui omnes isti peruntur sacro fulmine, etiam *non secuta pugna, nec actu ad pugnam proximo* §. XVII. ergo etiam spectantes de industria. Quin clarè hoc videtur decisum §. IV. ubi expressè damnantur *pugnantes, & ex composito spectatores, etiamsi pugnam ob aliquod impedimentum non commississent, si tamen ad locum accessissent pugnaturi*. At, dices, quales hi spectatores, si pugna non exhibetur? R. Quales illi patrini, si infans, seu duellum in lucem non editur? scilicet secundum malam suam voluntatem tales sunt.

423. Denique per *quomodocunque se immiscentes*, non video, quinam facilè ultra recensitos, & expressè in Constitutione nominatos intelligi possint. Apparet ex generali hac expressione, omni studio laborasse Pontificem proscribere omnia duelli adjumenta, quocunque nomine veniant.

## ARTICULUS II.

### *Declarantur pœne, in duellum statuta.*

**Q**ui legem violat, delictum admittit. Delicto autem debetur pœna, infligenda ab ea potestate, quæ legem tulit. Unde pœnam rectè ex Cujacio definit ZOESIUS (b), quòd sit delictorum sive criminum coercitio sive vindicta, inducta ad disciplinæ publicæ emendationem. Ut igitur pœnam, latam in delictum duelli, ritè declaremus, loquemur primò de pœna excommunicationis, ejusque usu laudabili in Ecclesia. Secundò de pœna aliter afficiente actiones principales, aliter secundarias. Tertio de privatione sepulturæ sacræ. Quarto de pœnis Clericorum. Quintò de pœnis in Germania non receptis. Sextò de ignorantia excusante à pœnis. Septimò de absolutione à pœnis. Demum de pœnis in Principes, & Magistratus locorum latis, dicemus *Cap. sequente*, ubi ex instituto horum obligationem sumus declaraturi.

§. I.

---

(a) Erotem, P. 2. sect. 6. §. 5. n. 6. (b) ff. de pœn. n. 1.

## §. I.

De pœna Excommunicationis, ejusque usu laudabili in Ecclesia:

424. *Quomodo sit lata in duellum.*

426. *Et equitas defenditur contra im-*  
*peritos.*

425. *Ejus explicatio datur:*

424. **P**Oena præcipua in duellum lata, est *Excommunicatio*, & quidem *major*, ac *lata sententia*, ut patet ex Decretis, & Constitutionibus Ecclesiasticis *Articuli præcedentis §. I.* recensitis, præcipuè ex Constitutione CLEMENTIS VIII. §. *XVIII.* Et ita quidem in duellum est lata excommunicationis pœna, ut ea se extendat ad actiones, & personas omnes §. II. & III. *præcedentis articuli* enarratas.

425. Ut explicem paucis, quid sit excommunicatio, ajo, eam esse ex censuris Ecclesiasticis præcipuam. Est autem *censura* pœna spiritualis, seu Ecclesiastica, qua potestas Ecclesiastica exterior fideles suos delinquentes, & contumaces bonorum quorundam spiritualium usu privat ad eorum correctionem. Ita plerique Doctores cum SUARIO (a). Ejusmodi censura est excommunicatio, separans excommunicatum à communione fidelium. Ita iterum quoad sensum SUARIUS cum aliis (b). Excommunicatio duello adhærens non est *ferenda sententia*: sed *lata*, id est, talis, quæ incurritur admissio crimine, quin opus sit, ut per sententiam imponatur à Judice Ecclesiastico. Et quidem est excommunicatio *major*, non *minor*, id est, non tantum privat usu passivo Sacramentorum, id est, eorum receptione, sicut *minor*: sed præterea privat simpliciter omnium bonorum, inter fideles communium, participatione. Unde hac excommunicatione ligatus, privatus est communibus Ecclesiæ suffragiis, quæ ex publicis Ministrorum Sacrificiis, & Officiis solent provenire fidelibus: (quid post mortem penitentis, Sacramentaliter absoluti liceat, dabit n. 433.) excluditur à sacrificio Missæ, ita ut hinc adesse nequeat: arcetur ab ingressu templi tempore, quo Divina celebrantur. Caret sepultura sacra. Nec licet ei recipere, vel administrare Sacramenta. Non potest obire officium publicum,  
etiam

(a) D. 1. de Censur. sect. 1. n. 5. (b) Ibid. D. 3. sect. 1. n. 1.

etiam civile, utpote à communione fidelium separatus. Denique caret favoribus omnibus, veteri illo versiculo contentis :

*Os, orare, vale, communio, mensa negatur.*

Explicare totam hanc damnorum appendicem, Juri Canonico, & Theologiae Morali incumbit.

426. Meum hoc loco calamum provocant imperiti quidam, & discoli inter ipsos Catholicos, qui tum enimvero se supra vulgus sapere, & judicii sui robur ostentare putant, dum de Excommunicatione joculari potius, quàm erudiri malunt. Nôrint hi, etiam in cœtu Protestantium, quorum libros sæpe avidiùs legunt, quàm Catholicos, excommunicationem locum habere. *Ad leges* (Ecclesiæ scilicet, sive Collegii) *servandas sua sponse se obligant*, ait PFAFFIUS (a) *Collegii membra, pœnitique etiam, quas tantisper sensu depurato ita nuncupamus, sese ita subjiciunt, ut, si eas hand luere velint, Collegiò dein exigantur.* Hanc expulsionem *Excommunicationem* appellant, teste LUDOV. KAHLE, recenti Authore multùm à suis laudato (b). “ Excommunicationem, ait, vocamus declarationem, Ecclesiæ nomine institutam, qua quis pro membro ejus non habetur, donec versus fuerit ad pœnitentiam. Itaque major Excommunicatio dæcernitur à tota Ecclesiâ, & rarò ab Evangelicis imperari solet; quia infamiae maculas incurrit. Quod verò ad minorem excommunicationem, sive exclusionem à sacra Cœna pertinet, hanc recepisse nostrates, nemo est, qui nesciat. ” Judicat postea, tam majorem, quàm minorem excommunicationem à Consistorio debere potius imponi, quàm à particulâribus Ecclesiæ Ministris, idque ob delicta longè gravissimâ, atque publica.

Nôrint præterea, excommunicationis usum esse antiquissimum, ut nil dicam de Synagoga (c), nil de Gentilibus (d), ad tempora Apostolorum respiciamus. Nónne Paulus hominem incestuosum, qui uxorem patris sui habuerat, jubet extra Ecclesiam ejici : *Tollatur*, inquit, *è medio vestri, qui hoc opus fecerit : auferre malum ex vobismet ipsis* (e). Idem Hy-

(a) De Orig. Jur. Eccles. 1719. (b) Element. Jur. Eccles. c. 4. §. 98.

(c) Vid. *Draffum* de Sect. lib. 3. c. 11. (d) *Danes. Antiq. Grequ. & Rom.*

(e) 1. Corinth. 5.



Hymnæum, & Alexandrum circa fidem naufragantes, Sathanæ tradidit (a). Petrus adversus Simonem Magum ea verba pronuntiavit : *Non est tibi pars, vel sors in sermone* (b). Percurrenti historiam Ecclesiasticam, & scripta PP. innumera omnis ætatis exempla occurrent. Occurrent etiam sollicita Pastorum monita, data gregi subdito fidelium, ne commercium habeant cum excommunicatis, ne manducant cum eis : sed eorum familiaritatem, ac consuetudinem, quantum possent, evitent.

Id. fateor, succedente tempore, quoad formam, & delictorum ita puniendorum numerum multa esse immutata : aliquas etiam divisiones (quoad vocem saltem) esse enatas, in excommunicationem *maiores & minores : lata & ferenda* sententiæ &c. At sicut in Jure Civili tempus & rerum usus multa perpolivit, ita etiam in Jure Ecclesiastico factum fuisse quis miretur ? quis miretur etiam multa à Protestantibus fugillari in usu excommunicationis, prout is viget hodie apud nos Catholicos ? Hæc Polemicis discutienda relinquo. Ne tamen suspectam Ecclesiam nostram habeant de immoderatiori potestatis suæ usu, addo, quod cavit prudentissimè Concilium Tridentinum (c) : *Quamvis excommunicationis gladius sit nervus Ecclesiastica disciplina, & ad continendos in officio populos valde salutaria : sobrie tamen, magnæque circumspectione exercendus est ; cum experientia doceat, si temere, aut levibus ex rebus incutiat, magis contemni, quàm formidari, & perniciem potius parere, quàm salutem.* Quodsi nihilominus quis injustè excommunicatione feriat, talis erit animo in Ecclesia, sive desiderio, quod ei sufficit ad salutem, quamvis non sit corpore, sive externa communicatione, ut testatur BELLARMINUS (d). Unde D. AUGUSTINUS ait : *Sape etiam finit Divina providentia expelli de Congregatione Christiana etiam bonos viros, quam contumeliam vel injuriam suam cum patientissimè ferunt pro Ecclesia pace, neque ulla novitates vel schismatis, vel hæreses moliti fuerint, docebunt homines, quàm vero affectu, & quanta sinceritate charitativè DEO serviendum sit.* (e). Hæc de pœna Excommunicationis dicta sufficiant. Quod autem non iniquè in duellum fuerit lata, pa-

Ss

ret

(a) 1. Tim. 1. (b) Act. 8. (c) Sess. 25. c. 3. de reform. (d) Tom. 2. lib. 3. c. 6.  
(e) Lib. de vera Relig. c. 6.

ret ex rationibus, quibus Tridentinum, & Pontifices ad hanc severitatem permotos se fuisse dicunt; Item ex severissimis Edictis Principum, quibus duellum ipsi satagunt profligare. Cum ergo hoc delictum sit fori mixti, quis vitio vertat potestati Ecclesiæ, si potestati Laicali in persequendo tam noxio delicto palmam nolit cedere?

## §. II.

De poena aliter afficiente actiones principales, aliter secundarias, retractatas, & non retractatas.

427. *Exponitur diversitas inter actiones principales, & secundarias.*

428. *Inter retractatas, & non retractatas.*

427. **A**fficit equidem poena excommunicationis omnes eas actiones & personas, quas §. II. & III. *precedentis Articuli* recensuimus: certo tamen cum discrimine. Aliquæ earum actionum prohibentur absque ulla exceptione: aliæ hac lege adjecta, si *per eos* (scilicet actionem talem admittentes) *non steterit, quo minus duellum sequeretur. Vid. Clementinam §. XVII.* Itaque locum habet excommunicatio, si talem actionem duellum sequatur: imò & tunc, si non sequatur, impeditum tamen aliunde, & ex quadam causa omissum, ad quam admittens eam actionem nihil contribuit, ita ut ei omissio duelli non sit adscribenda.

Actiones primi generis excommunicationem afferunt, quamprimum fuerint admissæ. Tales sunt, provocare, & provocationem acceptare, libellos provocatorios divulgare, dictare, componere, affigere, imprimere, vel etiam verbis denunciare. Item actiones his æquivalentes recensitæ in *Clementina* à §. XI. usque ad finem §. XVI. Ratio est juxta PERREGRINUM; quia ob actiones principaliter prohibitas, quales sunt istæ, illico poena intentata solet sequi: non autem ob eas, quæ secundariò, & accessoriè prohibentur, quales sunt, ad prædictas principales consilium, operam, vel favorem præstare, suadere, mandare, vel quomodolibet se immiscere. In has quoque excommunicatio statuitur, etiamsi neque pugna, aut actus ad pugnam proximus, neque aperta provocatio secuta fuerit, neque scriptiones in publicum prodierint, aut cuiquam fuerint nunciatæ, modo per eos (scilicet qui committunt has actiones secundarias, & accessorias)

forias) non steterit, quo minùs eæ principales fierent. Ita docet PEREGRINUS (a), & in simili MOLINA (b). Itaque notes, velim: Vel sequitur ex tua actione accessoria illa principalis, vel non sequitur? si non sequitur, an tu operam tuam impendisti ad eam impediendam, sive an per te stetit, quo minùs sequeretur? si ita; eris à pœnis exemptus. Si nihil contulisti ex tuo: sed ea actio principalis ex alia causâ fuit impedita, nihilominus incidis in pœnas, & quidem tunc, quando illa actio, e.g. provocatio à te suasa, sequi de se debuisset, nisi aliunde impedimentum intervenisset. Demum si sequitur, quæro, an non subtraxeris, & revocaveris operam tuam, antequam ea actio committeretur? si non; pœnis subjaces. Si aliter, percipe casum sequentem.

428. Titius, & Cajus Sempronio consulere, ut adversarium ad duellum evocaret. Brevi tamen facti sui pœnitens Titius, incipit provocationem dissuadere pro viribus. Id dum facere negligit Cajus, Sempronius provocat. Tum demum Cajus quoque cœpit laborare, ut Sempronium saltem à duello adhuc abstraheret. Quæritur, an Titius pœnas Ecclesiasticas incurrerit? item an Cajus, & quando?

R. Ad primum. Dehortatio facta à Titio vel fuit talis, quæ mutaverit voluntatem Sempronii, ita, ut hic postea aliunde concitatus nihilominus provocaverit: vel, non obstante dehortatione motus adhuc ex priorè adhortatione provocavit Sempronius? Si primum, tunc Titius nullam incurrit pœnam; quia adhortatio sua in provocationem non influit. Si secundum, tunc utique dubio locus est. Prima fronte videtur pœnas incurrisse; quia verè fuit causâ delicti principalis, seu provocationis; cùm adhortatio sua tam profundè in animum Sempronii descenderit, ut nec quidquam adhibita dehortatione, provocaverit. Dein, si quis alteri author fuerit ad furandum, & hoc consilio motus fur committat furtum, tenetur suadens rescire damnum, quamvis suasionem ante commissum furtum adhuc revocasset: ergo etiam pœnas subire tenebitur Titius.

Oppositum tamen videtur verius, nempe Titium ad pœnas subeundas non tenei. Ratio est; quia excommunicatio non incurritur nisi

Ss 2

ab

(a) De duell. q. 5. (b) Disp. 92. n. 11.

ab eo, qui conscientiam gravatam habet peccato gravi (a). Atqui Titius, saltem tunc, dum deberet incurrere excommunicationem, non habet grave peccatum; nam excommunicatio tunc primū contrahitur in delictis secundariis, quando sequitur, vel sequi debuisset effectus dati consilii ad provocationem; cū enim Pontifex det spatium resiliendi, & laborandi pro impediendō effectū actionis malæ secundariæ, patet, excommunicationem manere velut in suspenso, donec effectus sequatur, vel sequi de se deberet, nisi aliunde impediretur: ergo Titius tunc, dum deberet incurrere excommunicationem, scilicet tempore provocationis factæ, non fuit gravatus culpa mortali: ergo neque excommunicationem incurrit.

In contrarium adducta non obstant. Verum equidem est, Titii consilium causam dare provocationi; at invito jam Titio, & innocente, qui dehortando Sempronium facit, quantum potuit: ergo ad nihil ultra tenetur. Fateor tamen, quod, si Titius alia via impedire provocationem sciret, quā dissuadendo, eam inire viam fore obligatum. Dispar ratio est de eo, qui consilium dedit furandi. Obligatio restituendi contrahitur ex culpa præcedente, etiam emendata; quia damnum compensandum nihilominus manet: non item excommunicatio ex delicto jam deletō tunc, quando esset contrahenda. Aliud foret, teste PEREGRINO (b), si Titius subito suo Sempronio mandatum dedisset provocandi; etsi tunc pœnitudo subiret Titium: si tamen non potest revocare mandatum, & sequatur provocatio, nihilominus juxta eum authorem excommunicationem contrahit Titius. Assentior, si subeunte pœnitudine impedimentum, quo minus revocare mandatum possit, jam adfuit, dum e.g. famulus Sempronius jam iter ingressus revocari nequit; quia tunc excommunicatio suspensa non mansit usque ad provocationem, sed usque ad punctum temporis, quo intervenit impedimentum; ut etiam colligo ex SUARIO (c). Si itaque in hoc puncto Titius, necdum pœnitens, in peccato erat constitutus, excommunicatio suam vim in eum exerere potuit: non item, si jam purum invenisset, & paratum quamcunque operam afferre impediendo malo. Hæc de Titio.

De

(a) Ex cap. Nemo Episcop. ex cap. Nullus. 11. q. 3. (b) De duell. q. 30.  
(c) Tom. 5. de l'regul. disp. 44. Sect. 3. n. 13.

De Cajo autem dico sine hæsitacione, eum excommunicationem incurrisse; quia causa provocationis exitit hortando. Quodd postea duellum ipsum dissuasit, id solum effecit, ut ex ipso duello eam pœnam non promereretur, sed ex provocacione.

§. III.

De privatione Sepulturæ sacræ.

429. An hæc pœna primùm post sententiam iudicis incurratur?

430. An ei subiaceat moriens in loco confictus: post data tamen penitentia signa.

431. An subiaceat moriens extra eum

locum, nihilominus tamen ex vulnere accepto.

432. An dispensare possit Episcopus.

433. An publicas orationes pro mortuo offerre liceat.

429. **E**X synopsis vides in quinque membra resolvi quæstionem. Itaque Q. I. An hæc pœna primùm post sententiam iudicis incurratur? videri posset, quodd ita; quia Tridentinum dicit, occisus in duello *perpetuo careat Ecclesiastica Sepultura*. Verbum *careat* significat alibi in jure pœnam ferendæ primùm sententiæ (a): ergo etiam id verbum hoc loco ita accipi debet. At explicandum est hoc dubium verbum *careat* per Constitutionem Clement. dicentem: *Privatos esse volumus*. §. XVIII. Quodd si ergo notum satis sit delictum, nullo pacto occisus admittendus ad sepulturam sacram. Neque opus est expectare sententiam iudicis Ecclesiastici, id quod docet usus, & praxis passim recepta. Quodd si tamen *notorium* non esset commissum duellum, dato etiam, quodd probari posset per testes sufficientes, Parochus deferat rem totam ad Superiorem Ecclesiasticum. Si etiam apud hunc maneat dubium post adhibitam diligentiam, an per duellum occubuerit, poterit permitti sepultura sacra, ne temere occisus privetur suo jure acquisito, quo per Baptismum censetur potiri Catholicorum quilibet. Ita judicant PREGRINUS (b), & PIGNATELLIUS (c).

430. Q. II. An huic pœnæ subiaceat moriens in loco confictus post data tamen penitentia signa? R. Ex Tridentino debet peti decisio,

Ss 3

dicen.

(a) Ex cap. Omnes utriusque sexus. de Pœnit. & remiss. (b) De duell. q. 7.

(c) Consult. tom. 9. Consult. 88. n. 161.

dicente: *Si in ipso conflictu decesserint*: quod idem sonat, ac *in ipso loco duelli*. Non eximit Concilium morientem post data signa pœnitentiæ: ergo neque nos debemus excipere. Clarius loquitur Rituale Romanum, jussu PAULI V. editum (a): *Negatur sepultura Ecclesiastica morientibus in duello, etiamsi ante obitum dederint signa pœnitentiæ*. Contrà opponit PORTELLUS (b), qui pœnitentiæ signa edidit, censendus est, non decessisse in peccato mortali: ergo ei non est neganda sepultura, quæ ipsis adulteris deprehensis, & occisis in adulterio, non negatur, ut docet DE GRAFF.; neque meretrici juxta NAVARRUM, quæ in domo Amalii reperta est vulneribus confossa, & mortua; quia nemo faciliè suæ salutis etiam in extremis immemor esse creditur. At non prævalent istæ rationes contra verba Tridentini, & Ritualis Romani. Neque negatur ea sepultura ob statum malum animæ; in quo ejusmodi homo decedit: sed in odium admitti delicti, quod in foro externo punitur, etsi jam remissum sit à Deo. Ferme sicut in torneamento occumbens privatur sepultura sacra, *quamvis ei poscenti pœnitentiæ non negetur*, ut habet *Cap. I. de torneam.*

Mitior est LA CROIX (c) cum TAMBURINO judicans, si ante obitum non *qualiacunque signa pœnitentiæ* ediderit: sed confessus, & absolutus fuerit, cum dici posse *moraliter* decessisse post conflictum; cum intercedat utique mora inter confessionem, & vulnus, & utique minus sit, signa aliqua pœnitentiæ edere, quàm Sacramentum Confessionis suscipere. Si autem sufficerent quælibet signa, rarè privatio sepulturæ haberet locum: cum rarissimè ita quis saucietur, ut neque dando ejusmodi signo sufficiat. At ego nolim esse nimis facilis in adoptanda hac sententia propterea; quodd hoc modo non fuisset opus exprimere hanc pœnam in Ecclesiasticis legibus; nam suffecisset, solam imposuisse excommunicationem, utpote quæ de se jam conjunctam habet privationem sepulturæ, quamdiu per absolutionem sublata non fuerit. Quodd si ergo per Confessionem & Absolutionem ab Excommunicatione, quam Sacerdos in loco duelli huic vulnerato impertiri solet, recuperatur sepultura, pœna hæc, singulariter ad terrorem addita, effectum nullum habet, quem non haberet excommunicatio, jam aliàs connexa cum privatione sepulturæ, id quod non est satis credibile.

Dices

(a) Tit. de Exequiis. (b) In resp. mor. tom. 1. part. 3. cas. 10. (c) L. 3. p. 1. n. 864.

Dices tamen : eum adhuc singularem effectum futurum statuta pœnæ, quod eum sepultura excludat, qui post *qualiacunque* signa pœnitentiæ absolutus à peccatis, & excommunicatione fuerit. At nescio, an hoc sufficiat menti Legislatorum neutiquam lenium in hac materia : præcipuè si attendam ad rigorem illum, quo docent nonnulli, quod sepultura sacra sit privandus etiam ille, qui extra locum conflictus moritur : modò moriatur ex accepto ibi vulnere. *Vid. n. seq.* neque illud satis perspicio, quomodo faciens confessionem censeatur *Moraliter* non decedere in loco conflictus. Quidquid sit: ego solum dixi, me nolle esse nimis facilem in adoptanda hac sententia.

431. Q. III. An pœnæ huic subjaceat moriens extra locum quidem conflictus: ex accepto tamen vulnere? Controversum hoc est multis in utramque partem stantibus viris doctis. Examinatis eorundem argumentis, meò quidem iudiciò, non videtur is excludendus à sepultura sacra. Ratio est; quia si post complures primùm horas, vel etiam post unum, alterumve diem in ædibus suis expirat, utique neque in *ipso conflictu*, neque in *loco duelli* potest dici obiisse. Cur ergo ultra verba legum extendatur pœna adeò gravis, & infamis; cum tamen universè odia sint restringenda (a)? Certè si voluissent hanc severitatem Concilijam, aut subsequentes Pontifices, aliis usi essent verbis in hac præcipuè materia, in qua singulos apices multa cum consideratione videntur scripsisse. Rationes contrariæ PEREGRINI & PIGNATELLI non movent satis; nam primò dum PIGNATELLUS dicit, sic opus non fuisse hanc pœnam exprimere; cum privatio sepulturæ sit effectus consequens ad excommunicationem; ajo hanc pœnam peculiarem habere effectum; quia, dum quis *in loco duelli*, etiam absolutus à peccato, & excommunicatione decedit, nihilominus locum damus illi pœnæ. Secundò, dum PEREGRINUS (b) se fundat in torneamentis, nego ego, quod in his ludis vulneratus sepultura privandus sit, si non in arena, sed aliquò tempore post decedat è vita. Certè textus ait: Si quis *ibi* mortuus fuerit, ubi scilicet *milites ex condito convenire solent, & ad ostentationem virium suarum, & audacia congregati*.

(a) Reg. J. in 6. C. Odia. (b) De duell. q. 7. n. 4.

432. Q. IV. An dispensare possit Episcopus cum eo, qui privati sepultura sacra est promeritus? R. DUVALLIUS (a), Episcopum cum his, si contriti, & confessi obierint, iustis de causis posse dispensare. Quin DIANA existimat (b), neque opus esse dispensatione Episcopi; eo quod huiusmodi homo censendus sit non fuisse mortuus in peccato mortali. At negat PIGNATELLUS, iudicans id pugnare cum praxi S. Penitentiariæ (c). Mihi videtur, si contritus, & confessus quis obierit, Episcopum posse rescribere e.g. Parocho consulenti, ut sequatur sententiam mitiorem, secundum quam ejusmodi homo privationis pœnam non incurrit. Quodsi autem extra dubium sit, incurrisse hanc pœnam, non video, qua potestate Episcopus sine speciali facultate possit dispensare contra Concilia, & Canones. vide AUGUST. BARBOSAM. (d)

433. Q. V. An publicas preces pro ejusmodi mortuo, & Ecclesiastica sepultura privato, si pœnitens tamen obiit, liceat persolvere, atque ipsum SS. Missæ Sacrificium offerre? R. licet; quia, quamvis excommunicationem incurrerit; non fuit tamen nominatim declaratus: talem autem excommunicatum non tenemur vitare, neque in profano, neque in sacro Commercio. Neque constat mortuum fuisse in peccato mortali: quin potius contrarium fas est credere NAVARRO (e) & PIGNAT. (f)

#### §. IV.

##### De pœnis Clericorum, reorum de duello.

- |   |                                    |
|---|------------------------------------|
| 434. <i>Potest contingere hodie adhuc, ut Clericus fiat reus hujus delicti.</i> | 436. <i>Privatio beneficiorum.</i> |
| 435. <i>Pœna in id lata.</i>  | 437. <i>Inhabilitas.</i>           |
|   | 438. <i>Irregularitas.</i>         |

434. **H**AËTenus promiscuè locuti de pœnis latis in monachos, dicemus jam, quæ pœnæ, præter jam declaratas, speciatim in Clericos latæ sint, si quidem se hujus criminis reos faciant. Apud veteres duellò, vel propria, vel aliena manu, dimicasse Clericos, narratum est

n. 59.

---

(a) In 2. 2. D. Th. q. 17. art. 1. (b) P. 5. tr. 3. resolut. 140. (c) L. cit. n. 168.  
 (d) De potest. Episc. p. 2. compend. n. 75. (e) Tr. de Orat. c. 19. Concl. 6.  
 (f) Loc. cit. n. 170.



n. 59. Nec solum pugnando noxam possunt contrahere, verum etiam operam conferendo per actiones, quas ex Clementina recensimus esse prohibitas sub pœnis gravissimis *Art. preced. §. II.* Quid quod hodierna etiam ætate inter adynata referendum non sit duellum ab ipso Clerico susceptum; factum habe. Coriolanus, atque Horatius, viri duo clarissimi, potenti cuidam Principi erant à Consiliis, & duæ velut vastissimi dominatûs columnæ, quas tamen, ut fieri in aulis solet, gravis æmulatio collisit. Coriolanus malens proprio nomine imperare minori cuidam Principatui, quam ad ampliorem regendum operam conferre cum æmulo, felici electione Canoniceorum Principatum quemdam cum Episcopali dignitate obtinuit. Quo minùs autem mox eò abiret, potentissimus ille Princeps impedivit, obtentâ à Romana Sede licentiâ servandi sibi aliquamdiu adhuc virum, expediendo gravi cuidam negotio oppidò necessarium. Dum sic trahuntur moræ, erumpit subito æmulatio eoque, ut ad duellum evocaretur electus, & confirmatus, necdum tamen consecratus Episcopus; qui etiam gladium, quem necdum posuerat, stringere non dubitavit in loco condito: mox iterum coactus eundem in vagina condere, ubi superveniens quis altioris ordinis pugnam diremit imperiò.

435. Quas jam hic Clericus pœnas juxta rigorem juris Ecclesiastici debuisse ferre, recensendum est. Pius IV. (a) ubi tam pugnantes, quam provocantes, aut locum ad pugnandum dantes, ac in illis adstantes, committentes, nec non consulentes, ac adhærentes, & fautores, nec non chartas certaminis subscribentes, vel affigentes, aut publicantes, cujuscunque dignitatis fuerint, modò inferiores sint Imperatore, ac Rege, excommunicatione ferit, addit: *Si Ecclesiastici fuerint, etiam omnibus & singulis Ecclesiis, Monasteriis, & Dignitatibus, & aliis beneficiis Ecclesiasticis, per eos obstantis, seu in quibus, & ad qua jus eis competit, eo ipso privati, & ad illa, ac alia impofterum obtinenda inhabiles existant, nec non illa, tanquam per privationem hujusmodi vacantia, ab aliis impetrari possint, extendimus, & ampliamus.* Hanc Constitutionem PII IV. CLEMENS VIII. in sua confirmat, declarat, & extendit ad duellum privatum, actionesque huc

Tt

per-

(a) In Constit. Ea, qua à Prædecessoribus &c. an. 1560.

pertinentes. His statutis ut lucis quidpiam afferamus, triplex dubium enodare juvat.

436. Q. I. An Clericus commissio duello excidat beneficio, dignitate, atque officio ante ullam sententiam iudicis declarantis vel crimen, vel pœnam? Communius docetur, quod non: sed ut excidat, requiri, ut declaratur, si non etiam pœna, saltem crimen. Unde licet potest retinere, quod possidet, eoque frui, donec dejiciatur à iudice: vel alius id sibi impetraverit beneficium. Ratio est; quia durum nimis foret, si in se ipso quis pœnam exequi deberet. Unde P. SCHMALZGRUEBER prudenter discrimen statuit inter pœnas, privantes jure jam quæsito, & inter alias. Has, ait, ante sententiam declaratoriam incurrere: non illas (a). Verba ergo Pontificis: *eo ipso*, vel *ipso facto*, id operantur, ut necesse non sit per sententiam statuere pœnam, modò declaratur crimen. Hinc ante hanc declarationem Clericus facit fructus suos; ea tamen lege, ut post declarationem restituere eos debeat, quos percepit à die criminis commissi, restituendos aliàs solum à die latæ sententiæ, nisi adjecta verba essent: *ipso facto*, *eo ipso*. Item actus, & contractus, quos à die commissi criminis gessit, fuerunt tantum revocabiliter validi: consequenter, si irritari possint, irritandi. Tali spoliato SANCHEZ (b) adjudicat ex collectis fructibus à die commissi criminis aliquam saltem partem pro compensandis laboribus, interea præstitis. Neque huc trahenda est juxta PEREGRINUM (c) sententia PAULI II. (d), qua alienans bona Ecclesiæ *ipso facto absque declaratione* privatur beneficio; nam in præsentī materia hæc expressio *absque declaratione* non est addita, unde colligere datur, mentem Pontificis huc talem non fuisse. Quin existimat P. PICHLER (e), eam quoque clausulam posse de sententia declaratoria *pœna* intelligi: non de declaratione *criminis*, citans COVARRUVIAM, aliisque.

De Coriolano dubitari hac occasione posset, an non post commissum delictum illico ad novam electionem Canonici Ecclesiæ Cathedralis potuissent progredi propter verba Constitutionis dicentis, quod beneficia, ejus-

(a) Tit. de Cler. pugn. n. 52. 57. (b) L. 2. de matrim. disp. 51. n. 12.

(c) De duell. q. 7. n. 11. (d) Extrav. *Ambitiosa*, int. commun. de Reb. Eccl. non alien.

(e) L. 5. tit. 39. n. 9.

ejusmodi reis antè possessa, *tanquam vacantia ipso facto impetrari possint?* Quidquid sit de jure, consultum est, & moris in ejusmodi casibus procedere lentè.

437. Q. II. An *inhabilitas* ad acquirenda posthac beneficia incuratur ante omnem sententiam, etiam declaratoriam criminis, ita, ut collatio facta inhabili sit ipso facto nulla, etiam in foro conscientiæ, & beneficium retineri non possit tutè conscientia? Graves DD. id affirmant, negantibus aliis. Hos inter est SUAREZ (a), MOLINA (b), & LAYMAN (c); docentes solam pœnam excommunicationis, suspensionis, interdicti, atque irregularitatis locum habere ante judicis sententiam, nisi rigor sententiæ contrariæ sit alicubi jam receptus. MOLINA sic habet: "Pœna illa inhabilitatis ad beneficia, & officia obtinenda (pro exemplo adducit præsentem Constitutionem GREGORII XIII. de duello: id quod tamen clariùs ex Constitutione PII IV., & CLEMENTIS VIII. apparet) quoniam acerba est admodum, & permixtum apposita cum aliis, quæ vim non habent ante latam sententiam, excipienda est per epîchiam à regula COVARRUVIÆ dicentis: quando lege aliqua efficitur aliquis incapax rei alicujus, sive in pœnam, sive quavis alia de causa, vim illud habet etiam in foro conscientiæ, nullâque expectata sententia.,"

Ceterùm id certum videtur PIGNATELLO (d), quòd, si inhabilitatis pœna sit lata quoad illud numerò beneficium, ea obliget in conscientia ante omnem declarationem. Item si inhabilitas nascatur ex censura, vel irregularitate, quin scilicet apponatur ut pœna singularis, prout hic fit.

438. Q. III. Quomodo contrahatur *Irregularitas*, sive illud impedimentum Canonium, quod impedit (non irritat) susceptionem ordinum Ecclesiasticorum, & jam susceptorum usum? R. Si in duello alterum quis occidit, vel mutilaverit, dubium non est, quin incurratur ante omnem sententiam (c). Si verò mors, & mutilatio non est secuta, tunc monomachiæ reus, sit ipso facto infamis *per Bullam* PII IV. Infamibus autem

T t 2

portæ

(a) Tom. 1. de Relig. tract. ult. de Sim. c. 61. (b) Tr. 2. disp. 96. n. 6.  
(c) Lib. 4. Tract. de Sim. n. 74. (d) L. cit. n. 130. (e) C. 1. & 2. de Clero pugn.

portæ dignitatum patere non debent (a). Est autem Ordo Ecclesiasticus; & multo magis Episcopatus honor, & dignitas (b): sequitur ergo, quod duelli reus ad Ordines Ecclesiasticos, aut Episcopatum promoveri non possit, vel promotus exercere id officii non possit. Ita PEREGRINUS (c). Hic tamen notandum, quod iis in Provinciis, ubi pœna infamiae non est recepta, & in usu, uti in Germania *juxta §. sequentem*, quod ibi neque irregularitas oriri ex infamia possit. Insuper nota, irregularitatem etiam contrahi à suadentibus, mandantibus &c. de quibus supra. Quid autem in dubio juris, vel facti tenendum sit, docetur in principiis generalibus de Irregularitate. *vide Canonistas passim*. Unde patet, quibus pœnis semet obnoxium Coriolanus noster de jure fecerit. At tanti viri merita, & spes in futura tempora ingens merito permovit Romanum Antistitem, ut rigori justitiæ clementiam præhaberet.

## §. V.

## De Pœnis in Germania non receptis.

439. *De proscriptione, infamia &c. est satis certum, non esse receptas.* 440. *De excommunicatione non verum dubitat.*

439. **P**RÆTER excommunicationem pugnantes in duello, & eorum patrini incurrunt *proscriptionem omnium suorum bonorum*, perpetuam *infamiam*, pœnamque in homicidas à SS. Canonibus statutam. Ita Tridentinum *loc. cit.* Pius IV. in Constitutione *Ea qua* &c. statuit etiam pœnas crimini *læsæ Majestatis* proprias, adempta simul facultate, seu habilitate ad testandum. GREGORIUS XIII. *loc. cit.* extendit eas pœnas etiam ad duella privata; quin videntur omnes pœnæ, in pugnantes, & patrilinos latæ, etiam extendi ad consulentes, mandantes, favorem præstantes, ac ex composito spectatores vi Constitutionis P. IV., GREGORII, & demum CLEMENTIS VIII. confirmantis omnes jam prius statutas pœnas, & extendentis ad omnes culpas, prohibitas in Decretis prioribus. De his pœnis quæri inprimis posset, quo jure potestas Ecclesiastica eas, utpote habentes

tes effectum merè civilem, statuere possit, quin egredi limites suos videatur? Resp. GIBERTUS, non habere nisi rationem consilii, à potestate sacra suggesti potestati sæculari (a). Quidquid sit de hoc : de his pœnis satis certum est, non esse usu receptas in Germania; non enim facilè quis viderit monomacho à potestate Ecclesiastica eas fuisse inflictas. Jam verò *legæ firmantur, cum moribus usentium approbantur* (b). Et ita præter alios docet P. SCHMALZGRUBER (c). De pœnis, latis in Magistratus, & Præfectos *vid. Cap. IX.*

440. De excommunicatione quoque dubitare non veretur LAYMAN (d): "Pœna excommunicationis, ait, latæ sententiæ decreta est in Tridentino tum in locorum Dominos, qui duellum illicitum sua auctoritate permittunt: tum in ipsos duello concertantes, eorumque patres, auxiliares, spectatores. Insuper ut, si tali in conflictu decesserint, Ecclesiastica sepultura careant. Loquitur autem Concilium tantum de duellis publicis, & cum solemnitate institui solitis. Postea verò GREGORIUS XIII., & denique CLEMENS VIII. Concilii pœnas etiam ad duella privata extendit, & Sedi Apostolicæ reservavit. Ex quo colligit DELRIUS, & SANCHEZ, ex vi harum Bullarum excommunicationis pœnam etiam ab his incurri, qui certo loco, ac tempore designato ad certamen singulare, quamvis nulla alia solemnitate adhibita, ex conducto accedunt. Verùm Germani, aliique Septentrionales, sive ob ignorantiam, sive quia Constitutiones illæ secundum hunc sensum promulgatæ, & in usum deductæ non sunt, à censura excusari videntur. "

Sed contrà ait SCHMALZGRUBER: quoad pœnas spirituales, puta excommunicationis, privationis sepulturæ, beneficiorum, item inhabilitatis ad illa, dictas Constitutiones receptas esse, nemo est, qui dubitet. Et bene; nam ab his pœnis Germanos, aliòsque Septentrionales non excipit ignorantia, quæ, qualiscunque fuerit tempore LAYMANNI, hoc certè sæculo adedò universalis non est, etiam inter has gentes. Neque eximit promulgatio nunquam his in terris facta; nam probabilius sufficit promulgatio facta Romæ, ut docent cum SUAREZ (e) Canonistæ plurimi *sig. de Con-*

Tt 3

*flit.*

(a) Corp. Jur. Can. Prolegom. p. priore. tit. 8. (b) Can. 3. d. 4. (c) Tit. de Cler. pugn. n. 41. (d) L. 3. Tract. 3. p. 3. c. 9. n. 4. (e) L. 4. de Leg. c. 15.

*fit.* Accedit, quodd, modò lex observetur, ipse usus suppleat promulgationem; *cùm ipsa leges nulla alia ex causa nos teneant, quàm quodd judicìo populi recepte sint* (a). Sic Bulla Cœnæ, & Regulæ Cancellariæ obligant apud nos, licèt hic non promulgentur speciatim. Itaque eæ Constituciones de duello ea plenitudine, vel restrictione, quæ in usum deductæ sunt in Germania, etiam obligant. Quoad excommunicationem autem receptas esse æquè certum est, ac quodd sepultura sacra excludantur occisi in duello. Aliud est, an ea excommunicatio etiam quoad *reservationem* sit recepta, sive an ex usu habeatur pro tali, à qua absolvere soli Sedi Pontificiæ reservatum sit, præcipuè ubi mors secuta non fuit. SCHMÆLZGRUBER videtur dubitare: communius creditur reservata esse. Quodsi ita, per illud rigor minuitur, quodd, etsi reservata sit, absolvere in Germania alii quoque possint præter Summum Pontificem, de quo mox plura.

## §. VI.

## De ignorantia excusante ab his poenis.

- |   |   |
|---|---|
| 441. <i>Premissis notandis, statuuntur sequentia:</i>   | 445. <i>Etiã ignorantia comitans.</i>                       |
| 442. <i>Ignorantia legis vetantis duellum, aut actionem eò pertinentem, excusât à censuris.</i> | 446. <i>Non tamen affectata, &amp; crassa.</i>              |
| 443. <i>Item ignorantia pœna statuta.</i>   | 447. <i>Neque ignorantia reservationis à reservatione.</i>  |
| 444. <i>Aut ignorantia falsi.</i>   | 448. <i>Ignorantia autem debet probari in foro externo.</i> |
|   | 449. <i>Non item in interno.</i>                            |

441. **E**Quidem quæstio hæc ad principia generalia de Censuris pertinet; cùm tamen ex monogachis non pauci sint, qui saltem aliquas harum pœnarum ignorent, utpote viri militares, licebit hoc loco in compendio referre, quid de excusante ignorantia doceatur in Scholis. Ut ordine procedamus, Noto ex D. THOMA, & aliis Authoribus primò, ignorantiam aliam esse voluntariam, seu *vincibilem*, ac culpabilem; quando scilicet quis scire potest, ac debet, quid statutum sit. Aliam non voluntariam,

tariam, seu *invincibilem*, ac inculpabilem, quando quis vel non potest, vel non debet scire, quod statutum est, Aliqua etiam est *affecteda*, quæ directè est volita, & quæsita, ut si fugias ostendere tibi volentem Constitutiones Ecclesiasticas, contra duellum editas. *Crassa* erit, si omittas ipse inspicere ejusmodi Constitutiones, cum tamen faciliè posses. Alia est ignorantia *juris*, ut si ignores prohibentes leges, & statutas pœnas. Alia *facti*, ut si ignoras actionem tuam contineri ea prohibitione. Item alia est *antecedens*, cum quis, si sciret prohibitionem, non peccaret: nunc autem peccat, quia nescit. *Comitans* autem est, cum quis ignoret se peccare: sed nihilominus peccasset, tamen si notitiam habuisset. Talis non tam ex ignorantia peccat, quam *cum* ignorantia, ut inquit ARISTOTELES (a).

Noto secundò. Ubi lex est sufficienter promulgata, ita ut scientes liget, obligat etiam invincibiliter ignorantes: & quamvis hi excusentur à peccato, & pœna, si legem transgrediantur: alios tamen adhuc effectus habere lex potest. Sic lex Tridentini de matrimonio clandestino obligat ignorantes, ubi promulgata est; unde ignari hujus legis, clam contrahentes, matrimonium revera non contrahunt, quamvis nec culpæ, nec pœnæ reos se faciant.

Noto tertio. Constitutiones latæ contra duellum obligant, in quantum sunt usu receptæ in quavis Provincia post promulgationem Romanam, ut paulò antè monuimus, præscindendo jam ab ea quæstione, an requiratur etiam promulgatio, faciendâ in Provinciis. His præmissis

442. Dico primò: Si quis Constitutiones, contra duellum latas, invincibiliter ignorat, quamvis actionem admittat, non tantum in illis, sed etiam aliis legibus, vel etiam jure naturali, aut Divino prohibitam, non incurrit in foro conscientiæ pœnam excommunicationis, neque interdicti, aut suspensionis, aut etiam irregularitatis, consurgentis ex delicto. Videtur hoc colligi ex Cap. 2. de Constit. in 6. ubi hæc habentur: *Ut animarum periculis obviatur, sententiis per statuta quorumcunque Ordinariam prolati ligari volumus ignorantes, dum tamen eorum ignorantia crassa non fuerit & supina.* Ut ergo animarum periculis obviatur, idem dicendum erit de

(a) In 3. Ethic. c. 3.

de excommunicatione &c. Peculiaris adhuc ratio est circa excommunicationem; quia scilicet ad hanc promerendam requiritur inobedientia, & contumacia quædam contra Ecclesiæ legem: nescientes autem inobedientes, & contumaces dici non possunt. Puniendi ergo ejusmodi rei sunt poenâ legis Divinæ, contra quam scientes peccavere: non poenâ legis Ecclesiasticæ. Unde sequitur: si noverint unam Constitutionem, non autem alias, poenas ejus incurrunt, quam noverint: non aliarum. Non tamen nego etiam sententiam contrariam esse probabilem. De interdicto, suspensione, & irregularitate confurgente ex delicto par est ratio; quia interdictum etiam imponitur ob contemptum clavium, & contumaciam, ut notat FRANCUS (a). Et animarum periculis obviari ubique debet. Poena etiam Jure Divino statuta sufficiens est ad plectendum eum, qui non scit nisi Jus Divinum. Dixi de industria *irregularitatis ex delicto confurgentis*; nam eam, quæ factam ipsum sequitur, & absque omni culpa ob solam significationem, vel ob defectum lenitatis in bello justo contrahitur, & multo magis in duello, si in necem, aut mutilationem desinat, constat quacunque data ignorantia sive juris, sive facti contrahi; nam ideo ignorantia eximit à poena, quia liberat à culpa. Cum ergo hæc irregularitas, quæ factum ipsum sequitur, non exigat culpam, ignorantia non excusabit ab illa. *vid. PEREGR. (b)*

443. Dico secundò: Si quis haberet notitiam supradictarum Constitutionum, id est, actionum in iis prohibitarum: ignoraret tamen invincibiliter censuras in transgredientes esse statutas, is esset excusatus ab his poenis in foro conscientie. Equidem aliqui censent contrarium; eo quòd talis nihilominus esset inobediens contra legem prohibentem Ecclesiæ, quam scit: ergo non est, inquit, cur talis poenas non incurrat. Utique malefici, addunt, in foro criminali puniuntur poenâ per legem statutâ, quamvis nesciverint poenam illam esse tali delicto statutam: ergo idem fiet in foro Ecclesiastico. Præterea occidens incurrit irregularitatem, & casum reservatum, quamvis nesciverit irregularitatem, & reservationem: homicidio esse annexam: ergo etiam incurrit censuram. Hæ rationes sententiam horum Authorum reddunt probabilem: nihilominus opposita videtur probabi-

(a) In cap. 2. de Const. in 6. (b) De duell. q. 8. n. 20.



babiliior. Ratio validior stat in eo; quòd tales pœnæ ab Ecclesia imponantur tanquam admonitiones, & medicinæ præservantes: non autem habent rationem admonitionis, aut medicinæ *præservantis*, nisi prænoscantur ante culpam, & atque ita timore suo detertere valeant: ergo etiam non incurrunt, nisi præcognoscantur. Pœnas civiles quod attinet, sunt, qui putant, extraordinariæ si sint, non incurri ab illo, qui invincibiliter ignorat, eas esse transgressionis annexas, quod probabile etiam credit SUAREZ, SANCH. CASTROPAL. *vide* LA CROIX (a). Et certè, qui pœnam nescit annexam, minùs protervè peccat: ergo etiam mitiùs puniendus est. De irregularitate suprà diximus, quòd aliqua incurratur non ex delicto, sed alia de causa, e. g. *ex defectu* lenitatis in bello justo: ergo cum irregularitate *ex delicto*, aut alia censura comparari nequit. Sic etiam de reservatione dico, si aliqua esset purè pœnalis, qualem hodie dari negat LA CROIX (b), tunc etiam illa ab ignorante non incurreretur, sicut nostræ censuræ, pœnæ rationem habentes.

444. Dico tertio: sicut ignorantia juris, id est, prohibitionis, & pœnæ, per Constitutiones latæ, in materia duelli excusat à censuris: sic etiam ignorantia facti excusat. Sic multi nôrunt equidem prohibitum esse duellum, & excommunicatione puniri ab Ecclesia: nesciunt tamen actiones, per quas opera variis modis ad duellum confertur, eadem damnatione involvi; hos, ajo, à censuris quoque eximi in foro conscientiæ. Idem est, si quis duellum suum haberet pro rixa extemporanea. Ratio est eadem ferme, qua probavimus, ignorantiam juris excusare.

445. Dico quarto: ignorantia *comitans* tam *juris*, quàm *facti* excusat ignorantem in foro interno à censuris. Sic e. g. ignorat quis, charitatem, quam scribit, vel defert conductus ab alio, esse revera provocationem ad duellum: comparatus tamen ita est animo, ut esset scripturus, aut declaraturus, quamvis sciret esse talem: hæc ignorantia *comitans* factum, ajo, excusat à censuris; nam per actum externum, & internum imperantem hanc scriptionem, scribens non cupit lacerare leges Ecclesiæ: ergo per hos actus non meretur censuram juxta dicta *Conclus. I. Actum*

Uu

autem

(a) L. 7. n. 95. l. i. n. 767. (b) L. 6. p. 2. n. 1662.

autem internum, quem fortè conjunctum habet, secum statuens: *Scriberem, vel deferrem etiam vetante Ecclesia*, hunc, inquam, *merè internum* Ecclesia non punit per censuras, ut habet communis. Similiter si sciret quis provocationem ad duellum esse prohibitam jure Divino; & naturali, ignoraret tamen inflictam esse huic delicto censuram: nihilominus nimium audax diceret secum: *Provocarem, non obstante quacunque censura*, hæc ignorantia juris, ajo, iterum excusat à pœna illa. Ratio est eadem; quia per actum externum, & imperantem internum plus non agit, quàm ille, de quo *in Conclusione II.* egimus; per internum autem non conjunctum cum externo, sibi respondente, non incurritur censura juxta stylum Canonici juris. Quod si autem nullum actum internum condicionalem adjungas, sedingas, cum provocantem, *habitualmente* spectatum, esse ita constitutum, ut facilè prævideri possit ita acturus, etsi legem Ecclesiasticam cognosceret, vel pœnam sciret annexam; tunc sentio, ejusmodi Constitutionem habitualement nil facere ad meritum, vel demeritum. Sic conjugatus, qui accedit ad conjugem propriam, quem tamen tu divinas, vel DEUS scit accessurum fuisse etiam ad alienam, si modò invenisset in thoro, non contrahit culpam, aut pœnam adulterii. Fateor tamen, sententias contrarias etiam esse probabiles; & niti gravi autoritate DD. (a). Nihilominus meminisse juvat R. J. 49. VI. *In panis benignior interpretatio est facienda.*

446. Dico quintò: Ignorantia *affectata* sive *juris* sive *facti* non excusat; quia est expressè voluntaria, & æquiparatur dolo. Sic DD. cum SUARIO communiter (b). Idem ferme dicendum de ignorantia *crassa*, & *supina*; cum enim hæc non excuset à culpa, neque excusabit à pœna (c). Excusat tamen ignorantia *crassa* à pœna legis, quando lex punit eos, qui *scitenter* fecerint. Quin si lex dicat: qui *presumpserit, vel ausu temerario* aliquid fecerit, sit subiectus huic pœnæ, adhucdum excusabit ignorantia *crassa* (d).

447. Dico sextò: Si quis habens notitiam Constitutionum, & pœnarum, nesciret tamen reservationem, id est, quoddam absolutio reservata sit

(a) Vid. *Peregr.* q. 8. à n. 27. (b) In 3. p. D. Thom. tom. 5. disp. 4. sect. 11. n. 1. (c) *Sancti* tom. 1. de matrim. l. 5. disp. 3. n. 13. (d) Idem l. c. l. 3. disp. 48. n. 7.

sit summo Pontifici, sicut reservata est in duello, propter hanc ignorantiam non excusaretur à reservatione. Ratio est; quia talis reservatio non est statuta in pœnam: sed ob bonam Ecclesiæ gubernationem; nam expediret ad bonum regimen, ut graviora delicta superioribus reserventur juxta Tridentinum (a).

448. Dico septimò: Quamvis in foro externo, duobus mensibus à legis promulgatione transactis, præsumatur illius notitia: tamen admititur probatio in contrarium. Quomodo autem probetur, dubium est inter Autores. Aliqui dicunt, ignorantiam esse probandam juramento ignorantis, ita COVARRUVIAS (b). Alii dicunt, conjecturis esse probandam, ita BALDUS (c). PANORMITANUS docet, meo judicio, optimè (d) esse arbitrium secundum quantitatem præjudicii, qualitatem personæ allegantis ignorantiam, qualitatem ignorantiae, & qualitatem facti, in quo ignorantia prætenditur.

449. Dico octavò: In foro conscientiae si quis asserat, se nullam habuisse notitiam supradictarum Constitutionum, vel pœnarum ibi statutarum in actionem, à se commissam, credendum est ei; quia, licet in foro externo prætendenti ignorantiam incumbat onus probandi: tamen in foro conscientiae creditur pœnitenti pro se, & contra se (c).

## §. VII.

### De absolutione à Censuris latis in duellum.

450. *Præmissa notitia generali de reservationibus, dico:*

451. *Causa duelli est reservatus Papa.*

452. *Potest tamen quandoque etiam Episcopus absolvere.*

453. *Possunt id quoque Regulares plerique.*

454. *Non obstante derogante Clementis VIII. de anno M. DCI.*

455. *Circa hanc residuum dubium unicuique explicatur.*

450. **D**E excommunicatione potissimum hic nobis sermo erit; namque de pœnis propriis solis Clericis, dictum est §. IP. De pœnis Magistratuum & Principum, quas inter eminet *Interdictum*, agemus *Cap.*

Uu 2

seq.

(a) Sess. 14. de cas. reserv. (b) L. 2. var. Resolut. c. 10. (c) In l. 1. num. 1. ff. de LL. (d) In cap. 2. num. 9. de Constit. (e) D. Thom. Quodlibet. 1. art. 12.

*seq.* Cùm ergo quæretur, ad quem spectet absolvere ab excommunicatione, quæ ratione duelli contrahitur, certum nobis debet esse inprimis, sicut potestas ferendi Censuras in certa peccata datur in Ecclesia, ut n. 426. probatum est : sic etiam dari potestatem ab iis absolvendi; secus enim Ecclesiæ disciplina magis in destructionem vergeret, quàm ædificationem, ut observat *TOURNELY* (a). Nec tamen ista potestas solvendi censuras cum suis peccatis promiscuè conceditur, sed reservantur multæ Censuræ, & peccata solvenda altiori potestati. Papa sibi reservat talia solum peccata, quæ annexam habent censuram excommunicationis : quamvis posset & alia peccata sibi reservare. Est autem *Reservatio* non concessio, seu negatio jurisdictionis ad absolvendum ab aliquo peccato, quamvis circa alia concedatur. Certum est, in Ecclesia esse potestatem aliqua peccata reservandi, à quibus inferiores Confessarii nequeant absolvere, ut sic melius, & securius dirigantur subditi, & magis absterreantur à certis peccatis. Reservari ergo possunt *atrociora quadam, & graviora delicta*, ut docet Tridentinum (b) *præsertim illa, quibus excommunicationis censura annexa est*. Pluribus hoc contra Wicleffum, & hæreticos alios demonstrat *SUAREZ* (c). *In articulo mortis* cessat reservatio, & *omnes Sacerdotes, quoslibet penitentes a quibusvis peccatis, aut Censuris absolvere possunt, ne scilicet quis pereat* (d); quia omnes tunc habent delegatam jurisdictionem ab Ecclesia, id quod constat ex constanti Ecclesiæ praxi (e). Unde providè in pago quodam Parochus, monitus antè à provocato, dum ex urbe dimicaturi venerant duo monomachi, ex insidiis expectavit pugnae exitum, quam impedire jam nequibatur, & strato uno opportunè advolavit, data, antequam expiraret, sacra absolutione. Quid autem intelligatur per mortis articulum, & quàm latè is patcat : Item an in casu necessitatis ab inferiore Sacerdote absolutus post superatum periculum sistere se teneatur superiori, qui de jure extra periculum absolvere poterat : Item an Sacerdos non approbatus absolvere possit præsentè approbato, aut proprio Sacerdote, aliæque Censuris generatim convenientia, videri possunt apud Theologos passim. Cæterum, præscindendo à mortis articulo,

(a) Theol. Moral. tom. 2. tract. de Censur. c. 5. (b) Sess. 14. de Pœnit. c. 7. (c) De Sacram. Pœnit. disp. 29. Sect. 1. & 2. (d) Trid. l. cit. (e) *Tournely* l. cit.

451. Excommunicatio, lata in reos de crimine duelli, non est reservata vi Tridentini, neque vi Constitutionis Gregorianæ; est tamen reservata per Clementinam §. XIX. hīs verbis : *Cujus interdicti relaxationem, aut excommunicationis absolutionem ab alio, quàm à nobis, aut pro tempore existente Romano Pontifice, pœnitentia, & satisfactio congruè peracta, nisi in mortis articulo constituti, nequeant obtinere, prætextu quarumvis facultatum, & indulgentiarum.* Pontifex itaque solus absolvit, & quidem pœnitentiâ, & satisfactioe peracta, quod intelligendum est, ait PIGNATELLUS (a), “ quando absolutio datur extra mortis articulum, & quando sine gravi incommodo potest ille satisfacere ante absolutionem. Et loquitur de absolutione danda à Sede Apostolica : non autem imponit formam aliis habentibus privilegia sine tali restrictione. „

452. Non obstante reservatione Episcopus absolvere potest primò, quando delictum est occultum, idque per potestatem sibi à Tridentino concessam (b), cujus verba sunt : *Licet Episcopis in quibuscunque casibus occultis, etiam Sedi Apostolica reservatis, delinquentes quoscunque sibi subditos in Diœcesi sua per se ipsos, aut per Vicarium, ad id specialiter deputandum, in foro conscientia gratis absolvere, imposita pœna salutari.* Cui privilegio per Clementinam derogatum non est; quia de illo hæc singularem mentionem non facit, quod tamen ad derogandum requireretur; cum sit illa facultas absolvendi concessa dignitati Episcopali, non personæ; & sit generalis, non distinguendo inter reservationes præteritas, & futuras. *vid. PIREGRIN. (c).* *Occultum* autem crimen, ait SUAREZ (d), hic sumitur, prout in jure distinguitur à *publico*; est autem publicum, quod in oppido, aut vicinia, vel in Collegio, aut in Communitate aliqua omnibus notum est, ut publicè diffamatum. Unde licet sit notum aliquibus, potest dici occultum, quamdiu peccator non laborat publica infamia. Si verò duellum deductum sit ad forum contentiosum, etiamsi uno teste probetur, nequit Episcopus ab illo absolvere, nisi delinquens in foro externo ob defectum plenæ probationis absolurus fuerit. PIGNAT. (e) Secundò : Si quis excom-

Uu 3

muni-

(a) L. cit. n. 183. (b) Sess. 24. c. 6. de Reform. (c) Q. 37. n. 4. (d) De Pœnit. disp. 30. sect. 2. (e) L. cit. à p. 155.

municationem suprà dictam contrahit, nec ob verum impedimentum adire potest summum Pontificem, potest ab Episcopo absolvi, etsi delictum jam non occultum, sed publicum sit. Colligitur ex iis, quæ continentur *Cap. de casero. de sent. excomm.* non enim est ratio major, cur Episcopus potius absolvere possit pœnitentem, reum de percussione Clerici, aut alterius criminis: & non etiam in casu duelli id possit. *Impeditus* autem dici potest, qui *imminente mortis articulo, puerili, vel senili aetate, fragilitate sexus*, vel alio impedimento Canonico detinetur (a). Docet PEREGRINUS (b) cum aliis, & meritò, hanc doctrinam tunc quoque locum habere, quando excommunicatus impeditus procuratorem mittere posset; ad talem enim mittendum non obligatur à lege. Docet præterea, Episcopum in ejusmodi casu ministerium nudum absolvendi posse etiam committere Confessario, eo quòd Episcopus absolvar in dicto casu virtute jurisdictionis delegatæ, à Papa sibi concessæ, vel in privilegium perpetuum ratione dignitatis, vel virtute potestatis ordinariæ.

453. Præter Episcopum etiam varii Regulares, præsertim Mendicantes, vi suorum privilegiorum, habent potestatem absolvendi etiam à censuris Papæ reservatis, pro foro tamen interno tantum; si tamen censuras excipias in Bulla Cœnæ contentas; hæ enim censentur majores, nec comprehendi in concessione generali (c). Quod speciatim crimen duelli attinet, notandum venit, quòd aliquæ actiones, ad duellum pertinentes, in Constitutione CLEMENTIS VIII. sint sub pœnis Ecclesiasticis prohibitæ, quæ nondum erant antè, prohibitæ sub his pœnis à Constitutione GREGORII XIII. aut Tridentini Decreto. Talis est *e. g.* provocatio, post quam nec sequitur pugna, nec in locum certaminis descenditur. Unde jam quæstio oritur, an ab his omnibus possint absolvere Regulares, habentes aliàs facultatem absolvendi à reservatis Papæ: vel an tantum ab aliquibus? Ad quam quæstionem respondeo, quòd à casibus Clementinis, sive occultis, sive manifesti sint (pro foro tamen conscientie solum) possint absolvere omnes Regulares, aliique Sacerdotes, sive intra, sive extra Italiam degentes,

(a) C. 26. de sent. excomm. (b) Q. 37. n. 8. (c) Compend. privil. Soc. I. v. Absolut.

tes, qui vi privilegiorum suorum possunt absolvere à casibus, Pontifici reservatis. A casibus autem, jam contentis in Tridentino, aut Gregoriana, absolvere non possunt existentes in Italia extra Urbem; possunt id tamen Regulares, ac Sacerdotes existentes alibi, & aliàs gaudentes privilegio absolvendi à peccatis, & censuris Papæ reservatis.

Triplicis hujus asserti veritas ut pateat, scias; postquam jam plerique Regulares generalem illam facultatem obtinuerant, produisse Bullam Clementinam contra duellum, quæ, licet sibi reservet omnes actiones, quas prohibet; Regularibus tamen facultatem absolvendi non adimit; habentibus aliàs privilegium absolvendi à reservatis; privilegii enim hujus, per singularia merita obtenti, non fit peculiaris mentio in Clementina reservante, & derogante, quod tamen ad derogandum necesse esset; ut docent Authores passim cum PEREGRINO (a).

454. At novem annis post, scilicet anno MDCL. die IX. mensis Januarii ejusdem CLEMENTIS jussu sacra Congregatio S. R. E. Cardinalium, negotiis, & consultationibus Episcoporum, & Regularium præposita, Sacerdotibus omnibus tam Sæcularibus, quam Regularibus *per universam Italiam, & extra urbem* degentibus, quamvis Ordinum etiam Mendicantium essent, prohibuit, ne prætextu privilegiorum &c. ab ullis casibus, quomodocunque Sedi Apostolicæ reservatis, absolvere quemquam præsumant, nisi in articulo mortis: sive cum nova, vel speciali Sanctitatis suæ, aut Successorum suorum impetrata licentia.

Cum autem postea dubia quædam, & difficultates circa ejusdem Decreti interpretationem, atque observationem emerissent, eadem Congregatio jussu ejusdem Pontificis ita mitigavit, ac declaravit præcedens Decretum, ut aliquos tantum casus anno sequente MDCL. enumeraverit, pro quibus absolvendis facultas adempta sit Regularibus, aliisque privilegiatis. Hos inter recensetur casus *provocantium, & pugnantium in duello juxta Decretum Tridentini, & Constitutionem Gregorii XIII.* Qui itaque actionem committit, spectantem ad duellum, & jam prohibitam in Constitutione Gregoriana, & Decreto Tridentini, ille absolvi nequit à Sacer-

doti-

(a) Q. 37. n. 14.

dotibus tam Regularibus, quàm Sæcularibus *per universam Italiam, & extra Urbem degentibus*. Et quamvis hæc clausula in declaratione data anno MDCII., non addatur expressè: sufficit tamen, quòd profiteatur S. Congregatio, nil aliud facere se, quàm declarationem prioris Decreti dati anno MDCL., ita ut illud vellet in suo robore permanere solum quoad casus in declaratione recensitos. Decretum Congregationis exhibet

QUARANTA. (a)

Quæ cum ita sint, facultas absolvendi à Casibus etiam per Tridentinum, & GREGORIUM prohibitis, annexaque Censura manet salva Regularibus, aliisque, vel extra Italiam, vel in ipsa Urbe constitutis, qui aliàs privilegium generale habuere. Unde non capio, quo fundamento doctrinam hanc rejicere possit PIGNATELLUS (b), & contrarium omnino sibi *certum* dicere. Ratio sua ferè tota consistit in autoritate BONACINÆ (c) PEREGRINI (d), & SANCHEZ (e), quos pro se sentire existimat. At SANCHEZ pro suo fundamento nil affert aliud, quàm Constitutionem CLEMENTIS VIII. An. MDXCII. editam contra duella: Jam verò diximus, ex reservatione generali non fuisse derogatum privilegiis Regularium. Item CLEMENS VIII. in sua declaratione pronuntiat, se nihil innovare voluisse per decretum An. MDCL. nisi quòd sex vel septem variarum materiarum casus sibi reservatos velit, & quidem ita, ut absolvendi licentia solis Sacerdotibus negetur existentibus in Italia extra Urbem: ergo alii Sacerdotes extra Italiam, & intra Urbem possunt tam ab his, scilicet in Tridentino, & Gregoriano Decreto contentis, quàm ab omnibus aliis absolvere, prout antea potuere per privilegium suum. PEREGRINUS videtur loqui solum de Sacerdotibus intra Italiam, & extra Urbem degentibus. BONACINÆ etiam de his solis sermo est, cum nihil adducat aliud, quàm Decretum editum An. MDCL.

Itaque malim sentire cum PAULO COMITOLO (f), FILLIUCTO (g), DI CASTELLO (h), aliisque, nostram sententiam tenentibus. Ut nihil dicam de

Go-

---

(a) In summa Bullarii tit. Cas. Reserv. (b) Cit. n. 192. (c) De censur. disp. 2. q. 6. p. 1. n. 41. (d) Quæst. 38. n. 4. (e) L. 2. in Dec. c. 39. n. 27. (f) Lib. 6. Mor. q. 17. (g) Tom. 1. tr. 15. de censur. in partic. c. 5. n. 10. (h) De justit. l. 2. tract. 1. d. 10. n. 238.



GOBATO (a) dicente: " In Germania nostra superiore Mendicantes absol-  
vunt sine scrupulo. Congrediuntur Ingolstadii persæpe Studiosi Acade-  
mici duello propriè dicto, privato, non tamen recurrunt ad Sedem "  
Episcopalem, vel Apostolicam. „

455. Hoc solum videtur remanere dubium, an per Decretum An-  
ni MDCII. reservatæ maneat pro Italia Censuræ latæ in *mandantes duel-  
lum, instigantes, auxiliantes, consilium; vel favorem dantes &c. ex com-  
posito spectatores, vel socios quovis modo se præbentes, etiam tunc, quando pu-  
gna aliunde fuerit impedita*; hæc enim omnia damnantur in Gregoriana:  
& tamen Decretum dicti anni reservat tantum casum *provocantium, &  
pugnantium in duello* juxta Constitutionem Gregorianam. Item an etiam  
reservetur crimen provocationis solius, quam non secuta est pugna; non  
enim satis pater, an particula & sit sumenda distributivè, vel collectivè.  
Dubium hoc solvitur, si principia duo recolamus, passim recepta. Pri-  
mò quòd reservatio sit strictæ interpretationis; cum videatur odiosa, ha-  
bens adjunctam aliquam rationem pænæ. Secundò, quòd privilegia fa-  
vorabilia, quale est etiam licentia absolvendi à reservatis, sint latæ inter-  
pretationis juxta illud: *Beneficium Principis latissimè est interpretandum* (b).  
Itaque existimo solam provocationem, conjunctam cum pugna manere ita  
reservatam in Italia extra Urbem, ut absolutionem ab eadem dare non pos-  
sint etiam ii, qui privilegium absolvendi à reservatis obtinuerunt ante Cle-  
mentem VIII.

### ARTICULUS III.

*De impedimento, quod usui Sacramentorum afferre  
Duellum possit.*

**D**E duobus Sacramentis differere oportebit hoc loco: de Matrимо-  
nio scilicet, & Pœnitentia, in quorum utroque turbare quid valet  
duellum. Quid ad Sacramentum Ordinis vel suscipiendi, vel exercendi  
faciat, ex natura censurarum colligere datur, quas declaravimus *Articuli*

Xx

pra-

(a) Theol. Pract. tr. 7. n. 573. (b) L. 3. ff. de Constit. Princ.

*præcedentis §. IV.* In reliqua Sacramenta non admodum influit, nisi quatenus ex negata absolutione in Sacramento Pœnitentiæ, usus reliquorum illi-  
citus redditur. Itaque id solum præsentis Articulo quaeremus *primò*, an ex  
duello oriri impedimentum matrimonii possit: vel dissolvi sponsalia? *Se-*  
*cundò*: An Confessario constare debeat, quo animo pœnitens sit erga  
duellum?

## §. I.

An ex Duello oriri possit impedimentum Matrimonii, vel  
dissolvi Sponsalia?

456. *Ex proposito casu circa matri-*  
*monium,*

457. *Colligimus ortum fuisse impedi-*  
*mentum criminis, siquidem ex*  
*duello secuta sit mors.*

458. *Nec obstant argumenta contra-*  
*ria.*

459. *Aliud foret, si non ex duello*  
*mors sit secuta.*

460. *Id quod ex variis indiciis colli-*  
*gendum.*

461. *Casus de Sponsalibus, interve-*  
*niente duello,*

462. *Resolvitur cum limitatione.*

456. **C**Asum enarrabo, qui viam pandet ad explicandam doctrinam, in  
qua primò quæstio est circa matrimonium. Deperibat vir qui-  
dam militaris uxorem sui commilitonis, quæ cum non segnis amoris re-  
sponderet, eo prolapsi sunt ambo, ut matrimonium sibi mutuo sponderent,  
incundum post mariti obitum, quin & hanc mortem non tacitis votis expo-  
ptarent. Deerat sola occasio hanc machinandi, donec maritus, litteris  
amatoriis forè interceptis irritatus, abreptusque æstu, Graculo acriter  
diras cœcinerit, depexeritque liberaliter affusus probris, adulterum, &  
nescio quid, vocitando. Graculus opportunam occasionem sibi offerri  
ratus, per epistolam postulat pro injuriis sibi satisfieri gladio, utpote quæ  
graviores fuissent, quàm ut eas militaris patientia ferret. Per aliam mox  
epistolam complice femina monet de oblata occasione tollendi à medio  
invisum Silicernium, & optatis potiundi nuptiis. Respondit ista, hoc in  
consilio id solum sibi dolere, quòd in ancipiti pugna amantissimus pugil  
semet exponat discrimini: sperare se nihilominus evasurum victorem con-  
tra maritum suum, fungi hominem. Maritus condicit in pugnam, peri-  
culosè confossus moritur, relicto dubio, an verè obierit ex vulnere ac-  
cepto. Recipiunt se aliò homicida, & femina, ibique connubio junguntur.

457. *Quæ-*

457. Quæritur, an *impedimentum criminis* hoc duellum induxerit? Constat, Ecclesiam, ut conjuges magis abstercantur ab adulterio, & machinanda sibi nece, statuisse *impedimentum matrimonii* ineundi cum complice, quod *impedimentum criminis* dicimus, non *impediens* solum: sed & *dirimens*, hoc est, quod matrimonium non solum illicitum, sed & invalidum, ac irritum facit. Hoc *impedimentum* contrahitur, quando duo adulterium committunt cum promissione matrimonii quondam ineundi: vel moliuntur conjugicidium etiam sine adulterio, cum intentione tamen ineundi matrimonii post peractam cædem.

Illusere more suo Lutherus, & Melancthon huic *impedimento*, statuto ab Ecclesia. At si potestas Principum laicorum contractus quosdam civiles ipso jure irritos reddere per statutum potest: cur non etiam quosdam contractus matrimoniales Ecclesia? Qua potestate semel stabilita, ex æquo Ecclesia eadem usa est ad præstandam conjugibus securitatem mutuum, ne una pars alteri vel fidem frangeret, vel ipsam mortem machinaretur, spe contrahendi aliquando melioris conjugii. In casu nostro de commisso adulterio ante mortem mariti nil constat: promissum tamen matrimonii datum, acceptumque est, & ad hoc tanto citius consequendum bonus maritus in duellum est evocatus. Rebus sic stantibus

458. Dico primò: si certum esset, quod maritus ex accepto per duellum vulnere obierit, non video, quid conjugidas ab *impedimento criminis* eximeret; nil enim videtur deesse eorum, quæ ad *impedimentum* hoc sacri Cænes requirunt. Vel dic amabo, quid deest?

Dices primò: Provocavit vir militaris non tantum, ut nuptiis potiretur: sed, imò præcipue, ut vindicaret probra, in se liberaliter jacta, quæ inulta abire si passus fuisset, certe honore suo excidisset. Resp. Sufficere, quod nuptiarum cupido etiam stimulos suos, quamvis non unice, addiderit, ut tanto lubentius, tanto animosius certaret. Jura non expriment, quod novæ nuptiæ debeant præcipue, vel unice spectari. Sic ait LESSIUS (a), si Cajus maritus, præmisso adulterio cum Bertha, machinatus sit mortem suæ uxori, primariò quia oderat, secundariò ut cum Bertha

Xx 2

tha

tha iniret matrimonium, oriri impedimentum; quia machinati sunt animo contrahendi.

Dices secundò: illi solum contrahunt impedimentum criminis, qui *machinantur* mortem innocenti. Hac voce utitur lex Ecclesiastica sæpius C. 1. 3. 6. 7. *De eo, qui dux. in matrim. quam poll. per adult.* Jam verò qui duello congreditur, mortem non *machinatur*; nam *machinatio* propriè significat occultas technas, seu insidias, ut habet LA CROIX (a): In duello autem aperto Marte certatur. Neque obruitur incrimis, cavere sibi, aut defendere se nesciens. Resp. Vocem *machinari* non adedè strictè intelligi à SS. Canonibus, quasi verò tunc solum impedimentum hoc locum haberet, si per occultas machinationes patrata sit cædes; si enim significationem hujus vocis rigidè velimus attendere, etiam ab effectu secuto hæc vox præscindit; *machinari* enim etiam ille dicitur, qui effectu frustratur: neque tamen ira machinanti, sive struenti necem impedimentum lex injicit, ut docet communis. Vel si vir noster militaris non verè sit *machinatus* necem, dico eum nihilominus contraxisse impedimentum; quia alia lex dicit (b): si vir, aut mulier virum, qui mortuus fuerat, *occidisse* notetur. Occidere aperta vi etiam est *occidere*. Quòd armatum cum propriæ vitæ periculo aggressus sit, non excusat: sed demonstrat, quòd majore infamia, ac libidine fuerit agitatatus, ac alius, qui nihil cogitantem opprimeret: vel solum consilio, aut mandato necem procuraret.

Dices tertio: Non interveniente adulterio, non contrahitur impedimentum criminis, nisi *uterque* complex sit necem machinatus, ut constat ex communi. Atqui uxor interfecti nihil ad necem contulit. Fuit quidem conscia duelli ineundi: at non jussit, non suavit. Scripsit tantummodo, *id solum sibi dolere, quòd in ancipiti pugna amantissimus pugil semet discrimini exponeret*. Quamvis autem inde sequatur, sibi non dolituram mortem mariti: tamen ex hoc dici necdum potest, quòd ei mortem machinara sit. Sæpe mortem alicujus non dolemus: quam tamen machinatione nostra non causavimus. Dein ad summum dici potest duellum machinata: non

(a) Ex Pyrrho Corr. Krimer. l. 6. p. 3. n. 618. (b) Can. Si quis. 31. q. 1.

non autem mortem; incerti enim eventus ea pugna fuerat. Resp. Attendenda etiam esse illa verba muliebris epistolæ: *Sperare se nihilominus, eum victorem futurum contra fungi hominem, maritum suum, tunc se nil moraturam* &c. Quid hoc aliud sonat, quàm votum mortis; & quid est aliud, quàm renovato promisso ruenti amasio calcar addere, ut non pugnaret qualemcunque pugnam: sed fatalem. Incerti eventus quamvis duellum fuerit, faventem tamen votis suis eventum quæsitit amasius, & ut quæreret, animavit procax mulier, ex æquo itaque æternum spe sua uterque deiciendus. Et hoc, si fingatur maritus ex vulnere obiisse.

459. Jam verò & illa appendix consideranda venit, quoddam maritus occubuerit relicto dubio, an ex accepto in duello vulnere. Unde Dico secundò, post mortuum maritum non obstitisse impedimentum criminis matrimonio. Ratio est; quia satis communiter cum PONTIO, & MASTRIO docetur, ad impedimentum hoc requiri, ut mors sequatur ex machinatione rei, non ex imperitia chirurgorum, aut ipsius vulnerati culpa. Neque sufficere solam voluntatem dandi vulnus lethale, si successus conatui non respondeat. Quamdiu ergo dubium est, an mors secuta sit ex vulnere, tamdiu dubium est, an omnia, quæ constituunt impedimentum criminis, adsint: quamdiu hoc dubium obversatur, tamdiu libertas validè nubendi est in possessione.

Dices fortè: In dubio præsumptio stat pro vulnere. Resp. Nisi ex altera parte adessent argumenta quædam, ex quibus probabiliter colligi possit, aliunde venisse mortem, talia autem adfuerint in casu nostro, necesse est; secus non diceretur, vulneratum obiisse relicta vera incertitudine, an ex vulnere.

460. Quæres fortè, quibus indiciis cognoscatur, verè fatale fuisse vulnus. Pauca dicam, cætera relinquens tractantibus ex instituto res criminales. Sunt, qui ex temporis spatio, quò vulnere supervivit æger, id desumendum putent. De certo autem tempore minimè conveniunt; alii quinque dies, alii octo, alii sexaginta, alii annum nominant, ut videre est apud FARINACIUM (a). Edictum Brandeburgicum de duello statuit

Xx 3

dies

(a) P. 5. Oper. Crim. q. 27. n. 31. seq.

ches novem. Meo judicio, ubi in foro civili ejusmodi terminus receptus est, poterit etiam forum Canonicum se accommodare, & id vulnus habere pro lethali, quod necem intra hoc tempus attulit, & ex eo ipso statuere, an impedimentum criminis fuerit contractum; ea enim est harmonia utriusque fori, ut unum alterius leges sequatur, ubi proprias circa quamdam materiam non habet. Indicium certissimum ait CARPZOVIVS (a), capi debere ex inspectione cadaveris, facta à peritis Chirurgis, & Medicis; eo quodd hoc judicium spectet potius ad artem medicam, quam ad scientiam legum. Quodd si hi ipsi in arte periti hæreant dubii, nequaquam ad pœnam ordinariam deveniri possent. Infero ego: ergo, stante eodem dubio, nequaquam contralii impedimentum criminis; sicut enim pœna capitalis non nisi homicidio perfectò imponitur: sic dici potest, pœnam hanc Ecclesiasticam non nisi homicidio perfectò imponi. Nolim hic disputare, an pura pœna sit, vel simul inhabilitas, quam etiam ignorantes hanc legem incurrant. Sat ampliè hanc quæstionem P. PICHLER ventilat, contra communiorē defendens, pœnæ rationem habere, ab ignorantibus non contrahendam (b).

461. A Matrimonio ad *sponsalia* progrediamur, visuri, quid his quoque turbarum ex duello sit ortum. In Academia quadam Germaniæ artem amandi præ aliis didicerat Cajus, & Berthæ captus illiciis promiserat nuptias. Rivalem nactus est Titium, qui domum puellæ crebrius frequentando iras provocavit Caji, frendentis, suum sibi jus antiquius attrectari. Quid multis? duellum initur, vulneratur Cajus: Titius ex urbe se subduxit. Restitutus Cajus à vulnere spernere jam Bertham incipit, utpote periculosa pugnæ causam, & levis animi, venalisque affectus puellam. At renuebat hæc relaxare sponso vinculum, multum se dolente, inquiens, accidisse duellum, totumque commercium cum Titio intra honesti limites stetit. Dum sic litigando trahuntur moræ, Titius ad Bertham iterum per Epistolam revisit, & prout est *varium, ac mutabile semper, sæmina*, blanditiis inescaram in suas partes pertrahit. Interea etiam Cajus, reviviscen-  
ribus igniculis, cum Bertha redire in gratiam parat, & promissum confir-  
mare.

---

(a) Pract. Crim. p. 1. q. 26. à n. 14. (b) In tit. 7. l. 4.

mare. Cum ecce, jam refractariam invenit, multisque conquerentem, quod duello se infamare, & leviculæ puellæ notam affingere non dubitavit.

462. Quæritur primò: An Cajus ex æquo prior renunciaverit sponsalibus? Secundò: An postliminio Bertha?

Facultatem rescindendi hæc sponsalia, vel deberet Cajus nancisci ex duello, vel ex amicitia Berthæ cum Titio. De ejusmodi amicitia docent Authores communis, tum sponsum posse resilire, si sponsam sciat admittere ab alio tactus, vel oscula impudica: & multo magis si fornicaretur (a). Item si sponsalia interea contrahere cum alio tentaret; nam frangenti fidem fides frangatur eidem. Incumbit ergo jam Cajo probare, ejusmodi quid Bertham admisisse. *Probare*, inquam, quia ex præcipiti zelotypia atras has umbras fingere non sufficit: *Neque delicta presumuntur*. Duellum quod spectat, videndum, num, & quam eidem causam Bertha dederit. Si, dum res jam spectabat rixam, nihilominus ad se admisit Titium, & benevolentiae signa exhibere perrexit, jure se offensum potest conqueri Cajus, & periculp à procace foemina expositum, non restinguente incendium, vel fortè excitante. Certè si verè amâisset Cajum, huic diffidio se interposuisset, & repudiâisset omnem familiaritatem Titii. Quod si autem eam familiaritatem continuavit innocenter, mali nil suspicata, neque præviso tanto conflictu, neque de eo committendo ante monita, non video, cur acquisito suo jure propter duellum excidat.

Gravius pro se argumentum videtur habere Bertha, vi cujus resilire à sponsalibus possit patrato duello; fama enim commissæ pugnae ubique diffusa puellam depingebat leviculam, amasiis venalem, à qua ducenda jure abhorreant prudentiores juvenes: hanc ergo notam si Cajus Berthæ accivit absque data sufficiente causa, sola rivalitate incitatus ad arma, videtur Bertha non immeritò resilire. Contrà tamen perpendendum venit, quod Bertha facile semet purgare valeat ab ea nota, si modò Cajo nubat petenti, qui nubendo quasi publicè fatetur, temere se de sponsæ suæ fide judicasse. Quod si omnibus consideratis causa rescindendi sponsalia manet dubia, accedere debet autoritas Judicis Ecclesiastici (b). Quia vi contractus sponsaliti

---

(a) C. 25. de Jurejur. (b) Sanchez cum aliis.

litii pars utraque est in possessione sui juris acquisiti : in dubio autem nemini licet propria auctoritate alterum invictum deturbare de possessione sui juris.

## §. II.

An Confessario constare debeat, quo animo Pœnitens sit erga Duellum?

463. *Alanus Episcopus vetas absolvi eos, qui non promitterent scripto, se duellum nunquam inituros.*  
 464. *Unde quadruplex oritur questio.*  
 465. *Cui pramittitur quadruplex fundamentum Theologicum.*  
 466. *Ex quo respondetur primò ad factum Alani :*  
 467. *Tum quaritur, an hodie quemlibet nobilem, vel militarem virum de duello examinare debeas Confessarius.*  
 468. *Præcipue quando vel intra Confessionem :*  
 469. *Vel extra dederit causam non bene suspicandi de ejus animo circa duellum.*

463. **Q**uestioni huic ansam dedit vita Alani de Solminihac Episcopi, Baronis, & Comitis Cadurcensis, scripta à P. Leonardo Chastenet Canonico Regulari, & in Latinum versa à P. Dominico Bisselio, ejusdem Ordinis ad S. Crucem Augustæ Vindelicorum (a), ubi de hoc vigilantissimo in salutem animarum Prælato legere est sequentia (b) : “ Initio statim, atque Alanus in suam Diœcesin intravit, comperit, provocatorias dimicationes plurimum, à plebeie etiam conditionis hominibus, frequentari : zelo repletus, huic obviare malo, & detestando exercitio, non nisi ad perdendas animas à dæmone adinvento, finem imponere conatus est, incessanter in suis prædicationibus contrà declamans, & in familiaribus colloquiis Nobiles adhortans, generosum suum animum aliis ostentarent modis. Hæc omnia cùm parum utilitatis afferrent, ad censuras confugit : at verò plures necquidquam abstinerunt. Quo ipse obligatus fuit synodale statutum (c) conficere, in quo præter excommunicationem sibi reservatam omnes duellantes jure sepulturæ privavit, &

(a) Sub tit. Idea boni Prælati. Edit. Campidon, an. 1673. (b) Lib. 2, c. 10.  
 (c) An. 1651.



& ingressu Ecclesie interdixit, atque interdicto eorum Oratoria, ac Sa-  
 cella domestica supposuit. Præterea cum Marchio San-Alverius, tan-  
 quam Cadurcorum Senescallus, Cadurcum ingrederetur, Vicarium  
 suum Generalem ad eum ablegavit, qui suo nomine rogaret, curaret  
 Nobilitatem, quam habebat in comitatu, subscribere cuidam publicæ de-  
 clarationi, & solemnî præestationi omnis generis provocationes recu-  
 sandi, & pro quacunque causâ singulare certamen nunquam ineundi;  
 ipsemet dein eum convenit, illi demonstrans, quodd hinc ingens Deo,  
 Regi, & Provinciæ præstaret obsequium, nec non summum sibi hono-  
 rem, gloriâque compararet. Secundum hanc instantiam in quodam  
 Nobilium conventu idipsum fuit propositum, absque tamen rei deside-  
 ratæ effectu. Quod ubi Episcopus advertit, oblata tunc Jubilæi occa-  
 sione, statuit denuo rem aggredi, & in persona cum Diceceseos suæ  
 Nobilitate tractare, ut sic eos ad huic declarationi subscribendum obligaret.  
 Comitem ergo Valliacum rogavit, ut primus chirographum suum ap-  
 pingeret: certus quasi, neminem non subscripturum, si viri tam illustris,  
 apud hujus provinciæ Nobiles in magna autoritate constituti, pro-  
 priam manum asperxisset. Id quod perlibenter fecit: magnoque ani-  
 mo alii postmodum subsecuti sunt, & pauci superfuerunt, qui non ma-  
 num suam apposuerint. At resistentes à Jubilæi Confessariis coacti fue-  
 runt, quodd cæteroqui constanter absolutionis beneficium essent denega-  
 turi tandiu, donec suum quoque chirographum addidissent. Hæc  
 declaratio ea ipsa est, quæ anno MDCLI. per Franciæ Marescallos  
 approbata fuit, utpote Regiis Edictis, ac justissimis legibus confor-  
 mis. „ Hæc verò ita se habet: Nos subsignati scripto presenti publicè,  
 & solemniter declaramus, nos omni generis provocationes recusaturus, nec  
 unquam singulare certamen, quacunque causâ intervenias, inituros; insuper  
 omni modo testaturos, quantopere execremur duellum, utpote rationi, statu-  
 que publici bono contrarium; quoddque cum salute, & Religione Christiana com-  
 versare nequeat. Nolumus tamen per hanc declarationem renuntiare juri pro-  
 pulsandi quocunque legitimo modo injuriæ illatæ nobis, tantum scilicet, quan-  
 tum nostra professione, & natalium conditione tenebimur: nostra etiam ex  
 parte paratissimi, eos, qui fors existimabunt, aliqua se à nobis injuria affe-

*étos fuisse, bona fide instruere, nec alicujus offensa ansam alicui præbere velle.* Ex occasione hujus facti

464. Q. I. An Alanus ex æquo statuerit, ut Confessarii interrogarent Nobiles, num declarationem suo quoque chirographo signare vellet: tergiversantibus autem negarent absolutionem Sacramentalem?

Q. II. An hodierna ætate Confessarius Nobilem, aut virum militarem rectè interroget, si nullam habeat peculiarem interrogandi causam, quo animo sit erga duellum? an non horreat, pro tuendo honore id committere tunc, quando sine conscientia noxa committi nequit?

Q. III. In casu, quo vir ejusmodi confitetur, sibi molestas inimicitias ab aliquo tempore intercessisse cum Hektor: se hodie quidem rancorem deponere: *optare tamen, ut Hektor expeditè ediceret, si quid se vellet,* in hoc, inquam, casu quaeritur, an Confessarius, notans his verbis duellum indicari, pœnitentem examinare expressè debeat de voluntate accipiendi provocationem?

Q. IV. Si Confessarius aliunde sciat, quàm præpostera sensa de duelli licentia pœnitens foveat, an cum de his interrogare debeat, quamvis nec verbum de voluntate committendi unquam duellum in confessione afferentem?

465. Quaterno huic dubio quadruplex fundamentum Theologicum præmittimus.

Primò, Confessarius non rarè obligatur de rebus ad confessionem spectantibus pœnitentem interrogare: nominatim tunc, quando probabiliter putat, & suspicatur, pœnitentem omittere aliquid necessariò explicandum, vel defectu debiti examinis, vel ex verecundia, vel ex oblivione, vel ex ruditate (adde vel ex obstinatione, qua nolit aliquid illicitum judicare, quod tamen est). Ita apud BERNARDINUM BENZI integra Theologorum nubes (a). Ratio est; quia Confessarius, utpote Judex, in foro Sacramentali debet curare, ut cognoscat perfectè, quantum possibile est, culpas pœnitentis, & ut impleatur præceptum Divinum de integritate materialis confessionis; atqui hoc non curaret, si nollet interrogare, ubi probabi-

(a) Praxis Tribun. confc. d. sp. 2. q. 5.

babiliter putat, & suspicatur, pœnitentem omittere aliquid necessariò explicandum vel ex defectu debiti examinis, vel ex verecundia, vel ex oblivione, vel ex ruditate: ergo &c.

Secundò, ex opposito colligitur Confessarium non obligari ad interrogandum, quando ipse probabiliter putat, pœnitentem nihil omittere in confessione necessariò explicandum. Ita idem. In compendio itaque dicimus, si Confessarius habet rationem non levem putandi, aliquid fuisse omissum, debet interrogare: si non habet talem rationem, non debet interrogare.

Tertiò, Confessarius obligatur monere pœnitentem de statu malo, in quo eum per ignorantiam vincibilem, seu culpabilem versari invenit. Ita BENZI cum omnibus fere Authoribus. Ratio est; quia Confessarius, ut *medicus*, debet curare sanitatem sui ægroti, quam utique malè curaret, si relinqueret in ignorantia culpabili, non capacem salutaris absolutionis. Quòd si autem eum inveniat versari in ignorantia *invincibili*, seu inculpabili, ita ut pœnitens non agnoscat malitiam facti sui, cautè adhibenda est monitio; nempe tunc adhibenda est, ubi sperari prudenter potest emendatio, nec timetur aliud grave malum; nam *Judex* debet procurare integritatem materiale, & *Doctor* instruere in lege ignorantem. Quòd si autem vel non sperari prudenter possit emendatio, vel aliud grave malum ex monitione timeatur, non obligatur monere confessarius pœnitentem. Equidem THYRSUS GONZALEZ (a), & ELIZALDE (b) docent, semper esse admonendum, eo quòd non videatur dispositus ad absolutionem, nisi sit paratus implere omnem legem DEI. Sed SUARIUS, VASQUEZ, LAYMANN, imò quadraginta octo graves Authores (c) dicunt, non fore obligationem monendi tunc, si prævideatur ex infirmitate *formaliter* peccaturus, cum nunc per invincibilem ignorantiam *materialiter* tantum peccet; nisi, quod bene observat P. BENZI, pœnitentis status malus post se trahat grave damnum publicum; tunc enim monendus est, etsi ex monitione aliquod grave malum privatum vel ipsius pœnitentis, vel alterius personæ timeatur, *e. g.* si sit Parochus bona fide opinio-

Y y 2

nes

(a) De opin. prob. dissert. 14. c. ult. (b) L. 6. c. 20. (c) *Vindex Tabernæ* ad Propos. 13.

nes erroneas disseminans: vel Princeps munci suo non satisfaciens. Quodsi Confessarius nesciat, vel dubitet, an monere pœnitentem de statu malo, in quo per ignorantiam invincibilem versatur, sit profuturum, vel non pariturum grave malum, tum comparet utilitatem, quæ sub illo dubio speratur, & malum, quod sub illo dubio timeretur, & eligendo magis expediens, pœnitentem de suo statu moncat, vel non moneat; quia de duobus malis minus eligendum.

Quartò, si pœnitens, etsi interrogatus non explicat aliquid, aliàs necessariò explicandum, quod tamen Confessarius sciat ab eo fuisse patratum, plerumque Confessarius eum absolvere debet, & acquiescere; quoniam pœnitens in foro conscientiæ est simul accusator, & testis. Et quoniam hæc fortè alteri Confessario explicuit, vel ob justam causam explicare non potest, plerumque Confessarius ei hæc in re credere debet. His jactis fundamentis

466. Dico ad Q. primum: Ex æquo Alanus statuit, ut Confessarii interrogarent ejusmodi conditionis pœnitentes, num parati essent, declarationem suo quoque chirographo signare; nam cum eo tempore duella plurimùm fuerint frequentata, nec ampliùs à quoquam facilè pro gravi piaculo habita, probabiliter, seu ex ratione non levi Confessarius judicare debuit, suum quoque pœnitentem eodem errore infici. Ut autem constaret de errore deposito, & mutata in melius mente, aptiùs agere nil potuit, quàm interrogare, num paratus & ipse sit subscribere declarationi, cui jam tot alii subscripsissent; quodsi enim id abnueret, admodum probabiliter conjectare Confessarius poterat, pœnitentis animum à duello non abhorrere. Jam verdè ex primo fundamento patet, Confessarium obligari pœnitentem interrogare tunc, quando probabiliter putat, & suspicatur, eum quid omittere necessariò explicandum, vel ex ruditate, vel ex obstinatione, qua nolit illicitum judicare, quod tamen est. Neque ex ea ratione Confessarius interrogando abstinere potest, quod fors pœnitens invincibiliter ignoret malitiam duelli, & hac explicata spes sit ferme nulla emendationis; nam ubi Alanus vehementibus suis adhortationibus tantos motus concitabat, & passim Nobiles ad subscribendum confluebant, hujus pœnitentis ignorantia non ampliùs erat *invincibilis*.

Illud magis dubium est, an recusanti subscribere statim negari potuerit absolutio; quòd si enim pœnitens firmum propositum habeat nunquam committendi duellum illicitum, dispositus videtur esse ad absolutio-  
nem, quamvis hoc genus subscriptionis ei non arrideat. Quærere itaque Confessarius deberet de tali proposito suum pœnitentem: tum etiam monere de scandalo, dimanaturo in universam Nobilitatem, si refragaretur is pia aliorum studia imitari; primum enim foret judicare, id eò fieri, ut libertatem sibi servaret duello vindicandi honorem, si occasio ferret. Itaque eò saltem obligandus erit à Confessario, ut manifestetur publicè, sibi quoque fixum animo esse abstinere posthac duello, & ea omnia præstare factò, quod alii promitterent calamo: à quo promittendi modo peculiares ob causas ipse sibi abstinendum duceret. Hæc sentio salvo meliore. Alanus, non credo, quòd prohibuerit absolvere pœnitentem seriò affirmantem tale sibi propositum hære animò. Vcl rationes gravissimæ debuerunt tunc temporis suadere, ne fides cuiquam id affirmanti haberetur, quamdiu renueret subscribere.

467. Dico ad Q. secundum: hodierna ætate Confessarius Nobilem, aut virum militarem non tenetur interrogare, quo animo sit erga duellum, si nullam habeat peculiarem interrogandi causam. Ratio deducitur ex fundamento secundo. Et profectò non esset ratio, cur non ejusmodi pœnitentem etiam de fornicationibus, præsertim si uxorem non habeat: aut quemvis Senatorem de injustitia: molitorem de furtis: militem de imprecationibus debeat ultro interrogare, quamvis hi causam interrogandi, neque in ipsa sua confessione, neque extra eam præbuerint, id quod nemo facillè dixerit. Imò non tantùm non obligatur interrogare Confessarius, sed fortè imprudentiam interrogando admitteret; in hominè enim bene disposito cæteroquin, novos crabrones suscitaret. Quid? quòd multi sint ejusmodi viri nobiles, ac militares, qui præ multis casibus duellum, utur revera illicitum, censent licitum ex ignorantia invincibili, quam detegere non semper consultum est, ut fundamento tertio explicavimus. Casus ergo duos sequentes confinximus tales, in quibus vel intra, vel extra confessionem data est Confessario causa credendi, malè constitutum esse suum pœnitentem in hac materia. Hinc

468. Dico ad tertium : Existimare quis posset Confessarium non obligari ulterius interrogare optantem : *Modo adversarius diceret, si quid me vellet.* Nam primò etsi videantur hæc verba innuere, finem dissidio per arma faciendum : fors tamen intelligit pœnitens meram suam defensionem, qua esset usurus, si cum alter aggrediretur : non autem est illicitum optare ex bono fine, scilicet ut molesta dissidia tandem cessent, occasionem defendendi se contra aggredientem : aggressionem hanc nihilominus odisse & nolle, utpote offensam DEI. Secundò : Si etiam Pœnitens adderet : *Illico venirem, & darem satisfactionem,* existimare posset Confessarius, cum per ignorantiam invincibilem talem satisfaciendi modum habere pro licito; eo quòd de cætero optimè videat affectum esse erga mandata DEI, & generosè rancorem omnem deponere. Jam verò non rarò præstat tenebras talis ignorantiae dissimulare, quàm lucem inutilem, vel etiam noxiam affundere, saltem si ex ea ignorantia non resultent damna publica, ut dictum fundamento tertio; existimare itaque quis posset, Confessarium non obligari ad interrogandum. At malim sequi contrariam opinionem; præsertim si addantur illa verba : *Illico venirem, & satisfactionem darem;* hæc enim satis apertè pugnam denotant, & quidem liberè acceptandam. Cui accedit, quòd is pœnitens animum præferat bonum, & optimè erga quamcunque DEI legem affectum, cui clarior noticia non obfutura credi possit. Unde dein Confessarius procurare debet integritatem etiam materiale juxta fundamentum primum. Illud præterea in materia de duello considerandum, quòd ex ignorantia de malitia duelli, si quidem inter homines toleraretur, & invalesceret, plurima essent oritura mala, salutis animarum, reipublicæ, privatorum fortunis ac vitæ summè noxia. Unde ad caudatum ejusmodi peccatum silere haud poterit Confessarius, sed debet dedocere ignorantiam.

469. Dico ad Q. quartum : Si de aliquo actu malo quæstio esset, quem Confessarius sciret à pœnitente commissum fuisse, posset fortè abstinere ab interrogatione, & examine ulteriore, præcipuè si generatim interrogatus : *An nihil ei ultra occurrat?* respondeat, quòd *nihil.* Quia juxta fundamentum quartum pœnitens testis est simul, & accusator : & quoniam fortè alteri Confessario id explicuit. At cum in casu nostro non de actu aliquo malo, sed de *statu habituali malo* sermo sit, qualia scilicet  
 sensa

ſenſa pœnitens foveat de duelli licentia, videtur Confefſarius zelo ſanè & charitate deſtitui, ſi pœnitentem non moneat de erratica opinione ſua: præcipuè ſi aliàs in familiari colloquio Confefſarius jam contradixit homini jactanti falſa ſua principia: vel ſi ab aliis ei contradicturn fuiſſe ſcit: aug etiam ex Cathedra ſacra, aut libris monitum novit; tunc enim ignorantia vincibili potiùs, quàm invincibili laborare judicandus erit. Neque facile credi poteſt in alio jam tribunali ſacro errores depoſuiſſe, niſi interrogatus id expreſſè affirmaret.



## CAPUT IX. QUOMODO LEGE CIVILI DUELLUM PROHIBEATUR.

**L**Ege Divina, atque Ecclesiastica interdici Duellum hæcenus exposuimus, & utrinque severis pœnis plecti. Sed non sufficient ista, quamvis deberent, nisi Magistratus civiles, Reges, ac Principes conjunctis viribus se quoque opponant dominanti licentiæ. Legem Dei promulgare, & detonare ex sacris exedris possunt viri Ecclesiastici: vibrari potest ex Capitolio fulmen: sed frustra erunt, nisi profana quoque potestas brachium commodet. Execrari virulentam hydram possunt boni omnes: sed capita non demetent, nisi ferrum, & ignem adhibeat Alcides Princeps. Certè in eo rei cardo vertitur, ut Magistratus suo officio non desint: secus privatus quisque, velut torrente abreptus, ceder multitudini, & consuetudini prævalenti. Illi itaque agant, quod debent: &, quid debeant, moneantur intrepidè ab iis, quibus conscientiam credidère. Præsente Capite per quinque Articulos discutiemus. Primò: Quæ sit obligatio Magistratuum ad coërcendum duellorum usum. Secundò: Quas leges, & pœnas statuerint varii Magistratus in duellum. Tertiò: An unquam permittere duellum possint: vel commissio veniam dare, seu *aggraviare*? Quartò: Quas pœnas incurrant negligentes Magistratus. Quintò: An contra pœnas civiles sacro asylo gaudeant rei de duello?

### ARTICULUS I.

*Quæ sit obligatio Magistratuum ad coërcendum duellorum usum?*

**P**Lurima, quæ pro rei gravitate dicenda essent, in pugnum contrahor. Ajo primò: Tenentur ex officio vel impedire, vel punire duella. Secundò: Possunt etiam, modò velint serid. Tertiò: Modò adhibeant convenientem industriam. Quartò: Et modò sequantur exempla Regum Galliæ.

§. I.



§. I.

Magistratus tenentur ex Officio vel impedire, vel punire duella.

470. *Obligatio demonstratur.*

471. *A negligentibus penam expetet DEUS.*

472. *Id, quod ipsorum Principum testimonio firmatur.*

473. *Unde sibi caveat quilibet, ne det malum exemplum :*

474. *Sed attendat ad paranesin Cleri mentis VIII.*

475. *Item ad adhortationem Cleri Gallicani.*

476. *Nec non ad casum tragicum Henrici II, Gall. Reg.*

470. **O**bligantur Magistratus, Principesque omnes DEO, ac populo. Populo, à quo delatum acceperunt imperium : DEO, à quo in imperio confirmati, ejus jam vices agunt. Cum ergo duellum tam jura Numinis, quam salutem populorum eversum eat, terram unà, & cælum offendet Princeps, si grassanti malo conniveat. Pretiosè alunt subditi Principem, ed potissimum, ut ab ejus regimine bonis præstetur securitas. Et quæ hæc securitas, si quotidie paratum sanguinem circumferre debeant, ad protervi hominis provocationem effundendum? Si Turcicam servitutem fervirent, tutiores viverent sub hero barbaro, nunquam certè permisfuro, ut mancipio impunè quis insultet, vel necem machinetur. Mallem, dixit quis olim, quorundam Christianorum esse porcus, quam anima; utpote quæ minùs curatur ac ille. Et mallem ego nonnullorum Principum esse cervus, vel aper in sylvis, quam subditus; nam vae illi, qui feram ejusmodi sternere aufit : *Noli me tangere*, fronti suæ inscriptum gestarat hæc bestia : tota quanta est Principis sollicitudo, ac ira, pro bestia incolumitate excubat. Venabulo quis sacrosanctum ejusmodi aprum aggrediarur, vel glande trajiciat cervum, ut monomachus hominem, prohi quæ mugient illico tonitrua, quæ micabunt fulmina ! vindictam exposcet venatorum turba, temerata clamabit jura Regalia, perniciem illatam sylvis, & nobilissimum ferarum genus ad eam paucitatem redactum, quam in Arca Noë naufragus Orbis viderat : nec antea lamentis erit finis, donec feridica ad triremes, vel ipsum capitale supplicium abripiatur. Nolin ego hoc loco ejusmodi reorum patronum agere, meo quoque calculo eliminandi à republica feridicae sunt : qua pœna ex æquo afficiendi sunt,

docent lucubrationes doctæ complures. Id solum ajo, si tam sollicitè Principes cavent necem unius feræ, & patratam tam severè puniunt, cur vitam hominis subditi pensî non habent? Quin si puniunt eos quoque, qui fallente ictu machinati tantum sunt mortem cervo, cur monomacho parcunt, ubi duellum sine nece abivit? An cervus pluris est, quam homo subditus? Si à subditis habent, ex quo vivant regiè, cur subditis non præstant, unde vivant securè?

471. Quodsi omittant, humanum sanguinem impunè effusum vindicare, vindicabit Deus, pœnam expetiturus non tam ab homicida, quam à Principe, qui, dum non impeditur, quod debuit, alieno se scelere inquinavit; nam *negligere, cum possis deturbare perversos, nihil aliud est, quam fovere* (a). Satis audacter hoc exprobravit Pharamundo Regi nobilis pugil, quem celebris Angliæ Tragædus (b) in scenam inducit dolentem, & vix non furiis agitarum ob amicum, à se in duello occisum. " Si non indulgisses, ait, ô Rex! mos hic abominandus non invaluisset, eò, ut post alios casus tragicos jam hodie me cum amico tumularet. „ Quadrat huc etiam norum illud de Rege quodam Galliæ, qui, dum homicidæ vitæ gratiam renueret facere, eò quod jam tertia hæc cædes esset ab eo patrata, hæc sibi verba reagentem audire debuit: " Ignosce Domine, sum reus tantum cædis unius: tu duarum; neque enim perpetrâsti sem secundam, & tertiam, si me, ut merebar, post primam jussisses „ plecti capite. „

472. Ipsi plerumque summi Principes, & Magistratus agnovère, quantum ex hac indulgentia conscientia gravetur. FRIDERICUS AUGUSTUS Rex Poloniæ, & Saxoniae Elector anno MDCCVI. ad severissimum, quod tunc edebat, Edictum se permotum fuisse ait ex metu, ne Provinciæ sibi subditæ una cum ipso pœnas debeant Deo, supremo Vindici, de non punito duello.

ERNESTI Ducis Saxo-Gothaici cedro dignum effatum est: " Ad se-  
„ veram, quam condimus, interdictionem permovet nos non solum vox  
illa

---

(a) C. Negligere. 2. q. 7. L. Congruit. ff. de Offic. Præf. (b) Spectateur tom. 1.

illa Divina, penetrans corda hominum: *quicumque fuderit humanum san-* " *guinem, fundetur sanguis illius* (a), qua universè cædes humanæ vetan- " *ur*, aut tristia fata Provinciarum, ob illas inultas sæpius everfarum: " *sed singulariter, quòd clarè pateat, non posse salva conscientia in præ-* " *sententi negotio, duello scilicet abolendo, ulli conniventiae locum esse.* „ (b) "

Negat Augustus Dux Guelpherbytanus, licere Magistratibus, ac Principibus, ut, seposita hujus rei cura cujuslibet conscientiae relinquant, qui se gerere velit. (c)

Demum unanimi sensu clamant Edicta Megalopolitanum, Suecicum, Lubecense, Ulmense &c. rationem severam quondam exactum iri ab Urbium, ac Provinciarum Rectoribus de adhibita cura, quam ad eliminanda duella afferre oportebat.

473. Caveant itaque sibi Principes sedulo, ne approbare unquam, aut laudare duellum videantur; vox una ex ore Principis fortè excidens excipitur pronis auribus, animisque, & plurimum valet ad conciliandam crimini auctoritatem. FRANCISCUS I. Galliae Rex, cum CAROLO V. graviter collisus, aliquando in corona Procerum dicere auditus est: " Virum bo- " num non esse, qui objectum sibi mendacium non vindicaret armis. „ Et en! in morem inducitur per Italiam, & Galliam, ut hæc exprobratio pro causa duelli reciperetur, necessariò armis vindicanda; ante FRANCISCI enim imperium illud non obtinebat (d). Multo magis duellum confirmavit Princeps ille, cujus factum, certè ea dignitate indignum, alibi attulimus. Non solum laudavit is provocantem quemdam levi affectum injuria, sed &, dum hic comparere recusantem baculo percussit, equo donavit in præmium præclari facinoris. " Manifestum est, ait GOBAT (e), hoc Prin- " cipis factum inquinatum fuisse macula duplicis gravissimi peccati; primò " quòd cum, qui recusavit comparere loco nominato, exposuerit certo, & " diu duraturo ludibrio aliorum, cum revera fuerit laude dignissimus: in " ipsum verò quadravit illud tritum ex Dafibodio: „

*Non est dignus equo, cui charior est equus aequo.*

Zz 2

„Secur-

(a) Genes. 9. v. 6. (b) Edict. an. 1646. (c) Edict. an. 1646. (d) *Tibullus*, l. 2. an. 1547. (e) Theolog. Experim. p. 1. edit. 2. tr. 7. cap. 18.

„ Secūndò, quòd illo suo dono, ac laude excitārit & cum, quem ita re-  
 „ muneratus est, & suos Aulicos ad non solum admittenda, sed etiam  
 „ offerenda duella. „

474. Attendant universi Rectores populorum ad gravissimam pa-  
 rænesin summi Pastoris CLEMENTIS VIII. suprà in ejus Constitutione conten-  
 tam §. XX. “ Universos, & singulos charissimos in Christo Filios Nostros,  
 „ Imperatorem, Reges, ac dilectos Filios, nobiles viros, Duces armorum,  
 „ & exercituum, Marchiones, cæterosque Principes Christianos, nec non  
 „ Dominia, Potentatus, Communitates, & Universitates Civitatum, Op-  
 „ pidorum, & Castrorum, illorūque Domicellos, & Dominos tempo-  
 „ rales, ac etiam militum, & copiarum tam equestrium, quam pedestrium  
 „ Ductores, Tribunos, Præfectos, Capitaneos in quibuscunque etiam No-  
 „ bis, & S. R. E. temporali jurisdictioni non subjectis locis constitutos,  
 „ cujuscunque gradus, præeminentiæ, & nobilitatis existentes, hortamur,  
 „ rogamus, & obtestamur per viscera D. N. Jesu Christi, ut ejus Divini  
 „ Nominis intuitu pro sua erga eundem DEUM, per quem regnant Reges,  
 „ & à quo Principatus acceperunt, pietate, atque erga Nos, & sanctam  
 „ hanc Sedem reverentia, & devotione, non modò nihil tale in suis Do-  
 „ miniis fieri permittant, nec ullo modo conniveant: sed hoc malum omni  
 „ studio, diligentia, & autoritate exterminare totis viribus procurent,  
 „ & contra quoscunque delinquentes, & (ut præfertur) quomodolibet  
 „ complices, & participes etiam temporalibus pœnis gravissimis animad-  
 „ vertant, & per suos Officiales, & curiæ Ministros procedi curent,  
 „ scituri se obsequium DEO pergratum, pèrque acceptum præstituros, si  
 „ quo gladio ad tutelam bonorum, & ad propulsandos perditorum co-  
 „ natus sunt accincti, eundem ad vindictam hujus peccati, & ad fumen-  
 „ das de hujusmodi criminis reis debitas pœnas exercuerint: contrà verò  
 „ memores, si in re tam gravi malè se gesserint, se in districto DEI judi-  
 „ cio rationem in novissimo die reddituros. „

475. Audiri meretur & illa Clero Gallicano digna adhortatio, qua  
 per FOULIETUM, Episcopum Monpessolanum ita inter alia monuit LUDO-  
 VICUM XIII.: “ Nemini dubium est, quin principium huic lanienæ ab infero  
 „ sit, cui Christianos velut victimas immolari, quàm est impium, quàm  
 „ horrendum! Exiget aliquando DEUS effusi tam crudeliter sanguinis ra-  
 tionem

tionem à Regibus, quorum est opponere impiæ feritati severitatem legis. Quam rationem iste LUDOVICUS, in cæteris deliciæ humani generis, & cæli amor, quam rationem commissi sibi populi reddet coram Judice, scrutari corda, & renes solito? Infernus portio est tot hominum, quos auspiciis melioribus DEUS cælo creaverat. Unde id factum sciscitanti se- vera fronte Judici quid respondebis, LUDOVICE, qui eo momento Rex esse desieris? Potuisti salvam habere gentem meam, & perdidisti. Ob- jectioni occurre Rex, dum adhuc licet, nec diutius patere vanis homi- num auspiciis deludi gentem tuam. Indignatur DEUS, malè sic perdi- populum, cui liberando suum ipse sanguinem effudit: perditur impuni- rate, & æstimatione delicti, per quam transiit in magnanimitatem bar- baries. » Hæc & plura FOULIETUS apud GRAMONDUM. (a)

Non conquievit unquam laudatissimi hujus Cleri pius ardor, quin omni posthac ætate duellorum licentiæ sese velut aggerem torrenti oppo- neret. Etiam collectus in Synodum (b) Comiti DE DRUY gratularus est edi- tam lucubrationem, quæ veram fortitudinem à duello longè remotam esse dèmonstraverat (c).

476. Et dum de Gallia sermo est, infelicem HENRICI 4. casum non memorare non possum. Cabotius Jarnacius mendacii crimen Franci- sco Vivono Castaneo impegerat, in quo maxima credebatur esse injuria, necessariò armis vindicanda juxta oraculum Francisci I., de quo paulò an- tè. Igitur HENRICUS II. Rex publico duello experiri est passus, cum mul- tis proceribus præsens pugnae spectator. Succubuit Castaneus, ictu in po- plite accepto. Cùmque præ dolore ac mærore animi sanguinis cursum fisti, & vulnus à chirurgis obligari non pateretur, accedente vitæ tædio decessit. Rex Castaneo favens, præterque opinionem rem evenisse cer- nens, tantum hinc concepit dolorem, ut religiosissimo sacramento se ob- strinxerit, nulli posthac duello consensum dare. Hæc referens THUANUS (d), notat alibi (e), à curiosis, rerumque intelligentibus observatum fuisse, *Regem, qui serium duellum, rem religione Christiana vetitam, infaustis regno au- spiciis approbasset, in ludicro vitam amisisse*; constat quippe, quod à Mon-

ZZ 3

gome-

(a) Adan. 1615. (b) An. 1657. (c) De la beauté de la valeur, & de la lâcheté du duel. (d) L. 3. ad an. 1547. (e) Lib. 22. ad an. 1559.

gomerio, cohortis prætorianæ præfecto, dexterum in hastiludio transfusus oculum vitam finiverit. Nempe inultus non manet temere effusus humanus sanguis: vel vindicatur in effundente, vel in eo; qui effusionem non prohibet, dum debet, & potest.

## §. II.

Magistratus possunt abolere duella, modò velint seriò.

477. *Demonstratur hac veritas.*

479. *Cum Epicrisi.*

478. *Etià à contrario.*

477. **M**ulta potest Princeps volens, & volens seriò. Efficax imperantis vox est: *Sic volo, sic jubeo*, præsertim si affectus animi volentem stimulent, acuántque imperium. At ubi mens Rectoris languet, & ad speciem vetatur malum, patratumque dissimulatur, quis miretur, si medela non fiat? Mirum! moveri ad jussa Regis possunt ingentes exercitus, everti urbes, & mœnia, & per tela, per enses ruere miles: nec tamen rota autoritate Regia compesci queat monomachiae furor? Ea est aliàs in Equestri Ordine Regem imitandi, & assentandi studium, ut pulchrum dicant, quod deforme est: ut laudent, quod vituperandum, & vituperent, quod laudandum, modò Regis sententia præeat. Si ergo seriò duellum pro infamia, recusationem pro fortitudine Rex acciperet, an non etiam alios in sua sensa posset pertrahere? At dum laudant, quos audiunt pugnasse: dum aulâ arcent, vel arceri sinunt provocatum, qui recusavit comparere: dum hunc patiuntur excludi ab obsequio militari, & Nobilium circulis: vel dum custodia domestica unius hebdomadæ rota pœna absolvitur, eaque finita idem gratiæ locus patet, mirum non est, duella non tolli. Et hæc erat potissima ratio, teste BASNAGIO (a) aliisque, quòd anteriorum Regum Galliæ conatus arcendis duellis minùs suffecerint. Equidem gravissimis in illa edictis, pœnisque animadversum est: vetita duella sub vitæ pœna, & eorum, qui interfunt, bonorum confiscatione: in occisos supplicium Majestatis additum, ut cadavera per urbis vias, infamati crati

(a) De duell. §. 10.

crati imposita, ad scalas Gemonias à carnifice pertrahantur, & patibulo suffigantur (a). “At ego crediderim, ait quidam (b), illa Edicta Regia “suam auctoritatem paulatim perdidisse, quòd magno loco positi quidam “Duellatores, aut singulari gratia florentes factum suum impunè tulerint: “qualia impunitatis exempla in publicum sunt perniciosissima. „ Quàm strenuè autem posteriores Reges egerint, paulò pòst recensēbimus.

478. Interim illud manet certum, si oscitanter agant Magistratus, ac Principes, nil mirum, si parum proficiant. Dubitare scilicet incipiunt subditi, an seria sit mens Principis: an verè nolit has pugnas: an reapse duella displiceant: vel num cortice legis contentus fucum solum populo curet facere. Si seriò res agitur, cur Principes ignorare affectant, si quid ejusmodi acciderit? Cur reos non persequuntur, cur custodia domestica aliquot dierum contenti iterum accessum ad aulam, ad tribunalia, ad regia conclavia permittunt, cur subitæ rixæ nomen veris duellis sinunt asfingi? si seriò oderunt hoc crimen Principes, cur in sua præsentia patiuntur dilaudari, velut heroicum facinus, commissum duellum? cu: veluti de re præclare gesta gratulantur? Certè de ejusmodi legislatoribus veriùs ego, quàm quisquam de Ludovico M. dicerem: *Probant, quod prohibent* (c). Et quo suo id honore? Certè pudeat leges condere, & conditarum transgressiones impunitas ferre. Nescio, quid turpius: vel malum non prohibere, vel prohibitum, si committatur, indolenter aspicere. Unde jocatur falsè PLAUTUS in Trinummo:

*Mores leges perduxerunt jam in potestatem suam:  
Eæ misere etiam ad parietem sunt fixæ clavis ferreis,  
Ubi malos mores affigi nimio fuerat equius.*

479. Equidem non ignoro, quamcunque industriam adhibitori sint Magistratus, ac Principes, non propterea monomachiæ malum ex integro sublatum iri; quæ enim mandata, ab ipso etiam summo Numine lapidibus incisâ, tam accuratam inter homines observantiam obtinuerè, ut non

---

(a) Thuan. ad an. 1602. (b) Mauris. de duell. §. 82. (c) Journal Helvétique de l'année 1740.

non violata sæpe fuerint, & etiamnum violentur? At satis est, si omnem, quam possunt, operam afferant Principes, qua suus stet honor legibus, vel saltem impunè easdem transgredi non liceat. Præcavendo, &, quæ præcaveri non possunt, puniendo, repagulum ponent malo, ne pleno unquam agmine irruere valeat. Ut nunquam peccetur in legem, hoc nulla ætas, nulla respublica vidit: ut magis vel minùs peccetur, hoc solum à Magistratuum autoritate, & serio conatu dependet. Felix illa respublica, in qua is viget disciplinæ rigor, qui civibus securam reddit vitam, & *gladios convertit in vomeres*. Possunt id effectui dare Principes, modò velint seriò.

## §. III.

Magistratus possunt abolere duella, modò adhibeant convenientem industriam.

480. *Leges condant dissimulas.*

481. *Pœnas statuunt ignominiosas.*

482. *Fusjurandum exigant à Nobilitate, si è re futurum credant.*

483. *Notent, quæ passim in editis suggeruntur.*

484. *Addant obfirmatum animum juxta variorum exempla.*

480. **N**ON ille ego sum, qui summis dignitatum fastigiis mea consilia velim propinare: quid aliî, me multo sagaciores, in rem præsentem proficuum perspexerint, id solum memorare liceat. Ac primò quidem illud conducere notatum fuit, si leges contra duellum ferantur non confusè, & perfunctoriè: sed ita, ut in iis enucleatè contineatur, qua ratione conviciator factam labem reparare læso, qua pœna petulantiam luere debeat: tum quid secuto duello, facta, vel non facta cæde, cuique sit expectandum: quid inferioribus judicibus emergente ejusmodi dissidio sit observandum. Hæc, inquam, aliæque accuratè, & minutatim statuenda sunt, & in tabulas referenda, ac promulganda antè, quàm casus accidar; quoddâ enim Magistratus suo arbitrio reservet, quid postmodum judicare placeat, à recto deviabitis sæpe: jam movebitur intempestiva misericordia: jam timebit nobilis familiæ indignationem: jam partium studiis vel intercedentium deprecatione expugnabitur: jam exemplo unico datæ semel veniæ ligari sibi manus sentiet, ne feriat posthac. Ubi econtra leges, dilucidè scriptæ, strenuæque observatione deductæ in usum, quid



quid agendum, demonstrant, nil erit, quod Judicem facile à trita semita avocet. Ita sentit FERD. VASQUEZ, adducens etiam ARISTOTELEM, & DOMIN. SOTO (a), cujus verba recito: "Utilius, commodius, ac tutius est per legem, quam per Principem rempublicam gubernari; quòd illa "matura deliberatione, ac consilio plerumque fiat, sicque publicæ utilitati consulat: is non raro festinanter, & nubila mente odii, amoris, vel cupiditatis à bono publico abscedat: quare melius est, ut, quam maximè fieri possit, cuncta legibus explicentur, iudicibus autem non nisi minima, & quæ legibus comprehendi nequeunt, relinquuntur." Hæc VASQVUS sanè prudenter. Hinc ex edictis, quæ contra duellum edita exhibet LUNIGRUS, ea mihi minus probantur, quæ certi nihil designant; generatim prohibuisse duellum contenta. Alia econtra pleraque afferunt multiplicem industriam, & ad ipsas minutias descendunt, tum ut duellum evitetur, tum ut patratum ex æquò castigetur.

481. Alteram, quod eximie proficuum à multis judicatur, est, ut ex veneno fiat pharmaceum, & opprobrium, ad quod evitandum suscipi solet duellum, duello annectatur: & sic, dum jam pugnant, ut fugiant infamiam, posthac non pugnent, ne infamiam contrahant. Corrigere nempe oportet corruptas hominum ideas, ut, postquam turpe visum est, quod erat egregium, scilicet injuriam non ulcisci armis, posthac habeant pro turpi, quod visum erat egregium, scilicet ulcisci. Et profectò, cum existimationem, famamque præ vita æstiment nobiles animi, non aliis pœnis satis ab hoc crimine retrahentur, nisi quæ infamiam quamdam annexam habeant. Plus apud monomachos valebit, ait celebris Anglus (b) nota illa pœna Pillorii (c), quam centum mortes. Prohibeantur posthac nunquam gestare gladium, ejiciantur ex urbe, aut castris: habeantur inepti ad consequendum unquam militiæ, domive munus ullum. Auferantur illis Nobilitatis insignia, vel etiam publicè comminuantur, eradantur ex Equestri Ordine, ita ut etiam series genealogica in iis desinat: his machinis mitigati, frenabunt iram præcipientem, cavebunt offendere, & accipiam

Aaa

(a) Controv. l. 1. c. 1. n. 17. (b) Le Spectateur. (c) Contumeliosum supplicium est, descriptum à D. Bentham in Statu Eccles. Angl.

ptam fortè offensam tacitè concoquent, ne in nimbum incurrant, dum illas fugiunt. (a)

482. Neque illud hoc loco dissimulandum, quod probat PUFENDORF, ut scilicet omnes, qui Equestri Ordine censi volunt, jurejurando spondeant, nunquam ad duellum provocare: neque, si provocentur, comparere. Et hoc ipsum est, quod laudatissimi Marschalli Galliae laudârunt in familiis compluribus de flore Nobilitatis, quæ propria manu, & fide nobili ad id observandum sese obstrinxere (b). Quo exemplo excitatus CAROLUS EMMANUEL II. DUX Sabaudiae (c) idem juramentum deferri jussit Nobilitati suæ universæ, eorûmq; nomina, qui illud præstitissent, colligi, ut, quid de reliquis statuendum, maturè expendi valeat. Formula juramenti ita habet: "Ego, cujus infra scriptum nomen est, juro, & pro-  
 „ mitto, me nunquam duellum commissurum, neque in hunc finem libel-  
 „ lum provocationis missurum, aut acceptaturum, ex quacunque occa-  
 „ sione, aut offensa accidere id posset: Reservato tamen mihi jure, ut illatâ  
 „ fortè mihi injuriâ, uti liceat remediis salvando honori idoneis, nec pro-  
 „ hibitis per leges. „

483. Demum hoc loco iterum iterumque commendo multiplicia summorum Principum studia, quibus laborârunt occurrere necessitati tum provocandi, tum comparendi, quæ à nobis in pugnum contracta legere est §§. IV. & V. *Art. I. Cap. II. à n. 87.* Commendo item, ut inspicere nemo Magistratuum graveretur catalogum poenarum, quas in varia hujus generis delicta tulere prudentissimi, isque magno numero Principes, à nobis exhibendum *sequente Articulo.* Ex quo sibi quisque deligere poterit, quod sibi, suisque rebus (neque enim omnibus omnia quadrant) deprehenderit convenientissimum.

484. Quæ tamen omnia vana erunt, ac inutilia, nisi obfirmatus accedat in Rectore animus, à latis semel legibus nec latum unguem discedendi. Sine, ut unum, alterumve specimen obfirmati ejusmodi animi exhibeam.

JOSK-

(a) *Iea Roques Reflex. sur le duel. §. 90.* (b) *In edict. an. 1653. apud Lunsig.*  
 (c) *In edict. an. 1661.*

JOSEPHUS CLEMENS Colonienſis Elector jurejurando ſemper obſtrinxit, ne unquam aliter monomachum judicaret, aut plecteret, quàm ſuo in Ediſto ſtatueraſ. Prohibuit, ne quis ullo unquam tempore, etiam in feſtivis gaudiis, intercedere pro his reis-auiſt (a). Quin voluit, ut omnis venia, ſcripto exhibenda unquam ſe vivente, tanquam fictitia, ſeu *ſubreptitia* rejiciatur.

In Ediſto Brandenburgico (b) prohibentur omnes preces, interponendæ pro monomacho. Ediſtum aliud (c) fidem Regiam oppignorat de gratia nunquam faciendâ.

MAXIMILIANUS II. Bavariz Elector monitos vult omnes, & ſingulos, ne ſpe impunitatis, aut conniventiz ad violandum hoc mandatum ſuum abduci ſe ſinant (d). Idque ut tanto certius conſiſter, totum ediſtum jubet quotannis prælegi univerſis copiis, & publicè affixum continuò proſtare.

In Ediſto Regis Daniæ, item in Megalopolitano graves pænæ integrantur inferioribus Præfectis, ſi elabi ſinant monomachos. Saxonicum iisdem mandat, ut, quamprimum duellum commiſſum innotuerit, mox equos curſores cuiquam prohibeant dari, & portas urbis claudant: vel elapſo ex urbe reco, ruri etiam per campanas gentem ruſticam excitent ad perſequendum fugitivum (e).

Hamburgeniſis Magiſtratus curam ſuam ad ipſos chirurgos extendit, pœnam ipſis denuntians, niſi ipſi denuntient, quorum vulnera, in duello accepta, curanda ſuſcipiunt. Id quod & Lubecenſis conſultiffimè ſtatuit.

Quid dicam de hodierno Rege Chriſtianiffimo, qui dum capeſſeretur regiminis gubernaculum, jurejurando, juxta morem quorundam de ſuis Majoribus, promiſit, nunquam concedere veniam reo de duelli crimine. Ad hæc prohibuit ſeverè, ne pro ejusmodi quis preces interponeret ullo tempore, etiam dum genethliaca, vel nuptialia gaudia celebraret domus Regia. Liceat fuſiorem caſum honoris Regum Galliz dicare, utpote quibus nemo magis ad compeſcendam duelli pravitatem laboravit. ſit itaque

(a) Ediſt. an. 1704. (b) An. 1688. (c) An. 1713. (d) Ediſt. an. 1720.  
(e) Ediſt. an. 1706.

## §. IV.

Magistratus possunt abolere duella, modò imitentur Reges Gallia.

485. *Ludovicum XIII.*

487. *Ludovicum XV.*

486. *Ludovicum XIV.*

485. **T**Res postremos proponere juvat ad admirationem, & imitationem. Equidem priores jam bellum declaraverant huic malo, at successu modico, donec crescentibus damnis remedia magis seria, & docente experientia magis proficua adhiberi cœperunt. *LUDOVICUS XIII.*, dum regnum adiret, passim hanc rabiem grassantem invenit, sed cui paulatim, consilio usus celeberrimi Cardinalis *RICHÉLII*, cladem non levem attulit. Pace cum exteris, & Religionariis constabilita, ait historia (a), eandem Cardinalis Equestri Ordini, qui quotidie in multas neces ruebat, conciliaturus, Regi ad justitiæ fervorem propensissimo, ostendit, nihil aded legibus Divinis, & Reipublicæ adversum, quàm duella, quibus Nobilitatis flos, summum Gallia fulcrum, periret. Pœnas mox definivit, quibus intentatis absterrentur subditi, quasque Rex per jusjurandum sanxit. Unde nihil parcebatur monomachis. Marchio *Paralinus*, Filius *Mareschalli* defuncti, ausus erat cum *Barone Becio* congregi, unde Præfectura secundaria Campaniæ caruit, per aliquot annos aula remotus. Sic lex suspicionem gravi *Liancurtius*, quodd in gratiam Ducis *Halvini* *Pressianum* provocasset, ab aula arceatur. Cùm tamen temeritati nullum frenum sufficiat, *Butevillanus*, & *Chapellanus* ed provecti sunt, ut Rex, refragante nec quidquam clementi animo, majore, quàm unquam rigore in eos justitiam exerceret. *Butevillanus* quidem fortitudine eximia pollebat, etiam inimicorum testimonio, quæ prudentiæ inops, in eum furorē proruperat, ut aulæ fortissimum quemque provocaret. *vid. dicta n. 148.* Et postquam jam semel *Nemefi* se subduxerat in *Flandriam* profugus, in *Galliam* redux, *Lutetiam* petebat, qua urbe ei interdictum erat, moxque provocabat *Marchionem Berronem*; quo condicente pugnatum est, ternis utrinque congre-

(a) Ministère du G. de Richelieu l. 2. c. 8.

gredientibus, Butevillano scilicet, Chapellano, & Bertio contra Berro-  
nem, Bussium Ambrosianum, & Buquetum. Butevillanus patrata pugna  
fugitivus, à Matre Bussi occisi primùm detentus in custodia, tum missus  
Lutetiam est, & unà cum Chapellano, Vitriaci deprehensò, Senatui judi-  
candus est traditus, ex cujus sententia capitis supplicium subivèrè in campo  
Grevæ, nec quidquam Regis clementiam implorante nobilissima Butevil-  
lani familia (a).

Operæ pretium facturum me spero, si hoc loco latinè reddam epi-  
stolam Regis ad Momorentium scriptas doloris leniendi causâ, quem huic  
feralis sententia Butevillani, sanguine sibi conjunctissimi, ex æquo affere-  
bat. Ita habet (b).

**Cognate mi!**

“ Nullus dubito, quin te à me amari credas, magnòque in pre- “  
tío haberi familiam tuam, utpote, quæ inter antiquissimas, & illustrissi- “  
mas regni mei singulariter se commendat non sanguinis tantùm, & co- “  
gnationum claritate: sed & utilissimis obsequiis, præstitis tum à Majo- “  
ribus tuis, tum à te ipso. Nec minùs persuasum te crediderim, maximi “  
à me fieri robur animi in viris strenuis, de quibus servandis tanta mihi “  
jure merito cura est, ac de ulla alia rerum mearum. Unde conjectare “  
pronum tibi sit, quàm acerbè mihi acciderit infortunata culpa, & fors “  
extincti Butevillani, quàmque lubenter audivissem tuas, aliorùmque in- “  
terpositas preces. Id quoque tu ante alios perspectum habes, quàm ve- “  
hementer propenderim ad concedendam veniam reo de toties violatis “  
regni legibus. At, dum is denique, ira volentibus fati, ultro se justi- “  
tiae manibus exposuit, fateor, eò adactum me vidi, ut reprimerem “  
tantisper, vel nolens, perpetuam illam meam in te, résque tuas propen- “  
sionem; timui namque, ne, dum ego contra juratam Deo fidem duellis “  
indulgerem, in memet provocarem justam Dei iram: néve mei mihi “  
imputarent eversam edictorum vim, atque imminutam auctoritatem “

Aaa 3

Re-

(a) Ministère du C. Richel. l. 4. c. 6. (b) Causes celebres avec les Jugemens  
par Mons. Gayot de Pitaval.

Regiam. Quódque altius animum penetrat, strages est tot Nobilium, quorum vitam, & sanguinem præ meo amo; neque enim sine acerbissimo dolore cogitare valeo, quantum Nobilium, & fortium virorum numerum detestabilis ille duellorum furor ab aliquot abhinc annis rapuerit, quot clarissimas familias extinxerit, quámque eousque malum excreverit, ut etiam primis Procerum à turbulentis provocatoribus, securis esse non liceret. Ubi jam scelus, diu nimis impunitum, ad extrema devenit, aggerem oportebat ponere grassanti licentiæ, & justæ iræ locum dare. Testis mihi Deus scit, quantum propterea animus meus secum ipso luctatus fuerit, & num tu magis dolueris causæ hujus exitum, acego. De quo certiore te reddo per Saludium, Tribunum legionis Normandicæ. In hunc finem remisi eum ad te, ut argumentum caperes, quanto tu mihi in pretio, & amore esses. Id sicut tu conaberis etiam posthac promereri egregiis factis, sic omnem ego occasionem prensabo demonstrandi tibi hoc meum in te studium. Saludius ampliùs hoc te edocebit: habeto ei fidem, ac si meo ore loqueretur. Post hæc precor DEUM, mi cognate! ut te sancta sua custodia servet. Dabam Lutetiæ Parisiorum 25. Jun. anno 1627.

LUDOVICUS.

Mis aliisque egregiis, & regio fastigio dignis conatibus si annosam arborem non radicitus evulsit LUDOVICUS XIII. (non enim omnia, ut quidam inexperti credunt, ipsis Regibus in expedito sunt) convulsit tamen, & ita labefactavit, ut, quod strenuè cæperat Pater, feliciùs prosequi posuerit filius LUDOVICUS Magnus.

486. Huic fata reservârunt eam singularem gloriam, ut, si duellum non penitus extirpârit, certè fecerit in Galliis rarissimum. Postquam Anno MDCLXXIX. in celebri edicto suo spem sibi fecisset duelli usum immunitum à se iri, præquam à Regibus antecessoribus suis fuisset factum, in declaratione ejusdem edicti, triginta duobus annis post edita, testatur non sine liquido grandis animi sui solatio, tulisse se, aspirante Cælo, operæ pretium, felicique, quem hætenus habuisset, successu stimulari ad ulteriores conatus. Inde id obtinuit, ut grates ei immortales debeat posteritas; vitam

vitam enim innumeris servavit, dum vitæ gratiam nemini monomacho fecit : familiis quietem reddidit, dum aliquot turbulenta capita demefuit : & restituit sana veri honoris placita, dum à furore confecta contrivit. Ita BASNAGIUS : quamvis, an ex Christianis potiùs, quàm politicis rationibus commotus id Rex egerit, in dubium vocare malignus interpretes videatur (a). Quidquid sit, etiam bonam politicum, præter Christianas leges, cum laude curant Principes,

487. Præclaris Proavi vestigiis influit in hodiernum usque diem populi sui amor (b) LUDOVICUS xv. Vix sui juris factus, imperiû habenas capessiverat (c), mox in primis curis posuit firmare edita Declaratione mandatum Proavi, in qua, ait, non solum grandi hoc exemplo se excitari, sed etiam solemnî iurejurando, quo se, in Regem unctus obstrinxerat, à pœnis, in duellum latis, neminem eximere. Cùm autem, addit sapientissimè, nulla unquam lex tam clara sit, & præcisa, quam non perversa ingenia præposterè explicando enervare tentent, ideo se novam Declarationem condidisse. His præclaris studiis Christianissimî Reges effecere, ut postquam nullibi frequentior fuit duellorum usus, jam nullibi terrarum rarior, vel saltem minùs impunitus sit atque in Gallia, ubi monomachis vel in fuga, & tristi exilio quærenda salus est, vel subeundum infame supplicium, à quo neque occisus immunis est. Nempe pœnas victoribus, victisque constituere, ait Orator celebris (d), hoc ampliores, quodd ad vivos, & mortuos pertinerent : hoc graviores, quodd essent cum infamia conjunctæ : hoc minùs eluctabiles, quodd omnis spes veniæ Sacramento Regio tolleretur. Sicque ignominia metui coacti sunt vivere, quos opprobrii timor cogeret mori.

ARTI.

(a) Reflex. sur le duel. §. 9. (b) Le bien aimé. (c) An. 1722.

(d) P. Porté. Laudat. funebr. Ludov. XIV.

## ARTICULUS II.

*Quas Leges, & poenas in Duellum statuerint variis Magistratus.*

**N**on fuere officii sui aded immemores Principes, Magistratusque, ut non omni ferme ævo duelli barbariem saluberrimis legibus, atque injecto poenarum metu compescere studuerint. Ita quidem ut, si tanto rigore observari curassent leges, quanta providentia condiderunt, parum, quod ab hoc sibi malo timeret, habitura esset Respublica. In his exponendis ut ordo serveretur, quaeremus primò, quæ poenæ duello competant de Jure Communi. Secundò : Quæ de Jure Particulari, contento in plurimis Edictis Principum. Tertiò : An non hæ poenæ sint justo graviores. Quartò : Num etiam in Civitate malè ordinata infligi possint.

## §. I.

*Quæ poenæ duello competant de Jure Communi?*

488. *Missis legibus antiquis,*

489. *Et data definitione poenæ,*

490. *Queritur, quid Provocatus mereatur facta cade,*

491. *Quid illato tantum vulnere.*

492. *Quid provocans ob solam provocationem.*

493. *Quid ob vulnerationem.*

494. *Quid ob cadem.*

488. **N**olim esse longior in recensendis antiquissimis legibus, quæ præ cæteris CONSTANTINUS M. *cruenta spectacula, & gladiatores esse omnino prohibet* (a) : vel operas locare ad ineundam cum bestiis pugnam (b). Quarum Sanctionum prior juxta BRUNNEWANNUM complectitur omnia cruenta spectacula, in quibus effunditur, vel effundi potest humanus sanguis, ad mentem BARTOLI, JASONIS, BOCERI apud GONZALEZ. Referre etiam huc possem leges quamplurimas, per quas homicidia prohibentur in republica : vel per quas commendatur securitatis, atque tranquill-

(a) L. un. C. de Gladiat. (b) L. 1. §. Sed & si quis. ff. de postulando.



quillitatis conservatio : Item quibus cavetur, ne quis civem reipublicæ tollat à medio; cùm communitalis interfit, eam liberis hominibus esse repletam : vel quibus interdicitur, ne quis autoritate privata jus sibi dicat; his enim omnibus feritur duelli usus, utpote repugnans omnibus. At propius ad rem juvat accedere. Primo loco de pœna quæramus, quæ *provocato* competat : tum de pœna *provocantis*.

489. Est autem *pœna* juxta GROTIUM (a) malum passionis, quod infligitur ob malum actionis. Pœnam infligit suprema potestas : an autem ex justitia *commutativa* sive *expletrice*, ut vult GROTIUS : vel ex *distributiva* seu *assignatrice*, ut docent alii, non faciliè dictu est. Spectatis omnibus dicendum videtur, pœnas, si per legem publicam in genere præscribantur, pertinere ad justitiam *universalem*, seu *legalem* : si verò per sententiam hic & nunc in delinquentem statuatur, eas spectare ad justitiam *vindicativam*, quæ est separata justitiæ species ; in qua tamen observatur proportio arithmetica, ita ut in eodem gradu sit malum passionis, in quo fuit malum actionis ; distante sic Lege Divina veteri : *Pro mensura peccati erit & pignorum modus* (b). Et quamvis subinde respiciatur ad personas delinquentes : non tamen respicitur alio ex fine, quàm ut gravitas, vel levitas delicti, aut pœnæ exinde mensuram accipiat. Cæterum inter alias divisiones pœnæ hoc loco notandam duxi eam, qua pœna in ordinariam & extraordinariam dispeſcitur. *Ordinaria* est, quæ uniformiter decreta, ac determinata est delicto, vel per legem scriptam, vel per consuetudinem. *Extraordinaria* sive *arbitraria*, quæ à lege, statuto, consuetudine non est definita, sed à iudice, cujus arbitrio relinquatur, definitur, ita ut eam minuire, vel augere valeat, habita ratione delicti, & delinquentis.

His notatis, ad quæſtionem propositam juvat audire Juris Criminalis interpretes doctissimos CARPZOVIVM, BERLICHIVM, aliósque.

490. *Provocatus facta cade* inimmunis ab omni pœna esse non potest; quia in præſenti vitæ discrimine constitutus non fuit : neque rem li-

Bbb

citam

(a) J.B. & P.L. l. 2. c. 2. §. 1. (b) Deuter. c. 25.

citam egit cum provocante descendens ad duellum. Attamen non ordinaria pœna legis Cornelie de sicariis (a) : sed extraordinaria, nempe vel relegatione, vel multa, vel carceris pœna pro arbitrio judicis afficiendus esse quibusdam videtur, saltem si provocantem in ardenti ira occideret ; tum quod provocatus ad occidendum moveatur justo, atque intenso dolore, cui temperare difficillimum est, quo commotus quis non censetur esse sibi satis præsens ; cum metus improvisus instantis periculi tollat rectum iudicium : tum quod *ignoscendum sit ei, qui se voluit ulcisci provocatus* (b), Hæc est sententia CARPZOVII (c), quam ait confirmatam fuisse in Constitutione quadam Electoris Saxonie. Sed pœnam ait esse augendam, si quis provocatus fuerit absque verbis contumeliosis ad pugnam ; nec tamen ad mortem condemnat interfectorem. Addit, quod iudex hoc casu interfectorem, cui pœna arbitraria imponitur, simul ad solutionem Wergeldi (summa pecunie est, agnatis numeranda ad compensandum, quod passi sunt ea nece, damnum) & expensarum condemnare queat,

BERLICHIVS consentit ferme (d), dum provocatum in hoc casu non de toto, sed de quanto ille exceßerit moderamen inculpatæ tutelæ, puniendum censet, ideoque tantum pœna extraordinaria. Hæc tamen pœna extraordinaria sit solummodo carceris, vel relegationis, vel alia arbitraria. Ad fustigationem verò, vel ad manûs amputationem, vel aliam pœnam corporalem extendi non poterit. Ratio est ; quia quando imponitur pœna mortis : ea autem ex alia causa, ut in casu nostro ex causa provocationis, venit minuenda, tunc illa pœna non potest esse corporalis, sed pecuniaria, vel alia, per quam corpus non affligitur. In quo tamen dissentientem habet GEORG. OBRECHT (e).

Sententia hæc, à pœna capitali absolvens provocatum interfectorem, iusto benignior quibusdam videtur, nec immerito ; si enim ipse iniquè antea læsit adversarium, satisfaciet, ut debet ; nec per novam injuriam ejus vitam etiam armis impetat. Si provocatur nulla data causa, iudicem implorer. Nil itaque est, quod eum à pœna ordinaria eximat. Et

nun-

(a) Hujus definitionem vid. n. 492. (b) L. Qui cum major. 14. §. Si libertus. 6. ff. de bon. libert. (c) P. 1. quæst. crim. q. 29. n. 76. (d) Part. 4. conclus. 17. n. 9. (e) Tract. de defens. c. 11.

nunquid provocans etsi aliqua injuria affectus, pœnam ordinariam debet pati, si occidit, quem provocavit? quia scilicet apud judicem debebat con-  
queri: ergo pari ratione provocatus erit habendus. Mecum sentit MAU-  
RITIUS (a) citans HAHNIUM, & FRANTZKIUM. Idem pro solido funda-  
mento assertur in Edicto Saxo-Gothaico. *vid. n. 495.* Ipse BERLICHIIUS (b)  
fatetur, quòd provocatus juxta nonnullos *regulariter* non excusetur à pœna  
ordinaria legis Cornelie, quos inter adducit FELINUM, LUDOLPH. SCHRA-  
DER, GAIL &c.

Quin si rite BERLICHIIUM, aliòsque benigniores Doctores intelligo,  
non loquuntur de provocato, qui comparuit post moram, statuto loco,  
& tempore: sed potiùs de eo, qui ad subitaneum conflictum evocatur,  
vel acerba injuria laceffit ad arma stringenda; huic soli enim difficilli-  
mum est emotaſſe mentem, & ira succensam continere, quod fundamen-  
tum est benignæ sententiæ. Unde ipse BERLICHIIUS (c) vult, nece puniri  
provocatum, si ex intervallo, ubi ira, & dolor desit, provocantem in-  
terimit. Item, *si quis leviser tantum provocatus fuit, & ob levem ejus-  
modi provocationem occidit* (d). Quæ autem sit levis ira, & provocatio,  
Religioni, & arbitrio judicis relinquit (e). Consonant hæc cum principiis  
CARPZOVII (f). Quid? quòd in Constit. Carolin. Crim. (g) ultimum sup-  
plicium disertè sancitum sit in eos, qui inconsulto calore, & iræ fervore  
cædem patnaverint. Et, quæso, quis absque iræ quodam impulsu homi-  
cidium committit, nisi latro sit, vel sicarius?

Neque dicas, provocanti non fieri injuriam; eo quòd provocando  
renunciet juri, quo gaudet ad administrationem, vel usumfructum vitæ  
suæ; nam nihilominus fit injuria Deo, & Reipublicæ. Item, si miserum  
quemdam, etiã rogantem, occidas, morte lues factum haud dubiè: ergo  
multo magis si occidas ita inaniter renunciantem.

Unde non immeritò æquissimi Legislatores, quorum Edicta §. *se-  
quente* recensebimus, facta cæde in provocatum æquè, ac provocantem  
mortis pœnam statuerunt. Certè nemo eorum discrimen ullum fecit. Id

Bbb 2

dabo

(a) De duell. §. 46. (b) Loc. cit. n. 7. (c) Ibid. n. 20. (d) Ibid. n. 22.  
(e) N. 23. (f) P. 3. Pract. Crim. q. 147. n. 55. seq. (g) Art. 137.

dabo, si quis Magistratus gratiam interfectori facere velit, aut possit, ea digniorem esse provocatum, quam provocantem,

492. Quod si *provocatus* non occiderit provocantem, sed *vulneraverit*, aut verberaverit, ut loquitur BERLICHIIUS (a), tum pœna extraordinaria ad arbitrium judicis puniendus erit, ut docent plurimi, & sana videtur distare ratio. Mihi tamen, ait BERLICHIIUS, verius videtur, quod provocatus hoc in casu omnino puniri non debeat. Argumenta tamen ejus infirma esse existimo. Primum citat *L. si ex plagis. § 2. §. 1. ff. ad L. Aquil.*, ubi tabernarius, ablatam sibi lucernam repetens, dum flagello percutitur ab eo, qui sustulerat lucernam, reddens ictus, fortè oculum effodit homini: & tamen culpa penes eum dicitur residere, qui prior flagello percussit. At tunc ad rem foret hæc lex, si provocatus primò à provocante quidquam exegisset de jure sibi debitum: ab hoc autem malè exceptus vim vi repellendo fortuitò dedisset vulnus; id quod à casu nostro longè alienum est.

Nec melius quadrat *L. 1. §. cum arietes. 11. ff. Si quadrupes pauper. fec. dic.* ubi dicitur, si aries arietem provocavit, & provocatus provocantem occidit, quod contra eum nulla actio competat; hoc enim probaret nimium, scilicet quod provocatus impunis abire etiam deberet tunc, quando provocantem occidit. Ad hæc quæ similitudo inter homines, & bruta? utique brutum judicem adire pro vindicanda facta sibi injuria non potest: adeoque mirum non est, quod tam ipsum, quam dominus ejus veniam mercantur, si à provocato provocans lædatur.

Argumentum tertium BERLICHII ita habet: si provocatus provocantem occidat, tantum punitur pœna extraordinaria: ergo si tantum vulnerat, vel verberat, nulla pœna afficiendus erit; quoniam aliàs inter occidentem, & vulnerantem nulla foret differentia. Resp. dari inter ipsas extraordinarias pœnas, majores, & minores: si ergo occidenti aliqua extraordinaria competat, major huic assignanda, minor vulneranti. Cæterum quorundam Principum Edicta etiam vulneranti provocato dicunt pœnam mortis: quin solum pugnanti, quamvis sine vulnere, de cujus sententiæ æquitate suo loco dicemus.

492. Jam

(a) Loc. cit. n. 1.

492. Jam etiam de *provocante* statuendum est, quomodo hic puniatur *ob solam provocationem*, si e. g. hanc non accepit provocatus. Videtur dicendum, quod pena ordinaria *Legis Corneliae de sicariis* sit puniendus. Pena per legem hanc statuta, fuit aquæ, & ignis interdictio, in cuius locum fuit subrogata deportatio, & bonorum ademptio l. 3. §. *pen. ff. de sicar.* Postea verò capite placuit hoc crimen puniri, nisi honestiore loco positi fuerint rei, quàm ut penam legis sustineant; humiles enim bestiis solebant subijci: altiores verò in insulam deportari. Qua pena puniri jubentur, qui falsum testimonium ferunt, aut venena parant, aut cum telo ambulanti homines occidendi gratiâ. Neque enim exitus spectatur in delictis, sed voluntas (a): quatenus tamen aliquo modo in actum transit (b). Hanc penam in casu, quo quis habuit animum occidendi, & propositum, imponi posse, extra dubium esse ait BERLICHIVS (c), subjungit autem: cum tamen incertum sit, an provocans animum occidendi, an verò vulnerandi tantum habuerit: & si vel maximè animum occidendi habeat, cum tamen adversarium non clanculum, sed Marte aperto aggredi, & cum eo certare voluerit, & pugnae eventus anceps sit, melius erit, si pena extraordinaria ad arbitrium judicis puniatur. Pena ergo aliqua semper habebit locum etiam tunc, juxta BERLICHIVM, & KNIPSCHILT (d), quando provocatio absque verbis contumeliosis facta fuerit; cum provocatio omni jure prohibita sit, atque ita provocans ob solam etiam provocationem puniatur, & quidem severe, ut pestis hæc quantum potest fieri, eliminetur ex Republica. Idem juxta hos Authores procedit, etsi provocatus verbis, aut factis causam provocationi præbuerit; quia propterea non debet quis adversarium ad pugnam provocare, & se ipsum ulcisci: sed contra cum viâ juris experiri.

Observandum autem est, ut monet BERLICHIVS (e), quod prædicta pena provocanti ob solam provocationem imponatur. Unde inferitur, quod is, qui aliquem verbis contumeliosis provocaverit, vel aliam injuriam intulerit, nihilominus præter penam provocationis etiam alia

Bbb 3

pena

(a) L. Divus. ff. de sicar. (b) L. Cogitationis. ff. de pœnis. (c) P. 4. Concl. 16. n. 11. (d) De Nobilit. lib. 2. c. 3. n. 113. (e) Loc. n. cit. 15.

pœna injuriarum vel criminali, vel civili, prout actio instituta fuerit, puniri possit; tum quia hic adsunt plura & quidem diversa delicta, provocatio scilicet, & injuria: tum quia pœna provocationis pertinet ad fiscum: pœna verò injuriarum concernit injuriarum, & ei, si civiliter egerit, applicatur. Ubi autem duæ sunt pœnæ, quarum una pertinet ad fiscum, altera ad actorem, tunc una alteram non tollit (a).

493. Si provocatione acceptata *venerit provocans ad pugnam*, & provocatum vulneret, vel mutilet, ordinaria quoque pœna eum puniendum censet BERLICHIIUS (b), & OEBRECHT apud KNIPSCHILT (c); quoniam animum occidendi habuisse præsumitur, saltem si ipse prior armis provocatum invasit. Noto hic, animum in duello non semper esse *determinatè* mortem alteri inferendi: sed dandi vulnus, prout opportunitas tulerit, etsi sit lethale, quod sufficit ad culpam. Ipse tamen KNIPSCHILT iterum de pœna ordinaria dubitat, eo quòd hodie ex generali consuetudine omnium locorum, conatus, etsi ad proximum actum pervenerit, nisi delicto ipso perpetrato ordinaria pœna non puniatur. Docet etiam CARZOVIIUS (d), Legibus de conatu loquentibus, in toto orbe derogatum esse. Meretur tamen etiam audiri MAURITIUS (e): Etsi conatus delicti in genere ordinaria pœna regulariter non sit puniendus: non tamen hinc tutò colligitur, etiam illorum delictorum conatus, in quos à legibus speciatim pœna ordinaria sancita est, mitiori pœna plectendos, atque has etiam leges inter abrogatas privato quodam ausu reponendas esse, qua de re pluribus disputat TABOR (f). Unde colligo ego, eas leges observantià omnino esse dignas, quæ, ut videbimus §. seq. pœnam mortis in provocantem statuunt, etiam non secuta cæde. Idem dico de legibus, sub pœna mortis solam provocationem prohibentibus, etiam non secuta pugna.

494. Si denique *provocans provocatum occiderit* in duello, pœna ordinaria homicidii locum habet. ita KNIPSCHILT, aliique. Neque occisor defensionem prætexere poterit; cùm Author rixæ fuerit. Quod etiam

---

(a) L. pignore §. 4. s. Cum furti. 3. ff. de furtis. (b) Loc. cit. n. 16. (c) N. 114.  
(d) P. 1. Pract. Crim. q. 2. n. 54. (e) De duello. §. 48. (f) De conatu c. ult.

etiam eo casu procedit, teste CARPZOVIO (a), quando provocans in conflictu jamjam succumbens, & ab adversario redactus in angustias, hunc interficiat ad sui defensionem; tum quodd provocans ab initio non fuerit in *terminis defensionis*; sibi enim imputet, quodd per provocationem periculo se exposuerit: tum quodd lex non præsumat Authorem rixæ, & provocantem constitutum in vitæ periculo fuisse, urpote qui sponte sua ex culpa propria caput suum periculo objecerit. Proderit tamen in hanc rem legere §. ultimum Capitis sequentis.

## §. II.

Quæ poenæ duello competant de jure particulari juxta Edicta Principum.

495. **J**ura particularia & recentiora stat jam conspectui objicere: magis accommodata duello hodierno, nefasto honoris vindici. Habent id leges cum odoramentis commune, ut recentes fragrent magis, necdum vetustate exoletæ. Potissimam eorum partem ex LUNIGIO hausi (b), qui Edicta variorum Principum, ac urbium sedulè pro more suo colligit; aliqua aliunde conquisivi: haud dubiè multa præterea alia extant: at sufficientiant hæc ad finem mihi præfixum. Neque tamen repetere jam juvat præclara illa, quibus fœta sunt, sentia & sententias cedro dignas, quas sparsim hucusque, præsertim *Capite secundo* inserui: neque iterum recensere provida studia, queis impedire jurgia, enata sopire in tempore satagunt: item quas vias excogitârint, ut læsus cuique honor reparetur; quin necesse sit armis sibi jus dicere. Satis etiam ibidem explicatum est, qui gerere se debeat, qui fortè se provocatum videt: hæc, inquam, & similia non repetam. Sed pœnas jam vindicantis justitiæ in conspectum dabo, latas à supremis Principibus, ac Magistratibus in provocationem factam, & acceptatam: in duellum commissum sine cæde, vel eum cæde: tum in eos, qui operam suam duello navant. Ordinem autem alphabeticum servabo, ut edictum quodlibet præstò esse possit querenti.

Augu-

(a) L. cit. n. 97. (b) Corpus Juris Militan,

AUGUSTA libera Imperii Civitas, Vindeliciæ gemma, Edictum condidit contra duellum An. 1668. intentatis severis pœnis, si quis transgredi fuerit ausus.

BADENSIS Marchio LUDOVICUS WILHELMUS, exercitui ad Rhenum præpositus, statuit in Edicto suo militari pœnam mortis in provocantem, & provocatum: &, si videatur, etiam in adjuutores An. 1649..

BADENO-DURLACENSIS Marchio, præterquam, quod duelli reos, pro rerum adjunctis, capitali pœna affici mandet, iis quoque internuntiis, qui per occultam operam speciem rixæ affingere parant ejusmodi pugnis, simile supplicium intentat. *Edict. Ann. 1718.*

BAVARIÆ Elector, gloriose memoriæ MAXIMILIANUS EMMANUEL in terras suas ex Belgio redux An. 1701., queritur Edicto publico, quod contra saluberrima Statuta Majorum suorum, in ipsa sua Regia, rixæ, & duella nimium quantum invalescant, quæ tota, qua polleat autoritate, eliminata veller. Addidit mandatum amplius An. 1720., in quo repetit primò easdem querelas contra inobedientiam, exhibitam suo mandato Monacensi, & postquam explicavit, qua ratione cujuscunque honori consuli prudenter possit, pœnas, easque capitales decernit in transgredientes: non tamen certas pro certis quibuscunque hac in materia delictis, definit. Id quod quidem sapientissimus Princeps pro sua Bavaria sufficere credidit: alibi tamen terrarum prodesse vix poterunt ejusmodi minæ non satis definitæ, ut diximus n. 480. In eo providè actum, quod singulis annis copiis militaribus prælegi, & publicè in mansionibus militum affixum proflare voluerit hoc suum mandatum. BAVARIÆ hodiernus Elector, & verè Pater MAXIMILIANUS JOSEPHUS, quid utilissimè in hanc rem ediderit elapso Anno MDCCXLIX., alibi indicavimus num. 93. 97. 101.

In BELGIO etiam aliquoties Edicta fuerunt lata, sunt verba MAURITII de duell. §. 83. quibus duellatorum coerceretur furor. Et quidem PHILIPPI II. An. 1589. & plenissimum ALBERTI, & ISABELLÆ An. 1610. Idemque repetitum fuit An. 1624., quo provocantes, & in duellum consentientes infamia notantur, Nobilitatis insignibus, ac prærogativa exuuntur, officiis, honoribus, ac muneribus omnibus spoliantur, ac dimidia bonorum pars proscribitur, ac publicatur. Duellatoribus verò si lubitum sit, ut modò in constituto duello loco compareant, ac conspiciantur, ultimo afficiuntur supplicio, bonæque tum omnis Fisco applicantur. Cautum quoque



que est Edicto ALBERTI, & ISABELLÆ, se eos, qui provocationi non pareant, in suam fidem & protectionem recepturos, & si quis eis hanc mansuetudinem contumeliosè exprobrat, arbitraria in eum pœna esse animadversuros.

BELGII UNITI Gubernator, Princeps Arausicanus ipse quoque An. 1684. provocantes exuit dignitatibus, multam imperat juxta cujuslibet opes. Secuto duello, bonis fisco addictis, condemnat ad mortem tam paternos, quam ipsos duos pugiles. Secuta morte cadaver destinatur patibulo.

BIPONTI elaboratum est Ann. 1721. Edictum à GUSTAVO SAMUELE LEOPOLDO Com. Palat. Rh. Post explicata duelli mala statuitur in provocantes & paternos, aliósque operam præstantes jactura dignitatum, multa & carcer per tres annos, & subtractio mediæ partis proventuum annuorum: in defectu opum condemnantur sexennio ad operas publicas. Eadem est pœna provocati, non denuntiantis provocantem, nisi per injuriam præviam ad provocationem ansam dedisset; tunc enim augetur pœna. Secuto duello cum, sive sine cæde, gladius datur, aut restis. Sepultura conceditur Nobili in loco duelli: aliis apud excoriatorem.

In BRANDEBURGICIS etiam terris sanguinaria hæc Hydra suum Herculem invenit WILHELMUM Electorem, qui An. 1652. gravi eam Edicto afflixit. Secutum est aliud An. 1688. Authore FRIDERICO III., Saxonico admodum simile, nisi quòd aliquantò severitatem acuerit; quia etiam non dato lethali vulnere in commisso duello Nobiles nihilominus ad gladium, ignobiles ad restem condemnantur: & funus etiam viri nobilis carnifici curandum committitur. Quem rigorem iterum mitigavit An. 1713. FRIDERICUS WILHELMUS, statuens pro duello non facta cæde captivitatem duodecim annorum, quorum duo primi pane, & aqua exigendi sint, adempris tamen honoribus, muniis, & bonis omnibus, quæ adimi possint. Id enucleatè explicat, quomodo habendi sint ii suorum subditorum, qui, exteris in terris offensi, velut inviti trahuntur ad dimicandum. Hos non habendos esse, ait, pro reis de duello: si tamen sanguinem fuderint, juxta jus commune esse judicandos. *vid. n. 112.* Successit hujus declaratio An. 1717. in qua illud singulare, quòd vulnus tunc censendum sit lethale, si mors secuta sit intra diem nonum, nisi probetur, aliunde mortem venisse. Et denique altera declaratio, data An. 1721. singulare nil habet, nisi quòd reo concedatur defensio, solita aliàs concedi in causa criminali.

Cæterum hæc mandata, præcipuè illud FRIDERICI III. doctrina saluberrima refertum, dignissimum judico, quod à Principibus, & Magistratibus univèrsis cum attentione legatur, apud LUNIG.

BRANDEBURGICO-BARUTHANUM Edictum An. 1685. imperavit amputari dexteram, vulnere in duello vel mutilatione facta : secuta cæde pœnam mortis præscribit : patrinis, cæterisque hujus furfuris exilium perpetuum.

BRANDEBURGICO-ONOLZBACENSE carceri mandari jubet duellum machinantes : pœnam sibi reservat statuendam An. 1682-

BRUNSWICO-LUNEBURGICUS Elector GEORGIUS LUDOVICUS An. 1706, indignatus, Patris hac de re edita jussa non eo apud multos loco esse, quo deberent, renovavit mandatum, jam promulgatum Annò 1691. pœnam mortis statuit in interfectorem, & in interfectum sepulturam cum asinis. Cùmque postea etiam suo proprio mandato morem non satis geri videret, novo Edicto institit An. 1718., jam creatus Rex Angliæ, damno præcipuè, quod ea furia rei militari inferret, permotum se fassus. Quare provocantem sine secuto duello, ad gregarii militis functionem, & stipendium dejecit per trimestre. Eadem pœna statuta est in provocatum comparentem nullo etiam secuto vulnere. Attendi autem semper mandat ad dissidii authorem, huncque pœna dupla, sive provocans, sive provocatus sit, affici. Si datum vulnus sit, prolongetur tempus pœnæ. Interfectus, si provocaverit, & author jurgii fuerit, sepeliatur loco infami, secus, si talis non fuerit : quicumque autem interfecerit, sine discrimine gladio perimatur. Internuntii, patrini &c. per trimestre redigantur ad fortunam gregariorum. Dum ad præcavendum duellum satisfactio pro injuria danda est, semper respici vult ad authorem jurgii, & providè; sic enim modestiam colere discunt feroces genii, & causæ duellorum evitantur.

BRUNSWICO-GUELPHERYTANUS DUX An. 1646. totus in eo fuit, ut monomachiam insanix convinceret, omnisque frivolo obtentui effugium præcluderet. In homicidam pœnam mortis statuit.

In Regno CASTELLÆ, teste MOLINA *de Jussit. tract. 3. disp. 17. n. 5.* provocatus, etsi occiderit antagonistam, non punitur morte, sed perpetuo

tuo tantum exilio, eo quod laesisset accesserit, atque ut honori suo confuleret.

COLONIENSE Edictum JOSEPHI CLEMENTIS Electoris, & Archiepiscopi notatu dignum est, & multo cum zelo excusum An. 1704. ubi primo laeso non quaerenti praesidium apud judices, sed provocanti ad pugnam negatur posthac omnis satisfactio, aliudve juris remedium: tum addicitur per biennium carceri, triennio suspendendus ab exercendis suis muneribus, & proventu omni cariturus: ita ut poena etiam exasperanda sit, si aequum locorum Magistratibus, ac Praefectis visum fuerit. Iisdem poenis subjicitur, qui vocatus compareret in arena, vel acceptat solum provocationem ad se missam. Quod si quis praefectum suum militarem, postposita, quam debet, reverentia, provocare ausit, quadriennium duret poena ante recensita, sustinenda ab ipso etiam praefecto, si invitanti sibi subdito pareat comparendo, vel condicendo. Ad sexennium et poenae extenduntur in eos, qui in poenam loco suo morti sibi substitutis molestias ausi fuerint facessere evocando ad pugnam. Operam suam enarratis omnibus commodantes iisdem poenis subjiciuntur. Si ad pugnam deveniatur, utut sine vulnere etiam haec abiret, pugil uterque morte mulcetur, bonis fisco addictis, & applicandis partim Xenodochiis, partim reorum uxoribus, & liberis. Occiso uno cadaver arcetur sepultura Ecclesiastica, homicida traditur carnifici. Additur denique poena infamis in omnes, contra hoc mandatum peccantes, neque patrinis, aliisque similibus exceptis, dum Nobilitatis praerogativis exui, omnium officiorum incapaces haberi, insignia eorum aboleri, frangique carnificis manu jubentur, nulli posteriorum posthac servitura. Caver denique, ne subditorum quisquam alibi hoc crimen impunè patret; secus nihilominus citandus ad iudicium, in quo contra non comparentem ut contumacem ferenda erit sententia, juxta regulas hactenus firmatas.

Ex Electoratu COLONIENSI Edictum recentius accepimus à Serenissimo CLEMENTE AUGUSTO octo abhinc annis promulgatum, quem tragicus in aula sua casus ad nova contra duellum cudenda fulmina permovit. In eo post suggesta studia varia, quibus praepediri duellum posse alibi diximus (a), poenas decernit à priore edicto parum absimiles, quibus evi-

C c c 2

tandis

(a) Cap. 2. art. 1. §. 4. §.

tandis nulla præscriptio, etiam triginta annorum, sufficiat. Si quid in suo Edicto non expressum contingat, judicem jubet statuere juxta *paritatem rationis*, de reliquo agere secundum leges civiles ac militares, aliàs usu receptas. In fine pœnam, in provocantes statutam, sapientissimè extensam vult in eos, qui maledicè carpere suum Edictum ausi fuerint.

DANIE REX CHRISTIANUS V. Edicto suo, quod An. 1688. pro finibus præcipuè Pinnebergensibus, & vicinia civitatis Hamburgensis (ut quidem verba sonant) edidit, minitatur præcipuè locorum præfectis aliisque, qui vel capere eos negligunt, vel fugam eorum promovent, pœnas in bonis fortunæ, famæ, & corporis, quales ipsi pugiles deberent ferre.

GALLIÆ Mareschalli jussu Regis Edictum in lucem dedere An. 1653. ubi non tam de modo puniendi, quàm impediendi duellum laborarunt, declarando scilicet, quæ ratione honor mutilatus cuique redintegrari posset per auctoritatem publicam, & castigari deberet vindicta privata. Declaratio hujus mandati prodit iisdem auctoribus An. 1679.

GALLIÆ Regis LUDOVICI XIV. Edictum celebratissimum statet fulminibus, vibratis in monomachos. Provocanti negatur omnis satisfactio pro accepto probro, biennali adscribitur custodia, & mulctatur media parte annui proventus, applicanda Xenodochio proximo; præterea ab omni officio suspensus, & triennio fructibus inde percipiendis privatus esto. Eandem animadversionem sentiant, qui provocationem acceptant, venientes ad arenam, & aggressionem quamdam tentantes. Datur Magistratibus licentia ejusmodi pœnas augendi pro ratione delicti. Quod si provocare quis ausit præpositos sibi, & pugnam alteri intentare ob tricas ortas ex subjectione, quam dicasterium aut unum officium alteri debet, duplicata sit pœna ad quadriennium provocantis, & provocati parere volentis, sèque ad pugnam accingentis. Ad sexennium prorogatur contra eos, qui loco suo moti successoribus suis molestias faciunt: vel qui secunda vice provocationem dant, aut acceptant. Securo duello, etsi sine cæde, & vulnere, uterque pugil ad ferale supplicium condemnatur. Mobilia bona, & immobilia transcribuntur fisco regio, unde tamen portio quædam in sustentationem relictarum prolium, & triens in Xenodochium impendenda sit. In provinciis autem, ubi fisco transcribi bona non solent ex consuetudine, media bonorum pars in mulctam cedit. Unde fiscus, & Xeno-

Xenodochiorum curatores invigilare jubentur his spoliis, actione eis per viginti annos competente. Secuta cæde negatur sepultura Ecclesiastica, interfecto damnatur capitis : bona omnia utriusque fisco cedunt.

Qui secundis & tertiis utuntur, secuta pugna, cæsi innoxia, præter vitam, & bona, etiam insignia Nobilitatis perdunt, ita, ut eorum liberi alia teneantur sibi eligere. Sunt autem hi *Tertii*, & *Secundi* non testes, & patrini qualescunque, sed tales, qui etiam ipsi pugnae aleam subeunt. Denique qui libellos provocatorios deferunt, vel pugiles ad arenam committantur *e.g.* Famuli, prima vice fustigationem ferant, & infame inultum stigma. Repetito delicto mittendi sunt ad triremes. Ne verò inani obtentu extemporaneæ rixæ crimen pallietur, observanda erunt monita, alibi recensita *vid. N. 20.* Institit huic mandato suo immoto animo LUDOVICUS, donce an. 1711. articulum illius decimum tertium nova declaratione illustravit. Concesserat antea partem quamdam bonorum, fisco addictorum, impendi pro reorum liberis ac familia alendis : sed etiam hoc negat in præfenti, ut feroces homines propriæ salutis oblitos, suorum saltem miseria tangeret, & pietas erga charam familiam, redigendam ad inopiam, à dimicatione absterret. In provinciis autem, ubi bona fisco non solent cedere, multam solvendam à reis, ad duas tertias bonorum extendit, ut scirent monomachi, parum omnino remanere pro alimentis charæ sobolis. De æquitate hujus legis *vid. n. 498.*

GALLIÆ REX LUDOVICUS XV. gloriosissimè hodie regnans Declarationem, & confirmationem prioris Edicti dedit an. 1723. De cujus, & Magni Proavi laudibus *vid. n. 486.*

HAMBURGENSIS Magistratus exilium interminatur reis de duello commisso, sed non fatali; spectatoribus, vel rhedas, aut equos commodantibus, quin & chirurgis non denuntiantibus, quorum curant vulnera, pœnas alias parat An. 1699. Renov. An. 1720.

HANOVIENSIS Comes FRIDERICUS CASIMIRUS provocantem, & condecemtem eiici mandat ex legione, aula, dicasterio cum ignominia an. 1682.

HASSIÆ Landgravius CAROLUS Edictum promulgavit An. 1684. non equidem ab aliis, præcipuè à Würtembergensi multum diversum : lectu tamen dignissimum.

HASSO-DARMSTADIANUS Landgravius suo præter alia inseruit, ne vulnerato refarciantur expensæ, factæ in medicamenta An. 1715.

HISPANIS quoque Reges Catholici FERDINANDUS, & ELISABETH An. 1480. omnino duella prohibuerunt, adjunctis pœnis pugnantis, & mediatoribus pugnae ac patrinis; ut incurrant notam proditorum, & bonorum amissione fisco applicandorum puniantur, & ut provocans, si adversarium occiderit, seu vulneraverit, capitali supplicio afficiatur. GONZALEZ *ad Cap. II. de cler. pugn. in duell.*

JENÆ Senatus Academicus duellis Academicorum præpediendis multo cum consilio statutum condidit in hunc finem perquam opportunum Anno primùm quadragesimo nono hujus Sæculi.

IMPERII Conventus Conclusum in hac materia edidit an. 1667. in quo, postquam amplè explicatum est, quid circa injurias sit observandum, quomodo dissidia vel supprimenda sint in tempore, vel illata probra punienda, multaque patheticè contra duellum dicta fuere, statuitur in provocantem, etiam non securâ pugnâ, & multo magis eâ securâ, exuendum cum esse suis muniis & dignitatibus: quin, si ita visum fuerit, etiam exilio, ac morte puniendum. Simili pœna afficiendos pronuntiat provocatum si compareat, patrinos, deferentes libellum provocatorium, iridentes nolentem comparere, vel alia ratione operam conferentes. Cæde patrata tam provocatus, quam provocans, quicumque cædem admiserit, condemnatur ad gladium, nulla habita ratione nobilitatis, status, cognationis. Occisum prohibet in communi cæmeterio tumulari. Quod si reus in terras Principi suo non subiectas, intra fines tamen Germaniæ adhucdum sitas, aufugiat, jubetur reddi exigenti Domino, cui subest: vel si extra Germaniam abijisset, pati in effigie, quidquid pati potest. Probavit magnopere Ordinum studia LEOPOLDUS Imperator, resolutione, ut vocant, data An. 1668. Ordines Imperii instirere an. 1680. ut ea resolutio Cæsarea Ediçto promulgaretur. Quam petitionem ratam habuit anno sequente Augustissimus.

IMPERATOR FERDINANDUS III. An. 1651. mandatum in Silesiam misit, quo pœnam mortis decernit in provocantem, & provocatum, ita ut præter ipsum Imperatorem nemini Præfectorum liceat mitigare pœnam.

IMPERATOR LEOPOLDUS insigne in hanc rem mandatum vulgavit An. 1682., in quo primò facit mentionem de ediçto quodam FERDINANDI Patris edito An. 1637. tum de suo proprio dato An. 1666. dein ad mortem  
condem-

condemnat provocantem, & provocatum, etsi sine testibus pugnassent, aut sine vulnere, aut etiam extra fines suarum provinciarum; & una cum iis paternos, secundos, adjuvatores. Fugitivorum bona additisco servatis tamen alimentis pro uxore & liberis, & jure hæredum post mortem rei. Quodsi bona fugitivus non possideat, citatus & non comparens in effigie numcllis publicis exposita, sententiam fubeat. Ob solam provocationem factam, & acceptatam, non secutâ pugna statuitur relegatio ex patria, vel aula, jactura dignitatum, decennalis custodia, multa pecuniaria, aliæque similia. Quoad formam Judicii præscribitur, ut absque ambagibus trahantur ad pœnam, si sceleris convicti fuerint, vel illud ipsimet confessi. Secus interdicto processu ordinario, non nisi *summarissime* procedendum, sine solemnitatibus juris, nec levato velo. Demum Magistratibus omnibus adimitur facultas mitigandi pœnam, addito, ut sententiam ad ipsam Cæsaream Majestatem, antequam publicetur, mittere non omittant. Alia hoc Edicto contenta alibi etarravimus. *Ex Tabulario Viennensis Consilii Bellici.*

IMPERATRIX ELEONORA Vidua, CAROLI VI. Mater Augusta p. r. Gubernatrix provinciarum hæreditariarum Edictum LEOPOLDI, primò recensitum, confirmavit ex toto Anno 1712. *Ex eodem Tabulario.*

IMPERATRIX MARIA THERESIA, Regina Hungariæ, & Bohemiæ, hodierni ævi admiratio, dum nupcr Articulos bellicos, à LEOPOLDO I. conditos, confirmavit, inter alia ducllum sub pœna capitis prohibere non dubitavit, severa etiam pœna in paternos decreta. *Ex eod. Tabul.*

LOTHARINGÆ Dux LEOPOLDUS An. 1699. admodum laboravit Edicto suo saniora persuadere duclli sectatoribus. Provocantibus, provocationem denuntiantibus, acceptantibus, pugnae assistentibus triennalis custodia præter jacturam dignitatum decernitur. Qui ex famulatio opcram commodant, si egressi fuerint quindecim ætatis annos, sentiant fustigationem, & inurendum stigma; minoris ætatis pueri fustuarium in carcere. Si sequatur ducllum, certantibus pœna mortis, & jactura bonorum indicitur applicandorum arario Principis.

LUBECENSIS senatus severè prohibet in mandato, renovato An. 1720., ne quis currum, aut equum commodet fugam adornanti post ducllum. Quodsi etiam extra ditionem Lubecensem commissum id fuerit, modò

ddo sit decretum intrâ, pœnam feret eandem ac aliud, mortis scilicet, salutem si fuerit patrata cædes.

LUSITANARUM ordinationum *lib. 5. tit. 93.* exui jubentur bonis omnibus, additis pœnis aliis, quicumque ad duellum provocaverint, & qui laceffiti id acceptaverint, quin & patrini. *MOLIN. tract. 3. disp. 17. num. 5.*

MEGALOPOLITANUS DUX CAROLUS LEOPOLDUS anno 1715. curam suam amplo hac super re Edicto demonstravit, in quo condemnavit provocantem, non secuto duello, ad annum carcerem, jacturam dignitatum. Duplam dictat pœnam, si quis præfectum suum provocat ob offensam, quam sibi illatam olim ab eo fuisse putat tempore subjectionis. Tum de provocante aufugiente, vel dissidia domi orta, alibi gentium gladio volentibus decidere ferme eadem statuit, quæ legere est in Edicto Saxonico Electorali. Nec multum abludit in decernendis pœnis secuto duello. Familiae fugitivi relinquit bonorum dimidium ea lege, ut illa præstito jurejurando spondeat, nihil se opis missuram absenti. Internuntios, aliisque plectit, at ipsos pugiles: mitior nonnihil est in famulos reorum; severus in custodes, fugæ locum relinquentes.

MONASTERIENSIS Episcopus FERDINANDUS milites præcipuè cohibere studuit à duello; dum affigi, & promulgari ubique edictum suum mandavit AN. 1682.

NEAPOLITANO in Regno adest Pragmatica Sanctio, incipiens: *No- vis occurrentibus malis*, statuens pœnam mortis naturalis, ipso jure incurrendam non solum per ipsos principales, audentes provocare alios ad duellum, etiamsi nullum duellum sequeretur: sed etiam per nuntios, intermedios, & assistentes similibus pugnis, & duellis. Excipiuntur verò duo casus, in quibus dicta pœna minoratur. Super hac pragmatica extant commentaria FOLLERII, & FRANCISCI SCAGLIONI. *Ha QUARANTA verba sonant in summ. Bullar. verbo Duellum.*

PALATINI Electoris JOANNIS WILHELMI insignem æquitatem legere est in Edicto, elaborato non mediocri studio Ann. 1692. Cùm in plerisque, præcipuè in rigore pœnarum, simillimum sit Brandeburgico Anni 1688., supra in synopsis exhibito, pluribus commendare superfedeo.

PALA-



PALATINUM SULZBACENSE quoque huc referri debet, editum à THEODORO C. P. R. an. 1721. paucis complectens multa.

SABAUDIS suis DUX CAROLUS EMMANUEL I. An. 1660. pœnam mortis indixit, monomachis ferendam, bonis fisco adjudicatis. Eodem fato involvi voluit patrilinos, assistentes, vel provocationem nuntiantes. Aliud Edictum sequente anno datum fuit à CAROLO EMMANUELE II. Duce, ubi iuramentum à Nobilitate, aliisque, qui jure gestandi gladium gaudent, deponendum proponitur, de quo nos egimus N. 482. Accessit declaratio An. 1662. Denique in Constitutionibus editis An. 1723. à Rege Sardo, & Sabaudis Duce. L. 4. C. 2. Duellum dicitur prohiberi sub pœna mortis, etiam commissum extra ditionem, etiam cæde non secuta. Bona devolvuntur ad fiscum.

SAXONIAM suam FRIDERICUS AUGUSTUS, Rex Poloniæ, Saxonis Elector, præclaro Edicto contra duella firmavit an. 1706., quod solidissimâ undique doctrinâ respersum, non solum id agit, ut duella præpediant, illatas injurias publica auctoritate puniendô, sed & in privatos vindices æquali rigore animadvertit. Provocanti, etiam non secuto Duello, omnem negat pro injuria, si quam passus sit, satisfactionem in judicio, dignitatibus exuit, per annum, cujus semestre in pane, & aqua transigendum, custodiæ mandat: quodsi reus dignitatibus careat, proventuum suorum parte dimidia per triennium privat: carentem etiam proventibus ad operas condemnat per integrum quadriennium.

Has pœnas adanger iis, qui eum, sub cujus olim potestate erant, provocant ob tricas, tempore subjectionis exortas. Quodsi facta provocatione se subducatur, citatus, nec comparens decennio integro jubetur exulare, nomine ad patibulum affixo: statutam nihilominus pœnam recepturus post, ubi fors in casses inciderit. Si verò provocans nostræ, ait, potestati non subsistit, subito nostro provocato opem feremus, requirendo, & implorando justitiæ potentis extera, ad quam provocans spectat; hæc si audire nos nolit, reus per vicinas tres provincias proclamabitur *edictaliter*, & venire recusantis nomen in patibulo pendebit. Idem eveniet, ubi ejus fortè patria ignoretur. Tum ad provocatum conversus legislator æquissimus semestri custodiæ eum mancipat, si provocationem sibi factam judici non denuntiet. Vel si quis ortum in Saxonis terris dis-

fidium alibi armis finire tenter, punietur, ac si domi id tentaret. Vel si Saxonum quis alibi conflixerit, Magistratui ejus loci requirenti tradetur.

Quòd si duellum ipsum sequatur, quamvis absque cæde, Nobiles, vel eis pares, duodenni custodiæ traditi, dimidio proventuum suorum quamdiu vixerint, carcant: ad operas publicas amandantur ignobiles. Cùm ex vulnere in duello accepto, decesserit Nobilis, sepeliatur prope cæmeterium eo loco, quo sepeliri solent capite plexi: ignobilis à carnifice suspendatur ex patibulo. Qui occidit, Nobilis si sit, vel aliàs nobilium privilegiis gaudeat, fractò gladiò, capite erit plectendus, data sepultura priore: ignobilis, abscissa per carnificem dextra ad restim damnatur; media opum parte cedente fisco. Qui aufugit, si citatus non compareat, in effigie, quod meritus est, sustinet. Dimidium bonorum relinquatur liberis ejus, jurejurando tamen adstringendis, ne quid opis mittant fugitivo Patri: Uxoribus, fratribus, ac sororibus fisco nil auferat. Qui latibulum præbent reo, vel fugam promovent, subjacent suprà statutis in provocantem, non secuta pugna. Item qui concitant animos ad discordiam, vel qui patrimonios agunt, aut libellos provocatorios deferunt. Famuli, qui interfunt duello, vel arma, equos &c. ad arenam afferunt, per duos, trèsvè annos ad operas publicas condemnantur. Qui otiosos spectatores duelli agunt, neque impediunt, neque denuntiant Magistratui gliscens incendium, trimèstri captivitate, non nisi pane & frigida refocillandi, castigantur.

Idem æquissimus Rex declarationem addidit An. 1712. ubi singulare est, quòd, si in primo æstu, post acceptam statim offensam, quis provocaverit ipse, non mittendo alium (secus enim primus æstus dici ægrè posset) ab officio sit suspendendus, salario per biennium privandus, & per annum custodiæ dandus, hanc per biennium toleraturus, si munus carcat, quibus spoliatur. De Academicis ait, si facta criminalia commiserint, hoc in genere, ab eo esse judicandos, quibus aliàs hoc genus judiciorum criminalium competit. Si conflixerint duello, vel rixa, eadem cum aliis pœna afficiantur: si non devenierint ad ipsum conflictum, dimidium pœnæ ferant. Leviores injuriæ ad Magistratum Academicum de more pertineant. Si extrà Academiam cum militibus inciderint in jurgium,

gium, iudicium mixtum formari imperat ex Magistratu loci, & Præfecto militari, ibi præfente.

SAXO-GOTHAICUM concinnatum operâ clarissimi FRANTZKII, ut existimat MAURITIUS, mira cum energia stolidum duelli furorem adeò persequitur, ut nemo ex sacra Cathedra Orator solidius, & facundius ad principia veræ probitatis perorare posset. Inter alia demonstrat, æquum omnino esse, ut, cum provocans, etiam injuria irritatus, ob patratam eadem morte puniatur, simili pœna etiam provocatus puniatur, præsertim dum injuria illata causam conflictui dedit.

Ex eadem Provinciâ edictum aliud in lucem prodit sub FRIDERICO Duce An. 1709, pœnas statuens easdem, quas in Saxonico Electorali vidimus. Duplicari tamen eas præcipit in iis, qui à præpositis suis duellum exigunt ob molestiam, quam tempore subjectionis passos se fuisse credunt. Hoc mandatum ad mentem totius Serenissimæ Linæ Ernestinæ confectum esse asseritur ibidem. Neque contra has pœnas, aut actionem criminalem præscribi triginta annorum spatio, ita, ut, si tunc primum reus rescitur, vel in manus justitiæ incidat, pœnis omnibus statutis locus adhuc sit.

SAXO-EISENACENSE, HILDBURGHUSIANUM, & WEINMARIENSE ab hoc edicto normam accepisse videntur: certè eodem cum illo anno aspexere lucem.

SUEVICUM Regis CAROLI XI. An. 1682. inter alia declarat, pugnantem aliena in ditione impune à quovis posse occidi, quoad vixerit. Si sine cæde conflictus abeat, auferuntur dignitates, exigitur multa duorum millium Imperialium, & biennalis carcer assignatur pugnantibus æquè, ac Patris.

WÜRTEMBERGENSIS DUX EBERHARDUS LUDOVICUS. An. 1714. duo peculiariter capita notanter explicavit. Primum concernit Ephebos, aliòsque juvenes nobiles, quibus, si ob immaturam ætatem in duellum incidere, mitiorem aliquantum pœnam statuit; Academiæ autem candidatos omni rigore plecti mandat, & relegari. Secundò: Siqui subditorum suorum alienis in terris duellum apud Magistratum loci luerent mitius, servat reductus in patriam pœnas, à se statutas. Quòd si quis suorum in au-

in altera, vel apud exercitum alterius nationis læsum honorem armis vindicaret, edicti sui pœnis non sit obnoxius, sed iis, quæ in loco delicti statutz sunt in duellum, si quidem domum revocare non vacat ejusmodi reum. Quod si quis in patria Württembergensi offensus ab alio, qui alienæ potestati subiacet e.g. legationis causa, de obtinenda satisfactione desperans privatam vindictam sumeret, non ad decempedam hujus edicti, sed ex æquo, & bono puniendus dicitur.

ULMENSIS denique Respublica suam quoque symbolam contulit ad abolendum, vel coercendum saltem duellorum usum An. 1709.

Ex tot saluberrimis Edictis patet, quanto studio jam à quinquaginta & amplius annis pro compescenda effræni monomachorum licentia laboraverint Principes, atque Magistratus, quibus cura salutis publicæ cordi est. Unde etiam id affecti sunt, ut si non sublatae penitus, minùs tamen frequentes hodie sint ejusmodi pugnae, ac fuerint olim, minuendæ semper magis, si Decretis suis constanter inherere pergant.

### §. III.

An pœnz, his Edictis contentæ, non sint justo graviore, vel omnino inutiles, aut minùs necessariae?

496. *Premisso fundamento,*

497. *Statuitur pœnas illas esse justas ex fine:*

498. *Etiã habere justam mensuram patrata cæde, vel commissio sine cæde duello,*

499. *Quin etiam facta sola provocatione.*

500. *Multo minùs sunt ea leges inutilis,*

501. *Aut non necessaria.*

496. **D**E pœna capitali potissimùm oriri posset cuiquam dubium, statuta in duellum non solum secuta cæde, sed etiam juxta complura Edicta non secuta cæde: quin etiam facta sola provocatione. de hac, inquam, dubitari posset, an non justis leges excedat. Ajo, in *Civitate bene ordinata*, in qua scilicet læsus honor remediis melioribus refarciri, & injuria vindicari autoritate publica potest, & solet, eam pœnam nimis severitatis damnari non posse, quamvis in secundo, præcipuè autem in tertio casu de jure communi minùs habeantur rei. Atque ut ordine progrediamur,

diamur, præmittendum est de pœnis in genere, quis earum sit *finis*, quæ *mensura*.

Propositum sibi prudentem *finem* quivis Magistratus habere debet, dum pœnas exigit; etsi enim de se iniquum non sit, ut malum is patiatur, qui malum fecit: non rectè tamen pœnas exigimus, nisi aliqua inde resultet utilitas. Genuinus autem pœnarum finis est præcautio læsionum, ait PUFENDORF (a), quæ provenit, si velin melius emendetur, qui peccavit, vel ita cõrceatur, ut non possit deinceps peccare: vel alii ejus exemplo permoveantur, ne peccare velint. Huic triplici fini quartus rectè adjungitur, authore P. SCHMIEB (b), & ejus quidem judicio primarius, ut nempe satisfiat Reipublicæ, quæ & ipsa per legis transgressionem violatur, ut malum exemplum; scelere datum, resarciatur, simulque vindictæ privatæ usus, utpote tantorum malorum scaturigo, excludatur. In quem sensum Cicero ait: *Omnis animadversio, & castigatio contumelia carere debet, neque ad ejus, qui punit aliquem, aut verbis castigat, sed ad Reipublicæ utilitatem referri* (c).

De *mensura*, ita egregiè differit PUFENDORFIUS (d): " Arbitror  
 „ non dari in foro civili justitiam aliquam vindicativam, quæ certis deli-  
 „ ctis certam pœnæ mensuram, per *naturam* definitam, urique infligi ju-  
 „ beat, sed veram pœnarum humanarum mensuram esse utilitatem Reipu-  
 „ blicæ, & prout fines pœnarum commodissimè videntur proventuri, ita  
 „ eas per summum imperium intendi, vel remitti: ita tamen, ut insignis  
 „ circa easdem latitudo occurrat. Igitur justo major illa pœna erit, ubi  
 „ fines pœnarum molliori via obtineri poterant: justo mitior, cui non fa-  
 „ tis acrimonix, & efficacix inest ad producendos eosdem fines, adeo-  
 „ que ad reprimendam civium malitiam, atque internam civitatis securi-  
 „ tatem procurandam, seu quæ à delinquentibus contemnitur. In illam  
 „ partem ubi Legislator peccaverit, à crudelitatis nota non est im-  
 „ munis; in hanc ubi inclinaverit, pœnas reddit inutiles, ac vitis libe-  
 „ rum campum aperit. Cum enim comminatio pœnarum voluntatem ho-  
 „ minis à libidine peccandi ad normam legis flectere debeat, & verò ho-  
 „ mines

D d d 3

(a) J. N. G. L. §. c. 3. §. 9. (b) Jur. Univ. L. 3. c. 2. n. 85. (c) L. 1. de offic.  
 (d) J. N. G. L. §. c. 3. §. 24.

mines in deliberationibus commoda, & incommoda, ex eadem re provenientia, velut in bilance solcant expendere, facile liquet, ubi commoda, aut oblectamenta, ex aliquo vitio provenientia, damno & dolori, per poenam conciliando, præponderant, haud quidquam animum hominis satis validè à vitiis averti. „ His ita statutis.

497. Colligitur primò, Magistratus & Principes in statuendis contra Duellum gravibus quibusdam poenis prudentissimos *finis*, habuisse præ oculis; etsi enim morte punitus ea poena jam emendari amplius nequeat: alii tamen, ne Duellum committant, absterrentur, & sic Reipublicæ consulitur; est enim duellorum licentia ejusmodi malum, quod totis viribus oportet ex republica eliminare, est reipublicæ noxium, christianæ legi contrarium, injuriosum Deo, & Magistratui, est lex tyrannica, fortitudo spuria, barbarica insania, & quidquid horridum dici, vel cogitari potest, ut fusè *Cap. II.* demonstravimus. Huic furori si repagulum non objiceretur per leges aliquantum severas, inundaret provincias cum incredibili plurimorum damno.

498. Colligitur secundò, quòd etiam *mensuram* non possint dici excessisse legislatores §. *præcedente* cum laude recensiti. Dum enim *imò secuta cade* interfectori mortem minantur, id agunt, quod de ipso jure communi æquum esse suprà à N. 490. ostendimus, sive provocans is sit, sive provocatus. Dum addò supplicium capitale extendunt etiam in duellum *non secuta cade, aut gravi vulneratione*, ut videre est in edicto Lotharingico, Arausicano, Sabaudico, Gallico, Baruthano, Leopoldino, Bipontino, Palatino, Brandeburgico, Colonienfi, Baadenfi, & si ita visum fuerit, etiam in Concluso Imperiali, non possunt dici justo severiores; ita enim debent exasperari poenæ, ut finis poenarum obtineatur. Jam verò pro sua prudentia hi Principes perspexere, mitiore poena frustra se contra duellum fore pugnatuuros, neque satis eà fore absterrendos subditos suos, quorum mores & genium perspectos utique habuerint. Hinc statutis antiquis nova & acriora addere consultum duxere, & necessarium, secus utique pro sua humanitate id non facturi. Certè in suis Edictis sæpius audiuntur conqueri de effræni ea rabie eludente conditas antea leges, & nequidquam infringente Majorum mandata. Unde Ludovicus Magnus in declaratione, suo mandato post tempus addita, bonis omnibus reum exuit,  
nulla

nulla parte relicta ejus familiar, ut suorum saltem miseratione tactus Duello abstineret. Jam verò illa solum pœna, iusto gravior est, *ubi finis pœnarum molliore via obtineri poterat*. Non poterat autem apud has gentes, in his provinciis.

Si alibi mitior pœna suffecit, vel quia duellorum usus necdum aded invaluerat, vel quia mollior nationis genius non aded in iras erat promptus, vel quia metus minoris mali sufficienter continebat animos, vel quia ad parendum honestate magis, quàm metu trahebantur, ex æquo mitior quoque pœna in eos statui potuit, qui pugnassent non secuta cæde.

Neque quisquam hoc loco illud LUDOVICI Magni statutum iniquitatis arguat, utpote punientis innocentes liberos, & uxorem, ad egestatem redigendos ablatis bonis Patris; nam notandum probè est, hanc non esse pœnam pro libris statutam, sed pro patre: quòd damnum etiam in liberos refultet, pater in causa est, Princeps liberis injuriam non facit; nam ad bona Patris liberi in ea tantum hypothesi jus strictum consequuntur, ubi post mortem patris in ipsius patrimonio adhucdum extant, id quod in casu, quo bona post delictum ad fiscum devolvuntur, non contingit, ait P. SCHMIER (a). Unde liberi ob perduellionem patris usque ad secundam generationem non solum à bonis paternis, sed etiam ab honoribus repelli legimus. (b)

499. Si denique Sanctio pragmatica Regni Neapolitani, relata ex QUARANTA, mortis pœnam statuit in provocantes, etiam non secutâ, sed aliunde impeditâ pugnâ, crediderim ego, necessarium ibi fuisse tam acre remedium malo nimium quantum excrefcenti. Delicto non ex natura sua respondet certa pœna, sed attendendum, quomodo finis commodissimè valeat obtineri, & consuli saluti civium. Unde *per prudentiam summi Imperii debet intendi, vel remitti, ita tamen, ut insignis circa easdem latitudo occurrat*. Ita sonat doctrina superius adoptata.

500. Neque opponas imò stantibus his legibus, pœnisque nihilominus committi Duellum; nam Respond. longè plura forent committenda,

(a) L. 3. Jur. univ. c. 2. n. 93. (b) Cod. ad L. Jul. Majest.

da, si leges & pœnæ abessent. Dein committuntur tamen : sed cur ? quia scilicet nonnulli Magistratus, aut Principes neglectis legibus, malunt indulgere, quàm punire. Omnia nunquam evitabuntur ; quis enim ulla de lege perfectissimam sibi obedientiam promittat ? at ibi rariora erunt, ubi severiores erunt Magistratus.

Demum etsi metus pœnarum non absterreat multos à duello post pal- marem injuriam, absterret tamen ab injuria facienda, eaque nimis impa- tienter excipienda. Modestiam colere discunt viri militares, ac Nobiles, ut minùs offendant, ac magis dissimulent ; sic *indirectè*, ut loquimur, per in- tentatas graves pœnas impediuntur duella.

301. Neque opponas 2dò. postquam duelli furor satis, hac ætate edomitus est, rariórque illius usus, opus jam non esse pœnis, tam acri- bus, indulgentiùs posse haberi reos ; duella enim infrequentia parum malì afferre reipublicæ, neque cladem causare inter viros egregios. Respon- deo, neutiquam hæc consultò inferri ; si enim per severas leges edomitum fuit scelus, & vinculis constrictus furor, his ipsis contineri debet, ne re- surgat : *per qua fit, per eandem & conservatur*. Non satis fuit Herculi en- se præcidisse Hydræ capita, facem admovit, ne succrescerent. Unde su- premæ potestati, penes quemcunque ea resideat, debet esse quàm com- mendatissimum, leges & pœnas in suo rigore conservare.

Multo minùs huc quadrat illud SENECAE (a) : *Non minùs Principi turpia sunt multa supplicia, quàm medico funera* ; nam repono illud LIPSII (b) : *si crebra nimium aut pertinacia sint vitia, tum sanè illud valet : cru- delem medicum intemperans ager facit*. At hæc de Civitate bene ordinata dicta sunt.

## §. IV.

(a) L. 1. de Clem. c. 24. (b) Civil. doct. l. 4. c. 9.



§. IV.

Num poenæ illæ etiam in civitate malè ordinata infligi possint?

502. *Quæstio explicatur per casum.*

503. *Deciditur, poenam non potuisse infligi.*

504. *Respondetur ad argumenta contraria.*

502. Quid si alicubi autoritas publica suo desit officio, id est, si illam honori maculam eluere nolit, vel nesciat, ita ut privata vi suum sibi jus vindicare necesse habeat læsus, quæstio oritur, num commisso duello nihilominus scriptas olim poenas infligere delinquenti Magistratus vel Princeps possit?

Fingamus casum. In aula sua Gnathonem quemdam nutriverat Princeps, hominum genus ut plurimum inutile, & petulans. Hic viro militari, ac nobili temere calumniam impegerat, quam cum is dissimulare non facile posset, nec apud Principem æquas aures inveniret contra Gnathonem, neque antequam purgaretur, in legione sua ultra toleraretur, forunarum suarum, atque dignitatis exinde certum, & triste facturus naufragium, convitiatorem suum operiri statuit spatiantem per campos, ibique coram accitis testibus ad petendam veniam exerto gladio adigere. Juvenis pudore ductus; arma armis in iis angustiis opponere maluit, quam revocare dicta. Sed dum pugnat, vulnus accipit, ex quo paulò post obiit, multum dolente Principe, & vindictam spirante contra interfectorem, quem captum curat damnari capitis: quam tamen sententiam in perpetuum carcerem commutavit.

503. Sed meo quidem iudicio, sententia iniqua fuit, & poena nimia. Cur actionem injuriæ, quam læsus parabat, non admisit Princeps monitus, rogatusque? cur non asseruit læso dignitatem militarem, & quæ inde dependebat, necessariam ad vitam honestè ducendam sustentationem? cur Gnathonem suum non iussit offensæ petere veniam? Lethale vulnus quoddam dederit vir bonus, ipse, qui dedit, doluit, metiri ictus, & in potestate habere non valuit calente pugna: gratulaturus sibi fuerat, si minore incendio suum sibi honorem, opesque servare licuisset. Viderint ergo

Ecc

lenes

lenes illi Magistratus, qui duella non student impedire in tempore, in quas angustias semet redigant; vel enim commissa postea duella, cædēsque inultas debent relinquere, vel injustè punire : utrum pejus sit, non facillè dixerim.

§04. Oppones fortè, qualiscunque Principis hujus culpa, & negligentia præcesserit, commissa tamen cæde rectè morti adjudicatum fuisse homicidam, juxta Divinum mandatum : *quicumque effuderit humanum sanguinem, fundetur sanguis illius, ad imaginem quippe Dei factus est homo* (a). Resp. in eos hanc sententiam esse latam, qui gravi cum noxa, & contra conscientiam vitam eripiunt. In præsentī casu ejusmodi gravis peccati non ausim condemnare interfectorem : si velim inhærere doctrinæ alibi à me defensæ *Cap. IV.* De hac lege veteris testamenti recurrer sermo.

Oppones denuo : Vir hic militaris non potuit defendendæ dignitatis, & opum causâ conflictum hunc suscipere; prævidere enim potuit, strato Gnathone ab irato Principe extrema sibi fore timenda ; quòd si autem ipsemet esset succubiturus, cum vita utique se omnia perditurum. Resp. Credere potuit, Principem utcunque iratum, acerbius nil in se statuere posse, salvo honore proprio, quàm exilium : quo non obstante exuli alibi terrarum licuisset fortunam sectari, & militiam, id quod non licuisset, si neque autoritate publica, neque privata à probro purgatus abiisset.

### ARTICULUS III.

*An unquam Magistratus permittere Duellum possit, vel commisso veniam dare, seu aggratiare?*

**E**Ccur non possit? cogitabit non nemo; *qui nescit dissimulare, nescit regnare* : quid quòd hæc permissio hodie vel necessaria, vel certè utilis videatur. Ergo *permittere* Duellum poterit. Dein,

*Si quoties peccant homines, sua fulmina mittat*

*Jupiter, exiguo tempore inermis erit.*

Ergo etiam *aggratiandi* facultatem Magistratus habet. At fodiendum est aliud, & primò de permissione aliquando licita : tum de ejus hodie necessitate, vel utilitate : demum de venia differendum.

(a) Genes. 9. v. 6.

## §. I.

Permissio, si non sit approbatio, potest aliquando esse licita.

505. *Posse aliquando permitti, probatur.*

506. *Et solvitur argumentum contrarium.*

507. *Non tamen licet approbare.*

508. *Id quomodo in gemino casu factum fuerit, offenditur.*

509. *Quibus additur tertius intricatio, & notatu dignior.*

505. I. **R**ecepta thesis est : *Expedi, & licet quandoque minora mala permittere, ut evitentur majora.* Præterquam, quod id tradatur à legibus (a), & D. THOMA (b) æquitas naturalis ita suadet. Applicantes hanc veritatem duello Authorum multi (c) censuerunt, posse Principem in casu, præter ordinem insolito, ad majora mala evitanda duellum *permittere*. Nec etiam excommunicationem incurrit Princeps, ait SANCHEZ (d) “ Hæc duella inter Christianos permittens, quando per-  
mittere in casu extraordinario opus esset, ad vitanda majora mala & scanda-  
la, quia, licet semper peccet *assensum* his duellis præbendo, si-  
ve ea *concedendo*, attamen immunis esset culpæ ea *permittendo* in casu  
extraordinario, sicut ob similem causam licet permittere lupanaria. ”

Idem docere dicitur HURTADUS DE MENDOZA (e) apud PIGNATEL-  
LUM (f) : “ Unde juxta hunc designare licebit certamini locum, sicut  
licet designare locum lupanari, quando sine lupanari non possunt vitari  
incommoda graviora : & designatio loci non est cooperatio ad certa-  
men, sicut neque designatio lupanaris ad peccata meretricum : sed est  
designatio conditionata, ut ibi certent, vel impudicitiam exercent, si  
absolutè ita velint. Occasio dari posset in casu, si vasalli Principis ita  
rumultuarentur, in duas factiones divisi, & à duobus Magnatibus con-  
citati, ut ipse supremus Princeps eos jam compescere non posset, &  
promiscuas cædes timeret, tunc permittere potest, ut Magnates, vel alii  
eorum nomine, duello finiant turbas. ”

E e e 2

Doctri-

(a) Ex cap. denique. dist. 4. (b) 2. 2. q. 10. art. 11. (c) *Cajetan.* 2. 2. q. 95.  
art. 8. *Armell.* V. Duel. n. 5. *Se* eodem. V. *Lyræ.* 1. Reg. c. 17. *Navarr.*  
in Sum. cap. 11. n. 39. *Dian.* p. 3. tr. 6. miscel. 2. (d) l. 2. in Decal. s. 39.  
p. 30. (e) in 2. 2. tom. 2. disp. 170. sect. 21. (f) tom. 9. consult. 88. n. 174.

Doctrina hæc sana est, & æquitati naturali innixa. Unde miror ea, quæ PIGNATELLUS subjungit (a) : “ Audisti mi Lector, HURTADUM, & „ SANCHEZ. Tu verò mordicus tene, præsertim post S. Concilium, & „ Constitutiones Pontificias, nullo modo licere Principibus in aliquo casu „ dare licentiam ad duellum, neque illud permittere, ne quidem ad vi- „ tanda majora mala. Audi præcipuè CLEMENTEM VIII. pœnis subjicientem „ Magistratus monomachiam; in *quocunque casu* per Constitutiones prohibitam, *permittentis*, vel quantum in ipsis est, *non prohibentes*. Ubi „ ponderanda est dictio *quocunque*, quæ ita universalis est, ac distributi- „ va, ut etiam comprehendat ea, quæ aliis non comprehenderentur. „ Hoc, inquam, miror; nam si nulla exceptio habet locum, cur ipsemet PIGNATELLUS numero sequente dicit : *Non potest publica auctoritas duellum crimine eximere extra eventus superiùs* (scilicet per HURTADUM) *propositos*? si vel in his solis eventibus permissionem duelli non improbat, jam verum est primum asserti mei membrum : non esse scilicet impossibile casum, quo ad evitandum majus malum licetè Princeps, aut quivis Magistratus alius duellum permittat.

506. Oppones fortè, Exemplum ex lupanarium permissione male huc applicari; eo quòd teste KNIPSCHILT (b) ea lupanarium tolerantia à sanioribus, & in Rebus publicis bene constitutis improbetur. Cùm enim, ait, meretriciæ voluptates contra expressam Dei prohibitionem, contrarièque bonos mores fiant, consequens est, neque lupanaria absque læsione conscientiæ toleranda, sed omnino exterminanda, id quod probat ex Legibus Imperii in Reform. Polit. Augustæ (c), & Francofurti (d) editis, cùm hoc quoque remedio magis augeri, quàm minui delicta carnis experientia testetur, etiamsi sint ejusmodi lupanaria extra urbem, uti olim Parisiis in ultimis partibus civitatis erant; hodie verò, inquit, ex NICOL. à SALIS, contagio per omnia urbis viscera diffusa est. Resp. si vera sint ista, tunc per lupanaria, tamquam per minus malum, non evitantur majora mala : ubi ergo locorum hoc turpe consilium impediendæ majori turpitudini non quadrare deprehensum

(a) N. 175. (b) De Nobilit. lib. 2. c. 3. u. 109. (c) Anno 1530. §. 33. & anno 1548. §. 25. (d) Anno 1577. tit. 26.

hensum fuerit, sana ratio tollere jubebit lupanaria. Nos autem dum de duellis quibusdam tolerandis loquimur, casus fingimus, in quibus majora mala certè impediuntur. Jam verò, quamvis permittere mala minora hac ratione nefas non sit :

507. II. Attendendum erit tamen, ut probè discernatur *permissio ab approbatione*, aut *concessione*, qua crimini autoritas præstaretur; Duellum eqim honoris vindex malum est conscientiae repugnans, & , si aliquando tale non sit, ex culpa Magistratus, apertè negantis justitiam, non est, ut abundè explicatum *Cap. IV.* non licet autem ei, quod de se malum est, approbationem, vel auctoritatem præstare : si ergo hoc facit Magistratus, malè agit. Ajo *duellum honoris vindex*, quale scilicet hodierna ætate in usu est; nam de duellis veterum, an permitti possint, alibi fuit sermo n. 68. Quandoque est facile dijudicare, an approbatio sublit: quandoque difficilior. Habere exempla.

508. Solemni convivio adhibebantur Equites nobilissimi cujusdam Ordinis. Dum consideretur, eorum quidam protestatur, se non accubitorum cum Fromondo, utpote notato infami macula, qua necdum se purgasset. Dum attoniti omnes in Magnum Magistrum intentos convertunt oculos, hic Fromondum jubet discedere. Qui absque mora adversarium suum quæsitum ivit, & inventum aggressus est, dein finita pugna ad mensam reversus. Non difficile est, de Magni Magistri imperio judicium ferre Theologicum.

Aliud accipe. Invalescere sensim apud nonnullas legiones certæ nationis eum morem ajunt, ut, dum inter duos præfectos dissidium ortum est, quod sopiti in tempore non potuit, pars utraque expectet horam, qua præfidiarius miles, in stationes successurus, collectus stat in foro: tum progrediuntur pugiles, velut casu sibi occurrerent, & spectantibus universis tamdiu dimicant, donec duces dirimant certamen, satisque honori litatum esse asserant, id quod pro affectuum, vel causæ diversitate citius, aut tardius faciunt. Imperatur tamen ad speciem mox utrique pugili custodia.

Paret satis, morem hunc esse pessimum, & suffocandum in herba, antequam crescat. Nec boni colorem ei quis inde emendicet, quòd sic inconsultæ iræ, qua fors in loco separato abripi se sincerent Monomachi, in

tempore possit frænum à spectantibus injici ; nam præterquam quòd primi etiam ictus possint esse fatales , præterquam quòd tot spectatorum præsentia animos accendat , præterquam quòd crimini , absterfo paulatim horrore , honesti species accrescat , id certum est , primores ejusmodi Duces autoritate sua firmare id , quod impedire & abolere per omnes leges , & jura obligantur.

509. Casum addo magis intricatum. Fingamus Principem vel Magistratum suprema instructum autoritate , viro militari , provocato ad urbem neutrarum partium ab extero quodam , ita rescribere : Ito in urbem illam destinato die , & in ea , quam tibi antagonista nominavit , caupona , præsentem , quem tibi socium jungimus , teste , exige , ut argumentis demonstrat , te esse fungi , ut objectaverat , hominem. Argumenta si proferat , ea nobis redux exhibe : si probationem non inveniat , voca eum infamem calumniatorem : duello tamen , mandamus , ut abstineas. Vel sic age : urbis illius Prætorem roga , ut advenam hunc ad forum suum citet , jacti convitii rationem daturum : finito judicio actorum exemplar ad nos afferto. Fingamus , inquam , ita fuisse rescriptum huic provocato. Quæramus jam , an ita rescribendo Princeps , vel Magistratus duellum illud , quod prudens quilibet secuturum prævidet , *purè permisisse* dicendus sit : & si pura fuerit permissio , an licitè fuerit à Senatu data.

Permissionem quod spectat , ille *tantùm permittere* dicendus est , qui nil confert ad duellum , ut sequatur : neque etiam conatur impedire , ut non sequatur. Jam verò hic Magistratus videtur aliquid contulisse , ut sequeretur duellum ; occasionem enim proximam adire jussit provocatum. Quòd si enim hic in caupona provocantem conveniat , ac exigat argumenta , quibus fungi homo demonstratur , quid , quæso , responsi feret ? exiget provocans , ut contrarium gladio ostendat in proximo angiporù , vel extra mœnia , ac duello probeat , se non esse fungum. Si hanc probationem respuat actor , aut mandatum Magistratûs obtendat , prohibentis duellum , risum alter addet , & sarcasmos. Et num facillè tunc se continebit militaris provocati animus , is præsertim , qui sæpius stetit intrepidus inter præliorum fulmina , lethi contemptor nobilis : num continebit se , quo minùs etiam contra mandatum illud , quod quàm parum serium sit , utique perspicit ,

spicit, fræna calori laxet, atque in arma ruat? Accedit, quodd sciat, si domum redierit re infecta, & illotus, se etiam posthac futurum contemptui in legione sua, quæ cum eo militare eousque detrectaverat. In hoc rerum articulo, num, inquam, ille sibi à pugna temperare volet? Fors proderit causam deferre ad urbis Prætorem? at num volet hic judicare peregrinum, advenam, qui delictum, jactum scilicet convivium admisit alibi locorum? vel quis alius jam modus suppetit fortitendi forum, nisi ratione delicti? Demus etiam, quodd partes litigantes in jus velit vocare Prætor, nonne recusato judicio, & renovato coram teste convivio, se subducat advena provocans, si vel minimum videat incommodi sibi imminere? Hæc omnia cum provocatus ita eventura facillè perspiciat, judicabit Principem, vel Magistratum suum *velle, & nolle* duellum: jobere, ne committatur, non tamen fore invitum, imò gavisurum, si commissum molestis tricis finem, & lègioni quietem afferat. Quid ergo est, quodd virum hunc à duello retineat, imò quid est, quod in hoc rerum articulo ad duellum non animet? hunc autem rerum articulum senatui bellico satis antè perspectum fuisse, quis dubitet? dum ergo in eum conjecit provocatum, non potest dici *pure* *permittere* duellum, quod inde sequitur. Demus etiam, quodd *pura* *permissio* fuisset in ratione agendi, at neque ita permittere licet Magistratibus duellum, ut ex Constitutionibus Pontificum, & Principum satis patet, quæ eis imperant, ut ex officio, quod gerunt, omnem operam impendant ad duellum impediendum, & humaniore modo reddant honorem læso, si tamen possint. Potuit autem senatus. Quo modo quæris? Resp. modum hunc monstrant Edicta Principum, recensita alibi. Statuit Edictum Wirtembergicum, Hasso-Casselæanum, Saxo-Gothaicum, & complura alia, ut, si convitiator protervus se in terras externas receperit, per *requisitoriales*, seu literas *musui compæctis*, ut vocant, à Magistratu ejus terræ requiratur: frustra autem requisitus, aut ubi ubi latitans, *edictaliter* citetur ad reddendam rationem de convivio. Si non compæreat, damnatur de illara calumnia, aut iniquo convivio, ejusque nomine apparitor, listôrve *canat* palinodiam, ac petitâ veniâ honorem læso restituit. Simile quid post provocationem statutum legimus in Edicto Saxonico Electorali, & Megalopolitano, ut scilicet venire recusantis imago affigatur patibulo. Cur ergo hoc modo, tot prudentissimorum Principum judicio confirmato, *usus non est*

est Senatus bellicus? fungi hominem vocaverat convitiator virum, qui strenui militis partes semper adimplevisse est visus: ergo probet factum indignum milite ab eo unquam fuisse admissum: vel si probare recuset, infamis convitiatoris poenam sentiat.

Reponet quis fortè, legionem tumultuantem non fuisse acquieturam tali satisfactioni; eo quòd ignaviae labe non nisi duello juxta hodiernum systema eluatur. Resp. primò, num ergo potius acquietura fuisset, si in caupona, vel apud Prætores conventus convitiator de novo sua dicta confirmasset? non est facilè quis ita liebes, ut istud credat. Resp. secundò: Si convitiator pudendam infamiam contraxisset ex recantatione apparitoris, aut ex effigie in patibulo affixa, quis exigere, quæso, ultra potuisset, ut vir militaris cum infami homine de honore certaret? Ideo nempe is recantandi modus statutus est à Magistratibus, ut in eum statum reponatur lædens, in quo cum eo manus conferere nemo vir honestus possit. Resp. terriò: Datò etiam, quòd legio tumultuari non cessasset, compefci potuisset, modò adhibitum fuisset remedium, alibi à nobis explicatum. *vid. n. 110.*

Exempla hæc sufficiant, in quibus permissio est tacitè approbatio, vel etiam ipsamet permissio illicita. Cum tamen permissio aliquando possit esse licita, queri potest, an hodierno ævo detur necessitas, vel utilitas ad duellum permittendum? Respondebit

## §. II.

Nulla hodierno ævo necessitas datur, nec utilitas ad permittendum duellum.

§10. *Nec necessitas datur.*

§11. *Nec utilitas.*

§10. **A**Jo, ex hæctenus dictis satis apparere, nec speciem hujusmodi feralis necessitatis apparere. Tam inter viros nobiles, quàm militares datur ratio accommodatissima, eaque multiplex cuique, injuriam passò succurrendi, uti abundè patet ex *Cap. II. Arr. 1. §. IV. & V.* neque erit necessitas provocationem ad duellum relinquendi impunitam, uti patet ex *Capitis presens is Arr. II. §. II.*; namque in omnes eventus curas suas converterunt legislatores, prospexere omnibus, neglexere nihil: modò hodierni Magistratus velint



sunt serid, nunquam eò rediguntur, ut adductis humeris connivere duello debeant. Et hac ipsa de causa à me tandem obtinui, ut hac de materia scriberem, punquam id facturus, si solummodo in duellum, & Magistratus Philippicam scribere scivissem: ignorassem autem suggerere, qua ratione cavere malo possit.

§II. Circa utilitatem dubitatum aliquando fuit, an non expediret autoritate judicis permittere Nobilibus ac militaribus viris duellum tunc, quando, causâ probè perspectâ, honorem verè fœdatum fuisse constar, nec si alia ratione ad concordiam facilè reduci possunt. Hanc in rem disserentem audiamus ipsum Cardinalem RICHELUM, in celebri suo Testamento politico (si tamen verè ejus est) ad Regem Christianissimum LUDOVICUM XIII. (a). Nihil omisi, ait, ô Rex, quo malo huic apprimè noxie (duello scilicet) remedium afferrem. Mecum sæpe expendebam, an non, sicut Reges duobus selectis concedere duellum possunt ad impediendum, vel finiendum bellum publicum, ita quoque potestatem facere valeant, tricas privatas ejusmodi monomachia discutiendi, eo scilicet fine, ut tollatur inter Gallos nimia frequentia duellorum; namque, reputabam mecum, hac ratione, dum scilicet quis à judicibus sperare posset dandam sibi pugnandi licentiam, multos in honore læsos, omisâ præproperâ vindictâ, opem ibi quaesituros. Quod si facerent, tunc æquis rei arbitris difficile non futurum, remedium afferre ut plurimum componendis turbis, & restringendo odio. Firmabam opinionem hanc meam eo argumento, quòd antehac duella permessa non rarò fuisse sciverim tum in Francia, tum alibi gentium.

Sed post lectas, relectisque sententias præstantissimorum Authorum, & penitiùs examinatam hanc maximi momenti materiam, deprehendi apud Theologos, minimè aliàs anxios, rigidòsve, Regibus, positis à Deo ad tuendam subditorum vitam, fas non esse, eam exponere periculo sine utilitate publica, aut privata necessitate. Quid quòd hac ratione innocens æquè ac nocens eidem discrimini subjiciatur; cum utique non semper causa melior viribùs prævaleat, atque armorum successu. Et quamvis ejusmodi pugnae auctoritate Principum quandoque legantur commissa,

F f f

aut

aut etiam cum consensu Ecclesiarum particularium : inter abusus tamen fuerant semper reputandæ. Id quod manifestè patet ex eo, quòd tandem ab universali Ecclesia intentatis gravissimis pœnis fuerint prohibitæ. Notavi etiam latum discrimen inter monomachias, ob publicam causam concessas, & nostras inter; ibi enim pars pro toto se exponit, id quod omnium temporum Historiæ, & ipsæ SS. Litteræ approbant : at in his in suum interitum ruerent privati, quin utilitas ulla in publicum redundaret. Quæ enim illa? frequentiam sistere duellorum? Neque hæc obtineretur in tanta Nobilitatis nostræ cæcitate; cùm enim plerique existimaturi essent, pugnandi licentiam petere à iudicibus idem esse ac pacis arbitros quærere, & sic pugnam subterfugere, probro sibi ducerent, si non vindicando injuriam ex arbitrio proprio, vanissimam suam fortitudinem demonstrare omitterent. Rex nuper defunctus volebat hoc remedio occurrere duellorum frequentiæ Anno MDCIX.; ita ut pœnas acerrimas statueret in eos, qui ante petitam licentiam duello confugerent : sed incassum laboravit, nemine volente licentiam petere. Et hoc ipsum permovit tuam Majestatem, ut post haustam ad ingressum regiminis similem experientiam aliud consilium caperes, frænando furori accommodatius.

Hactenus sagacissimus Cardinalis. Unde patet, ex ejusmodi licentia utilitatem sperari nullam posse : præterquam quòd eam concedere necesse nequitiam sit.

### §. III.

An Magistratus veniam commisso duello possit dare? seu jure  
*aggratiandi* uti?

§12. Datur jus aggratiandi, competens supremæ potestati.

§13. Negatur ab aliquibus, quòd in eade locum habens:

§14. Sed refutatur hac Doctrina.

§15. Quomodo cautè utendum sit hoc jure offenditur.

§16. Applicatur ista duello facto cum eade:

§17. Facto sine eade: etiam soli provocatori.

Quòd si Magistratu invito duellum nihilominus commissum fuerit, & violatæ leges, quibus in ea Republica sub gravibus pœnis duellum prohibetur, quærimus, an veniam reo dare, seu aggratiandi jure

jure uti Magistratus, aut Princeps possit, id est, an post commissum delictum pœnam vel ex integro condonare, vel in minorem commutare tamen conscientia valeat?

§12. Nimius fuit olim Stoicorum rigor, improbantium universam omnem veniam, quæ delicto conceditur, apud STOBÆUM (a). Ajunt, prudentem nemini veniam dare; quia ejusdem hominis sit veniam dare, & putare, eum, qui peccavit, non sua culpa peccasse; cum tamen omnes sua malitia peccent. At quàm infirma sit hæc assertio, ultro patet; nam quamvis Princeps credat, & sciat, reum ex propria malitia peccasse: causam tamen habere potest remittendi pœnam vel ex toto, vel saltem ex parte. Neque tamen diffiteor, etiam illud esse verissimum, quod quidam cecinit (b):

*Plus sœpe nocet patientia Regis*

*Quàm rigor: ille nocet paucis, hæc incitat omnes,*

*Dum se ferre suos sperant impune reatus.*

Unde etiam CONSTANTINUM M. EUSEBIUS (c) arguit nimie clementie his verbis: "Cum nullus esset extremi supplicii metus, qui malos homines à sceleribus deterreret, Imperatore prorsus in clementiam propenso, & ex provinciarum Rectoribus nemine crimina coercente, eo factum est, ut publica administratio non mediocrem reprehensionem subierit." Jus aggratiandi ergo datur quidem: at in salutem Reipublicæ adhibendum, non in detrimentum.

Competit hoc jus summo Principi, qui, cum supra leges emineat, utique pœnam, à legibus statutam, remittere potest, vel mitigare (d). Competit etiam in Romano Imperio Principibus, & Statibus Imperii; cum enim vi superioritatis territorialis leges communes immutare, & diversas condere possint (saltem si hæ non refragentur legibus, statum, & commodum publicum concernentibus) possunt etiam reis veniam concedere (e). Unde est teste CARPZOVIO (f), quodd in Germania Baronum

F f f 2

quo-

(a) Serm. 44. (b) *Gunterus* Ligurin. l. 1. (c) L. 4. de vita Constantini. (d) *Hermes* in Fasci Jur. Publ. c. 11. (e) vid. *Schmier* Jur. Publ. Rom. l. p. l. 1. c. 3. n. 21. (f) *Præf. crim.* p. 3. q. 151. n. 24.

quorundam autoritas, & potentia plus habeat ponderis, quam alibi Principum, & Ducum. Reliquis verò Principibus, Magnatibus, aut iudicibus, quibus territorialis superioritas deest, jus aggratiandi non competit; nam, ut respondit PAPINIANUS (a): *facti quidem questio est in arbitrio judicantis: pena verò persecutio non ejus voluntati mandatur, sed legi auctoritati reservatur.*

§13. Quòd si jam quaeritur, an eade in duello patrata poena mortis remitti valeat salva conscientia; in diversa abire video Doctores. Juris-Consulti Acatbolici admodum rigidi sunt contra homicidas, nominatim VITRIARIUS (b), & PEEFFINGER (c). CARPZOVIVM audire juvat (d). „ In delictis, ait, lege divina severè prohibitis, veluti est homicidium, „ adulterium, blasphemia, sacrilegium, sodomia, ne quidem summus Prin- „ ceps, aut Magistratus quivis superior hoc casu mortis supplicium abs- „ que causa sufficienti remittere potest. „ Tum inducit BESOLDUM, dicentem: Quemadmodum Majestatica Potestas criminalem, ob rationes duntaxat politicas introductam poenam faciliùs condonare potest: ita à nemine remitti possunt eae poenae, quae ad auctoritatem Decalogi tenendam à Deo ipso sunt sancitae. Tum varios pro se Autores affert: sed dubitatur, num fideliter. Hanc sententiam BESOLDI, quibus rationibus firmet CARPZOVIVS, audiamus.

Primò ait, indubitati juris est, inferiorem haud posse abrogare legem superioris: quanto igitur inferior Princeps etiam summus in orbe terrarum est ipso Deo Opt. Max. homicidas ultimo supplicio afficere jubente, tanto minùs huic mandato contravenire potest. Nominatim hae misericordiae species prohibetur, *Deuter. 13. v. 8. Hebr. 10. v. 28. Exod. 21. v. 12. Num. 35. v. 31.* Ubi non nisi sanguis pro sanguine reposcitur. Itaque Princeps notet sibi, quod in cap. non licet. 2. dist. 10. dicitur: *Non licere Imperatori aliquid contra divina mandata presumere, nec quidquam, quod Evangelicis, Prophetis, aut Apostolicis Regulis obviat, agere.* Secundò: Regula est justitiae, *suum cuique tribuere*, defensionem innocentibus, poenas

(a) In L. accusatorum. 1. §. 4. ff. ad SCtum Turpil. (b) Institut. Jur. Publ. l. 2. tit. 17. n. 114. (c) Ibid. ad n. 118. (d) L. cit. n. 29.

pœnas verò nocentibus. Quare Princeps non discedat ab hac Regula parcendo homicidæ, nisi velit cum Rege Saule, contra mandata DEI parcente Regi Amalecitarum, rejici à DEO (a). Tertiò etiam propterea in crimine homicidii Princeps veniam reo largiri non potest; ne ex spe impunitatis aliis præbeatur delinquendi materia. Quartò accedit, quòd metuendum sit, ne hac impunitate fontibus concessa, graves populi querelas de neglecta justitia Princeps in se suscitet.

§ 14. Sed sententia contraria est solidior. Ratio est; quia pœnæ criminum., à DEO in lege veteri constitutæ, non pertinebant ad leges morales, seu naturales; quamvis enim lex naturæ jubeat fontes puniri: genus tamen, & rationem pœnæ non definit. Pertinebant igitur ad leges judiciales, sancitas pro commodo, & statu reipublicæ Judaicæ. Hoc dato, sic arguo: leges veteris testamenti judiciales, æquæ ac cæremoniales amiserunt suam vim in testamento novo (b): ergo leges veteris testamenti, pœnam mortis homicidæ decernentes, utpote judiciales non obligant in testamento novo: ergo Princeps condonans mortis pœnam nihil agit adversus legem Divinam: sed tantùm in lege humana, ubi talis existat, pro ea vice dispensat.

Confirmatur nostra doctrina. Si tam rigidè inhærendum est legibus veteris testamenti, reos condemnantibus ad mortem, cur non etiam adulterium morte pleñitur? hoc certè *Levit. 20. v. 10.* præcipitur: *si machatus quis fueris cum uxore alterius, & adulterium perpetraveris cum conjuge proximi sui, morte moriantur & machus & adultera.* Et tamen de jure civili *L. Juli. de adult. coerc.* hujus criminis pœna olim erat deportatio seu exilium, postea quidem gladius: quem tamen rigorem pro mulieribus mitigavit JUSTINIANUS (an ejus uxor THEODORA?) & virgis cæsas detrudi jussit in Monasterium. Et quamvis CAROLUS V. in *Consist. pœnal. Art. XII.* ut volunt Interpretes, renovarit pœnam gladii: hanc tamen nullibi hodie, saltem propter primum adulterium irrogari docet experientia, sed puniatur variè pro varietate locorum. Quomodo per gradus acuiatur pœna vi legum Bavaricarum *vid. Ordin. politic. Tit. IX. Art. II.* Quoddà ergo ri-

F f f 3

gor

(a) 1. Reg. 4. (b) Communis ex cap. un. de purif. post partum.

gor legis veteris non extendi debet ad adulteros, cur extendi debeat ad homicidas? Natura quidem & Deus etiam in lege novâ obligant iudices ad puniendâ hæc crimina: ita tamen ut modum definiendum eis relinquant, prout saluti reipublicæ pro casuum varietate convenire videbitur.

Quoddâ cuiquam verba illa *Genesis Cap. IX.* scrupulum adhuc moveant: *quicumque effuderit humanum sanguinem, fundetur sanguis illius*, utpote quæ ante legem Mosaicam prolata, legis potius naturalis, & moralis, quàm judicialis vim habeant, Resp. ea non fuisse proposita cum obligatione stringente potestatem politicam, ut in omni homicidio infligat pœnam mortis: sed auctoritatem eidem fuisse collatam homicidam occidendi: aut, si proposita fuerint ea verba sub ejusmodi obligatione, eandem non durasse diutius, quàm ad tempus legis gratiæ: sicuti nec obligatio occidendi animal mortiferum, de quo ibidem v. 5. neque obligatio à carne, & sanguine abstinendi, de qua v. 4. vim suam ultra id tempus extenderunt. Ita Authores præclari complures. Etiam illud huc facere puto, quòd in paucitate prima hominum occisio unius longè magis noxia fuerit, ac postea, genere humano satis jam multiplicato.

Unde ruunt jam fundamenta CARPZOVII. Primò enim negatur, quòd Princeps faciens homicidiæ gratiam, aboleat legem superioris, scilicet DEI; non enim existit ejusmodi lex in testamento novo. Secundò si iudex *ita suum cuique tribuere debet*, ut nunquam gratiam facere fas sit, totum jus aggratiandi etiam in aliis materiis tollitur: nam *Deus. 21.* legitur sine discrimine: *maleficum non patieris vivere*; hoc autem esset sanè nimium: vel ostendatur expressum DEI mandatum, quale Sauli Dominus dedit per Prophetam. Ex tertio argumento id solum sequitur, quòd promiscuè, & sine gravi ratione suo jure uti Princeps non debeat. Neque ex usu moderato orientur querelæ subditorum, saltem prudentiorum. Itaque rigida nimis est sententia negans Principi universè omnem potestatem faciendi vitæ gratiam interfectori. *vid. LAUTERBACH (a).*

515. Sed quatuor hic monenda, atque inculcanda sunt. Primò nunquam remittenda est omnis pœna, sed in mitiorem commutanda; namque

que, etsi modus puniendi dependeat à norma legis humanæ, obligatio tamen puniendi resultat ex jure naturali, & sic satisfiit Regulæ quintæ Jur. in 6. *Peccati venia non datur nisi correcto.* Secundò, ubi expressa lex pœnalis condita exstat definiens certo delicto certam pœnam, difficilius fit commutatio quàm ubi pœna per legem definita necdum est, sed solum delictum prohibitum, idque, non tam ob eam causam, ut ait PUFENDORF (a), quòd par sit, ut legislator suis se legibus conformem gerat: quàm quia autoritas legum vilescit, si citra gravissimam causam executioni non mandentur: & quia ad peccandum ultro Magistratus videtur invitare, qui æqualem, aut majorem causam præbeat veniam sperandi, quàm pœnam metuendi. Igitur quamvis legum humanarum vis à voluntate humana pendeat, non in origine tantùm, sed etiam in conservacione: non tamen illæ tolli, aut mutari debent, nisi gravi urgente causa; alioquin in officium Rectoris peccabitur. Imò gravius videtur, citra gravem causam legem manentem non exequi in certis personis, quàm eandem penitus tollere; cùm illic acerbis querelis occasio præbeatur, quòd æqualia meriti non habeantur æqualiter. Itaque tertio, ut monet P. SCHMIDT (b), supremus iudex debet considerare causas illas, ex quibus aliàs quandoque inferior in delictis variis statutam pœnam temperare valet; sic enim habebit amussim, ad quam examinet gratiam, quam facere cogitat. Ibidem recenset *sect.* 3. Causas pœnam mitigantes, quas etiam legere est apud CARPZOVIVM (c), & nos paulò post recensimus. N. 525. Quarto denique de condonandis pœnis quibusdam legi meretur GROTIUS (d), docens, an exigi debeat pœna, vel remitti, dependere ex connexionne finium, ubi quos pœna instituta est, cum ipsa pœna. De his finibus egimus paulò antè n. 446. Quare, si fines illi per se morali æstimatione, id est, prudentis, & boni viri (e) necessarii non sint: aut fines ex opposito in præsentì occurrant non minùs utiles, ac necessarii: aut fines pœnæ alia via obtineri possint; jam apparet, nihil esse, quod ad pœnam exigendam præcisè obliget. Hanc doctrinam GROTII ZIEGLERUS (f) laxam nimis dicit; ejusque sententiæ fuisse ait ANT. MATHEUM (g). Ego verò

(a) L. §. c. 3. §. 17. (b) Jurispr. Canon. lib. 5. tract. 1. c. 3. n. 81. (c) P. 3. q. 149. & 150. Pract. crim. (d) Lib. 2. cap. 20. §. 21. (e) Gronov. not. (f) De Jur. aggrat. l. 1. c. 8. (g) Ad tit. ff. quibus mod. crim. c. 5.

verò existimo eam esse sanam, ut scilicet, cessante fine pœnæ, ipsa pœna cesset; at judico simul, casum rarissimum esse, ubi omnes fines cessent, ob quos tam in duellum, quàm provocationem pœnæ constitutæ sunt à prudentissimis Legislatoribus.

§16. Quibus disputatis concludo, equidem supremum Principem posse vitam condonare ei, qui in duello antagonistam occidit; non faciliè tamen, nec sine gravi causa id ei licere; quoddâ enim mandatum illud: *quicumque effuderit humanum sanguinem, fundetur sanguis illius, ad imaginem quippe Dei factus est homo.* (a) Quoddâ, inquam, hæc verba vim legis jam non habeant: quid tamen justum sit, & ex natura delicti homicidæ competat, satis innunt. Difficillimus ergo sit in hac causa Princeps; secus, quæcunque cædes ex spe impunitatis, ex indulgentia dissimulantis Magistratûs committuntur, utique in hujus conscientiam recident. Id addere liceat, potius provocatum, si occidat, dignum esse gratia, quàm provocantem, si interficiat, quem ad pugnam adegit importunus.

§17. Quoddâ vtro duellum abierit absque nece, aut graviore vulnere, facilius aliquanto locus est gratiæ, si pœna mortis in tale fuerit statuta. Sed probè notandum, sicut *dispensationes* dicuntur *vulnera legum*, & non nisi rarò ob gravem causam concedendæ sunt, ita etiam, præsertim ubi certæ pœnæ pro duello in aliqua republica definitæ sunt, omnis disciplinæ vigor eliditur per frequentem indulgentiam. Notet judex, si credat se habere gravem causam aggratiandi, habere se etiam gravem causam non aggratiandi, scilicet bonum publicum. Hæc certò adest semper: illa confingitur sæpe juxta varios variorum affectus. Unde pessima est reipublicæ gubernatio, ubi duella rarò puniuntur, vel non nisi pœna levi, quæ ferme semper deberent plecti, & quidem graviter.

Ex dictis faciliè colliges, quid sentiendum de gratia, facienda solè provocationi, non secuto duello.

Hæc de æquitate naturali dicta sunt juxta syntagmata juris naturalis; an verò etiam juxta leges canonicas ejusmodi gratia locum habeat, paulò post videbimus n. §23.



## ARTICULUS IV.

*Quas Pœnas incurrant negligentes Magistratus?*

**M**agistratus inferior, qui altiore supra se potestatem reveretur, castigari ab hac potest, & debet, si oscitanter suo fungatur officio. Quodsi Magistratus etiam suprema potestate gaudeat, uti in Republica Senatus, Rex in regno, Ecclesiasticam nihilominus pœnam juxta Catholicorum principia, incurreret, si negligentiam hoc in genere admiserit. Juvat, primò explicare pœnas : tum casibus particularibus applicare.

## §. I.

## Explicantur pœnæ.

518. *Pœnis civilibus subjacent Magistratus inferiores:*

519. *Ecclesiasticis omnes.*

520. *Explicatur primò ex Tridentino, privatio dominii statuta in locorum Dominos.*

521. *Secundò ex Clementina, inter-*

*dictum latum in ea loca, ubi duellum permittitur.*

522. *Tertiò pœna lata in Præfectos; præcipuè militares, non impedienses, vel non punientes duellum.*

523. *Additur annotatio Theologica.*

518. **P**œnis quidem civilibus non subjacent ipsimet summi Magistratus, ac Principes : ipsorum tamen est, ejusmodi pœnas statuere in inferiores Præfectos suos ac Magistratus, qui vel non satagunt gliscentem dissidiū ignem sopire in tempore, vel provocatione facta non illico custodiæ mancipant reos, vel patrato etiam duello connivent, & silentio involvunt crimen, quin ad superius tribunal deferant. Et ejusmodi conniventia non infrequens est; modò nemo pugilum occubuerit, vulneratus curatur domi suæ, simulans nescio quem morbum : Præfecti affectant ignorantiam facti, contentissimi, si res non divulgetur. Vel, si verentur, ne quid ad superiorem Senatum, aut Principem transpiret, equidem hunc certiores faciunt de commissa inter quosdam pugna; eam tamen studiosè vestiunt extemporaneæ rixæ nomine, quamvis dissidium natum fuerit aliquot ante pugnam diebus, & satis longo itinere, statuta hora, ad locum desti-

destinatum expiari debuerint pugiles patrinis stipati. Ita committuntur saepe duella, vel commissa relinquuntur impunita vitio Præfectorum inferiorum. In hos itaque pœna acris statuenda est, ipso facto incurrenda e.g. jactura officii, vel numeranda certa mûlta pecuniaria, parte aliqua assignata delatori, prout in compluribus Ediçtis Principum providè statutum legimus.

§19. Præter has aliæ supersunt pœnæ Ecclesiasticæ, tam in inferioribus, quàm supremos Magistratus latæ, à Conciliis, & Pontificibus Romanis, siquidem in coercendo duello negligentes sint, ac indulgentes. Præcipua est *Excommunicatio*, de qua egimus amplè satis n. 242. An etiam ipsos Imperatores, & Reges tangat, vide n. sequente ad finem. Reliquas pœnas ex triplici fonte depromam explicandas.

§20. I. Tridentinum (a) ita habet, *Imperator, Reges, Duces, Principes, Marchiones, Comites, & quocunque alio nomine Domini temporales, qui ad monomachiam locum in terris suis inter Christianos concesserint, eo ipso sint excommunicati, ac jurisdictione, & dominio Civitatis, castri aut loci, in quo vel apud quem duellum fieri permiserint, quod ab Ecclesia obtinent, privati intelligantur: & si feudalia sint, statim Dominis directis acquirantur.* Noto, equidem à Tridentino non nisi duella solemnia damnari, quæ nostra ætate exoleverunt. Cùm tamen pœnas Tridentini GREGORIUS XIII. extenderit etiam ad duellum privatum, ut sonat dicti Pontificis Constitutio (b), expendenda sunt quædam Tridentini verba. *Locus ad monomachiam concedere*, idem est, ac securitatem præstare, vi cujus nemo in duello pugnantibus manus injicere, vel liberum ad suos reditum, quomodocunque cadente alea, intercipere possit. Ad hoc publica fide se obligabant olim, qui ejusmodi Campum *Francum*, ut vocabant, dissidentibus præbebant, jure quandoque muniti ad eum præbendum. Tali jure gloriata fuisse legimus nonnulla Germaniæ oppida, veluti Halam Suevorum, Herbiopolim, & de Norimberga restatur GOLDASTUS (c). Notandum etiam venit istud: *Inter Christianos*; hinc si Princeps solis infidelibus, vel Judæis concederet in terra sua

(a) Sess. 25. de reform. c. 19. (b) Vide n. 404. (c) P. 2. Constit. Imp. tit. 71.

sua locum ad duellum, non incideret in pœnas Tridentini, licet utique graviter peccaret, permittendo rem jure naturæ veritam: incideret tamen probabiliter, si Christiano pugnaturus eum infideli locum duelli concedat; quia non minùs indecenter Christiani sanguis effundendus offertur infideli, quàm si offeratur Christiano alteri. Cùm verò post GREGORIUS XIII. loquatur generatim de *permittentibus*, non exprimens inter quos, SANCHEZ judicare videtur, Principem etiam inter meros infideles permittentem duellum, incurfurum dictas pœnas: nisi fortè dicatur GREGORIUM tantùm voluisse explicare Tridentinum, adeoque non fecisse extensionem pœnarum.

Pœna Tridentini etiam infert id, *ut jurisdictione, aut dominio civitatis, castri, aut loci, in quo, vel apud quem duella permiserint, quod ab Ecclesia obtinent, privati intelligantur.* Si scilicet ab Ecclesia obtineant, five acceperint (utique titulo ex natura sua rescindibili) ejusmodi jurisdictione Civitatis, aut præfectura castri privantur. *Quodsi feudalia sint, statim Dominis directis acquirantur.* Cùm verò aliud sit feudum *Ecclesiasticum*, quod scilicet conceditur à Prælato Ecclesiastico in bonis ad Ecclesiam pertinentibus: aliud *seculare*, quod à laico in bonis, ad Ecclesiam non pertinentibus, constituitur; & datur laico; crediderim ego, quòd Tridentino sermo solum sit de feudo Ecclesiastico; non enim voluerit in feuda secularia, avitè, ac gentilitia falcem immittere. Sunt equidem delicta aliqua, quæ de jure feudali *caducum* reddunt feudum, & nomine *felonia* veniunt; at vel talia sunt, quæ in ipsum Dominum directum feudi committuntur: vel tam atrocia sunt, ut præterea vassallus redditus infamis in curia Domini stare non ultra possit. Quòd horum delictorum numerum etiam in feudis merè secularibus augere Decreto suo Tridentinum voluerit, non crediderim. Certè postquam hodie ea pœna extensa est ad Principes, duella privata non impediunt, & non rarè ejusmodi *non impediens* invenire sit, non tamen videmus facillè ullum ejusmodi felonie exemplum. Unde vel ad sola Ecclesiastica feuda restricta est pœna: vel in rigore majore receptæ non sunt ejusmodi Constitutiones. Nolim tamen ego hoc loco Commentarium scribere in Concilium Tridentinum, id quod reservatum esse perbene novi S. Congregationi.

Illud non inobservatum relinquam : Tridentinum de solemnibus duellis loquens, etiam Imperatores, & Reges expressè complecti voluit, quos antea Pius IV. (a) exceperat. Post Tridentinum tamen GREGORIUS XIII., dum ad privata duella pœnas Tridentini extendit, Imperatores & Reges non nominavit, sed generali voce dixit : *locorum Dominos* : neque eo usque ascendit CLEMENS VIII. confirmans Constitutiones prædecessorum. Equidem ait (b) : *Panis subjacere tam si enumeratis, quàm si aliis etiam majoribus Ecclesiasticis, vel mundanis dignitatibus, gradibus, & præminentis excellant.* At videntur hæc referri ad eos, qui vel primariam, vel secundariam actionem ad duellum pertinentem ipsimet admittunt, ut consideranti patebit. Unde, cum aliunde constet, quàm cauta sit Romana Ecclesia in feriendis summis Capitibus, dubitari potest, an ex hujusmodi culpa Excommunicationem incurrant Imperatores, & Reges : &, quod consequitur, qui ijs pares censentur : id quod ego aliorum judicio relinquo.

§21. II. CLEMENTIS VIII. Constitutio, præterquam, quòd omnia, in Tridentino contenta renovata velit, peculiariter hæc habet (c) : *Ipsæ verò Civitates, oppida, terras, vel castra, in quorum territorio id facinus, vel tacitè vel expresse permittentibus, aut tolerantibus Dominis, aut Magistratibus, vel Senatu, aut populo admissum fuerit, Ecclesiastico supponimus interdicto.* Complectitur summus Pontifex omnes regiminis formas, cæque interdicto subjicit, Monarchiam *per locorum Dominos*, Aristocratiam *per Senatum*, & Democratiam *per Populum*. Est autem *Interdictum* Censura Ecclesiastica prohibens usum Divinorum Officiorum, aliquorum Sacramentorum, & Ecclesiasticæ sepulturæ, *quatenus talis est.* Hoc ultimum additur, ut differat ab Excommunicatione, quæ eodem usu privar, quatenus est communicatio cum fidelibus.

Dividitur in Locale, & Personale : *Personale* immediatè afficit personas : *Locale* immediatè locum. Præsens interdictum *locale* esse apparet; dicit enim Constitutio : *Civitates, oppida, terras, vel castra Ecclesiastico supponimus interdicto.* Hujus effectus potissimus est, privatio Officiorum Divinorum, quo nomine veniunt functiones sacræ, quæ fiunt à Clericis publi-

cè

(a) In Constit. *Æqua*, an. 1560. (b) Constit. §. XVII. (c) §. XIX.

cè, & ratione Ordinis sacri, uti Sacrificium Missæ, Horæ Canonicæ, Benedictiones publicæ &c. Cætera, quæ ad interdictum pertinent, videre passim est apud Interpretes Decretalium, ad tit. 39. L. V.

Hoc interdictum, in nominata loca latum est, siquidem eorum Domini, Magistratus, Senatus, aut populus facinus, seu duellum *tacitè*, vel *expresse permittant, aut tolerant*. Quid sit *tacitè* permittere, patet partim *ex Articuli præcedentis §. I.* partim patebit *ex §. mox secuturo*. Interim noto, interdictum locale, quamvis ab ipso jure sit latum, aliquam tamen denuntiationem requirere saltem declaratoriam criminis juxta principia generalia de Censuris. Unde cum duella non rarè dissimulentur à locorum Magistratibus, vel inani pallio subitæ rixæ necquidquam involvantur: non facile autem de declarato aliquo interdicto locali, apud nos quid auditum fuerit, fortè non ineptè dici poterit, hanc constitutionem quoad hoc caput receptam non esse, saltem in Germania. Id extra dubium est, quòd, si huic interdicto locus quis subjiceretur, relaxatio ejus reservata sit Sedi Pontificiæ. (*vide Constit. Clement. §. XIX.*)

§22. III. Ampliùs se explicat dictus Papa verbis sequentibus: *Et non solum locorum Dominos, sed & Magistratus, Præsides locum tenentes, aut etiam militum Duces, & Capitaneos in castris vel extra ea, in alieno, vel hostili solo vel cum militibus exercitiis adversariorum Monomachiam, in quocunque casu, per præsentem, vel alias constitutiones hujusmodi prohibito, permittentes, vel quantum in ipsis est, non prohibentes, aut post admissum crimen veniam, & impunitatem concedentes*, pœnis à Tridentino latis subjicimus. Perstringuntur itaque præter Magistratus, Capitanei, locum tenentes, militum Duces, quando permittunt, aut non impediunt duellum, sive *in castris, sive in propugnaculis, etiam ubi S. R. E., aut Catholica fidei hostium furor impunè grassatur, vel in Dominiis per eos occupatis, & detentis*. (a) Dum videlicet fortè *justo bello indicto miles aliquis contra alterum in adversariorum exercitum militantem privatas inimicitias, atque simulas publicæ causæ velut immiscere*. (b), modò casus sit talis, in quo aliàs de se prohibitum sit duellum, nec excusationem inveniat. Unde colliges, multo magis perstringi

G g 3

eos

(a) Constit. §. VII. (b) Ibidem §. VIII

eos Duces militares, qui suis militibus inter se has pugnas indulgent: quin feriuntur etiam una cum Magistratibus, dum post admissum crimen, veniam & impunitatem concedunt.

Inter pœnas præcipua est Excommunicatio *Major*, latæ *sententia*, qualem in ipsos pugiles latam pridem diximus. Quodsi *Ecclesiastici fuerint*, (tales scilicet Principes, aut Prælati) qui ejusmodi negligentia se reos fecerint, *privatio omnium dignitatum, beneficiorum, & officiorum Ecclesiasticorum, & inhabilitas ad illa, & alia impofterum obtinenda: à quibus panis non nisi à Romano Pontifice absolvi possint.* Pœnam Excommunicationis hodie dum locum habere, non video, qui dubio sit locus; oportet tamen juxta Regulas generales de Excommunicatione receptas, ut negligentia suâ admiserint peccatum grave, & latæ Excommunicationis illi Præpositi notitiam habuerint. De privatione dignitatum, dubito, num satis in usu sit Constitutio Pii IV. confirmata à CLEMENTE. Siquidem tamen Princeps Ecclesiasticus reum se ejus criminis faceret, crediderim, ad hanc pœnam opus esse sententia declaratoria.

523. Ratio, quæ sacros Legislatores ad ferendas tam acerbis pœnas permovet, est grandis perniciēs animarum, & corporum, quæ ex duellorum licentia, non refrænata, oritur. Unde ejusmodi peccant mortaliter, malè dum funguntur suo officio. *Arg. L. Congruit. ff. de offic. Præsid.* Docet id D. THOMAS (a), PEREGRINUS, (b) NAVARRUS (c) SALON (d), alii-que. Unde GOBAT, Theologus aliàs neutiquam rigidus, non mediocriter tamen doctus, fidenter asserit: (c) *Existimo, esse in Germania saltem, & in Gallia hoc tempore incapacem absolutionis Sacramentalis Principem, qui, audito subditorum suorum aliquem provocasse ad duellum alterum aliquem, talem provocantem non punit valde graviter, esto non sit secuta pugna: si autem secuta, necaveritque provocans provocatum, non ferat irremissibilem capitis pœnam; nisi ratio boni publici exposcat aliquam moderationem judicio prudentium non interessatorum.*

Pruden-

(a) 2. 2. q. 62. art. 7. (b) De Duello. q. 4. n. 11. (c) Manual. c. 25. n. 25. (d) In 2. 2. D. Thom. tom. 1. q. 62. art. 7. contr. 2. (e) Theol. experim. tract. 7. n. 573. Append. 2. l. F.

Prudenter, & cum judicio GOBAT apponit sententiæ suæ limitem his verbis : *nisi ratio boni publici moderationem exigat* ; dum enim puniuntur Magistratus, *post admissum crimen veniam, & impunitatem concedentes*, non crediderim ego, ita infringi jus, quod aliàs habent summi Magistratus faciendi reis gratiam, seu *aggratiandi*, ut *art. precedente* explicatum est, ut nullo in casu veniam, & impunitatem concedere possint, neque tunc, quando non est secuta pugna, aut cædes; nam præterquam, *quòd in panis be-* *nignior sit interpretatio facienda* : (a) videtur, quòd lex hæc, si omnem facultatem aggratiandi excluderet, futura non esset satis rationabilis, & laxura foret jus Magistratibus aliunde competens ex naturali æquitatē. Jam verò *placuit in omnibus rebus precipuam esse æquitatis, & justitiæ, quàm stricti juris rationem.* (b) Item in omnibus quidem, maximè tamen in jure, æquitas spectanda est. (c) Unde admitto *aliquam moderationem* : sed tantum *judicio prudentium non interessatorum*, ut loquitur GOBAT, notòque quòd varii generis *interessati* dentur. Aliqui capiuntur lucro, aliqui obsequiis, & laudibus, aliqui studio partium, aliqui mira æstimatione Nobilitatis, alii affectu erga agnatos : alii denique *interessatorum* commendationibus, aut studio eisdem placendi, & si quæ sunt aliæ humani judicii decipulæ. Hæc de pœnis statutis in negligentes Magistratus : apud quos tamen honestas, & recta ratio præ omni pœna valere debet, nisi fastigio, quo collocati sunt, indigni audire velint.

## §. II.

Pœnæ Magistratum negligentium applicantur casibus particularibus.

524. *Septem Casus Duellorum permis-* 525. *Quatuor casus duellorum non*  
*sorum, vel non impeditorum.* *satis punitorum.*

524. QUODSI jam doctrinam, ex fonte triplici haustam, exemplis oporteat declarare, non referam facillè casus alios, quàm fictos, tres priores si excipias. Si Lector factos quosdam noverit meis fictis similes, in culpa non ero. Judicium itaque meum ita proferam, ut neque in

in quemquam dirigam telum : neque aliter sentiendi libertatem ereptam velim. Præmitto casus duellorum *permissorum* : sequentur casus duellorum *non punitorum* ; in utrumque enim hoc negligentiae genus statuta sunt poenae Ecclesiasticae.

Inprimis illum Principem, de quo GOBAT refert (a) quodd non solum laudaverit provocantem : sed hunc, dum nolentem comparere baculo percussit, equo donaverit in præmium veluti rei præclare gestae, hunc, inquam, non dubitamus meritum fuisse poenas Ecclesiasticas omnes.

Secundò : ægrè etiam ille Senatus bellicus impunè abibit, qui centurioni, dum baculo à quoquam percussus opem imploraret, rescripsit, sibi met prospiceret, se cogere non posse milites, ut communia cum ipso munia obeant. *vid. n. 281.* nisi fortè ad majora mala evitanda, minus permittendum duxerit Senatus ille. Quæ tamen secutura graviora mala non satis ego perspicio, si recolo ea remedia, & Principum in Edictis suis studia, quæ satis amplè recensui alibi, scilicet *Cap. II. vid. etiam n. 510.*

Tertiò : Minus à poena Ecclesiastica immune pronuntiare velim factum illud (Principis id fuerit, vel Senatus sui) dum interfectori, postquam peracto duello, ad quod provocaverat, injuriâ non nisi per malignam interpretationem affectus, aliquamdiu in asylo latitaverat, centuriam interfecti attribuit, cui pridem is inhiaverat. Equidem ordo eum ad centuriæ præfecturam vocabat, utpote primum ex subcenturionibus ejus legionis : at an duellum facta cæde nihil poenae merebatur ?

Quartò : Alius ille Magistratus, vel Princeps, de quo finxi N. 509. quodd provocatum ab extero ad urbem neutrarum partium ire jusserit, ac exigere, ut ibi provocans demonstret, vel in caupona coram teste sibi adjuncto, vel coram Prætorè in curia, se esse fungi hominem, ut exprobraverat, hic, inquam, Magistratus, cum videatur, vel *tacitè permisisse duellum*, vel saltem *pro viribus non impedivisse*, ægrè poenas canonicas evaserit, nisi fortè bona fides excusaverit, quam colligere datur ex illo qualicunque conatu, quo studuit remedium quærere provocato, legioni tumultuanti mitigandæ sufficiens.

Quintò

(a) Theol. experim. p. 1. edit. 2. tract. 7. cap. 18.



Quintò: Fuit Tribunus legionis cujusdam, qui conquerenti de ac-  
cep̃ta à commilitone injuria, adductis aliquantum humeris, respondit:  
*amice, facilius tu, quàm ego huic rei exitum invenies, & sic à se dimisit.*  
Dum ei à viro probò scrupulus injiceretur, eo se excusavit, quòd qualicum-  
que sua autoritate, & imperata satisfactione aliud præter risum obten-  
turus fuisset nihil apud legionem in duellum obstinatam, neque sperare  
altioris judicii auxilium licuisset. Si quidem veritate nitatur hæc excusatio,  
Tribuni negligentia tanta vix fuerit, credo, ut pœnas Ecclesiasticas fuerit  
promerita.

Sextò: Certius eas promerentur Præfecti illi militares, qui in loco  
publico, ubi miles disponitur, in stationes successurus, duellum spectant,  
si quidem eum modum approbent, vel foveant. *vid. n. 508.*

Demum septimò huc referri potest celebre illud dubium: an supre-  
ma potestas possit duobus ad mortem damnatis imperare duellum ad re-  
creandos spectatores. Videtur esse licitum, quia hoc aliud non est, quàm  
constituere alterum alteri justitiæ ministrum. At meritò id negant commu-  
niùs Authores; quia ejusmodi Princeps potestate sua abuteretur ad delectan-  
dos homines crudeli hoc spectaculo, à quo probæ mentes abhorrent. Data  
tamen hac facultate, reus uterque licitè pugnat, tum ut agat ministrum  
justitiæ, tum salvandæ vitæ gratiâ antagonista superato: modò caveant  
sibi ab odio.

525. Octavò: Cum pœna Ecclesiastica non tantum in eos Magi-  
stratus, & Principes lata sit, qui duellum permittunt, & non impediunt;  
sed etiam in eos, qui post admissum *veniam, vel impunitatem concedunt*, (sine  
gravi scilicet causa *juxta n. 523.*) dubitari potest, an sufficienter puniti  
fuerint duo illi, quos equidem dignitate, aut nobilitate non admodum  
conspicuos, postquam tamen aliquamdiu securi sunt castra, ad duelli fa-  
cultatem evehit hodierni ævi persuasio. Unus levi perstrictus verbo, al-  
teri à latere non discessit importunus exactor, donec eum vel invitum per  
ambages platearum ad arcam pertraxerit, duellis sacram. Ubi etiam tulit  
importunitatis suæ præmium, vulnera scilicet in vultu satis luculenta, quæ  
cæsum alter ei inflixit. Fingamus supremum Magistratum edoctum de fa-  
ciliore, aliam provocanti pœnam non indixisse, quàm ut eurgeret sua vit-

nera, quæ pro merito retulisset. Fingamus Principem, de miti nimium sententia monitum, etiam officio uno, (geminum possedisse statuamus) eoque satis pingui, exuisse reum. Dubitatur, num Magistratus fulmen Ecclesiæ evaserit? Item num Princeps? Magistratum incurrisse satis certum est; quæ enim pœna, quodd pati debeat vulnera accepta in facie sine vitæ periculo? hanc pœnam injunxit provocatus; quid ergo fecit Magistratus? Principem facilius excusarem, nisi fortè in sua provincia duellum, etiam non secuta cæde, sub capitis pœna, vel exilio prohibitum per leges sit, à quibus sine gravi ratione deflectere non liceat.

Nonò : Fingamus, virum Equestrem, admittæ turpissimæ culpæ à Clito infimulatum, hunc ad duellum provocasse, quod dum is, utpote cum infami inire recusaret, alter ad judicium provocat, actionem injuriæ intentans. Admissa est actio contra Clitum; quæritur num bene? Videtur, quodd non; eo quodd actio neganda sit ei, qui autoritate privata præoccupare voluit officium judicis, non sine hujus contemptu. Venisset, antequam provocaret, quamprimum injuriam acceperat. Actionem certè ejusmodi homini negant Edictum Colonienſe, Palatinum, Bipontinum, Saxo-Gothaicum, Lotharingicum, Megalopolitanum, & complura alia, quin ipsa æquitas naturalis. Docet CARPZOVIVS (a) per retorsionem tolli actionem injuriarum; si enim injuriam passus per retorsionem eandem repulerit, sibi ipsi in causa sua jus dixisse videtur, & indignus est, ut legis, aut Magistratûs opem sentiat, qui jus dicentis autoritatem, quam implorare debuerat, neglexit. Quodd si sola *retorsio* quemquam actione reddit indignum, multo magis *provocatio* id faciet.

Sed, quæres, quid ergo agat miser, infami nota conspersus, quodd se convertat? vel in iudicio absolvi debebit, vel ultro armatus irruere in Clitum. Ajo, si, actionem negantè Prætore, suæ sibi innocentiae sit conficius, subornet quempiam, qui ex indicis illis ipsis, quibus Clitus se induci ad exprobrationem est passus, apud judicem cum denuntiet. Judicis tum erit inquirere, & trutinare suggesta indicia : quæ si minus ponderis

---

(a) Jurisprud. Forens. p. 4. Constit. 46. defin. 10.

ris habere deprehendantur, & declarentur, satis erit consultum honori. Neque *denuntians* inde quidquam damni capiet, veluti accusator solet capere, si in probatione succumbat; denunciatus enim non tenetur se inscribere ad pœnam talionis, aut ad causam plenè probandam, ut docent passim Doctores (a). Quod autem iudices illos attinet, qui post factam provocationem adhuc admisere actionem, si quidem etiam apud illos extitit editum id vetans, malè egerunt contra debitam legibus observantiam: nec tamen pœnas Ecclesiasticas meriti sunt; eo quòd duellum neque permiserint, neque veniam & impunitatem eidem concesserint.

Decimò: At tales ego iudices eximere nolum, qui pœna ferme nulla afficerent provocantem, contenti, quòd ex provincia abiret aliò ferrarum, quòd eum negotium quoddam vocat, cujus tamen tanta erat audacia, ut post litem suam in iudicio decisam, & pronunciatam sententiam adversarium nihilominus gladio adoriri non sit veritus, quamvis fide jurata in iudicio promiserit, id se non facturum. Gravissimæ consequentiæ hoc crimen est; si enim post supremæ potestatis sententiam pugnare adhuc pro honore necesse ducitur, frustra laboratur tollendis duellis, desperatus est morbus, cui tollendo unicum, quod superest remedium, non sufficit. Gravissimè itaque puniendum erat crimen, nec ferendum, ut tanta auctoritas ludo haberetur. Peccarunt itaque: Pœnas tamen Ecclesiasticas non contraxerunt; quia *duellum* non erat, sed aggressio ex una, defensio ex altera parte: itaque *rixa* erat, quam impunitam dimiserant.

Undecimò: Fingendus adhuc casus unus est. Camillus & Hector, egregii bello duces, sua quilibet dignitate conspicui, subita æmulatione collisi sunt. Camillus enim in rebus ad munus suum pertinentibus, ulla ab Hectore iussa accipere detrectavit, ob, nescio, quam antiquioris juris prærogativam, donec supremus Princeps pronuntiavit editâ sententiâ, ut dependeret Camillus ab imperio Hectoris. Ille irritatus hac sententia per Epistolam Hectori animum suum graviter exacerbatum exposuit. Hector lætæ epistolæ responsorias dedit, in quibus, invidiam à se amoliturus, sententiam Principis objecit. Cùm tamen Epistola Camilli etiam personam Hectoris videretur perstringere, addidit hic in responsoriis suis: *si de ca-*

H h h 2

tero,

(a) vid. *Reiffenstuel* tit. de accus. & inq. nif.

*sero, quid sua persona velles, scires se nihil metuere.* Aliquot post dies, dum nihil minus opinatur Hector, Camillus adest, ad duellum provocat. Pugnatum fuit non seguitur. Levi tamen vulnere finita est pugna. Admonitus Princeps, utrumque domi se continere iussit, donec post aliquot dies causa ventilata, & decisa fuerit, eâ clementiâ, ut Camillo, utpote magis reo, scripta fuerit levis objurgatio, de reliquo nihil ei fortunarum, aut gratiæ decessisse notatum fuerit. Dubitari in consêto hoc casu posset, an non iudices nimis clementes hoc sibi iudicio pœnas Ecclesiasticas sint promeriti, quia *post admissum crimen veniam, & impunitatem concessere.* Vel si levis objurgatio, data Camillo, pœnæ nomine venit, aut domestica custodia per se servanda, donec post pauculos dies causa examinaretur, videtur ea pœna delicti nimium quantum inferior, præsertim in iis Provinciis, ubi supplicium capitale statutum est in duellum etiam non secuta cæde. Delictum Camilli ex eo quoque crescit, quod propter *subordinatiquem* per supremi Principis decretum expressè *definitam*, irritatus provocaverit. Nec dici potest, quod contra privatam Hectoris personam se vindicaverit: ab hac nihil injuriæ acceperat; verba namque in responsoriis scripta non provocantis erant, sed virtutem profitentis. Videntur ergo hic locum habere Ecclesiæ fulmina, & sententia GORATI, recitata n. 323.

Et profectò, quamdiu præsens negotium intra fictionem consideratur, vix est excusationi locus super. At si revera aliquando ita contingeret, ut tali duello talis sententia daretur, tunc crederem ego (saltem si iudices scirem viros esse, alioquin integros, & conscientiæ rectæ) crederem, & mihi persuaderem, gravem causam eos habuisse tam mitis sententiæ. Novi siquidem ex CARPZOVIO (a) tredecim dari causas, ob quas pœna possit mitigari, scilicet ætatem tencram, senectutem, & corporis debilitatem, insaniam sive phrenesim, ebrietatem, surditatem in muto, calorem iracundiæ subitam, delicti incertitudinem, promissionem mitigationis factam ad eliciendam confessionem spontaneam, diurnam captivitatem, intercessionem puellæ reum condemnatum petentis in matrimonium, peritiam vel insigne artificium delinquentis. Unam ergo harum causarum adesse toties crederem ego, quoties à viris probis tam lenem sententiam ferri cernerem.

Causa

(a) Præf. Crim. p. 3. q. 143.

Causa decima tertia, est Nobilitas : sed præterquam, quòd hoc causæ genus prudenti declaratione indigeat, non video, quomodo contra leges duelli patrocinari Nobili possit; cùm hæc leges utique, non pro rusticis & plebe, sed si non unicè, certè potissimùm pro Nobilitate sint scriptæ, vel pro iis, qui Nobilium jure gaudent. Aliud foret, si Nobilitati accederent collecta à reo præclara in Rempublicam merita. Hæc in casu nostro, si adfuisse fingamus, minùs poterimus condemnare judices. Quidquid sit, ego, in quocunque casu Magistratuum judicia semper in melius studerem interpretari, nisi fortè in sacro tribunali ea mihi dijudicanda eorum quis afferret.

Duodecimò : Princeps quidam Ecclesiasticus Germaniæ admonitus de injuria, ab Aulico uno illata alteri, & futuro duello, id respondere satis habuit: Væ illis, si in territorio meo pugnent. Mediæ horæ itinere in alienam ditionem egressi, patrata pugnâ, rursus impunè in aula comparuerunt, provocans quidem eadem die, provocatus autem post triduum curato levi vulnere. Facile ex dictis patet, an officio suo satisfecerit Princeps. Dissimulavit crimen; quia *alieno* patratum *in territorio*. At sui tamen fuerunt, & manserunt subditi, qui crimen admiserant. Quæso, an etiam impunitos reliquisset, si rapinas & adulteria *in alieno territorio* exercuissent? Igitur pœnas incurreret non tantùm aliis Principibus communes, sed & eas, quas in Clericos speciatim latas à n. 434. recensuimus, id quod colligo ex *Clementina Constitutionis §. II. VI. X.*

Decimo tertio : Punivit alicubi Magistratus ipsos pugiles post admissum duellum, juxta Edictum eo in loco promulgatum & receptum: pœnam tamen Patrinis non indixit, quamvis etiam his in eo edicto pœna peculiaris dictata extet. Dubium non est, quin hi Patrini peccârint graviter, & pœnas Ecclesiasticas incurrerint *vid. n. 37.* At illud quæri potest, an Magistratus eisdem pœnis obnoxium se reddiderit, *dum post admissum crimen Patrinis veniam & impunitatem concessit?* Resp. quòd non; quia in Constitutione CLEMENTIS §. X. damnantur *veniam, & impunitatem concedentes*: & tum primùm §. XI. Pontifex descendit ad actiones secundarias, inter quas etiam est agere Patrinum.

## ARTICULUS V.

*An contra pœnas civiles sacro Asylo gaudeant rei de Duello?*

**N**EGAT hoc BARBOSA (a), asserunt alii. Itaque ut nihil desiderari poterat in præsentì opere meo, quod ad materiam de Duello pertinet, etiam de Asylo dicam, ad quod monomachus confugere solet, qui in duello vulneratum à se non leviter adversarium notat; commune enim hoc est horum Heroum receptaculum, timentium sibi à vindicante justitia. Id quoque sæpe accidit, ut Curia secularis, militaris præcipuè, Asyli sacrum jus turbidè invadar verbis, factisque. Itaque §. primo dabo prænotanda necessaria. Secundo, quæram, an duello Asylum bene neget BARBOSA. Tertio: an etiam post Constitutiones BENEDICTI XIII., & CLEMENTIS XII. Asylum pateat duello lethali. Quarto: quid singulariter novissimè statuerit BENEDICTUS XIV. Quinto: an iusta querela contra asylum locum habeat?

## §. I.

## Prænotanda Necessaria.

526. *Definitio Asyli explicata.*

527. *Applicatur Duello.*

526. **P**rimò: Jus Asyli, spectans ad immunitatem Localem Ecclesiarum, dicitur privilegium locis, ad DEI cultum ordinatis, concessum, vi cujus rei ad illa confugientes sunt securi, nec per violentiam inde abstrahi possunt (b). *Per loca ad DEI cultum ordinata* intelliguntur templa etiam nondum consecrata, & benedicta, etiam templi atrium, & quidem ad triginta in minore Ecclesia, vel ad quadraginta passus in majore, quod tamen contrario usu in plerisque abrogatum esse censet PIGNATELLUS (c): item cœmeterium, quamvis templo non sit contiguum, Monasteria, & Domus Religiosorum, horti, aræ, ædes, scholæ, intra septa Monasterii existentes: Oratoria, & Capellæ autoritate Episcopi Divino cultui in perpetuum

(a) Jur. Eccles. l. 2. c. 3. n. 101. (b) Ex Cap. inter alia. de Immunit. Eccles.

(c) Tom. 6. Consult. 25.

petuum dedicatæ, etsi in privatorum ædibus erectæ sint. *vid. DELBENE (a).* Per Reos intelligimus eos, qui facinus ejusmodi commiserunt, ut propterea mortem, vel mutilationem sustinere deprehensi debeant, vel certè timere: vel etiam pœnam morti aut mutilationi æquivalentem, vel carcerem molestum & perpetuum, aut valde diuturnum, triremes, longissimum exilium, aut tam durum verberationis genus, quod hominem reddat ineptum ad lucrandum victum. Ubi non est certa pœna statuta in delictum, sufficit, quodd reus expectare debeat incertam sententiam, dictaturam certè pœnam oppidò gravem. Sunt *securi* in Asylo, hoc est, reus in loco Asyli jam constitutus non potest alligari vinculis, nec aliter vexari, nec potest ei negari victus, aut requies, aut vestis, nec inferri ullum damnum (b). Nec *per violentiam inde abstrahi possunt*. Hinc iudex sæcularis mandans extrahi ex Asylo aliquem, eo gaudentem, ministri etiam extrahentes, & quicunque suam conferentes ad id operam non solum peccant graviter contra Religionem & justitiam, sed etiam incurrunt excommunicationem latæ sententiæ, à qua non sunt absolvendi, nisi restituant prius extractum loco suo (c). Dixi, *Asylo gaudentem* si extrahant; quodd si dubium sit, an delictum tale sit, quod gaudeat Asylo, vel an sit exceptum, de quibus *vid. n. 530.* extrahi non potest, nisi antea Episcopus fuerit requisitus, & sententiam dixerit. Plura de hoc, & de modo tradendi reum judici laico, patebunt legenti Constitutionem GREGORII XIV., & BENEDICTI XIII., de quibus paulò pòst: item mandatum novissimè editum in Diœcesi Augustana (d).

. 527. Unde hæc ut rite applicentur duello, considerandum in primis venit, an commissæ pugna, non rixa potius, quàm duellum fuerit; nam rixa si fuerit, & facta sit cædes, faciliùs reus gaudebit asylo, saltem extra ditionis Pontificiæ terras; in rixa quippe cædes non fit animo adedò *premeditato, ac deliberato*. Tum si duellum revera fuerit, sed sine cæde, videndum, quæ pœna in ejusmodi duellum lata sit in ea provincia: si pœna capitalis, vel alia admodum gravis, quales *numero præcedente* recensuimus, asylum patebit. Idem dico de sola provocatione, & de actionibus secundariis patrinorum, deferentium libellos provocatorios &c., nisi argumentum BARBOSÆ, paulò pòst discutiendum, prævaleat. Quodd si denique cædes secuta primùm pòst unum, alterumve diem fuerit, & pœna capitalis, aut ferme æquivalens in solum duellum

(a) De Immunit. Eccles. cap. 16. dubit. 9. (b) Leg. 6. C. de his. qui ad Eccles. confug. c. diffinivit. XVII. q. 4. (c) Cap. cit. (d) An. 1748. §. Maii.

duellum lethale lata sit, attendendum erit, an mors sit secuta ex vulnere, & intra quale temporis spatium. *vid. n. 460.*

## §. II.

An Duello Asylum bene neget *Barbosa*?

528. *Sententia Barbosæ explicatur.* 530. *Et secunda.*  
529. *Refutatur ejus ratio prima.*

528. **A**UGUSTINUS BARBOSA, celebre inter Jurisconsultos nomen, ita docuit. " Qui se simul ad rixam provocaverint, & duellum in-  
dixerint, immunitate minimè gaudent; quis enim dixerit, Excommuni-  
catus, & ab Ecclesia dejectos, quibus sacræ sepulturæ loco interdicitur  
juxta Tridentinum, eos Ecclesiæ posse perfrui immunitate, quos nolit  
mortuos intra Ecclesiam, vel cæmeterium sepeliri? quodsi mortuos Ec-  
clesia à sacro loco depellit, & exhumari jubet, quis vivos illos subterfu-  
gio gaudere affirmet? Idem dicendum puto, cum duo simul decertan-  
tes se certo in loco ad duellum provocarent, & alterum unus occide-  
ret; nam animus occidendi præmeditatus adest, qui, si veriore se-  
ntentiam, solus sufficit, ut quis Ecclesiæ immunitatem amittat.  
Ita ille. Ex quo colligitur, quòd Asylum neget non ei tantum, qui in duel-  
lo cædem commisit: sed & provocantibus, & duellum indicentibus; id-  
que ex ratione gemina; quia scilicet excommunicati ipsa sepultura sacra  
excluduntur: ergo multo magis asylo, tum quia præmeditatum ejusmo-  
di homicidium immunitatem amittit.

529. Sed non persuadet gemina hæc ratio; nam primò, quam-  
vis excommunicationem incurrant, & sepultura priventur rei de duello,  
non sequitur, quòd etiam priventur asylo; satis quippe receptum est, quòd  
etiam Excommunicati, aut interdicti ab ingressu Ecclesiæ, utut publicè  
denuntiati, asylum habeant, juxta SIV. NAVARR. ANG. ARM. DELBENE. (a).  
Ipsos hæreticos, alterius criminis, quàm hæreseos reos, gaudere asylo  
docent multi apud, & cum DELBENE (b), quin ipsos non baptizatos Judæos,  
& Saracenos admittunt, si verè ad Christiana Sacra converti velint; quia sci-  
licet non est indecens, ut benigna Mater Ecclesia etiam cuidam indigno fa-  
vorem

(a) Apud *la Croix* l. 4. n. 1393. (b) *Tom. 2. C. 16. dub. 22.*



vorem concedat. Potissima autem ratio est Constitutio GREGORII XIV. ejusmodi reos non excludentis.

§ 30. Ex qua ipsa refellitur argumentum secundum BARBOSÆ. Sic enim arguo : De jure communi facinorosis omnibus competit asylo, nisi crimen exceptum sit : arqui nec provocatio, nec ipsum duellum, nec patrata in eo cædes crimen est exceptum, privans asylo : ergo gaudent asylo. Non censentur alia excepta, quàm illa octo, contenta in Constitutione GREGORII XIV, (a) quæ hac in materia jus novissimum constituebat tempore BARBOSÆ, & in qua hæc legere est : *Laicis ad Ecclesias, locaque sacra confugientibus, si sint publici latrones, viarumque grassatores, qui itinera frequentata, vel publicas stratas obsident, ac viatores ex insidiis aggrediuntur, aut depopulatores agrorum, quæve mutilationes membrorum, aut homicidia in ipsis Ecclesiis, earumque camerariis committere non verentur : aut qui proditoriè proximum suum occiderint ; aut assassini, vel hæresis, vel læsæ Majestatis in personam ipsiusmet Principis rei, immunitas Ecclesiastica non suffragetur.* Nihil in hac exceptione de duello. Cædes etsi sequatur, non erit ex proditione ; ille enim occidit proditoriè, qui per insidias, & sub specie amicitiae occidit incautum, sive nihil potentem sibi cavere. Præter hæc crimina autem nullum aliud, quamvis atrox, privat asylo juxta constitutionem Gregorianam ; quia hæc voluit omnia, in materia immunitatis occurrentia dubia tollere, atque velut norma reducere omnia ad unam tantum formam, statuens, ut sola enumerata octo delicta privent asylo, non alia, etsi agnipollescent in jure expressis, vel adsit paritas, identitas, aut majoritas rationis.

(a) Cùm alias edita Anno 1591.

## §. III.

An etiam post Constitutionem BENEDICTI XIII. & CLEMENTIS XII.  
Asylum pateat Duello lethali?

531. *Intra Diocesem, quarum Episcopi interfuerunt Concilio Romano, non patet.* 532. *Extra Italiam valet sententia* PICHLERI.  
533. *Cui aliquot notiones subjungimus,*

531. **B**ENEDICTUS XIII. piissimæ memoriæ Pontifex, postquam Concilium Provinciale in Ecclesia Lateranensi, utpote hujus Patriarcha, anno MDCCXXV. celebraverat, Constitutionem edidit (a), in qua inter alia nova delicta, asylo privantia, statuit primo mox loco : *si quis interficiat proximum animo præmeditato, ac deliberato*. Arctiores ergo limites asylo posuit, ac antè posuerat GREGORIUS XIV. utpote qui solum homicidium *proditorium*, non verò etiam id, quod sine proditione animo præmeditato, ac deliberato fit, hac immunitate excluderat. Inde colligo, duello *lethali* non patere asyllum sacrum : id est, eo non gaudere, qui alterum in duello interfecit, quæ cædes utique fit animo *præmeditato, ac deliberato*. Vel enim pactio de levi tantum infligendo vulnere præmissa non fuit duello ; vel si præmissa fuit, futilis erat, & pro non adjecta habenda, ut Cap. sequente patebit. Quòd si ergo quis pugnando locum quærat vulneri, parum sollicitus, & prorsus incertus, an vulnus lethale sit futurum, nec ne : quin etiam animo ita sit comparatus, ut lethale quoque vulnus dare non abhorreat, modò possit dare ; vel si aliud commodè dare non possit ; quis neget, hunc *præmeditato, ac deliberato animo*, adhibita omni dexteritate, ac robore suo, vitam alteri eripere ? Et tamen ita animo comparati solent esse monomachi. Quod tanto magis verum est de eo, cujus voluntas in lethale potius, quàm levius vulnus fertur. Homicidium ergo in Duello patratum animo *præmeditato, ac deliberato*. Et hæc ipsa est ratio, quòd omnis ætas, & omne tribunal pugilem ejusmodi, qui antagonistam duello occidit, pro vero homicida habuerit. Dubium videtur omnino tolli per Constitutionem CLEMENTIS XII. (b), ubi asylo excluduntur, qui homicidium in rixa commississent, dummodo homicidium non fuisset casuale, vel  
ad

(a) Quæ incipit : *Ex quo Divina Sc. inserta Concilio in appendice.* (b) Quæ incipit : *In supremo iustitia solio* An. 1734.

ad propriam defensionem. Jam verò *rixæ* minus quid est, quàm *duellum* (*vid. Cap. I. Art. I. §. 2. 3.*) Ergo duello multo minùs favet Constitutio.

532. At cùm hoc Concilium Romanum à BENEDICTO XIII. celebratum, *particulare* tantùm fuerit; qualia nullos fidei articulos desinire, neque statuta, ac morum decreta pro universali Ecclesia condere possunt, nisi à Pontifice approbata, & recepta fuerint pro tota Ecclesia: item cùm ea, quæ per CLEMENTEM juris communis, & Gregorianæ, ac Benedictinæ Constitutionum sanctionibus addita fuerunt, ultra fines (verba recito Constitutionis BENEDICTI XIV.) temporalis domini Apostolicæ Sedis minime extendantur, quæritur jam, an homicida monomachus hodie extra Italiam in terris nostris excludendus asylo sit?

Ad hanc quæstionem Respondet P. PICHLER (a), sequentem in modum: "Hæc Constitutio BENEDICTI XIII. sicut in his nostris partibus, quantum mihi constat, specialiter promulgata non est, ita, an recepta sit, aut in usum deducta, dubito, sicut tamen in praxi observatam fuisse scio Constitutionem Gregorianam, (quæ scilicet hunc homicidam non excludit.) "Unam tamen scio Diocesin, in qua conformiter dictæ Bullæ binis vicibus Episcopi autoritate ex asylo extraditi sunt, qui homicidium præmeditatum commiserant." Sic dictus Author in suo præclaro compendio. *Ge-* minum hunc casum clariùs recenset in suo *Jure Canonico practice explicato*. (b). "Venit ad me, inquit, Reverendissimus quidam Vicarius Generalis vir magnæ doctrinæ, dicens, se Constitutionem BENEDICTI XIII. novissimam secutum, jam duos extradidisse ex asylo Curiaæ sæculari: num bene? hoc ex me cupere eum intelligere. Reposui, ipsum omnino potuisse hoc facere: at obligatum non fuisse juxta meam doctrinam, qua trado, Bullas Pontificias novam legem ponentes, non obligare in Provinciis, in quibus promulgatæ non sunt debito modo, præsertim pœnales, correctorias, & revocatorias, qualis est ista Benedictina." Tum recenset longam disputationem, in quam cum Vicario Generali incidisset, circa necessitatem promulgationis faciendæ etiam in Provinciis.

(a) Comp. Jur. Can. l. 3. tit. 49. N. 6. (b) Lib. 5. tit. 37.

Demum iterum concludit: " Vicarium potuisse hoc facere : sed non fuisse obligatum ; quia existentes in cæteris Provinciis nullibi prohibentur acceptare legem Pontificiam , apud se non promulgatam : si-  
cut etiam non jubentur acceptare. Ergo licitè potuit ( citra obligationem tamen ) iste Reverendissimus ultronea acceptatione sequi Constitutionem , Romæ , & postea per Concilium in tota Italia debito modo promulgatam. Ac certè , si fuisset causa Romam , & ipse propterea delatus , vicisset , ac ibi apud legitimum judicem assistentiam invenisset pro foro externo , ac proin etiam in interno tutus fuisset , sicut tutus fuit extradendo.

533. His doctissimè disputatis liceat subungere quatuor annotationes.

Primò : Etsi promulgatio Romæ facta sufficeret ad obligationem inducendam in Provinciis , necdum tamen obligatus fuisset Vicarius , ut reum asylo excluderet ; quia non constabat adhuc , an eam legem per quasdam Provincias Italiæ promulgatam , Pontifex etiam voluerit ad reliquum orbem propagare ; potest enim quandoque rationem habere condendi pro una tantum provincia legem quamdam , præcipuè dum in Concilio non nisi Provinciali condit.

Secundò : In quibus Diœcesibus ( audio in pluribus extra Italiam id jam esse factum ) jam aliquoties *homicidio premeditato* , & facto *animo deliberato* negatum fuit asyllum , in iis negandum erit etiam posthac ; lex enim , acceptata per usum , obligat , (a)

Tertiò : In quibus Diœcesibus recepta necdum est ea Constitutio , consultum erit recipere , præcipuè si necessarium credatur ejusmodi frænum coërcendæ licentiæ duellorum , qua de re etiam Principes , pro salute publica solliciti , laudabiliter consilia cum Episcopis communicabunt.

Quartò : Consultum erit in iis Diœcesibus , ubi Constitutio per usum recepta necdum est , eam promulgando recipere , antequam casus ejusmodi contingat ; quòd si enim , occiso quodam per duellum , nobilis ejus familia apud Episcopum instaret , ne asyllum interfectori detur , durum accideret reo , tum primùm per acceptationem Bullæ in ultimum discrimen conjici

(a) L. de quibus. 33. ff. de leg.

conji. Jus quidem Episcopus semper habet Bullam acceptandi ; at etiam ejusmodi reus jus se habere crederet exigendi , ut secum agatur secundum usum , qui vigeat tempore commissi delicti.

## §. IV.

Quid singulariter novissimè statuerit BENEDICTUS XIV.?

534. *Constitutiones præcedentes partim extendit.* 535. *Partim declarat,*

534. SAPIENTISSIMUS hic Pontifex , cujus *sapientia* in condendis decretis *est quasi arena in littore maris* (a) , Constitutionibus Prædecessorum suorum novam Constitutionem addidit circa immunitatem localem (b) , in qua præcedentes extendit

Primò : quoad *personas* ; cum enim GREGORIUS XIV. & BENEDICTUS XIII. de Laicis tantum essent locuti , post CLEMENS XII. etiam Ecclesiasticos esset complexus , nunc Constitutione postrema etiam Regulares comprehendi declarantur , ut , si qui unquam (quod DEUS avertat) homicidium animo præmeditato ac deliberato patnaverint , à beneficio Immunitatis Ecclesiasticæ exclusi censeantur. Cavetur simul , ne quis mulieres , aut milites exceptos fors esse existimet.

Secundò : fit *extensio ad facta* , scilicet ad gravem etiam vulnerationem , ita ut ad perdendam asyli gratiam necesse non sit , percussum jam expirasse ; modò Chirurgi ad inspiciendum vulnus acciti *grave vite periculum* adesse rerulerint , percussor , è loco immuni servatis servandis extractus , carceribus mancipari permittitur ; hac tamen lege , ut Ecclesiæ omnino restituatur , ubi is , qui vulneratus fuerit , ultra tempus à legibus constitutum superstes vivat , & quidem sub iisdem pœnis , quibus in BENEDICTI , & CLEMENTIS literis si subjiciuntur , qui delinquentem ex indicibus ad torturam sufficientibus sibi traditum restituere recusant , postquam is in suis defensionibus hujusmodi indicia diluerit.

Iii 3

Ter-

---

(a) 3. Reg. 4. 29. (b) An. 1750. Idib. Mart. ejus initium : *Officii nostri ratio.*

Tertiò : Extenditur Constitutio etiam quoad loca, dum sic loquitur Pontifex : " Visum nobis est, eadem, quæ in hac materia à Prædecessoribus nostris constituta sunt, ad alias quoque regiones, quarum summi Principes id postulassent, opportune ampliari posse. Itaque in Concordatis, cum quæ Anno MDCCXLI. cum charissimo in Christo Filio nostro Carolo utriusque Siciliae Rege Illustri : tum quæ anno sequenti cum alio pariter charissimo in Christo Filio nostro Carolo Emanuele illustri quoque Sardiniae Rege sancita fuerunt, contentas in Clementis Literis dispositiones in eorundem Regum dominiis locum habere concessimus ; mox etiam ad alia Principum id expectantium dominia peculiaribus respectivè editis literis, quarum exemplum videre est in Tom. I. Bullarii nostri Constit. LXXXVIII., quæ incipit : *Alias felicit*, extendimus, & ampliavimus.,

§35. Constitutiones sic extensas etiam quoad quædam Capita declarat. Primò ait, equidem standum esse antiquo jure, ut scilicet causa extractionis è loco immuni in casu excepto ad solos Episcopos, aliòsque Episcopis superiores Prælatos pertineat : sed quoniam nonnullæ querelæ super hoc delatæ fuerunt, quòd quædam Curie Ecclesiasticæ extractionem delinquentium diutius, quàm par est, protrahere consueverint, hinc morantur Episcopi, ut sufficientibus indiciis absque mora collectis extractio decernatur, & rei vel in Episcopalibus carceribus nomine Ecclesiæ detineantur, vel, si indicia adsint, aliàs ad torturam sufficientia, etiam ad Curie Laicalis carceres transferantur. Pro majore acceleratione permittit Pontifex, ut Episcopi, à loco delicti absentes, Vicariis suis foraneis, sive etiam aliis Ecclesiasticis personis committant indicia juridicè colligenda. Id præcipuè æquissimum Pontificis nostri animum declarat, quòd expressè dicat, Ecclesiastici zeli officium non in eo esse statuendum, ut justitiæ cursus per Apostolicas Constitutiones præscriptus adversus facinorosos homines impediatur ; sed in Ecclesiæ immunitate ac juribus asserendis, ubi hæc contra sacrarum legum præscriptum, violari contingat.

Declaratur secundo, quid agendum in casu, quo reus ex loco delicti confugit ad asyllum Ecclesiæ in alia ditione, ex qua vi consuetudinis rei solent remitti ad locum commissi criminis. Scilicet si delictum juxta Constitutiones Pontificias pro excepto haberi debeat, mandat Pontifex, ut

ut Episcopus ille, ad quem ratione loci delicti commissi id pertinere dignoscitur, indicia ad capturam requisita cumulari faciat, eaque transmittat ad Episcopum ditionis, intra cujus Jurisdictionis fines illius delicti reus asyllum delegit, ut hujus Antistitis auctoritate, aliisque servatis servandis à confugii loco extrahi, ac si ita res feret, externæ postulanti Curiae valeat consignari.

Declaratur tertio, quod ii, qui in spretum Ecclesiasticæ autoritatis, posthabito recursum ad Superiores Ecclesiasticos, loca immunitatis obfidere præsumunt, ac impediendo, ne ad illos, qui sacro confugio se tuentur, alimenta deferantur, sive aliter in Curiae secularis potestatem se dedere cogunt, quod hi, inquam, iisdem pœnis subjaceant, quibus subiecti pridem fuerunt Curiae seculares, & Judices delinquentem sine interuentu Ecclesiasticæ autoritatis capientes, extrahentes, incarcerantes, vel ad declarandum, crimina esse excepta, procedentes. Quibus ego tamen verbis non prohibuit existimo, custodiam aliquam loco immuni addere, ne interea, dum causam Episcopus cognoscit, elabatur reus; modò aliàs molestiæ nihil vel loco, vel reo inferatur, nec recursum ad Superiores Ecclesiasticos posthabito, autoritas Ecclesiastica spernatur.

Hæc sunt, quæ circa asyllum sapientissimè in Ecclesia constituta esse novimus, hucque pertinere existimavimus.

## §. V.

An contra hoc Asylum justa querela locum habeat?

536. Auditur querela.

537. Refellitur ratione, & demonstratur ulterius, quod

538. Asylum non eximat reum penitus à pœna.

539. Nec sit consuetum in favorem Clericorum.

540. Et quod invalescente abusu, tolli, aut restringi possit.

536. **S**unt non rarè jurium Ecclesiasticorum vel imperiti quidam, vel osiores, qui, nescio, quibus studiis ducti, improbare non verentur asyli securitatem, & cæde fors quadam in duello patrata, mox, ubi homicida in locum immunem se subduxerit, detonare in ejusmodi receptacula

cula audiuntur : longè prudentiùs acturi, si in duellum ipsum suam bilem exonerarent, nec defenderent ejus usum, unicam effusi sanguinis causam. Quoddam iniquum ipsis non habetur duello congregi, quoddam necessitatis ritu hanc pugnam excusant, quin & fortitudinis laude exornant, cur viri pugili securitatem invident, sacro in loco quam quærit? Fingamus ejusmodi convitiatorem, vel ejus amicum quempiam asylo egere, tunc verso stylo saluberrimum hoc institutum appellabunt, quo consulatur reo, mala sorte redacto ad cædem humanam : at in causa aliena severi admodum sunt, damnantes uno halitu & reum, & jura Ecclesiæ.

537. Noverint ergo jus asyli esse antiquissimum, & coævum ipsis nascentis Ecclesiæ temporibus; quia GELASIUS Papa, (a) apertè pronuntiat, nec potestatibus, nec Principibus unquam licuisse, ut hominem in sanctuariis constitutum violenter abstraherent. Pontifex autem hic sedit ab anno 492. ad annum 496. Unde satis constar, quoddam facta ab ARCADIO prohibitio anno 398., ne scilicet reus in Ecclesia securitatem haberet, necessariò immunitatem jam habuerit ante se : quamvis & hæc prohibitio brevi post revocata sit, (b) & ejus architectus Eutropius consilium hoc suum, velut alter Beryllus, luerit, abstractus ab aris, ad quas confugerat reus perductionis. (c) Hoc jus asyli pluribus aliis in Conciliis confirmatum fuit, ab Aurelianensi sub HORMISDA Papa anno 514. Matisconensi primo sub PELAGIO II. circa annum 588. Moguntino anno 858. In duobus Conciliis posterioribus jam fuerant excepta aliqua crimina, ne scilicet Ecclesiæ clementia abusu noceret. Demum hæc immunitas sacrorum locorum lenienter confirmata est ab Oecumenico Concilio Tridentino (d). Typum hujus immunitatis in synagoga jam invenimus, cui *sex urbes refugii* ipse DEUS designaverat, *ut fugeret ad eas, qui fuderit sanguinem.* (e)

Nolim equidem ex iis esse, qui ex asylo Judaico æquitatem hodierni asyli rectè probare contendunt; scio enim, quantum differant.

Im-

---

(a) C. Frater. 10. XVII. q. 4. (b) L. 2. Cod. de his, qui ad Eccles. (c) vid. Gothofred. Comment. ad Cod. Theodof. leg. 16. & 17. de pœu. leg. 3. de his, qui ad Eccles. confug. (d) Sess. 25. Cap. 20. (e) Numer. C. 35. v. 6.



Impune erat Judæis, propinqui sui necem nece homicidæ vindicare, id est, ut explicat CORNELIUS à LAPIDE, facti impunitatem in foro externo habebant; indulgendum enim aliquid erat impotentibus Judæorum animis, prurientibus in vindictam: ergo constituit DEUS has urbes refugii, ad quas, qui cædem talem admisissent, se reciperent, ut ibi laterent tuti, donec examinata causâ pateret, an deliberatè occiderint, vel casu fortuito, vel ad sui tutelam. Si hoc, remittebantur ad locum refugii, donec, Sacerdote magno mortuo, in libertatem liceret prodire: econtra occidebantur, si destinato consilio occidissent. Jam verò asylum Christianorum etiam his, qui destinato consilio occiderunt, patuit hætenus, saltem usque ad BENEDICTI XIII. Constitutionem. Ad hæc non sex solum urbibus unius regionis, sed cuilibet loco sacro cujuslibet urbis est indultum toto terrarum orbe: nec soli homicidio, sed etiam criminibus aliis non exceptis. Unde colligere licet, exemplo veteris legis stabiliri quidem aliquem asyli usum: non tamen hodiernum, multo benigniorem.

At quid prohibet, in lege Gratiae benignius agere? quid prohibet, Ecclesiis longè sacratioribus plus privilegii dare? Causa asylorum fuit, ait CORNELIUS à LAPIDE, reverentia templorum, & locorum sacrorum, atque ipsius DEI, dum enim domus DEI habentur Sacrosanctæ, celebratur ejus gloria, & majestas; secundò ejus misericordia, & benignitas commendatur. Hæc utique in lege nova multo magis valent, ac valuerant in antiqua. Sileo morem gentilium, qui similem securitatem locis suis sacris concedere fas, & decens esse existimabant, ut passim legere est. (a) Dum ergo præterea auctoritas Conciliorum, & antiquissimarum legum, tam Ecclesiasticarum, quàm civilium hodiernæ asyli formæ invictum superaddit robur, parum curandi sunt oggannientes, heri nati blaterones.

538. Ajunt quidem, bonum publicum exigere, ut puniantur scelera: asylum esse inventum Clericorum, quo sibi auctoritatem, & venerationem conciliant: abusum hunc à florentissimis regnis vel admissum nunquam fuisse, vel eliminatum. Ut triplex hoc accusationis caput refellam,

K k k

Scito

---

(a) vid. Div. *August.* l. 1. de civit. C. 34. *Pausan.* l. 1. in Attic. &c.

Scito primò, Bonum publicum exigere quidem, ut puniantur delicta : at non ut puniantur *omnia, & semper, & morte notentis*. Bonum publicum etiam exigit, reverentiam haberi locis sacris; *cùm summa sit ratio, qua pro Religione facis* (a), neque enim per privilegium asyli tam reis, quàm locis sacris, favere cupiunt Pontifices. Unde nuper Cathedra Canonica Ingolstadiensis sapientissimè hanc thesin concertationi proposuit : (b) *Ius asyli tanquam privilegium favorabile, exigit latam interpretationem, quatenus cedis in favorem Ecclesie. Ubi autem solummodo agitur de favore Reorum, experimur recentiores Pontifices dubia inter Doctores exorta, identidem resolvere in strictiorem partem.* Dein ne quis putet, duella lethalia per asyli gratiam abire omnino impunia, perpendat, rogo, quid potestati Judicis laici liceat contra reum in asylo constitutum. Abripi ad carceres, & ferale pegma non potest, fateor : at potest reus citari, non comparens spoliari bonis, quæ habet extra Ecclesiam, dignitatibus, & officiis exui, proscribi patria. Potest etiam proferri sententia mortis, inferendæ, quodcumque extra asylum deprehendatur. Ita docent Authores plurimi (c). De proferenda tamen mortis sententia dubito : neque velim consuetudinem, si alicubi viget, laudare. Nihilominus pænæ hæ tantæ sunt, ut fortè non majores statuerent multi Judices laici, si ipsi reum deprehendissent mox à commissa in duello cæde.

539. Scito secundò, Clericis, & Religiosis longè plus molestiæ, quàm commodi ex asyli gratia accedere. Militari custodia circumdantur eorum ædes : reum debent alere suis, vel Ecclesiæ sumptibus, si ex propriis alere se nequeat : in tricis molestas cum Ducibus militum incidunt, ut multa alia fileam. Unde nunquam audiivi gratulantes sibi, dum hospes ejusmodi sacras fores pulsavit. Tradere petentibus reum non possunt, nisi Excommunicationem reservatam velint incurrere. (a) De favore ergo Ecclesiarum agitur, non Clericorum. Id tamen notari velim, si Clericis molestiæ inferantur, ad custodiam Rei non necessariæ, aut immoderatæ,

non

(a) L. 43. ff. de Relig. & sumpt. (b) Ord. 29. in Præcognit. Jur. Can. P. Xav. Zech.  
(c) Apud Delbene de Immunit. Cap. 16. dubit. 31. n. 11.

non minùs violari immunitatem Ecclesiæ, ac si inferantur confugienti ad Ecclesiam.

540. Scito tertio, si alicubi terrarum ex spe hujus immunitatis nimum invalesceret duellorum licentia, licebit Principi, aut senatui curare, ut vel restringatur, vel, si necesse sit, tollatur asyli favor, uti factum in Gallia novimus; Immunitas enim localis neque est juris naturalis, neque divini, uti major pars Authorum tenet. (b) Equidem ex utroque jure reverentia quædani locis sacris debetur: modum tamen venerationis definire situm est in potestate Ecclesiæ. Unde non video, cur non consuetudine, si hæc sit introducta, ut debet (c) asyli favor restringi, vel tolli possit, saltem si introducta sit post Tridentinum, & Constitutionem GREGORII XIV.; hæc quippe videtur abrogare omnes præcedentes consuetudines (d). Securius autem modus ponendi limites asylo, seu potius hujus abufui, si fortè alicubi necesse sit, est, ut Magistratus, communicatis cum Episcopo consiliis, agat de acceptanda Bulla BENEDICTI XIII. hac acceptata monomachus, si cædem patraverit, asylo non gaudebit. Vel recurri potest ad summum Pontificem, cui *visum est*, ut habent verba BENEDICTI XIV., privationem asyli, à Prædecessoribus statutam, *ad alias quoque Regiones, quarum supremi Principes id postulassent, opportunè ampliari posse.* Quodsi duellum, etiam non secuta cæde, sub pœna capitis, vel alia gravissima, lege civili esset prohibitum, & invalescenti temeritati frænum oporteret injicere, monendus, & rogandus esset ipsemet summus Pontifex, ut pro paterna sua vigilantia hoc effugium clauderet monomachis, vel tollendo id refugium ex toto in ea provincia, vel restringendo ad loca pauciora, vel alio, quo visum fuerit modo; Episcopus enim, quamvis potestatem habeat Bullam in Concilio Provinciali Romano editam adoptandi pro sua quoque Diœcesi: non potest tamen sponte sua aliud dictum ab asylo excludere, quod in ea Bulla exclusum non fuerit.

His omnibus probè notatis, perspicuum est, quod de nostro Asylo justa querela locum non habeat.

K k k 2.

CAPUT

(a) Extrav. 3. de Pernit. int. com. (b) apud *Delbene* l. c. dubit. 2. (c) in Cap. fin. de consuet. (d) *Delbene* l. cit. dubit. 6. 7.

## CAPUT X. DE DUELLO INNOXIO.

**C**Apud ultimum superest, & brevissimum. De rariore duelli genere agit, &, si non innocuo, saltem minùs noxio. *Innoxium* ergo dum dicimus, *minùs noxium* intelligimus; non enim ita sanguinarium est, ut ad necem usque grassari velit. Frænare iram potest vel pactione, qua pugnam certis legibus *restringat*: vel mera *fictione*, qua seriò agere solùm simulet: vel etiam *abrumpendo* calentem pugnam, dum necdum lethale quid accidit. De his aget *Articulus primus*. Tum *altero Articulo* explicabimus aliud duellum, quod scientia Equestris Italica videtur habuisse pro innoxio.

### ARTICULUS I.

#### *Explicatur Duellum triplici modo innoxium.*

**S**Ecernere, & declarare dubia oportet, de quibus confusè, & sparsim hinc inde variorum libri agunt. Itaque §. *primo* proponemus duellum innoxium, *ex restricto modo pugnandi*. *Secundo* innoxium *ex fictione*. *Tertio* innoxium *ex abruptione pugna*.

#### §. I.

#### Duellum innoxium ex restricto modo pugnandi.

- |   |   |
|---|---|
| <p>§41. <i>Explicatur varius restringendi modus.</i></p> <p>§42. <i>Qui non exusat in Civitate bene ordinata.</i></p> <p>§43. <i>In Civitate male ordinata est duellum restrictum licitum, quando non restrictum licitum est.</i></p> | <p>§44. <i>Et prohibitum, quando alterum est prohibitum.</i></p> <p>§45. <i>Id quod etiam probatur ex Jurisconsultis.</i></p> <p>§46. <i>Et occurritur objecto dubio.</i></p> |
|---|---|

§41. **R**estringi pugnandi modus potest primò, si pactio ineatur à provocante, & provocato de dirimendo certamine, quamprimum alteruter vulneratus fuerit, aut sanguine manaverit: vel secundò quamprimum

num certus ictuum numerus utrique fuerit vibratus, aut globorum numerus explosus : vel tertio si spondeant mutuo se curaturos, ut vulnus non nisi leve detur. Si jam moveatur quaestio, quid sit sentiendum de ejusmodi duellis, restrictis ex modo pugnandi per pactum statuto, distinguendum esse arbitror juxta statum Civitatis, in qua committuntur, an scilicet in statu *Civitatis bene ordinata*, ubi Magistratus, vel Princeps, laciones honoris judicare, & laesos à damno servare vult, & potest : vel num in statu *Civitatis male ordinata*, ubi tale praesidium in Magistratu, & Principe invenire non est, de quo statu gemino utrique sat multa haecenus diximus.

Dico primò : In statu Civitatis *bene ordinata* ejusmodi duella illicita sunt. Ratio prima est; quia damnata sunt in Constitutione CLEMENTIS VIII. (a) dicentis : *iisdem panis, decreto, & constitutionibus teneri eos, inter quos pactiones inita sunt de dirimendo certamine, cum primum alteruter vulneratus fuerit, seu sanguinem fuderit, aut certus ictuum numerus utrique illatus fuerit.* Ratio secunda reprobans etiam tertium casum, quo promittunt se curaturos, ut non nisi leve detur vulnus, petenda est ex §o sequente; nam argumentum, quo ibi impugnatur duellum innoxium ex fictione, etiam huc quadrat. Ratio tertia occurrit in conclusione proxima, qua probamus, ea duella etiam in ipso statu Civitatis male ordinatae esse ut plurimum illicita. vide n. 544. Nec dubito, quin haec duella Excommunicationi subiaceant, primus enim & secundus casus *clare* exprimuntur à Pontifice : tertius quamvis non ita expressus sit, verè tamen duelli, & quidem illiciti rationem habet.

543. Dico secundò : Quando in Civitate *male ordinata* sub certis *circumstantiis* licitum est duellum ex toto serium, nullo pacto restrictum, e.g. dum agitur de servando non tantum honore, sed etiam necessaria sustentatione ( *vid. Cap. IV. & V.* ) tunc etiam licitum est duellum restrictum modo triplici recensito. Ratio clara; quia dum licet majus, licet etiam minus.

At de eo dubitari potest, an non duellum ita restrictum possit esse licitum, quamvis in iisdem circumstantiis duellum, hac restrictione

K k k 3

carens

carens, esset prohibitum; cùm enim sit minus, non semper erit prohibitum, quando prohibitum est majus. Nihilominus

544. Dico tertid : Quandocunque prohibitum est duellum ex toto serium, nullo pacto restrictum, etiam prohibitum est duellum dictis tribus modis restrictum; nam primò si pactio præmittitur de certamine dirimendo, *quæprimum alteruter vulneratus fuerit, seu sanguinem effuderit*, fateor, equidem hæc pugnandi ratio ita crudelis non est, ac alia, sine limite, ac ulla moderatione grassans in vitam hominis, aut nolens desistere, donec unus pugilum prostratus herbam mordeat : satis tamen infestum est pretiosæ vitæ, & membrorum integritati; quia utique res incerta est, an non primum vulnus lethale, aut an non saltem admodum nocivum nobilioribus partibus, aut uni sensuum sit futurum. Pugiles certè feriant, ut possunt, &, qua data porta, irruunt in adversum corpus, malentes prævenire, quàm præveniri.

Secundò: etiam ea pactio, ut cesset pugna *post certum ictum, aut globorum numerum*, etsi quandoque vitam servare possit, huc tamen nihil facit, quia jam primi ictus, globisque possunt esse fatales, vel valde noxii, ut mox pluribus dicemus.

Tertio : Inane etiam pactum est, *de non dando alio vulnere, quàm levi*; difficillimum quippe est, in medio pugnæ discernere, num rima, quæ patet, ad nobiliores corporis partes gladium ductura sit, vel minus nobiles. Quis aded dexterè jaculari norit, ut securus sit, se, currente etiam equo, non aberraturum aliquot transversis digitis? audivi ex non uno in hac palæstra versato, id pro certo spondere neminem posse, utinam exercitatissimum. Fors alter excutiendo gladium meum minùs dexterè, hunc ipsum ed diriger, quò ego non destinaveram. Multo minùs securitatem dabunt glandes plumbeæ, non solùm dependentes à mea destinatione, sed etiam ab altèrius motu. Ad hæc, quis, dum pugna caler, temperabit sibi facilè, ut aditu opportuno, ad corpus adversum fortè detecto, abstineat?

545. Certè Jurisperiti propositum abstinendi in pugna à lethali vulnere aded inane esse judicant, ut, si cædes sequatur, homicidam pœnâ ordi-

nariâ

nariâ efficiendum esse censeant, velut acsi nihil excepiisset, seu reservasset, quorum sententiam, ait CARPZOVIVS (a), juri ac veritati consentaneam esse arbitror, eo quod percussus gladio, animo solum vulnerandi, æquè in dolo est; & quis scit, vel saltem scire debeat, certo, & destinato modo vulnus, præsertim gladio, vel simili instrumento, ad homicidium perpetrandum apto, dari non posse. Id ipsum variis testimoniis, & rationibus confirmat ulterius.

Denique etiam vulnus non lethale datum, e. g. in gutture, aut oculo, aut digitis, aut naribus, quoties non integritatem corporis lædit cum gravissimo incommodo? obligamur autem gravissimè non solum vitam, sed & usum membrorum integrum servare: ergo ejusmodi duello periculoso exponere illicitum est, quoties illicitum est exponere duello ex toto serio, & nulla pactione restricto.

546. Cùm autem restrictum minis malum sit, quàm aliud non restrictum, dubitari potest, an non pro minore damno avertendo uti restricto liceat, eo quod pro majore damno, e. g. jactura sustentationis necessariæ liceat adhibere id, quod non restrictum est? Resp. Cùm, spectando periculum, inter utrumque hoc duelli genus modica sit differentia, sed differentia potissimum se teneat in sola voluntate, non videtur etiam ratione damni faciendum esse notabile discrimen.

## §. II.

## Duellum innoxium ex fictione.

547. *Casus primus de duello ficto.*  
 548. *Damnaturs in statu Civitatis bene ordinata.*  
 549. *In statu Civitatis male ordinata admittitur, si agatur de vitando gravi damno.*

550. *Quod non necessario debet esse ita grave, ac in duello serio.*  
 551. *Duellum fictum illicitum Excommunicationi non subiacet.*  
 552. *Casus alter, ubi gladius tantum evaginatur ob inaequalitatem personarum, damnaturs.*

547. **G**Emino casu explicabimus, quæ ad rem præsentem pertinent. Casus primus ita habet: Conradus vir nobilis, in dignitate civili constitutus, ab alio ejusdem conditionis in frequenti cœtu æqualium vile

vile convivium nult, quod fuerat concocturus sine ultione, nisi conjux, mulier impotens ac imperiosa, virum excitasset ad vindicandi modum, nobili, ut aiebat, dignum animo. Itaque vel invitus Conradus statuere conviciatori horam, & locum duelli debuit. Cum tamen uterque pacem præ bello coleret, urbis Gubernatorem curarunt per subornatum quemquam moneri de re tota. Qui suis partibus ut non deesset, excubiis ad urbis portas vigilantibus in mandatis dedit, hos duos, cum datâ horâ exirent, reducere ad custodiam quemque domesticam. Ita hæc provocatio fuit innoxia ex fictione. Quodsi Gubernator neglexisset eum obicem ponere, illi ulterius progressi gladios quidem strinxissent: at ea tantum lege, ut inani strepitu contenti ærem verberarent, non corpora peterent in præsentia patrinorum fidorum & amantium pacis. Quæritur, num licitum fuisset hoc duellum, vel illa provocatio ficta?

548. Dico primò: In statu *Civitatis bene ordinata*, ejusmodi duella, & quod sequitur, etiam provocatio ad illa, conscientia repugnant. Ratio generalis est; quia privata autoritate, neglecta publica potestate, jus sibi met dicere injuriosum est Magistratibus, Reipublicæ noxium, ut pluribus ostensum est *Cap. II. Art. V. VI.* Et quamvis pugna omnino ficta sit: nihilominus peccant pugnantes pravo exemplo; quærunt enim fidem facere aliis, quasi seriò dimicassent. (quid enim fictio nota prodest ad servandum honorem?) ergo persuadere aliis conantur, sibi viluisse leges humanas, Divinâsque, duellum seriò prohibentes: quod, quàm periculosum sit in materia honoris, & quot turbaram causa, consideranti facillè patet. vid. MENDO. (a)

Aliam rationem addit P. SCHMALZGRUEBER (b) his verbis: Finis adæquatus legum, præcipuè Ecclesiasticarum non tantum est, impedire cædes: sed etiam *tollere usum detestabilem duellorum*: ut patet ex Bullis Pontificum, ac decreto Tridentini. Finis autem hic non obtineretur, si liceant duella ejusmodi ficta, quæ respectu omnium (si amicos excipias) habent speciem veri duelli, adeoque veris duellis auctoritatem

CON-

(a) l. 3. Jur. acad. q. 29. append. de duell. §. 4. (b) tit. de cleric. pugn. n. 30.



conciliant, eorūque usum exemplo roborant, atque ad imitationem invitant : ergo etiam hæc per leges Ecclesiasticas sunt prohibita. Quia addo, etiam per divinas, & naturales; utpote vetantes, ne veris duellis autoritas concilietur, eorūque usus pravo exemplo roboretur. Et hæc de statu Civitatis bene ordinatæ dicta sunt. Magis dubium est,

549. An in statu Civitatis malè ordinatæ, ubi nemo iudex læso hoc in causarum genere succurrit, duellum hoc fictum conscientiæ repugnet? Videtur, quòd non; nam primò nihil affert periculi, saltem propinqui. Secundò rationes contrà allatæ in statu Civitatis bene ordinatæ, vim non habent in statu Civitatis malè ordinatæ; privata enim autoritate ab honoris dispendio, vel aliis adhuc connexis damnis se liberare fas est, ubi liberandi ratio est innoxia, & frustra imploratur Magistratus. Neque hoc faciens pravo exemplo nocet; Magistratus, suo non fungens officio, est, qui nocet. Id equidem verum est, finis adæquatus legis Ecclesiasticæ, qui est, non solùm cædes, sed etiam usum duellorum impedire, nonnihil detrimenti pateretur ex ficta hac velitatione: at hoc tanti non esse videtur in casu singulari, ut sub culpa gravi obliget honoris damnum, aliæque connexæ fortè incommoda perpeti potius, quàm illud qualecunque detrimentum fini legis Ecclesiasticæ afferre; tunc impediretur finis legis, si ex obvia quavis causâ ad pugnam simulatam liceret avolare. Dein habet Ecclesiasticus legislator, cur potius de conniventia potestatis profanæ conqueratur, quæ si in foro suo judicaret injurias, privata autoritas deberet cedere.

His perpensis judico, *frivole aut levi de causâ* fictum duellum inire nefas esse etiam in statu Civitatis malè ordinatæ. Ratio est; quia semper aliquid pravi exempli inde oritur, diffundendum in plures non sine Reipublicæ aliquo incommodo; & quamvis potior culpæ pars in negligentem judicem recidat, nihilominus sine gravi causâ etiam minorem culpæ partem in se talis homo suscipit. Quòd si tamen quis iniquè, & graviter læsus (quòd non refertur exprobratio imperiosæ cujusdam mulieris) nulla succurrente potestate publica, honoris, ac fortunarum grande dispendium ficto hoc duello avertere sciret, securâ conscientia, meo quidem iudicio, id tentaret. Ratio est; quia duellum serium succurrentibus his adjunctis, fas est inire, ut satis probatum est *Cap. P.* ergo multo magis fictum.

550. Quæres autem primò, an non *minus damnum* sufficiat ad licentiam duelli ficti, quàm sufficere dixerimus ( *Cap. VI.* ) ad duellum *serium*? e.g. an, dum quis societate honoratorum excluditur: vel dum sola dignitas, remanente tamen sustentatione necessaria, foret amittenda: vel ubi tantum pars sustentationis in discrimen adducitur: vel ubi spes, aut jus ad pingue munus evertitur, an non tunc, inquam, saltem simulato duello locus sit, si per hoc averti talia damna valeant? Item quæres, an non sufficiat ad provocandum læsio materialis, sive animo prorsus inconsiderato mihi facta, grave tamen post se tractura damnum, si duello non vindicetur: an non læsio illata mihi semiplena cum attentione? an non læsio illata per revelationem criminis veri? vel an provocato ad comparandum non sufficiat solum grave damnum, quod esset passurus, quamvis considerato alterum læserit? Singula hæc membra examinavimus *Cap. VI.* singulorum loca faciliè ex Conspectu operis invenies. Resp. Ex ratione naturali utique colligi, minus damnum, & minorem læsionem sufficere duello ficto, non suffecturum duello verò; cum ex hoc ficto nemini quidquam mali oriatur. *Scandalum* sive pravum exemplum si abesset, non dubitarem asserere in statu Civitatis malè ordinatæ post apertè denegatam justitiam licitum esse duellum fictum, etiam in propositis casibus, pro quibus duellum *serium* difficulter admitteretur: at cum pravi exempli etiam in hoc statu sit habenda ratio, hoc *scandalum* erit ponendum in una lance: damnum, quod non inito duello esset ferendum, in altera, & sic prudentium judicio aestimare oportebit, quid præponderet.

Oppones fortè, & dices: pravum exemplum redundat in publicum: damnum econtra hominis singularis est; præcavendum autem esse damnum publicum præ singulari: ergo semper præponderabit ratio pravi exempli, nec instituenda comparatio habebit locum. Item pravum hoc exemplum viam pandit, & inducit ad duella *seria* eo ipso, quod ficta credantur esse *seria*, & cernantur committi à viris cæterà probis: ergo requiritur tam magnum damnum, & læsio tam magna, quanta ad duellum *serium*. Resp. Nec inesse tantum ponderis huc pravo exemplo, nec totum, quod inest, premere moriachum; nam rarissima sunt duella ficta, præsertim inter viros militares: patrini id non ferrent: vel ri-

mendum semper esset, ne quis eorum cum tempore fictionem proderet. Uti possunt hoc duelli genere fere si Nobiles, quibus civilia sectantibus non est animus ad digladiandum: familiam alunt, pacem colunt, nec usum armorum habent; unde ad simulatam hanc velitationem non nisi inviti extrema in necessitate trahuntur: paternos sibi pacificos eligunt, & probatæ fidei, non adlituros, si res seriò ageretur; hinc rara sunt ejusmodi duella ficta. Non est ergo quodd. grandem morum stragem timeamus; præsertim ubi constat, ad amoliendum non leve damnum, vel incommodum tale quid suscipi, & quidem malo medelam non ferente Magistratu; aliud foret, si, obvia quavis ex causa ad talem pugnam liceret avolare. Accedit, quod pars potissima hujus mali exempli in Magistratum, frustra imploratum, recidat.

Unde concluditur, in statu Civitatis malè ordinatæ, dum adsunt conditiones requisitæ, posse quædamquæ duellum simulatum esse licitum, & quidem facilius, quàm scilicet; in statu autem civitatis bene ordinatæ esse prohibitum. Jam

551. Quæres secundò: an in duellum fictum illicitum sit Jura Excommunicatio cum aliis poenis Ecclesiasticis, quas Cap. VIII. in duellum seriem latas vidimus? Dixi: *in duellum fictum illicitum*; nam licitum quando est, poena Ecclesiastica locum non habet, ut dictum n. 271. Resp. Probabilius non esse latam. Ratio est; quia duellum simulatum non est *duellum*, sed mera fictio duelli, *deest nempe animus vulnerandi, vel occidendi*; qui à definitione duelli abesse non potest. *vid. n. 271.* Tunc ipsa quidem fictione peccatur: sed non peccato *duelli*; hoc peccatum alterius speciei erit, quam desumes ex rationibus n. 548., quibus probavimus esse illicitum.

Contrà dices primò: In Clementina §. IX. etiam puniuntur duella cum pactionibus inita, per quas cavetur, ne fatalia sint. Resp. Ibi de pactione nostra nihil dicitur: sed de pactione distimendi certamen, quamprimum alteruter vulneratus fuerit, aut certus istum numerus illatus.

Dices secundò: Legum Ecclesiasticarum finis est, non tantum vulnèra, & necesse impedire, sed ipsum tollere duellorum usum, ut clare patet

ex Tridentino: ergo etiam duellum fictum punitur pœnis Ecclesiasticis, si hunc usum foveat: atqui fovet, ut ex ipso nostro argumento secundo *num.* 549. patet: ergo &c. Resp. Negando consequentiam enthymematis; etsi enim duellum quoque fictum illi fini aliquid detrimenti afferat, non sequitur, quod pœna per legem dictata hoc quoque duellum afficiat. Extensio ab uno *serio* ad alterum *fictum* non facili debet fieri, præsertim in *odiosis*, quod utique pertinent leges *pœnales*. Finis autem, seu *ratio legis non est ipsa lex*; ut habet commune effatum. Et quamvis illud quoque valeat: *ubi est eadem ratio, ibi est eadem juris dispositio*: excipiuntur tamen leges pœnales, ubi etiam propter *identitatem*, vel etiam *majoritatem* rationis non est facienda extensio, ut docent passim juris Ecclesiastici Interpretes in *Tit. de Constitut.*

Nolim huc afferre opiniones varias Authorum, quorum aliqui non distinguunt inter statum Civitatis bene & malè ordinatæ; aliqui non satis declarant, an ejusmodi fictionem ab Excommunicatione tantum, vel etiam à peccato absolutam velint: alii qui quoad rem mecum sentiunt, argumenta adhibent, quæ mea facere nolim. Videri potest PIGNATELLUS (a), SCHMALZGRUBER (b), SPORER (c), LA CROIX (d).

§52. Casus II. Hic quandoque accidit, ubi inter duos prorsus in dignitate inæquales evaginato solum gladio datur satisfactio. Sic in exercitu quodam primorum Ducum quispiam ignominioso nomine compellaverat inferioris notæ virum, qui à calamis erat tabulario militari, characterem tamen Sub-anturionis gaudebat. Hic, læsum in honore se credens, dum satisfieri à Duce sibi petit, vix non cum risu rejicitur. At, re delata ad Senatum militarem aulicum, rescribitur, ut strictum opponendo gladium Dux læso satisfaciatur: quo honore etiam hic, ut debebat, contentus, evaginato suo quoque gladio Ducem venerabundus salutavit in præsentia complurium.

Quæritur primò: An licitum fuisset Duci dare ejusmodi satisfactionem sponte sua, etsi mandatum non accepisset, nec accepturum se credidisset ex Curia?

Quæ-

---

(a) Tom. 9. Consult. 88. n. 92. (b) Ad tit. de Cleric. pugm (c) Theol. Mor. Tract. V. in §. præcept. (d) L. 3. p. 1. n. 840.

Queritur secundò: An hoc mandatum potuerit dare Senatus bellicus sine peccato, & pœna Excommunicationis?

Queritur tertio: An mandato huic morem gerere sine peccato potuerit Dux?

Queritur quarto: An imperatam hanc satisfactionem potuerit acceptare læsus?

Resp. ad primum: Non futurum fuisse licitum, quia res est pessimi exempli, si in primo ordine constitutus Dux publicè declaret ipso facto suo, se quoque esse ejus sententiæ, imò velut regulam agnoscere, viro militari imminutum honorem resarciri debere non via juris, sed armis. Et quid aliud fuisset professus Dux, quàm serium duellum in hoc casu convenire, sèque non recusaturum fore, nisi inæqualitas conditionis aliud præscriberet. Non posset majus firmamentum, & robur pseudo-legi illi accedere, quàm dum ei se subjiciunt illi, quibus ex officio incumbit hæc ab exercitu insaniam proscribere.

Sed dices contrà: Sic miser Subcenturio, si Dux recusasset stringere gladium, nec similis sententia aliunde sperari potuisset, contemptui publico fuisset expositus: & quid misero superfuisset, nisi statione sua excedere, & incertam alibi terrarum fortunam sectari? digna utique hæc calamitas videri poterat Duci strenuo, cui oblato ad speciem gladio mederetur, ferme ut de paradoxo illo actu charitatis dicebamus n. 350. Resp. Prævum exemplum toti exercitui dandum tanti momenti esse, ut ei postponi ex æquo deberet calamitas privati hominis, etsi hæc alia ratione averti non posset. Potest autem, si Subcenturioni, statione sua excedenti, Dux opem ferat, vel per commendatitias ad obtinendum munus civile, vel de suo ære proprio alimenta procuret. In illo casu paradoxo Themistocles nihil debebat Epaminondæ, utpote à se non offenso. Etiam pravitæ exempli jam aliunde manaverat, tum à legione rejiciente hominem, convictum mendacii: tum à Principe, reluctantes non compescente.

Resp. ad secundum: Ea me veneratione ferri in Magistratus, ut, dum eos absolvere non possum, condemnare verear. Decisionem Lector erigere poterit ex principiis datis *Cap. IX. Art. IV.*

Resp. ad tertium: Si mali nihil continuit mandatum Senatûs, morem gerere potuit. At si id mandatum jussit mali quid, & præterea Dux non parendo grave sibi malum accivisset, decisio quaerenda est ex illis principiis, quibus obediendi obligatio in subdito definitur, quæ cum ad materiam de duello non spectent, amplius illis immorari nolum.

Resp. ad quartum: Potuit acceptare; quia etiam ad duellum ferium potuisset progredi, si secus unâ cum honore sustentationem necessariam debuisset amittere, juxta doctrinam *Cap. IV. V. VI.* stabilitam.

### §. III.

#### Duellum innoxium ex abruptione.

§ 53. *Ad Casum propositum resolvendum* § 55. *Et transferuntur ad hoc bellum*  
 § 54. *Attendantur principia ex bello pu-* *privatum.*  
*blico,*

553. **C**onferuerat jam manus Themistocles cum Sophocle, quem provocaverat. In pugnae ardore, post libratos aliquoties ultro citroque ictus, satisfactum sibi esse pronuntiat Themistocles. At non mihi, respondit Sophocles, expecta sis, faxo, ut me non provocés posthac: sed mox intercedunt patrini, pugnautes separant, indicta utrinque pace.

Q. primò: An abrumpere debuerit pugnam Sophocles, petente Themistocle?

Q. secundò: Si Sophocles prior petiisset finem, an Themistocles quoque, & quando obligatus fuisset desistere?

§ 54. Quæsitum I. decidere juvat ex principiis, de bello publico receptis. Refert SCHIARA (a), CAJETANUM, & BANNEZ existimasse, cœpto semel bello, non obligari eum desistere, cui pars adversa tunc primam satisfactionem offert, quam debebat offerre ante; ferme sicut judici integrum est prosequi ceptum semel judicium, seu procedere contra reum, etsi

(a) Theol. Bell. l. 1. Diffic. 10. n. 5.

erit hic, jam facti poenitens, laeso satisfacturum se spondeat. Rationem dant; quia scilicet non dens satisfactionem ante bellum semet constituat extra statum satisfaciendi, & ponit in statu executionis justitiæ vindictivæ, quam perficere jam fas est alteri, nisi fortè, ut DRIEDO addit (a), pro loci, temporis, personarum, aliarumque circumstantiarum conditione lex charitatis suggerat; oportere à bello inchoato desistere.

At verior, & communior sententia docet, pacem, & satisfactionem, quocunque offeratur tempore ab hoste, esse acceptandam, si modò per illam securitati publicæ, non præsentì solùm, sed & futuræ satis prospiciatur. Id quod fit per cautiones exigì solitas, ait BÖHMER (b), quas *Guarantias* vocant; quæ si oblatae, & tales fuerint, ut nulla ex causa respui possint, bellum nihilominus prosequi volens injustè agit, & aggredi censetur. Ita VITRIARIUS ad GROTIUM (c). Idem censet SCHMIE (d): SCHIARA adducens complures, & inter hos MOLINAM (e). Exemplum adversariorum, mutuatum à judice, eis non faver, ait SCHMIE, liquidem etiam in civilibus judex nequit ultra contra reum procedere, quando hic post litem jam motam ad satisfactionem se obligat, cessante tunc fine, cujus gratia judicium susceptum erat. Itaque & Princeps bellum continuare nequit contra hostem, dum hic post intervallum satisfacere seridè desiderat, belli fine, id est, reparatione injuriæ, jamjam adimpleto. Quod tardius satisfacere volens extra statum satisfaciendi se posuerit, negat MOLINA; nam ab eo temporis momento cessat injuria, quo offertur satisfactio: pro injuria autem præterita exigere nihil potest Princeps, & hoc intelligendum esse ait tam de bello, quàm de *actuali* conflictu, si revera possibile esset, durante conflictu, debitam satisfactionem offerre. Addit tamen, cum vix talis satisfactio post bellum jam commissum præstari valeat, qualis de rigore justitiæ potest exigì, qua scilicet resarciantur damna illata, persolvantur belli impensæ, nec non valor periculorum, laboris & industriæ &c. Hinc bella gerentem ex rigore justitiæ non obligari statim abstinere ab armis: lege verò charitatis, non plus teneri quàm ex DRIEDONIS sententia dictum.

Abel-

(a) Apud *Molin.* tom. 1. tr. 2. disp. 103. n. 23. (b) *Introd. ad J. P. H. I.* 2. c. 1. §. 11. (c) *L. 2. c. 1. quæst. ult.* (d) *Jur. Univ. I.* 4. c. 1. n. 121. (e) *Tom. 1. tract. 2. disp. 103. n. ult.*

555. A bello publico ad privatum si applicemus doctrinam, appareret, in hoc æquè, atque in illo esse desistendum, quamprimum data est satisfactio, id est, quamprimum Themistocles, quem fingimus iniquè læsum à Sophocle, & non nisi gravissima necessitate adactum provocasse, profiteretur se non habere ultra, quod exigat. Cessat tunc ratio, cur Sophocles pergat tam suam, quam antagonistæ vitam prodigè periculo exponere.

At, quid si Sophocles scirer, nullà fere datà causâ se frivolt fuisse provocatum ad pugnam, non recusandam sine gravissimo damno, an non tunc meritiò persequeretur aliquantum pugnam, præsertim cum spe perstringendi vulnere non lethali Themistoclem, in modum scilicet castigationis promeritæ, ne tam facilè posthac redeat? jus castigandi frivolt offendentem competit homini etiam privato in statu naturali (*vid. n. 179.*) cui statum Civitatis malè ordinatæ æquivalere diximus. Favet, quod complures apud MOLINAM docent, (a) durante conflictu non obligari quemquam posse, ut desistat, quamprimum offertur satisfactio.

Resp. leve vulnus facilè posse esse fatale, vel saltem graviter noxium membrorum integritati, ut explicatum N. 542. difficile certè est modum tenere in calore pugne: nec minùs difficile, non nisi ex amore justitiæ absque odio agere. Quod illi Authores apud MOLINAM docent, refutatur ab ipso MOLINA. Videntur etiam loqui ex persuasione prorsus solida, si de conflictu belli publici sermo sit, quòd nempe eo durante vix possibile sit satisfactionem debitam offerre una cum securitate de eadem præstanda. In casu nostro belli privati res aliter se habet.

Quæsitio II. satisficit paucis. Si nempe est iniqua causa Themistoclis, tunc sicut incipere nunquam licet, sic finire debet momentis singulis. Si æqua fuit, tunc desistere debet, quamprimum in salvo est honor suus, & connexa cum eo bona fortunæ, id quod fideles patrini judicabunt.

ARTI.

---

(a) Loc. cit.



## ARTICULUS II.

*Explicatur aliud Duellum, quod scientia Equestris Italica pro innoxio venditavit.*

CUM sæpius per decursum operis mentionem fecerim libri illius præstantis, quem Author Illustrissimus Marchio MAFFEIUS, ab eruditione sua satis orbi litterato notus, inscripsit *scientiam Equestram*, (a) occasio jam se offert ex instituto de hac scientia tractandi. De Duello *innoxio* agimus hoc Capite: ad duellum *innoxium* etiam hanc scientiam revocare volebant aliqui, inter quos præcipuè numerandus venit Comes BELLINCINI, qui Marchionem ita interpretari voluit, & explicare, ac si is solum scientiæ abusum, non usum improbasset; utpote qui *innoxius* esset, culpæque liber. Mancam ego crederem tractationem meam, si hanc *scientiam Equestram*, in Italia præcipuè celebratam, tot authorum libris explicatam, silentiò præterirem. Primò itaque hujus scientiæ ortum & placita exponam. Tum referam, quomodo illam damnet MAFFEIUS: demum quomodo ut *innoxiam* studeat proponere Comes BELLINCINI (b).

## §. I.

Scientiæ Equestris ortus, & placita.

556. Ortus. 557. Placita.

556. SUB finem sæculi XV. initium datum est scribendis hac de re voluminibus bene amplis, continuato labore per sæcula sequentia ad nostra usque tempora, ait MAFFEIUS (c). Ultra quinquaginta Auctores  
Mmm ejus-

(a) Scienza Cavalleresca. (b) Giunte all'opera intitolata della Scienz. Cavalier.  
(c) L. 2. c. 4.

ejusmodi numerantur, quorum primi erant Legum periti, cæteri Nobiles, aliive Philosophiam moralem professi, qui scientiam hanc pertexuere multa subtilitate, inani speculatione, ridicula propè frivolarum quaestionum ventilatione. Artem, qua viri equestres læsum honorem defenderent, suasque tricas componerent, quin necesse haberent implorare competentem judicem, *scientiam* dixere *Equestrem*, seu scientiam *honoris*, & duelli (a). An ei in sensu rigido nomen *scientia* conveniat, ipse Comes BELLINCINI dubitat. Id satis patet, qualemcunque hanc scientiam, ubi mitiorem exitum causæ non invenit, plerumque terminari in duello : sed non incundo, nisi postquam ad illius regulas & discussa injuria fuerit, & exceptiones oppositæ, & statutum, quis actor, quis reus, factaque electio armorum, & plurima alia capita absoluta ab electis ex Nobilitate arbitris.

§57. Mirum, quos apices & scrupulos acuta Italorum ingenia in hac arte ad omnem acribiam examinârint. Disputatum fuit de mutanda querela, de augenda, stabilienda, relinquenda : de exceptionibus dilatoriis, peremptoriis : discussum, quis victor dicendus foret, si ambo vitam perderent : quod fructum ex armis, in pugna si perdat, plus probri afferat : quodnam vocabulum honori plus vel minus detraheret. Tum de clausulis chartæ provocatoriæ actum : de genere & constitutione armorum. Sic primum de hac materia editum opus capita omnino ducenta complexum est. In statuenda definitione *honoris* Dialecticam totam exhaustere ; cum ultra viginti definitiones varias numerare sit. In ejus divisione jam duo genera honorum, jam tria, jam plura posuere. His *honor*, & *reputatio*, & *bonus conceptus* videbantur univoca : aliis æquivoca. Circa injurias ponderandas applicârunt categorias Dialecticas & Philosophorum prædicamenta. Pro dignoscendo actore & reo, etiam post datas varias regulas, annis quandoque opus erat, aded intricata sunt omnia. Nolim plura ejusmodi memorare. Quod scientificam hanc machinam duello erexerint Itali, dandum est eorum genio vivido, nec satis occupato, ait MAFFEIUS (b).

## §. II.

(a) *Peffect. Dial. I. apud Maff. l. 2. c. 4.* (b) *L. 2. c. 8.*

## §. II.

Damnatur à Marchione *Masseio*.558. *Quid Libro primo.*559. *Quid in reliquis libris doceat.*

558. **S**apienter prorsus Marchio *libro primo* demonstrat, ei scientiæ rationem neutiquam suffragari. Singula principia excutit, ut, quàm à sano judicio abludant, cuilibet ad oculum pateat. Falsa esse illorum scriptorum principia circa honorem, inde colligit, quòd dum honorem omnibus bonis anteponendum esse clamant, *honorem cum honesto* malè confundant, ut nos jam exposuimus n. 65. *nostri tractatus*. Secundò negat, per injuriam cuiquam demi honorem posse, si per honorem *bona existimatio* intelligatur; quis enim virum cæteroquin probum & egregium, mox condemnet ad infames fungos, quamprimum petulans lingua ejusmodi eum probro salutarerit? prudentiores certè indignabuntur protervo conviciatori, bene gnari, quantum regnet hodie maledicendi licentia. In hoc quidem contemptu negatus est honor ille, qui *testificatio excellentia austerius* appellatur: sed ab uno tantùm privato fuit negatus, qui ruinam afferre bonæ existimationi non valet, si ea vigere in aliorum judiciis pergat. At in his quoque deficiet, ajunt scriptores, si læsus silens ferat contemptum illum; sic enim passim judicabitur mereri injuriam, vel certè fortitudine carere.

Sed e contra ostendit Marchio, quòd vindicatio maculam non abstergat; namque, etiam qui verè rei sunt, ad exprobrationem criminis excandescunt, & vindictam spirant. Nemo Græcorum aut Romanorum, nemo Philosophorum & prudentum simile judicium tulisse auditus est. Negat quoque Marchio, quòd vindicatio sit signum fortitudinis, argumentis id stabilit, qualia ferme nos attulimus à n. 121. Tum ridet eos, qui in sola vindicatione injuriæ honorem reponunt, nec interim erubescunt alienis inhiare uxoribus, contrahere æs alienum, persequi injustas lites, lusu & otio vitam terere. Quærit etiam, quo privilegio Nobiles ac mi-

Mmm 2

lita-

litares viri exempti sint ab observatione legum, vindictam privatam prohibentium? Docent quidem ii scriptores, nobilem virum justitiæ & fortitudinis præ aliis debere esse studiosum: at, instat Marchio, nunquid primus actus justitiæ est, obedire Magistratui, & vi privata abstinere? Et quæ hæc justitia, si vir quisquam, vel dexteritate tractandi arma, vel viribus corporis, aliisque adminiculis ad felicem pugnam antagonistiæ suæ multum inferior, honorem tamen suum protervè læsum præsentissimo vitæ periculo redimere debeat? Sic *toto libro primo* exagitat Maffei principia illius scientiæ Equestris.

§59. *Libro secundo* demonstrat, nulla autoritate eam scientiam niti. *Tertio* demum nullam utilitatem, sed potiùs incommoda gravissima in rempublicam inferre ostendit. Donec tandem *Capite ultimo* æquiora principia substituatur, quibus si mores accommodarent homines, majore cum honore & tranquillitate essent vitam acturi. Ita docet MAFFEUS. Unde mirum non est, si calamum tam generis splendore nobilitatum, quàm copiosa eruditione tinctum debitis laudibus mactaverit orbis litteratus.

### §. III.

Scientia Equestris frustra dealbatur à Comite Bellincini.

§60. *Fucum allinit.*

§62. *Et refutatur.*

§61. *Apertius se prodit.*

§60. **P**ostquam Marchio MAFFEUS hanc machinam scientificam admodum labefactaverat, Comes BELLINCINI ruinam ejus miseratus, calamum strinxit, quo non quidem impeteret Marchionem: sed ejus doctissimum tractatum od detorqueret, ut eo videretur non tam usus scientiæ, quàm abusus fuisse improbatus. Huic usui itaque ut Comes patrocinaretur, dexterè incrustavit, ac dealbavit labem multiplicem, qua scodatus apparebat honoris Colossus.

Pro fundamento ponit, quodd vir nobilis virtutem justitiæ & fortitudinis sibi debeat habere quàm commendatissimam; nisi enim justus & stren-

strenuus sit, nunquam impleturum sui mensuram nominis, nec quadraturum defendendæ Religioni aut patriæ. Jam verò defendere honorem propulsatæ injuriæ, justitia & fortitudo imperant. Triplici autem modo, ait, obviari potest injuriæ. Primum: Si ex principiis Christianis committatur Deo. Et hæc grandis perfectio est, ad quam eluctari paucis ex Nobilitate est datum. *Habitus* inveteratus Christianæ mansuetudinis requiritur, ut quis impactam fortè contumeliam tacitus & quietus ferat. Quotusquisque autem est ex Nobilitate Italica, qui *habitus* ejusmodi possideat? Accedit, quoddam periculosa sit ista patientia; nam ad injuriam qui silet, videtur ipse credere, quoddammodo hæc sibi facta fuerit: sicut qui post laram contra se sententiam acquiescit, quin ad superius tribunal provocet, ipse videtur agnoscere sententiæ justitiam. Vel certe agit talis vir patiens (quantum quidem externo oculo metiri datur) quod aliud esset imbellis fungus acturus pro eo rerum articulo. Itaque vel ad judicem de contumelia deferenda querela est, vel alio *licito modo* erit propulsanda. Illud cum Nobilem non satis deceat, hoc ultimum servando honori remedium supererit, qui tamen *licitus modus* eo solum *sine* utique *honestissimo* adhibendus erit, ut pax queratur, & finis imponatur litigiis. Quæ cum ita sint, concludit Comes, patet, quoddam Scientia Equestris non tantum à vitio timiditatis removere hominem curret, sed etiam ab altero extremo, præcipiti scilicet ira, & deproperata vindicta; dum injuriam docet *placido modo* abstergere. En honestatis speciem, fucumque, quem duello allinit.

561. Apertius loquitur *Cap. VIII.* ubi, in eum fere sensum differt: Non in omni causa judicem declinare potest vir Equestris. Si vel ratione personæ, vel materiæ, vel loci contingat, ut privata fortitudine honorem vindicare nequeat, tunc primum justitiæ, quam sectari utique debet, præceptum est, seposita vindicta privata auctoritatem publicam implorare. Quodsi verò injuria facta sit inter *æquales*, & repelli possit intra *terminos naturalis defensionis*, à *legibus concessos*, tunc laudabile est propria auctoritate honorem vindicare; sic enim justos nos exhibebimus permanendo intra limites justæ defensionis, simulque strenuos, dum propriis viribus nos defendendo ab imbellibus discernimur. Quia magis expedit non uti rigore judicis; ne scilicet in ruborem detur,

Mmm 2

néve

nēve pēnæ subjiçiat̃ illatæ offēnsæ reus. Judicio itaque Nobilitatis offēsus se potiùs committat, sic æquitatem legum, omisso rigore, sectabitur. Obligare eum, ut semper ad judicem recurrat, idem esset, ac in dubium vocare amplissimū privilegium Equest̃is Ordinis, quod ei arbitrium in suorum litigiis competit. Quid? quodd̃ etiam injuria ejusmodi esse possit, cui abstergendæ tota auctoritas judicis non sufficiat; sit enim Vir Equest̃is læsus exprobratione timiditatis, sit vocatus imbellis fungus, judicis sententia, utur offendentem damnet, ac puniat, non demonstrabit, quodd̃ offēsus sit vir strenuus, nisi talem se ip̃sus probet defensione justa. Demum per judicium Nobilitatis sopiuntur brevi tempore molestæ tricæ, quibus tollendis per actionem injuriarum judex alius complures fortè annos frustra consumpsisset. Afferitur autem hæc licentia vindicandi virtute propria honorem soli Nobilitati; quia de hac existimandum, quodd̃ sui magis potens ab iræ excessu cavere sibi sciat. Demum commendat Comes iterum, iterumque, ut satisfactio exigatur ex solo impulsu virtutis, quin aliud, quàm justitiam respiciamus.

§62. Cautè hæc legenda, & dijudicanda sunt; videtur enim sub fuco latere, quod primo obrutu non satis apparet malum. Non ego improbo, si læsus in honore recurrat ad arbitrium Nobilium; amicè jurgium componere res est oppidò laudabilis. At si Nobiles hi arbitri conviciatorem ad petendam veniam, vel aliam satisfactionem condemnent, quam tamen ille averferur, quid consilii erit super? Quid si causa sit aded̃ intricata, ut facillè dispici nequeat, quis offēnsæ ansam dederit, ubi tunc exitus invenietur? nunquid ip̃sime Nobiles attractis humeris armato juri relinquent litigantes? Erĩ exp̃ressè hoc non fateatur Comes: negare tamen non audet, quin tacitè videtur concedere. Certè id scriptores, quorum Patro-num contra MASSEIUM videtur agere, id innuunt, & aperrè tuentur ut licitum. Tunc scilicet *laudabile erit propria auctoritate* injuriam vindicare, & ille *alius modus licitus* locum habebit? tunc cum *fortitudine & justitia* duellum inibitur? Privilegium componendi jurgia Nobilitati non abrogo, nec cujusvis alteri hominum conditioni: facient hoc etiam judice minimè invito: at ubi componi tricæ non possunt amicè, præ gladio potiores ille sibi

sibi partes arrogabit. Obsecro, cur iudicis officium implorare virum Nobilem dedecet tunc, quando ei cum Nobili res est? semper *primum justitia preceptum fuit seposita vindicta propria auctoritatem publicam implorare*. Agatur licet de abstergenda timiditatis nota fortè impacta ab ore maledico, valet & huic mœderi iudex, probationem exigit admittæ aliquando vecordix, secus calumniam puniturus. Nobilium autem arbitrorum sententia, consideratis scientiæ hujus aphorismis, plerumque eò propendebit, ut gladio exigatur, & præstetur satisfactio: id verò vitæ, neque arbitrium nullæ leges Nobilitati concedunt.

Itaque Nobilis contemptum contemptu heroico vindicet. Non ex Imbelli animo id proficisci judicabimus; quia *de Nobilitate credimus, quod sui magis potens ab ira excessu cavere sibi sciat*. Vel, si fortè timet, ne tacendo fateri videatur objectum probrum, provocet ad tribunal, ad quod tot edictis Principes invitant fideles subditos.

Cætera, quæ à Comite afferuntur, talia sunt, quibus vel non contradico: vel quæ à Marchione §o. *præcedente* convulsa vidimus: vel à nobis in decursu tractatus satis fuerunt enervata.

Habes hic amice Lector, quæ de DUELLO HONORIS VINDICE scribenda duxi. Ea de malefano hoc furore attulisse mihi videor, quæ Nobiles animos ad illum detestandum merito pertrahant. Quæ autem de licentia Duelli in *Civitate male ordinata* scripsi, eò solum tendunt, ut Magistratus excitentur ad arripienda media, Duello eliminando opportuna, quibus neglectis Furia hæc speciem necessariæ defensionis induet. Qui de conragione scribunt, animant ad comburendas merces, supellectilem, ipsasque ædes & naves infectas: dùmque ostendunt, grassante peste singulos non solum jus habere, sed etiam compelli posse ad ejusmodi stragem edendam; per hoc non intendunt promovere gravissima subditorum damna: sed potius excitant tam Magistratus, quàm subditos ad præcavendas has tristes pestiferæ luis consecutiones. Simili fere ratione nullum stimulum acuendæ Magistratuum severitati opportuniorem fore credebam, quàm si ob ocu-

los ponatur, gravissimæ cladis licentiâ suâ indulgentiâ in Rempublicam  
invehi. Faxit Deus, cujus *Honori* labor iste omnis consecratus est, ut *Verum*  
*Honorem*, cujus inanem umbram multi duello sectantur, opportunis  
viris Viri Nobiles & Militares ambiant, & efficacibus me-  
diis Principes tueantur.

## F I N I S.



---

INGOLSTADII, Typis Joannis Pauli Schleg, Electoralis Academici  
Typographi, Anno Domini 1751.



